



B X 1751

B 67

1839

t. 3

*Thos Sauley*

# INSTITUTIONES

## THEOLOGICÆ

AD USUM SEMINARIORUM.

—

TOMUS III.



*Je poursuivrai les contrefacteurs ou débitans  
d'éditions contrefaites, selon toute la rigueur des  
lois.*

Méquignon Junior.

# INSTITUTIONES THEOLOGICÆ AD USUM SEMINARIORUM,

AUCTORE J.-B. BOUVIER,  
EPISCOPO CENOMANENSI.

---

TERTIA EDITIO, ACCURATE EMENDATA.

ACCEDIT RERUM INDEX GENERALIS ALPHABETICUS.

---

TOMUS TERTIUS.

*DE EUCHARISTIA. — DE POENITENTIA. —  
DE EXTREMA-UNCTIONE.*



PARISIIS,  
APUD MÉQUIGNON JUNIOREM,  
FACULTATIS THEOLOGICÆ BIBLIOPOLAM,  
Via Majorum Augustinianorum, n° 9.

---

M DCCC XXXIX.

THE WORLD OF THE FUTURE

SCIENCE AND THE FUTURE

THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE



THE FUTURE OF THE FUTURE

THE FUTURE OF THE FUTURE

THE FUTURE OF THE FUTURE


THE FUTURE OF THE FUTURE

62579



# INSTITUTIONES THEOLOGICÆ

AD USUM SEMINARIORUM.



## TRACTATUS

### DE SANCTISSIMA EUCHARISTIA.



EUCCHARISTIA, a verbo græco idem significante ac *gratiarum actio*, sic dicta, est ineffabile mysterium in quo Salvator noster Dominus divitias divini sui erga homines amoris effundit. Dicitur autem *Eucharistia* seu *gratiarum actio*, quia ad gratias Deo agendas destinata est. Appellatur etiam tum in Scriptura sacra, tum apud sanctos Patres, tum in liturgiis et in canonibus Ecclesiæ, *Panis vitæ*, *Panis dominicus*, *Panis Angelorum*, *cœna Domini*, ex circumstantia in qua fuit instituta; *communio*, quia illius ope fideles Christo, Ecclesiæ et sibi invicem uniuntur; *sacra Synaxis*, id est sacer cœtus, quia fideles in suis cœtibus divinam Eucharistiam accipere solebant. Vocabatur olim AGAPE, latine *dilectio*, quia est summum divini amoris erga nos argumentum. Dicitur etiam *Mysterium fidei*, *Myteria tremenda*, *sacrosanctum Mysterium*, *Sancta sanctorum*, *Sacramentum altaris*, et frequentius *sanctissimum Sacramentum*, etc.

Eucharistia duplici modo spectari potest, scilicet, ut sacramentum et ut sacrificium. Itaque hujusce tractatus duæ erunt partes.

## PARS PRIMA.

### DE EUCHARISTIA QUATENUS EST SACRAMENTUM, SEU DE SANCTISSIMO EUCHARISTIÆ SACRAMENTO.

Eucharistia sic spectata, recte definiri potest, ut in Catechismo : *Sacramentum quod vere et realiter continet corpus, sanguinem, animam atque divinitatem Domini nostri Jesu Christi, sub speciebus vel apparentiis panis et vini.* Veritas hujus definitionis patebit ex dicendis.

Septem hujus partis tractatus nostri erunt capita : primum, de illius sacramenti existentia et natura ; secundum, de illius materia ; tertium, de illius forma ; quartum, de illius ministro ; quintum, de illius subjecto ; sextum, de illius necessitate ; septimum, de illius effectibus.

---

### CAPUT PRIMUM.

#### DE SACRAMENTI EUCHARISTIÆ EXISTENTIA ET NATURA.

Si excipiantur Sociniani et hodierni rationalistæ qui proprie Christiani dici nequeunt et in tractatibus de Religione et de Ecclesia confutantur, omnes catholici, schismatici et hæretici unanimiter docent Eucharistiam esse sacramentum : at circa naturam illius sacramenti non ita sibi consentiunt ; quidam illud habentes ut signum realitate vacuum, alii ut præsentiam realem continens simul cum pane et vino, et alii præsentiam realem cum solis materiæ apparentiis. Itaque, seposita sacramenti hujus existentia ab adversariis admissa, in duplici articulo tractabimus 1° de præsentia reali et 2° de modo illius præsentiae seu de transsubstantiatione.

## ARTICULUS PRIMUS.

## DE PRÆSENTIA REALI CHRISTI IN EUCHARISTIA.

Phantasiastæ, Valentiniani alique primorum sæculorum hæretici qui negabant Christum habere verum corpus humanum, vel animam, ut in initio tractatus de Incarnatione retulimus, eo ipso indirecte præsentiam realem negabant.

Alii directe eam negaverunt, videlicet, 1<sup>o</sup> Joannes Scott vel Scot, cognomento *Erigena*, a patria quæ erat Hibernia, olim vocata *Erim* vel *Erin*. Venit in Galliam in nono sæculo, et a Carolo Calvo bene fuit acceptus, quia pro tempore videbatur doctus. Composuit librum de Eucharistia, nunc non exstantem, in quo totus erat ut persuaderet *hoc quod in altari consecratur, neque vere corpus, neque vere Christi sanguinem esse*, sed omnia hic *specie geri, non veritate*: sunt verba Ascelini monachi, in Epistola ad Berengarium, *Labbe*, t. 9. Fertur hunc auctorem obiisse circa annum 884, quidam dicunt in Gallia, et alii in Anglia. Liber ejus damnatus fuit in concilio Vercellensi, anno 1031, et Parisiensi, eodem tempore. Scott multos discipulos reliquisse videtur.

2<sup>o</sup> Sub initio undecimi sæculi Berengarius, Turonensis, e parentibus divitiis et nobilitate conspicuis oriundus, celebris Fulberti Carnutensis fuit discipulus et magnos obtinuit progressus. Anno 1030 in patriam reversus, Scholasticus S. Martini Turonensis creatus, multos habuit discipulos, et, licet dignitate archidiaconi in ecclesia Andegavensi donatus, nihilominus apud S. Martinum docere perrexit. Postea ægre ferens non paucos e discipulis suis ad Lanfrancum famosam tunc tenentem scholam in monasterio Beccensi, prope Rhotomagum, migrare, singulares cœpit defendere opiniones quibus audientium attentionem ad se converteret; et, scriptis Erigenæ Scott utens, mysterium præsentiae realis in Eucharistia negavit. Damnatus fuit et excommunicatus anno 1050 a Leone IX,



in concilio Romano, et eodem anno in conciliis Vercelensi et Parisiensi. Anno 1055, errores suos ejuravit in concilio Turonensi; sed relapsus, rursum damnatus fuit a Nicolao II in concilio Romæ habito anno 1059 : damnationi suæ subscripsit, scripta sua combussit, et tamen in Gallia reversus clamavit se non fuisse liberum et de novo eosdem sparsit errores. Tandem in alio concilio, anno 1078 Romæ, jubente Gregorio VII, celebrato, bona fide hæresim deseruit, in Galliam rediit et octo ultimos vitæ suæ annos in parva insula S. Cosmi, prope Turones, pœnitentiam agens duxit.

3<sup>o</sup> Petrus de Bruis, cujus sectatores dicti sunt Petrobrusiani, versus annum 1126 cœpit docere, in provincia Arelatensi, Christum dedisse quidem corpus suum et sanguinem in ultima cœna, sed nihil tale in Ecclesia fieri. Hæc refert Petrus Cluniacensis, Bibliothec. Patrum, t. 22.

Quidam Henricus, præcipuus Petri de Bruis sectator, eandem hæresim docuit Tolosis, anno 1146, cui S. Bernardus sermonibus, scriptis et miraculis fortiter obstitit; discipuli ejus vocati sunt Henriciani.

4<sup>o</sup> Quidam Valdenses et Wiclefistas inter adversarios præsentiae realis computaverunt, sed illustrissimus *Bosuet* probat eos errasse tantum circa ministrum, asserentes malum sacerdotem consecrare non posse, et circa mysterium transsubstantiationis.

5<sup>o</sup> In decimo sexto sæculo *Carlostad*, discipulus Lutheri, deinde ipsius adversarius, *Zuingle*, *OEcolampade* alique Sacramentarii et Calvinistæ præsentiam realem aperte negaverunt, contententes verba Christi, *Hoc est corpus meum*, sensu metaphorico intelligenda esse, pro figura corporis. Cum objiceretur hæc verba esse absoluta et nihil indicare in contextu ea ad metaphoram esse convertenda, *Zuingle* refert sibi responsum ad hanc objectionem quærenti, quadam nocte, *nescit quem*, astitisse, *ater, an albus fuerit, nihil meminit, qui moneret verbum est*, in propositione Christi, eodem sensu accipiendum esse ac in textu Exodi, **xii, 11**, *Est enim phase (id est transitus) Domini.*

Calvinus autem viam Scripturæ et traditionis triplici effugio præsertim conatus est eludere : 1° dicendo cum *Zuingle*, verbum est idem sonare ac *significat* aut *figurat*; 2° corpus Christi licet tantum distet ab Eucharistia quantum cælum a terra, manducari per fidem, quia fidelis credendo illud attrahit et reddit præsens; 3° corpus Christi aliquam virtutem e cælo diffundere in animam communicantis.

Contra hos omnes stabiliendum est dogma catholicum.

## PROPOSITIO.

*Sanctissimum Eucharistiæ sacramentum continet vere, realiter et substantialiter corpus et sanguinem, una cum anima et divinitate Domini nostri Jesu Christi, ac proinde totum Christum.*

Hæc verba expressam continent definitionem concilii Tridentini quæ de verbo ad verbum sic habetur, sess. 13, can. 1 : « Si quis negaverit in sanctissimæ Eucharistiæ » sacramento contineri vere, realiter et substantialiter » corpus et sanguinem, una cum anima et divinitate » Domini nostri Jesu Christi, ac proinde totum Christum, sed dixerit tantummodo esse in eo ut in signo, » vel figura, aut virtute : anathema sit. »

*Patet* sanctam synodum triplex Calvinii effugium hac definitione præcludere voluisse. Nostra igitur propositio est de fide catholica, probatur Scriptura sacra, traditione et præscriptione. Inter verba Scripturæ, alia promissionem Eucharistiæ respiciunt, alia ejus institutionem, et alia usum. Juvat illud dogma venerandum et maximi momenti fusius probare per argumenta petita 1° ex promissione; 2° ex institutione; 3° ex usu Eucharistiæ; 4° ex traditione; 5° ex præscriptione.

ARGUMENTUM I. Ex verbis Christi promissionem Eucharistiæ respicientibus petitur.

Hæc promissio reperitur in ultima parte capituli vi Evan-

geli secundum Joannem, a  $\text{y}$ . 52; omnes quippe fatentur in initio capitis, usque ad  $\text{y}$ . 25, sermonem esse de ingenti miraculo multiplicationis panum, quibus quinque millia hominum saturati sunt; qua occasione Christus hortatur Judæos ut præstantiorem appetant cibum qui non perit, *sed qui permanet in vitam æternam, quem Filius dabit vobis*. Postea, in secunda parte, commendat fidem ut conditionem ad obtinendum hunc cibum necessariam; seipsum designat ut panem vitæ, ut panem cœlestem, et,  $\text{y}$ . 52, addit :

*Si quis manducaverit ex hoc pane, vivet in æternum; et panis quem ego dabo, caro mea est pro mundi vita. Litigabant ergo Judæi ad invicem, dicentes : Quomodo potest hic nobis carnem suam dare ad manducandum? Dixit ergo eis Jesus : Amen, amen dico vobis : nisi manducaveritis carnem Filii hominis et biberitis ejus sanguinem, non habebitis vitam in vobis. Qui manducat meam carnem et bibit meum sanguinem, habet vitam æternam, et ego resuscitabo eum in novissimo die. Caro mea vere est cibus, et sanguis meus vere est potus.... Multi ergo audientes ex discipulis ejus, dixerunt : Durus est hic sermo, et quis potest eum audire? Sciens autem Jesus apud semetipsum quia murmurarent de hoc discipuli ejus, dixit eis : Hoc vos scandalizat? Si ergo videritis Filium hominis ascendentem ubi erat prius?.... Ex hoc multi discipulorum ejus abierunt retro, et jam non cum illo ambulabant. Dixit ergo Jesus undecim : Numquid et vos vultis abire? Respondit ergo ei Simon Petrus : Domine, ad quem ibimus? Verba vitæ æternæ habes.*

Ut ex illo textu solidum deducatur argumentum in gratiam propositionis nostræ, duo sufficiunt, scilicet 1° quod in illo de Eucharistia agatur, et 2° quod in Eucharistia caro et sanguis Christi vere, realiter et substantialiter tradantur : atqui hæc duo certa sunt.

1° In illo textu agitur de Eucharistia. Nam 1° series contextus ad hunc sensum naturaliter deducit : Christus siquidem ex pane corporeo, vitam perituram sustentante, animas Judæorum ad vitam æternam erigit; fidem omnino necessariam ut hæc vita obtineatur commendat, et



ineffabilem promittit corporis sui manducationem, quæ sola fide cognosci et utiliter perfici potest. 2° Fatentibus adversariis nostris, tres alii Evangelistæ institutionem Eucharistiæ referunt : incredibile esset S. Joannem de tanto mysterio nihil dixisse : attamen nihil de illo dixisset si præcedentia verba de sacramento Eucharistiæ non intelligerentur. 3° Christus præcipua vitæ suæ facta aut mysteria prænuntiare solebat, ut discipulos ad ea credenda præpararet : sic prænuntiavit sua opprobria, mortem, resurrectionem, ascensionem, Spiritus sancti effusionem, Baptismi institutionem, infallibilem Ecclesiæ auctoritatem : præsumendum est ergo illum augustissimi Eucharistiæ sacramenti institutionem annuntiasset, et S. Joannem, ultimo scribentem, de hujusce mysterii institutione apud tres alios Evangelistas relata siluisse, ejus vero promissionem retulisse. 4° Inter sermonem Evangelistarum Eucharistiæ institutionem describentium et sermonem apud S. Joannem relatam magna est similitudo; utrinque eadem est cibi et potus, corporis et sanguinis distinctio, eadem dicendi forma. 5° Verba quibus utitur Christus aliquid futurum et magni momenti indicant : *Panis quem ego dabo, caro mea est pro mundi vita* : at si fidem in seipsum tantum exprimere voluisset, aliquid futurum non indicasset. 6° Omnes SS. Patres Græci et Latini, Ecclesiæ doctores, Scripturæ interpretes et theologi prædicta verba intellexerunt de Eucharistia. « Nemini enim fere auctori, bono malove, ante Lutherum, venit in mentem ut diceret in hoc loco de Eucharistia non agere, » inquit *Maldonat*; deinde plusquam triginta citat Patres vel antiquos doctores. 7° Item concilia Ephesinum, *Labbe*, t. 3, Nicænum II, ibid. t. 7, Trid. sess. 13, cap. 2, et multa concilia particularia quædam verba ex dicto S. Joannis capite deprompta Eucharistiæ applicant. Ergo 1°.

2° Hæc verba, de Eucharistia intellecta, veram, realem et substantialem carnis et sanguinis Christi manducationem exprimunt; sic enim 1° Patres et concilia citata ea accipiunt, eaque alio sensu accipi posse nunquam æsti-

maverunt. 2° Verba Christi sensu obvio accepta manducationem realem significant; quod adeo verum est, ut Judæi et ipsi discipuli ea sic acceperint, scandalizati fuerint et multi abierint. 3° Si Christus manducationem realem exprimere noluisset, videns Judæos et discipulos propter duritiem sermonis scandalizatos, errorem eorum corrigere debuisset, dicendo sua verba sensu metaphoricò, de manducatione per fidem, intelligenda esse: nedum autem id faciat, eos in persuasione accepta magis ac magis confirmat, dicens: *Hoc vos scandalizat?* Id est, ut interpretatur *Maldonat*, hoc credere non potestis dum me videtis: quomodo ergo credetis cum rediero ad Patrem et amplius me non videbitis? et ad Apostolos: *Numquid et vos vultis abire?* Ergo 2°; aliunde, etc. Ergo, etc.

*Notandum* tamen, præter Calvinistas, nonnullos catholicos, ut Gabrielem, Cajetanum, Trapper, Jensenium, Gaudensem, tertiam capituli vi S. Joannis partem interpretatos esse de fide, ut facilius refellerent Hussitas et Lutheranos, communionem sub utraque specie jure divino necessariam esse probare nitentes, ex his Christi verbis: *Nisi manducaveritis carnem Filii hominis et biberitis ejus sanguinem, non habebitis vitam in vobis.* Licet hi erraverint, concilium tamen Tridentinum decretum contra communionem sub utraque specie ita composuit, ut eos non attingeret. Vide Pallav. l. 17, cap. 11.

ARGUMENTUM II. — Ex verbis institutionis Eucharistiæ petitum.

Institutionem divini illius sacramenti sic refert S. Matthæus, xxxvi, 26: *Coenantibus eis, accepit Jesus panem et benedixit ac fregit, deditque discipulis suis, et ait: Accipite et comedite: hoc est corpus meum. Et accipiens calicem, gratias agit, et dedit illis, dicens: Bibite ex hoc omnes. Hic est enim sanguis meus Novi Testamenti, qui pro multis effundetur in remissionem peccatorum.* Illa institutio iisdem ferme verbis refertur a S. Marco, xiv, 22; a S. Luca, xxii, 19 et a S. Paulo, I Cor. ii, 24. Verba consecrationis panis sunt apud omnes: *Hoc est corpus meum.* S. Lucas ad-

dit : *Quod pro vobis datur; et Apostolus : Quod pro vobis frangitur.* Verba consecrationis calicis sunt apud Matth. et Marc. *Hic est sanguis meus Novi Testamenti, qui pro multis, etc.* apud Lucam : *Hic est calix Novum Testamentum in meo sanguine qui pro vobis fundetur; et apud B. Paulum : Hic calix Novum Testamentum est in meo sanguine : hoc facite, etc.*

*Unde sic.* Præcedentia verba sensu naturali accepta, præsentiam realem exprimunt, ut ipsi Sacramentarii fassentur : atqui sensu naturali accipienda sunt. Nam 1° verba Scripturæ semper intelligenda sunt sensu obvio et naturali, nisi aliquid ostendat ea sensu metaphorico esse accipienda, alioquin nihil esset certum : porro in contextu prædictorum verborum nihil ostendit ea sensu metaphorico accipienda esse. 2° Quando adhibentur figuræ, necesse est ut signum rem exprimendam significet, vel ex natura sua, ut statua ad effigiem alicujus sculpta ; vel ex usu recepto, v. g. sicut agnus significat Christum ; vel ex loquendi modo aut ex contextu, exempli gratia : *Est enim phase, id est transitus Domini, Exod. xii, 11 ;* vel ex præmonitione loquentis, quia unusquisque sensum metaphoricum voci qua pro arbitrio utitur annectere potest, modo audientes de hac significatione admoneat, secus insipienter loqueretur. Atqui panis et vinum neque ex natura sua, neque ex usu recepto, neque ex loquendi modo aut contextu, sunt figura corporis et sanguinis Christi, et Christus his utendo vocibus discipulos non monuit eas sensu metaphorico accipiendas esse : ergo dicendum esset Christum, cujus verba tantam simplicitatem et claritatem semper redolent, hic modo ambiguo et inintelligibili locutum fuisse. 3° Metaphoræ ideo adhibentur ut qualitates alicujus rei clarius aut fortius exprimantur ; v. g. dicitur de viro forti quod sit leo, id est habeat talem fortitudinem qualem habent leones : in mêtaphoris igitur necesse est ut terminus figurativus sit generalis ; hinc Christus recte dixit generaliter : *Ego sum panis vitæ*, id est habeo relative ad vitam æternam eas qualitates quas panis materialis habet relative ad vitam corporalem ; sed dicere non potuisset, aliquem ostendendo

panem, *Ego sum hic panis*, quia tunc non designasset qualitatem, sed ipsam panis substantiam. Pariter dixit: *Ego sum vitis vera; Pater meus agricola est... vos palmites*, Joan. xv, 1 et 5; non autem: *Hæc vitis, hic agricola, hi palmites*. Attamen dixit, ostendendo panem et vinum: *Hoc est corpus meum, hic est sanguis meus*. Ergo non adhibuit metaphoram. 4° Christus, dicta proferens verba, sacramentum instituebat, juxta ipsos novatores, dogma fidei proponebat, legem condebat, testamentum conficiebat et ultimum vale discipulis suis dicebat: hujusmodi circumstantiæ exigebant ut aperte et simpliciter loqueretur. Equidem sic admirabiliter locutus est, si præsentiam realem expresserit; contra vero obscure et absurde, si quamquam præsentiam figurativam significare voluerit. 5° Apostoli verba Christi de præsentia reali intellexerunt, ut patet relatione B. Pauli I Cor. ii, 23 et seq. qui certe sensum figurativum indicare debuisset si eum admittendum esse credidisset. 6° Tota omnium ecclesiarum traditio, saltem usque ad Sacramentarios, præfata Christi verba in sensu naturali accipit, *ut infra ostendemus*.

Ipse Lutherus in Epist. ad Argentinenses, t. 7 operum ejus, aiebat: « Vellem quod posset aliquis mihi persuadere nihil esse in Eucharistia præter panem et vinum: magno ille me beneficio devinciret. Jam sæpe gravibus curis in hac materia desudavi, et videbam me hoc modo posse Papatui incommodo esse. Verum ego me captum video, nulla elabendi via relicta est, textus Evangelii nimis est apertus. » Ergo.

Nihil proficiunt Sacramentarii varios allegando Scripturæ textus, in quibus verbum esse ponitur pro significare, v. g. *Septem boves pulchræ et septem spicæ plenæ, septem ubertatis anni sunt*, Gen. xli, 26; *Petra autem erat Christus*, I Cor. x, 4, etc. nam sensus metaphoricus ex contextu evidenter determinatur.

#### ARGUMENTUM III. Ex usu Eucharistiæ desumptum.

Modum divina Eucharistia utendi sic describit Apostolus, I Cor. xi, 27, postquam institutionem hujus sa-



cramenti retulit : *Itaque quicumque manducaverit panem hunc, vel biberit calicem Domini indigne, reus erit corporis et sanguinis Domini. Probet autem seipsum homo, et sic de pane illo edat et de calice bibat. Qui enim manducat et bibit indigne, judicium sibi manducat et bibit, non dijudicans corpus Domini.* Supposita reali præsentia, ad sensum catholicorum, hæc verba sunt clara, gravia, sensu plena, ad ædificationem animæ conducentia : si vero corpus et sanguis Christi non accipiuntur in Eucharistia nisi in figura et per fidem, rationabilem non habent sensum. Quid enim significant verba manducare corpus vel bibere sanguinem indigne, reum esse corporis et sanguinis Domini, corpus Domini non discernere, id est, illud sicut cibos communes sumere, si tantummodo ibi adsit figura? Aliunde, cum, juxta Calvinistas, sola fides peccata remittat, vel sumens Eucharistiam habet fidem, vel non : si habet fidem, justitiam obtinet et indigne non manducat; si non habet fidem, corpus Christi nullo modo accipit, sed ad summum figuram ejus non sufficienter honorat : ergo proprie dici non potest eum corpus Christi indigne manducare, illius reum esse, etc. Ergo.

Firmum aliud deduci posset argumentum ex sequentibus ejusdem B. Pauli verbis, I Cor. x, 16 : *Calix benedictionis cui benedicimus, nonne communicatio sanguinis Christi est? et panis quem frangimus, nonne participatio corporis Domini est? Quoniam unus panis, unum corpus multi sumus omnes qui de uno pane participamus.* Optimum habent sensum hæc verba de præsentia reali intellecta, et ad fovendam pietatis affectionem valde idonea sunt; in sensum vero figurativum detorsa, sunt obscura et absurda. Ergo.

#### ARGUMENTUM IV. Ex traditione petatum.

Quamvis Protestantes soli Scripturæ standum esse profiteantur, et traditionem sibi adversam contemnere soleant, conati sunt tamen Patres primorum sæculorum ad se trahere, ut probarent catholicos, præsentiam realem admittentes, a doctrina veterum recessisse. « Constat ve-  
» tustos omnes scriptores qui totis quinque sæculis post



» Apostolos vixerunt, uno ore nobis patrocinari, » inquit Calvinus, in ultima admonitione ad Westphalum. Hæc audax assertio impudens est mendacium. Si cuncta Patrum testimonia quæ præsentiam realem astruunt referre vellemus, multo longiores essemus. Cum dogma præsentiae realis ex natura sua sit popolare, supponi non potest aliquem ex SS. Patribus ignorasse quid Ecclesia suo tempore doceret, aut contra fidem ejus, nullis reclamantibus, scripsisse. Sufficit ergo unum aut alterum ex singulis sæculis in testimonium proferre.

Primo sæculo, S. Ignatius martyr, S. Petri discipulus, ab eo, post Evodium, Antiochensis ordinatus episcopus, et anno 116 circiter mortuus, Epist. ad Smyrnæos, n. 8, de quibusdam errantibus dicit : « Ab Eucharistia et » oratione abinent, eo quod non confiteantur Eucharistiam carnem esse servatoris nostri Jesu Chriti, qui » pro peccatis nostris passus est, quem Pater sua benignitate suscitavit : » Cotel. t. 2, pag. 37.

Secundo sæculo, S. Justinus, in Apologia I ad imperatorem Antonium directa, anno 150, n° 66 : « Neque enim » ut communem panem, neque ut communem potum » ista sumimus; sed quemadmodum per verbum Dei caro » factus Jesus Christus Salvator noster, et carnem et sanguinem habuit nostræ salutis causa : sic etiam illam, in » qua per precem ipsius verba continentem gratiæ actæ » sunt, alimoniam, ex qua sanguis et carnes nostræ per » mutationem aluntur, incarnati illius Jesu et carnem et » sanguinem esse edocti sumus. Nam Apostoli in commentariis suis quæ vocantur Evangelia, ita sibi namdasse Jesum tradiderunt, eum scilicet, accepto pane, » cum gratias egisset, dixisse : *Hoc facite in meam commemorationem : hoc est corpus meum*; et poculo similiter » accepto, actisque gratiis, dixisse : *Hic est sanguis meus*, » ipsisque solis tradidisse. » Panis et vinum eo modo, per verba a Christo determinata, fiunt corpus et sanguis Christi, quo per verbum Dei caro factus est Salvator noster : atqui Salvator noster non factus est caro metaphorice : ergo.

Tertio sæculo, Tertull. adversus Marcionem, l. 4,

cap. 40 : « Acceptum panem (*Christus*) et distributum » discipulis, corpus illum suum fecit, hoc est corpus » meum dicendo. » Realitatem præsentiae corporis Christi et sensum verborum institutionis designat.

Libro de Resurrectione carnis, cap. 8, idem Tertull. sic habet : « Caro abluitur, ut anima emaculetur; caro » ungitur, ut anima consecretur, caro signatur, ut et » anima muniatur.... caro corpore et sanguine Christi » vescitur, ut anima de Deo saginetur.. » Si Christus figurate tantum esset in Eucharistia, certe dici non posset carnem corpore et sanguine Christi vesci. Præterea caro realiter abluitur, ungitur, signatur, etc. Ergo in cogitatione Tertulliani, et realiter corpus et sanguinem Christi suscipit.

Eodem sæculo, S. Cyp. Epist. x, aliquos reprehendens presbyteros qui, ad preces martyrum et confessorum, veniam facilius lapsis concedebant, ait : « Illi contra » Evangelii legem, contra vestram quoque honorificam » petitionem, ante actam pœnitentiam, ante exomologesim.... offerre pro illis et Eucharistiam dare, id est, » sanctum Domini corpus profanare audeant, cum » scriptum sit : *Qui ederit panem aut biberit calicem Domini indigne, reus erit corporis et sanguinis Domini.* »

Quarto sæculo habentur testimonia concilii Nicæni I, prohibentis, can. 14, diaconis ne corpus Christi presbyteris porrigant. S. Greg. Nyssenus, Catechetica oratione, cap. 37, ait, post comparisonem inter corpus Verbi incarnati, et corpus Christi in Eucharistia : « Et hic similiter, panis, sicut dicit Apostolus, sanctificatur per » verbum Dei et orationem, non eo quidem quod, cibo » mediante, in Verbi corpus evadat, sed quod statim per » verbum in corpus transmutetur, sicut dictum est a » Verbo, *Hoc est corpus meum.* »

S. Cyrillus Hierosol. annæ 386 defunctus, Catechesi 4 mystagogica : « Cum igitur ipse Christus pronuntiaverit » et dixerit de pane, *Hoc est corpus meum*, quis audebit » deinceps ambigere? et cum ipse asseveraverit et dixerit, » *hic est sanguis meus*, quis unquam dubitaverit, aiens

» non esse ejus sanguinem? Aquam olim in vinum, quod  
 » sanguini affine est, in Cana Galileæ transmutavit, et  
 » eum parum dignum existimabimus cui credamus, cum  
 » vinum in sanguinem transmutavit? Ad nuptias corpo-  
 » rales vocatus, stupendum hoc miraculum effecit; et non  
 » eum multo magis filiis thalami nuptialis corpus suum  
 » et sanguinem fruenda donasse confitebimur? Quare  
 » cum omni persuasionem tanquam corpus et sanguinem  
 » Christi sumamus. Nam sub specie panis datur tibi cor-  
 » pus, et sub specie vini datur tibi sanguis; ut cum  
 » sumpseris corpus et sanguinem Christi, concorporeus  
 » et consanguis ipsi efficiaris: sic etenim christiferi effi-  
 » cimur, distributo in membra nostra corpore ejus et  
 » sanguine. » Adeo clarus est ille textus, ut nulla expli-  
 catione indigeat: idcirco illum in aliqua extensione re-  
 ferendum censuimus. Melius adhuc tota Catechesis  
 legeretur.

Quinto sæculo, S. Ambros. lib. de Mysteriis, cap. 9,  
 n. 54: « Ipse clamat Dominus Jesus: *hoc est corpus meum*.  
 » Ante benedictionem verborum cœlestium, alia species  
 » nominatur, post consecrationem corpus significatur.  
 » Ipse dicit sanguinem suum. Ante consecrationem, aliud  
 » dicitur; post consecrationem, sanguis nuncupatur. Et  
 » tu dicis: Amen, hoc est, verum est. Quod os loquitur,  
 » mens interna fateatur; quod sermo sonat, affectus  
 » sentiat. »

S. Chrysost. Homilia 83 in Matth. n. 4: « Quoniam ille  
 » dixit (Christus), *hoc est corpus meum*, obtemperemus,  
 » credamus... Quot sunt qui modo dicunt: Vellein ejus  
 » formam, typum, vestimenta, calceamenta videre? Ecce  
 » ipsum vides (in Eucharistia), ipsum tangis, ipsum co-  
 » medis. Et paulo post: Cogita quantum adeptus sis ho-  
 » norem, qua frueris mensa. Quod angeli tremunt vi-  
 » dentes... eo nos alimur, huic commiscemur factique  
 » sumus Christi unum corpus et una caro. »

S. Aug. Sermone 132 de Verbis Evang. Joan. dicit:  
 » Qui jam manducant carnem Domini et bibunt sangui-  
 » nem ejus, cogitent quid manducent et bibant; ne, sicut

» dicit Apostolus, *judicium sibi manducent et bibant.* »

Sexto sæculo, S. Cæsarius Arelatensis, anno 542 vita functus, Homilia 7 de Paschate 5, ait loquens de sacramento corporis et sanguinis Christi : « Quando benedicendæ verbis cœlestibus creaturæ sacris altaribus imponuntur, antequam invocatione sancti nominis consecrentur, substantia illic est panis et vini : post verba autem Christi, corpus est et sanguis Christi. Quid autem mirum est si ea quæ verbo potuit creare, possit verbo creata convertere ? »

Sexto et septimo sæculo, S. Gregorius Magnus, anno 604 mortuus, Homilia 14 in Evangelia : « Bonus pastor pro ovibus suis animam posuit, ut in sacramento nostro corpus suum et sanguinem verteret, et oves quas redemerat, carnis suæ alimento satiaret. » In hypothesi adversariorum, non carnis alimento, sed carnis simulacro Christus fideles satiaret.

Præterea idem S. Greg. Dialog. 1. 3, cap. 3, refert claudum et mutum oblatum fuisse S. Agapito, pontifici Romano, qui, « Orationi incubuit, et missarum solemnias exorsus, sacrificium in conspectu Dei omnipotentis intromolavit ; quo peracto, ab altari exiens, claudi manum tenuit, atque assistente et aspiciente populo, mox a terra in propriis gressibus erexit, cumque ei dominicum corpus in os mitteret, illa diu muta ad loquendum lingua soluta est. Mirati omnes flere præ gaudio cœperunt. »

Insigne aliud miraculum in vita S. Greg. a duobus diversis auctoribus scripta, refertur : quædam mulier a dicto S. Greg. interrogata curjam communicatura risisset, respondit, quia de pane a se confecto eum audiisset dicentem : « Corpus Domini nostri Jesu Christi custodiat animam tuam. Tunc S. Greg. hæc audiens, pro incredulitate mulieris, cum tota plebe se in orationem prostravit, et post paululum surgens, particulam panis quam super altare posuerat, carnem factam reperit. » *Inter opera S. Greg. t. iv.*

Hæc facta saltem evidenter probant dogma præsentiae



realis et transsubstantiationis tunc universim creditum fuisse.

Octavo sæculo, S. Joannes Damascenus, anno 760 circiter defunctus, de Fide orthodoxa, l. 4, cap. 13 : « Nec » vero panis et vinum Christi corporis et sanguinis figura » sunt (absit), sed ipsum Domini corpus deitate donatum; cum ipse Dominus dixerit, *hoc est*, non figura » corporis, sed *corpus meum*; neque figura sanguinis, » sed *sanguis meus*. Et antea Judæis dixerat : *Nisi manducaveritis*, etc. Et paulo post : Quod si nonnulli panem » vinumque corporis et sanguinis Domini antitypo, seu » imagines figurasve vocaverunt, velut divinus Basilus, » non hoc post consecrationem dixerunt, sed antequam » oblatio ipsa consecraretur vocem hanc usurparunt, » consecrationem dixerunt, sed antequam sanctificaretur » ipsa oblatio, sic appellantes. »

Nono sæculo, Nicephorus patriarcha Constantinopol. apud Allatium, de Perpetua consensione utriusque ecclesiæ, l. 3, cap. 15 : « Nos catholici neque imaginem, » neque figuram hæc, *corpus et sanguinem* dicimus, licet » symbolice conficiantur, sed ipsum Christi corpus deificatum. »

Anno 831, juxta P. Mabillon, Annal. Bened. t. 4, prodiit liber Paschasii Radberti, monachi et deinde abbatis Corbeiensis, de Corpore et Sanguine Domini, in quo præsentia realis tam aperte docetur, ut quidam scriptores calvinistæ affirmare non erubuerint Paschasium certe primum fuisse novatorem qui doceret Eucharistiam simul esse figuram corporis Christi et ejusdem corporis veritatem. Ipsius tamen doctrina circa hoc punctum consentanea est testimoniis jam relatis, et nisi consensisset fidei Ecclesiæ, adversus illam undique reclamatum fuisset. Liber ejus reperitur in Bibliotheca Patrum, t. 14.

Versus finem ejusdem sæculi, apparuit liber Erigenæ, qui supposebat præsentiam realem ab omnibus admitti : statim Nicolaüs I ad Carolum Calvum scripsit, postulans ut talem novatorem expelleret, *Labbe*, t. 8.

Postea ipsi Sacramentarii non negant fidem totius Ec-



clesiæ Romanæ tunc fuisse Christum realiter esse præsentem in Eucharistia, et ideo eam in absurditatem idololatriæ lapsam esse fidenter pronuntiant. Ergo.

ARGUMENTUM V. Ex præscriptione petitem.

Qui positiva traditionis monumenta colligere, lustrare et ab objectis adversariorum vindicare non possent, præscriptionis argumento de præsentia reali Christi in Eucharistia sic facile vincerentur. Nunc, solis Sacramentariis exceptis, omnes ecclesiæ et sectæ Christianæ, in orbe universo dispersæ, catholicæ, hæreticæ, schismaticæ, Latinæ, Græcæ, Moscovitæ, Armenicæ aliæque Orientales dogma præsentiae realis admittunt; illud admittebant in decimo sexto sæculo, quando Lutherus et Calvinus prædicare cœperunt: id fatentur Sacramentarii. Imo conveniunt hanc persuasionem in nono vel decimo sæculo invasisse et tempore Berengarii fuisse universalem, ut patet ex tot sententiis quibus ille fuit percussus, donec errorem suum abjuraret et resipisceret. Tota igitur difficultas est, an fides hujus dogmatis decursu temporum incœperit, an vero ab Apostolis descendat. Atqui ab Apostolis descendit; ab Apostolis enim descendit si ipsius inductio fuerit prorsus impossibilis: atqui inductio præsentiae realis fuit omnino impossibilis. Nam 1º hic recurrunt omnes rationes quibus ostendimus suppositionem alicujus sacramenti fuisse impossibilem. 2º In ea hypothese, omnes fideles per octo vel novem sæcula persuasum habuissent Eucharistiam esse duntaxat figuram corporis Christi, et postea omnes præsentiam realem credidissent: at evidenter repugnat omnes fideles ab una persuasionem ad fidem oppositam in materia tanti momenti sic transiisse, ut nullum talis innovationis reperiatur vestigium. 3º Supponendum est innumeros episcopos, presbyteros et monachos, qui hactenus credebant et docebant Christum non esse in Eucharistia nisi modo figurato, doctrinam oppositam amplexos esse sine disceptatione, eamque velut a Christo descendentem, unanimi ore tradidisse: quis autem, serio reflectens,

talem suppositionem admittere potest? 4<sup>o</sup> Volunt adversarii suppositionem quam fingunt in nono vel decimo sæculo contigisse, eamque Paschasio, obscuro monacho, tribuunt: sed eo tempore Græci a Latinis jam incipiebant separari: Cophtæ, Jacobitæ, Maronitæ aliæque sectæ Orientales a plurimis sæculis erant separatæ: quomodo fieri potuit ut omnes dogma rationi impervium, antiquæ fidei contrarium et gravissimi momenti, adeo facile et universaliter admiserint, ut ne unus quidem, aut episcopus, aut doctor, imposturam detexerit, vel suspicatus fuerit? Eadem recurrit ratio pro aliis retro sæculis: si una ecclesia talem produxisset innovationem, aliæ reclamassent: semper exstiterunt sectæ hæreticæ aut schismaticæ quæ hujus naturæ mutationem Ecclesiæ Romanæ exprobrassent. Dicendum est ergo cum Tertull. lib. de Præscriptione, cap. 28: « Ecquid verisimile est » ut tot et tantæ in unam fidem erraverint *ecclesiæ*? » Nullus inter multos eventus unus est exitus; variasse » debuerat error doctrinæ ecclesiarum. Cæterum, quod » apud multos unum invenitur, non est erratum, sed tra- » ditum; audeat ergo aliquis dicere illos errasse qui tra- » diderunt. » Vide hoc argumentum fusius expositum in exquisito opere dicto: *Perpétuité de la foi.... défendue*, ..... præsertim, l. 9, cap. 11. Vide etiam aliud opus Gallice scriptum: *Discussion amicale, lettre VIII et suiv.*

## COROLLARIUM.

Si unum ex præcedentibus argumentis seorsim sumptum sit invictum, quantam animi convictionem omnia simul spectata producere debent! Quam inania sunt systemata et vana objecta quibus novatores veritatem tam firmiter stabilitam lacessere conantur! Præcipuæ tamen rationes quibus eis responderi potest exponendæ sunt.

*Solvuntur objectiones  
contra argumenta ex Scriptura sacra petita.*

*Obj. 1<sup>o</sup> contra argumentum ex promissione Eucharistiæ petatum. In ultima parte capitis VI Evangelii se-*

cundum Joannem agitur de cibo qui dat vitam æternam, et sine quo vita æterna obtineri non potest; *Si quis manducaverit ex hoc pane, vivet in æternum: Nisi manducaveritis carnem Filii hominis..... non habebitis vitam in vobis.* At omnes qui panem eucharisticum manducant, vitam æternam non habent, et multi qui illum non manducant, vitam æternam consequuntur: ergo ibi, sicut in parte præcedenti, de manducatione spirituali agitur.

*R. Dist. maj.* Agitur de cibo qui dat vitam æternam, etc. positis conditionibus requisitis, *concedo*; secus, *nego maj.* Etenim in divinis promissionibus, libertatem hominis supponentibus, quædam ordinarie subaudiuntur conditiones omnino necessariæ; sic apud Lucam, xi, 10: *Omnis qui petit, accipit*; id est, si bene petat: apud Marcum, xvi, 16: *Qui crediderit et baptizatus fuerit, salvus erit*; supposito quod, Baptismo suscepto, fidem non amittat, aut alterius gravis peccati reus non fiat, aut pœnitentiæ remedio veniam obtineat, etc. Ita qui panem eucharisticum, per se gratiam producentem, cum dispositionibus requisitis manducat, *vivet in æternum*, modo in gratia per illum suscepta usque ad mortem perseveret.

Item verba, *nisi manducaveritis*, etc. exprimunt mandatum affirmativum: at de natura est mandati affirmativi ut non obliget pro semper, sed tantum in debitis circumstantiis: ergo nihil exigit ut de manducatione spirituali intelligantur. Imo in ea hypothesi eadem esset difficultas, siquidem infantes valide baptizati salvantur, et tamen spiritualis manducationis sunt incapaces. Ergo.

*Inst.* Christus ait, *ŷ. 64* ejusdem capituli, Capharnaitis respondens: *Spiritus est qui vivificat; caro non prodest quidquam. Verba quæ ego locutus sum vobis, spiritus et vita sunt.* Ergo volebat ut ipsius verba præcedentia, non de manducatione reali, sed de manducatione spirituali, seu per fidem, intelligerentur.

*R. Nego conseq.* Nam 1º si Christus de manducatione spirituali tantum loqui voluisset, uno verbo scandalum Capharnaitarum sustulisset, dicendo verba quæ illis videbantur dura, sensu metaphorico esse accipienda; quod

tamen non fecit, et passus est ut *multi discipulorum ejus abirent retro*. 2<sup>o</sup> Verba nobis objecta, *Spiritus est qui vivificat, caro non prodest quidquam*, non ipsam carnem Christi indicant, sed sensum quo accipienda essent præcedentia verba quibus audientes fuerant scandalizati, id est, ea secundum fidem et affectum cœlestem intelligenda esse, non vero carnali ingenio, more Judæorum, vel de sanguinolenta manducatione cadaveris a spiritu separati, ut sibi fingeant Capharnaitæ, qui, audientes Christum dicentem, *panis quem ego dabo, caro mea est pro mundi vita*, dixerunt: *Quomodo potest hic carnem suam dare ad manducandum?* « acceperunt illud stulte, inquit S. Aug. » in Ps. cxviii, carnaliter illud cogitaverunt et putaverunt » quod præcisurus esset Dominus particulas quasdam de » corpore suo et daturus illis, et dixerunt, *Durus est hic » sermo*. Ipsi erant duri, non sermo. » Ergo.

*Obj.* 2<sup>o</sup> *contra argumentum ex verbis institutionis*. Christus, ostendendo panem, dixit, *Hoc est corpus meum*: atqui panis ipsius corpus esse non poterat, sed figura ejus: ergo.

*R. Dist. min.* Panis, remanens panis, ipsius corpus esse non poterat, *concedo*; in corpus ejus mutari non poterat, *nego min.* Itaque verba Christi efficiunt propositionem practicam quæ, vi supremæ potestatis, producit quod enuntiat. Si Christus, quando aquam vertit in vinum, ostendendo hydrias aqua plenas, practice dixisset, *Hoc est vinum*, certe non sensu metaphorico locutus fuisset: at eodem sensu protulit verba, *Hoc est corpus meum*. Ergo.

Eodem sensu intelligenda sunt verba quibus affirmatur Christum accepisse panem, benedixisse, fregisse ac dedisse discipulis, etc.

*Notandum est*, Christum, porrigendo panem consecratum, non dixisse, *Hic panis est corpus meum*, sed *hoc est corpus meum*. Pronomen autem *hoc*, græce *τοῦτο*, et non *οὗτος*, panem designare non potest, cum ejusdem non sit generis, sed vel corpus si adjective sumatur, vel rem præsentem et ostensam si substantive accipiatur, ut videtur accipiendum. Similiter, pro altera specie, Christus,



ostendendo vinum, non dicit hoc, ne intelligeretur vinum, sed *hic est sanguis meus*. Quia græce οινος, *vinum*, masculini est generis, Evangelista pronomen τούτο adhibet: idcirco cum vinum neutri sit generis, interpret latinus dicere debuit *hic est*. Unde in utroque textu, græco scilicet et latino, pronomen optime eligitur, ut præsentia realis exprimatur et sensus figuratus excludatur.

*Inst. 1º.* Christus, apud Lucam, xxii, 20, dixit: *Hic est calix novum testamentum in meo sanguine*. Unde sic: vox *calix* sumitur metaphorice pro re in calice contenta: ergo *a pari* et vox *panis* metaphorice accipienda est.

*R. Nego conseq. et paritatem.* Nam 1º ex usu recepto et communi, vox *calix* pro liquore contento usurpatur, sicut apud nos dicitur, *emporter une bouteille de vin, boire un verre de vin*, etc. Nusquam vero *panis* ad figurandum corpus Christi ex usu communi destinatus est. 2º Etsi vox *calix*, pro more, metaphorice accipiatur, substantia sic expressa in sensu naturali intelligenda est, ut ostendimus, id est, de vino converso in sanguinem qui pro multis effundendus erat: ergo similiter et panis, etc.

*Inst. 2º.* Christus, apud Matth. xxvi, 29, post consecrationem subjunxit: *Dico autem vobis: non bibam amodo de hoc genimine vitis, usque in diem illum, cum illud bibam vobiscum novum in regno Patris mei*: ergo non sanguis Christi, sed vinum adhuc erat in calice post consecrationem.

*R. Nego conseq.* Sanguis enim Christi vinum appellatur, 1º quia ex vino conversus est, et alibi in Scripturis res in aliam conversa primum nomen retinet; v. g. Exod. vii, 12, de virga Aaron in draconem versa legitur: *Sed devoravit virga Aaron virgas eorum*, etiam in serpentes versas; et apud Joan. ii, 9: *Ut autem gustavit architriclinus aquam vinum factam*. 2º Quia sanguis Christi in sacramento Eucharistiæ speciem seu apparentiam habet vini, et in Scripturis res sæpe designantur per eam quam habent vel habuerunt apparentiam: sic Deus, quia sub forma ignis apparuerat, *ignis consumens* vocatur, Deut. iv, 24; Abraham angelos appellat homines, quia formam



humanitatis induerant. 3° Plurimi, textum S. Matthæi cum simili textu S. Lucæ, xxii, 18, consecrationem panis et vini immediate antecedenti, conferentes, arbitrantur ibi non agi de calice consecrato, sed de altera calicis non consecrati distributione quæ in cœna ante institutionem Eucharistiæ locum habuit. Vide super hunc locum *Mal-donat* in Matthi. Jansenium, etc.

Calvinistæ multos alios obijciunt textus qui evidenter ipsorum systemati non favent et meras subministrant cavillationes, quibus solvendis non immorabimur.

*Solvuntur objectiones contra argumenta ex Patribus et præscriptione petita.*

*Obj.* 1°. Rarissima et obscura sunt veterum Patrum testimonia in quibus fit mentio Eucharistiæ: ergo certitudo præsentia realis ex illis deduci non potest.

*R.* 1°. *Nego ant.* Quædam enim retulimus testimonia in quibus præsentia realis non obscure docetur. Alia plura legi possunt apud *du Perron*, *Bellarmin*, *Witasse*, in opere dicto, *la Perpétuité de la Foi*, etc.

*R.* 2°. *Nego conseq.* Etenim 1° si non multa ex primis temporibus referantur testimonia in gratiam præsentia realis, ratio est quia pauca supersunt horum sæculorum scripta, et nulla de illo dogmate movebatur controversia. 2° Mos erat in Ecclesia sacramentorum mysteria, præsertim ea quæ missæ sacrificium et Eucharistiam respiciebant, infidelibus et ipsis catechumenis non revelare, sed solis baptizatis, ne sacra hæc objecta in contemptum devenirent. Existentia hujus disciplinæ, traditione apostolica innixæ, ex pluribus constat monumentis, v. g. ex S. Ambros. lib. de Mysteriis, cap 9; ex Julio I, Epist. 1, apud *Coustant*; ex Innocentio I, Epist. 25, ibidem; et ex multis aliis testimoniis, ut videre est in opere dicto, *Discussion amicale*, t. 1.

Ex facto in Historia ecclesiastica relato, *Fleury*, l. 37, n° 17, videtur sacram Eucharistiam in septimo sæculo ab episcopo Londinensi, in Anglia, publice distributam fuisse

populo, et principes paganos illius participes instar cæterorum fieri voluisse.

Sæpe igitur Patres de sanctissimo illo mysterio obscure loquebantur, ne illud intempestive manifestarent. Sic Origenes, contra Celsum, lib. 8, sacram Eucharistiam vocat, *corpus quoddam sanctum*; et S. Aug. Epist. 140 ad Honoratum, cap. 19, ait: « Hinc gratias agimus Domino  
« Deo nostro, quod est magnum sacramentum in sacrificio novi testamenti, quod ubi, et quando, et quomodo  
« offeratur, cum fueris baptizatus, invenies. »

Hæc autem sollicitudo tantum mysterium infidelibus occultandi fidem præsentia realis probat; si enim pastores Ecclesiæ hanc præsentiam non credidissent, nonne palam dicere debuissent Christianos verum Christi corpus non manducare et sanguinem ejus non bibere? Sic enim præcidissent in radice calunniam qua infideles eos incusabant, occidere scilicet in cœtibus suis infantem, ut corpus ejus manducarent et sanguinem biberent: id nunquam tentaverunt; nec unum verbum contra præsentiam realem dixerunt; sed duntaxat, etiam inter acerrimos cruciatus, professi sunt tantum scelus falso sibi imputari, et in ritibus suis nihil reperiri quod sanctitate et pietate plenum non esset. « Quotidie obsidemur, inquit Tertull. Apolog. cap. 7, quotidie prodinur: in  
» ipsis plurimum cœtibus et congregationibus nostris  
» opprimimur; quis unquam taliter vagienti infanti  
» supervenit? » Ergo.

*Inst.* Sæpe sancti Patres vocaverunt Eucharistiam simpliciter panem, panem sacrum, typum, figuram, imaginem, sacramentum corporis Christi: ergo ex eorum testimoniis præsentia realis concludi non potest.

*R. Nego conseq.* Omnes enim citatæ locutiones aliæque similes cum præsentia reali optime conciliari possunt. Eucharistia, etiam post consecrationem, dici potest 1º panis, quia ex pane conficitur et speciem retinet panis; 2º figura, imago, signum, repræsentatio corporis Christi, quia sub sacramentali specie latet corpus Christi, quasi sub involucro. Unde duplicis generis distinguendæ sunt figuræ,

aliæ nempe vacuæ, ut panis et vinum quæ obtulit Melchisedech, manna in deserto, panes propositionis in antiqua Lege, quibus figurabatur Eucharistia ; et aliæ plenæ, quæ continent rem quam repræsentant : hujus generis sunt species eucharisticæ. Non mirum ergo si Patres eas sæpe vocaverint figuram, typum, signum, etc. præsertim cum prævidere non potuerint Sacramentarios in decursu sæculorum eis abusuros, ut cavillationes adversus præsentiam realem congererent.

Item sancti Patres hæc affirmare potuerunt, absque læsione catholici dogmatis :

1° Corpus Christi idem non esse in Eucharistia ac fuit in sinu B. Virginis, in vita, in cruce, hoc de solo statu ejus intelligendo ;

2° Illud spiritualiter manducandum esse, id est realem ejus susceptionem absque dispositionibus internis non prodesse, sed e contra granditer obesse ;

3° Panem benedictum non esse corpus Christi, illud intelligendo de pane oblato, sed nondum consecrato, vel de eulogiis seu pane benedicto qui omnibus in signum unionis distribuitur, et olim solis non communicantibus dabatur : lato sensu dicitur sacramentum vel sacramentale ;

4° Si quandoque dicant corpora nostra corpore Christi nutriri, vesci, augeri, etc. id eo accipiendum esse sensu quo corpus Christi suscipitur, manducatur, tangitur, frangitur, portatur, etc. id est ratione specierum quibus involvitur.

His præmissis, textus SS. Patrum a Calvinianis nobis objecti facile explicantur ; v. g. sequentes.

1° Tertull. adversus Marcionem, l. 1, cap. 14 : « Ille » quidem (Christus) usque nunc nec aquam reprobavit » Creatoris qua suos abluit ; nec oleum quo suos ungit ; » nec mellis et lactis societatem qua suos infantat ; nec » panem quo corpus suum repræsentat ; etiam in sacra- » mentis propriis egens mendicitatibus Creatoris. Item, » ibid. l. 3, cap. 19 : Sic Deus in Evangelio quoque ves- » tro revelavit, panem corpus suum appellans, ut et hinc » jam eum intelligas corporis sui figuram pani dedisse,

» cujus retro corpus in panem Prophetes figuravit , ipso  
 » Domino hoc sacramentum postea interpretaturo. »  
 Propheta hic indicatus est Jeremias, qui, xi, 19, de Christo prophetans, dixit : *Mittamus lignum in panem ejus, videlicet in corpus.*

2° S. Ambros. de Officiis, l. 1, cap. 48 : « Imago est in  
 » Evangelio, veritas in cœlestibus... hic in imagine ( *offertur Christus* ), ibi in veritate, ubi apud Patrem pro  
 » nobis quasi advocatus intervenit. » Et de Sacramentis,  
 lib. 4, cap. 4 : « Similitudinem pretiosi sanguinis bibis, ut  
 » nullus horror cruoris sit, et pretium tamen operatur redemptionis. » Conveniens quippe erat ut corpus et sanguis Christi in imagine et sub aliqua similitudine nobis darentur, et non in naturali statu qui horrorem excitasset.

3° S. Aug. Serm. 272, ad infantes baptizatos loquens, ait : « Quod videtis, panis est et calix; quod vobis etiam  
 » oculi vestri renuntiant : quod autem fides vestra possit  
 » tulat instruenda, panis est corpus Christi, et calix sanguis Christi... Quare ergo in pane? Nihil hic de nostro  
 » offeramus, ipsum Apostolum identidem audiamus, qui,  
 » cum de isto sacramento loqueretur, ait : *Unus panis,*  
 » *unum corpus multi sumus* ; intelligite et gaudete ; unitas,  
 » veritas, pietas, charitas. » Probat S. Doctor symbola eucharistica sapienter in pane et vino constituta fuisse : ipsius autem verba a Sacramentariis allegata magis nobis prosunt quam obsunt.

*Obj.* 2°. Nonum et decimum sæculum densissimis tenebris erant involuta : ergo non repugnat fidem Ecclesiæ circa naturam Eucharistiæ eo tempore mutatam fuisse.

*R. Nego conseq.* Nam 1° multa existunt Patrum et Doctorum testimonia antecedentia, quæ præsentiam realem clare exprimunt. 2° Licet non inmerito dicatur illa sæcula ignorantiae tenebris fuisse obsita, plurimi tamen tunc floruerunt summi pontifices, episcopi et abbates sanctitate et scientia conspicui, inter quos S. Udo, S. Mayeulus et S. Odilo abbates Cluniacenses, S. Dunstanus et S. Odo archiepiscopi Cantuarienses, Hincmarus archiepiscopus Rhemensis, Fulbertus episcopus Carnu-



tensis, Paschasius Radbertus jam citatus, Rabbanus archiepiscopus Moguntius, Ratramnus monachus Corbeien-  
sis, etc. Tres posteriores de sacra Eucharistia scripserunt,  
et præsentiam realem agnoverunt, saltem Paschasius et  
Rabbanus : de Ratramno magis dubitatur ; plerique ta-  
men affirmant obscuriora ipsius verba cum fide præsen-  
tiæ realis conciliari posse. Vide *P. Mabillon*, Annal. Be-  
ned. t. 3. 3° Durantibus his sæculis, multa celebrata sunt  
concilia inter quæ octavum generale ; error Prædestina-  
tionum pluries damnatus est : ergo similiter error circa  
Eucharistiam proscriptus fuisset. 4° Eo tempore celebres  
floruerunt scholæ, v. g. Turonibus, Carnuti, Fuldæ in  
monasterio Beccensi, etc. Si præfata mutatio locum ha-  
buisset, numquid magistri et discipuli eam non advertis-  
sent ? 5° Plures existebant sectæ in Oriente, ab Ecclesia  
Romana separatæ, quæ hujus generis innovationem certe  
non admisissent : attamen omnes præsentiam realem ag-  
noscunt : ergo.

*Inst.* Usus communicandi sub utraque specie, praxis  
utendi pane fermentato ad consecrationem, mos jeju-  
nium ante vespas non solvendi insensibilem et tamen  
gravem subierunt mutationem, ut ex hodierno usu pa-  
tet : ergo *a pari* et fides circa Eucharistiam mutari potuit.

*R. Nego conseq. et paritatem.* Rationes disparitatis sunt :  
1° quod in exemplis allatis ageretur tantum de disciplina  
quæ, juxta omnes, varias subire potest mutationes, non  
ita fides circa dogma catholicum ; 2° vestigia istiusmodi  
mutationum sunt manifesta : assignatur tempus quo ve-  
tus disciplina adhuc vigeat ; loca in quibus etiam nunc  
exstat, nempe apud Græcos qui in pane fermentato con-  
secrant, sub utraque specie communicant, et jejunium  
ante vespas non solvunt. Nihil horum existit relative  
ad dogma præsentiae realis : ergo nulla est paritas.

*Solvuntur objectiones ex ratione petitæ.*

*Obj.* 1°. Præsentia realis evidenter repugnat : ergo ad-  
mitti non potest.

*R. Nego ant.* 1° Enim quod est evidens, cunctis homi-



nibus ratione præditis et in materia versatis, tale videtur : at innumeri homines doctissimi et in scientia theologica versatissimi non judicarunt præsentiam realem evidenter repugnare, siquidem eam firmiter crediderunt. 2º Ideo affirmatur præsentiam realem repugnare, quia modus ejus existentiae non percipitur : sed multa sunt in mundo quorum certissima est existentia, licet modus existendi nos prorsus lateat, ut in tractatu de Vera Religione ostendimus : ergo *a pari*, etc. 3º Quod Deus certo revelavit, repugnare non potest : atqui præsentiam realem Deus certo revelavit, *ut invicte probavimus*, licet modum divinae illius præsentiae non manifestaverit : ergo quælibet rationis repugnantiae statim repelli debent tanquam meræ argutiae.

*Inst. 1º.* Deus revelare non potest absurda : atqui dogma præsentiae realis multa complectitur absurda, v. g. idem corpus esse simul in cælo et in terra, in omnibus hostiis consecratis et in singulis hostiarum partibus, corpus extensum fieri simplex vel adeo parvum ut sensibus sit impervium. Ergo.

*R. Nego min.* Demonstrandum enim foret dogma præsentiae realis absurda continere : porro adversarii id nunquam demonstrabunt. Ad hoc quippe necesse esset ut accurate determinarent quid sit materia, quid sint loca, quid Deus possit circa præsentiam corporum in locis. Fieri quidem non potest ut corpus naturale reducatur, servatis legibus physicis, ad minimum punctum, vel in pluribus simul adsit locis : sed quis negabit hoc omnipotenti Deo possibile esse? Cunctis igitur impossibilitatibus quas fingunt hæretici et increduli semper invicte respondemus, dicentes : Nescitis quid sit corpus in ordine supernaturali, corpus glorificatum, corpus in statu sacramentali ; locorum naturam, materiae essentiam ignoratis : qua ergo fiducia affirmare audetis præsentiam realem potentiae Dei repugnare?

Certum est Deum omnibus locis et totum singulis locorum partibus simul præsentem esse, animam nostram cunctis corporis nostri partibus integram præesse, vocem

coram multitudine prolata in auribus omnium audientium eodem instanti totam esse : quomodo hæc fiant, non percipimus, et tamen ea negari posse, propter obscuritatem qua involvuntur, non arbitramur : ergo similiter præsentiam realem negare non debemus, ex eo quod ratio nostra ipsius modum non percipiat.

D. *de Lignac*, qui successive fuit apud patres societatis Jesu et apud presbyteros Oratorii quos etiam deseruit, in opere dicto, *La présence corporelle de l'homme prouvée possible en plusieurs lieux à la fois par les principes de la saine philosophie*, fingit hypothesim in qua corpus Christi, ex Maria natum et crucifixum, idem in multis locis simul esse possit.

Supponit 1° eandem animam multis corporibus individuís simul uniri posse, sicut multis partibus ejusdem corporis præest. Supponit 2° ex omnibus partibus quibus corpus Christi conflatur, quasdam partes omnipotentia Dei extrahi, non per sectionem, sed per accuratam *deduplicationem* : tunc habebitur corpus organicum, animæ et divinitati Christi unitum, ex Maria natum, etc. Porro hæc *deduplicatio* ope divina iterari potest usque ad infinitum, et sic præsentia corporis Christi multiplicari ratione locorum.

D. *de Pressy*, Bononiensis episcopus, alteram excogitavit hypothesim quæ compendiose sic se habet. Supponit in corpore Christi innumera existere corpuscula, invisibilia, organis instructa, animæ Christi et divinitati æqualiter unita, licet singula sint completa. Supponit iterum hujusmodi corpuscula, per singulas hostias et singulas hostiarum partes ad exhibendum corpus Christi idoneas, in ipso consecrationis momento distribui. In hac suppositione, dici potest de singulis hostiis consecratis et singulis earum partibus sensibilibus, Hoc est verum Christi corpus, ex Maria natum, una cum anima Christi et divinitate Verbi.

Minime tamen illi auctores naturam mysterii explicare sibi proponunt, sed tantum ostendere illud rationi non evidenter repugnare : si enim humanum ingenium mons-

trare valeat idem corpus in multis locis a se longe dissitis simul existere posse, *a fortiori* infinita Dei sapientia innumeros excogitare potest modos hoc ineffabile adimplendi mysterium.

Supremæ igitur auctoritati Dei præsentiam realem certo revelantis plenissime fidentes, hoc venerandum et sanctissimum dogma immobili fide teneamus, de possibilitate ejus nihil curantes, neque de variis incredulorum dicteriis. In mente habeamus sequentia S. Aug. verba ad philosophos æterna damnatorum supplicia negantes directæ, quæ præsentia realis adversariis pariter conveniunt, de Civitate Dei, l. 21, cap. 3 : « Quod si respondeatur.... nullam esse carnem quæ dolere possit morique non possit, quid aliud dicitur, nisi quod sensu corporis homines et experientia collegerunt! Nullam namque carnem nisi mortalem sciunt, et hæc est eorum tota ratio, ut quod experti non sunt, nequaquam esse posse arbitrentur. »

Quando igitur Calvinistæ et increduli nobis objiciunt, in nostra doctrina corpus Christi manducari, conculcari, corrumpi, simul quiescere et moveri, seipsum portasse et manducasse in cœna institutionis, etc. hæc omnia et alia quæcumque ejusdem generis sola rei expositione, prout fecimus, evanescunt. Corpus Christi in statu sacramentali idem est quidem numerice ac fuit in statu naturali, sed non ejusdem est conditionis, ac proinde ab uno statu ad alterum non valet conclusio : attamen omnia adversariorum objecta ex ratione petita, hoc vitio fundamentaliter laborant. Ea ipse solvit *Leibnitz*, licet Protestans, in libro cui titulus, *Exposition de la doctrine de Leibnitz*. Ergo nullius sunt roboris.

Gratias igitur Deo super inenarrabili dono ejus, II Cor. ix, 15; *Jesus... cum dilexisset suos qui erant in mundo, in finem dilexit eos*, Joan. xiii, 1; *Memoriam fecit mirabilium suorum misericors et miserator Dominus; escam dedit timentibus se*, Psal. cx, 4, et concil. Trid., sess. 13, cap. 2. Non solum gratia sua animas nostras reficere, sed et carnem nostram sua sanctissima carne mirabiliter nu-

triri voluit, sicque futuræ resurrectionis pignus et semen immortalitatis nobis præstitit.

## ARTICULUS SECUNDUS.

### DE MODO PRÆSENTIÆ REALIS.

Dogmate catholico adversus Calvinistas stabilito, omnes fatentur quamdam per consecrationem fieri mutationem, et Christum cum materia vel sub speciebus materiæ fieri præsentem : sed qua mutatione id contingat, quomodo Christus sit sub speciebus, quanto tempore et quo cultu sit prosequendus inquirendum est. Itaque in quintuplici paragrapho dicemus, 1° de transsubstantiatione; 2° de natura specierum post consecrationem; 3° de modo quo Christus est sub speciebus; 4° de duratione ejus præsentiae sub iisdem speciebus, et 5° de cultu ei debito in eo statu.

#### § I. — De transsubstantiatione.

Calvinistæ et increduli transsubstantiationem a præsentia reali non sejungunt, et fatentur, una admissa, alteram esse admittendam.

Lutherani, e contra, qui vere sunt Lutherani, non vero qui, sub nomine Lutheranorum, sunt rationalistæ, præsentiam realem semper retinuerunt, et mysterium transsubstantiationis pertinaciter negant; voluntque Christum esse in Eucharistia vel per impanationem, vel per consubstantiationem.

Impanatio, si existeret, esset unio hypostatica Christi cum pane, sicut unio Verbi divini cum homine; ita ut quemadmodum recte dicitur de Christo, *Hic homo est Deus*, sic pariter recte diceretur de pane consecrato, *Hic panis est Deus*. Quosdam Berengarii discipulos hanc sententiam habuisse creditur, et inter Lutheranos solus Oziander eam docuit.

Alii vero Lutherani, post antesignanum suum, admittunt consubstantiationem, quæ in eo sita est, ut corpus Christi, vi consecrationis, simul cum pane, vel sub pane,



vel in pane existat. Zuinglianis autem objicientibus corpus Christi in cœlo simul et in Eucharistia existere non posse, respondit Lutherus illud hypostatice unitum Verbo, ubique præsenti, etiam ubique existere. Qui hanc amplexi sunt sententiam, ut Brentius, Illyricus et alii in decimo sexto sæculo, dicti sunt Ubiquistæ. Post Lutheri mortem, discipuli ejus et præsertim Melanchton hanc doctrinam generaliter improbaverunt.

Omnes catholici velut dogma fidei tenent Christum esse in Eucharistia per transsubstantiationem, id est, per substantiarum panis et vini conversionem in corpus et sanguinem ejus.

## PROPOSITIO.

*Christus est in Eucharistia per transsubstantiationem.*

*Prob.* Illa propositio est de fide, probatur Scriptura sacra et traditione. 1° *Est de fide.* In synodo Romæ, anno 1079, contra Berengarium sub Gregorio VII celebrata, definitum est *panem et vinum substantialiter converti in corpus et sanguinem Christi*; apud Labbe.

Concilium Lateranense IV, anno 1215 celebratum, ait, canone 1, Labbe, t. 11, part. 1 : « De Christo cujus » corpus et sanguis in sacramento altaris sub speciebus » panis et vini veraciter continentur, transsubstantiatis » pane in corpus et vino in sanguinem potestate divina. »

Concilium Constantiense, præscribens ut quilibet de erroribus Wiclefistarum suspectus interrogetur, inter proponendos articulos, sequentem exprimit : « Utrum » credat quod, post consecrationem sacerdotis, in sacramento Altaris, sub velamento panis et vini, non sit panis materialis et vinum materiale, sed idem per omnia » Christus qui fuit in cruce passus, et sedet ad dexteram » Patris. »

Concil. Florent. in Decreto ad Armenos : « Ipsorum » verborum virtute substantia panis in corpus Christi, » et substantia vini in sanguinem convertuntur. »

Tandem concil. Trid. sess. 13, can. 2 : « Si quis dixerit in sacrosancto Eucharistiæ sacramento remanere,



» substantiam panis et vini una cum corpore et sanguine  
 » Domini nostri Jesu Christi, negaveritque mirabilem illam  
 » et singularem conversionem totius substantiæ panis in corpus  
 » et totius substantiæ vini in sanguinem,  
 » manentibus duntaxat speciebus panis et vini, quam quidem  
 » conversionem catholica Ecclesia aptissime transsubstantiationem  
 » appellat : anathema sit. » Ergo 1°.

2° *Prob. Scriptura sacra, nempe verbis institutionis : Hoc est corpus meum ; Hic est sanguis meus.* Hæc enim verba, *ex dictis in primo articulo*, non figuratam, sed realem significant præsentiam : unde intelligenda sunt vel de *impanatione*, vel de consubstantiatione, vel de transsubstantiatione : atqui duo priora dici nequeunt.

1° Intelligi non possunt de *impanatione*. Posita enim absurda *impanationis* hypothesi, panis et corpus, vinum et sanguis Christi hypostatice unirentur, sicut divinitas et humanitas in Christo : utraque igitur substantia simul existeret sicut utraque natura, divina et humana, in Christo : atqui verba Christi, *Hoc est corpus meum, Hic est sanguis meus*, utramque substantiam non exprimunt, *ut patet*. Absurde dictum fuisset, humanitatem Christi ostendendo, *Hoc est divinitas* : ergo *a pari* de pane et vino, naturam suam retinentibus, absurde diceretur : *Hoc est corpus Christi ; Hic est sanguis Christi*. Ergo 1°.

2° Non de consubstantiatione. Nam similiter et *a fortiori* utraque simul existeret substantia : verba igitur Christi significarent, *hic*, id est, *in hoc vel sub hoc pane est corpus meum, in hoc vel sub hoc vino est sanguis meus* : atqui talis sensus evidenter est contortus, usui communi contrarius et sermonis subversio. Si quis enim aurum in frustulo panis occultasset, et panem ostendendo diceret, *hoc est aurum*, a nemine intelligeretur : ¶ ergo *a pari* Christus insulse locutus fuisset, quod est impium. Unde ipsi Calvinistæ fatentur prædicta verba de præsentia reali intelligi non posse quin simul de transsubstantiatione intelligantur. Nullius sunt ponderis exempla a Lutheranis allegata, v. g. dici posse, ostendendo dolia vel lagenas, *Hoc est vinum ; Hoc est cerevisia*, etc. quia,

ex usu recepto, vas pro liquore contento nominari solet : nihil simile est autem in pane et vino relative ad corpus et sanguinem Christi : ergo 2°, etc. aliunde, etc. ergo, etc. Ergo 2°.

3° *Traditione*. Testimonia enim S. Gregorii Nysseni, S. Cyrilli Hierosolymit. S. Ambrosii, S. Cæsarii Arelat. S. Joannis Damasceni superius relata, transsubstantiationem evidenter exprimunt vel supponunt, et in sensu Lutheranorum intelligi non possunt, *ut unicuique attendenti patet*. Omnes liturgiæ orientales et occidentales, ut testatur P. *Le Brun*, habent orationem qua sacerdos postulat ut oblata fiant corpus et sanguis Domini nostri Jesu Christi : statim atque errores adversus præsentiam realem prodierunt, concilia eos profligantia mysterium transsubstantiationis docuerunt, *ut ostendimus* : ergo non minus constans fuit traditio circa transsubstantiationem quam circa præsentiam realem. Ergo 3°, etc. aliunde, etc. Ergo.

Qui hanc quæstionem fusius tractatam videre cupierit, adeat opera jam citata, *La Perpétuité de la foi, Discussion amicale, Lettre du P. Scheffmacher, Witasse, Tournely*, etc.

*Solvuntur objectiones.*

*Obj. 1°*. In materia fidei omnis fugienda est novitas : atqui vox transsubstantiatio nova est : ergo non adhibenda est.

*R. Distinguo min.* Vox transsubstantiatio nova est quoad syllabas, *concedo* ; quoad rem significatam, *nego min.* Etenim vox ipsa in primis traditionis monumentis non reperitur : sed res per hanc vocem designata semper credita est ; sæpe enim Patres utuntur verbis, *convertere, transmutare, corpus et sanguinem efficere* : porro illæ locutiones mutationem naturæ exprimunt. Merito igitur vox transsubstantiatio usurpata est, ut effectus consecrationis clarius et brevius exprimeretur ; sicut in concilio Nicæno I, vox *consubstantiatio* inventa est, ut natura Verbi divini accuratius redderetur. Ergo.

*Inst.* SS. Patres pluribus in locis dicunt *naturam panis, substantiam panis*, post consecrationem remanere. Ergo.

*R. Dist. ant.* Et per naturam aut substantiam naturales qualitates intelligunt, *concedo*; secus, *nego*. Revera plures sancti Patres species eucharisticas, etiam post consecrationem, vocaverunt naturam vel substantiam panis aut vini. Verum ex contextu vel ex aliis eorundem auctorum textibus, constat eos per hujusmodi voces Eucharistiæ applicatas, qualitates naturales panis et vini intelligere, scilicet colorem, saporem, figuram, etc. V. g. obijciuntur hæc verba Gelasii papæ, Bibliotheca Patrum : « Certe sacramenta quæ suminus corporis et sanguinis » Domini, divina res est.... Et tamen esse non desinit » substantia vel natura panis et vini. » Sed 1º Melchior Canus, Bellarminus, Baronius aliique doctissimi viri, contra Sirmundum, Petavium et alios scriptores, contendunt librum de Duabus naturis, ex quo citata extracta sunt verba, non esse Gelasii. 2º Auctor hujus libri, de sacris symbolis ibidem loquens, ait : « In divinam trans- » eunt, sancto Spiritu perficiente, substantiam, perma- » nente tamen in sua proprietate natura, et per eadem » (*symbola*) divinæ efficimur consortes naturæ. » Ergo per naturam sensibiles panis et vini qualitates intelligit. Alii textus qui obijci solent eadem facilitate explicari possunt. Ergo.

*Obj.* 2º. Testimonium sensuum universale, constans et invincibile, certum est veritatis argumentum : atqui sensus nostri universaliter, constanter et invincibiliter testantur panis et vini materiam post consecrationem remanere : ergo.

*R. Nego minorem.* Testimonium enim sensuum circa materiæ et vini existentiam, post consecrationem, non est invincibile, siquidem datur revelatio qua reformatur : unde merito cum Ecclesia dicimus : *Si sensus deficit, ad firmandum cor sincerum, sola fides sufficit.*

*Inst.* 1º. Naturali propensione ferimur ad judicandum, non solum panis et vini sensibiles qualitates, sed et sub-

stantiam post consecrationem existere : ergo Deus , qui est auctor naturæ , nos decipit.

*R. 1°. Nego ant.* Naturali enim propensione non ferimur ad judicandum de intrinseca corporum natura, aut saltem, in ferendo hujusmodi judicio, testimonio sensuum imprudenter niteremur, cum sensus essentiam materiæ attingere non valeant.

*R. 2°. Nego conseq.* Deus quippe ingens dilectionis suæ erga homines prodigium operari volens, revelavit naturam panis et vini per consecrationem transmutari : ergo reipsa non decipit. Si contingat hostiam consecratam reperiri coram homine consecrationem ignorante vel eam non credente, qui judicet panem ibi adesse, est error accidentalis, non magis in Deum refundendus quam error eorum qui videntes Christum, et divinitatem ejus nescientes, judicabant esse purum hominem. Ergo.

*Inst. 2°.* Qualitates sensibiles per se subsistere non possunt, sed indigent subjecto cui inhæreant : ergo substantia panis et vini, etc.

*R. Dist. ant.* Qualitates sensibiles per se subsistere non possunt, naturaliter, *concedo*; supernaturaliter et ex omnipotentia Dei, *nego ant.* Apud omnes enim constat qualitates sensibiles per se naturaliter subsistere non posse; eas nobis repræsentare non possumus sine subjecto cui inhæreant. Sed quid in alio ordine et ex omnipotentia Dei fieri possit, ignoramus. Ergo.

#### SCHOLIUM.

Catholici, dogma transsubstantiationis admittentes, non sibi consentiunt circa divinæ illius operationis naturam. Scotistæ volunt panem et vinum in instanti consecrationis annihilari, et corpus ac sanguinem Christi e nihilo educi seu produci; ideo hanc conversionem vocant productivam. Thomistæ vero contendunt corpus et sanguinem Christi e nihilo non educi, sed loco panis et vini substitui, seu adduci; sicque transsubstantiationem appellant *productionem adductivam*.



Sententia Scotistarum, licet fidei non adversa, doctrinæ catholicæ minus tamen congruere videtur. Nam 1º in eorum systemate, duplex esset divina operatio : una ad panis et vini annihilationem, et altera ad corporis et sanguinis Christi e nihilo productionem : verba autem consecrationis unicam indicant operationem. 2º Ex SS. PP. et conciliis, panis debet converti in corpus et vinum in sanguinem Christi : at, in opinione Scotistarum, vera non existeret substantiarum conversio quam transsubstantiationem vocamus, sed substitutio. 3º Corpus in Eucharistia existens idem est numerice ac illud quod ex Maria natum, fuit flagellatum, crucifixum, mortuum, sepultum, suscitatum, etc. Verum quomodo corpus e nihilo productum sic recte diceretur? Probabilior est igitur sententia Thomistarum. Sed fidem divina auctoritate stabilitam firmiter teneamus, et difficultates vel argutias per humanam philosophiam procreatas parum curemus, sequentium Magistri sententiarum verborum memores, l. 4, dist. 11 : « Si quis modum quo id fieri possit quærit, » breviter respondeo : *Mysterium fidei salubriter credi potest; investigari salubriter non potest.* »

## § II. — De natura specierum panis et vini post consecrationem.

Ecclesia, definiendo totam substantiam panis in corpus et totam substantiam vini in sanguinem Christi converti, *remanentibus duntaxat speciebus panis et vini*, quid sint illæ species non dixit. Philosophi vero Christiani et theologi eas explicare conati sunt et in varias abierunt sententias : præcipuas tantum breviter referemus, nullam, pro more nostro, amplexuri.

1ª est eorum qui dicunt accidentia panis et vini in corpus Christi transire, et in eo subsistere. Sic corpus Christi qualitates suas naturales et gloriosas, juxta quas nec frangi nec pati potest, retinens, qualitates panis et vini induit, et sub eo respectu est album, rotundum, frangibile, etc. Quando autem hostia consecrata dividitur, Christus, juxta ens suum naturale, non frangitur,



sed totus a seipso separatur et totus est sub singulis specierum partibus. Reipsa tangitur, manducatur et nobis incorporatur, juxta ens suum sacramentale. Hanc sententiam docuerunt 1° Anastasius Sinaita, in septimo sæculo in opere dicto græce οδευς, latine *Conductor*, adversus Eutychianos; 2° Guitmundus, Aversanus episcopus, celeberrimus Berengarii adversarius; 3° plures alii viri doctrina et sanctitate conspicui eidem sententiæ subscripserunt, tum Berengarii tempore, tum in posterioribus sæculis. *Collet* arbitratur eam plus imaginationem quam rationem lædere, et ideo commendandam esse; quia 1° a multis sanctis admissa est; 2° tempore Berengarii recepta fuisse videtur; 3° antiquorum Ecclesiæ doctorum verbis magis congruit; 4° recentiori doctrina accidentium absolutorum, de quibus infra, est clarior.

II<sup>a</sup> est Petri *Abeilard*, qui tenebat Eucharistiæ accidentia in aere corpus Christi circumdanti residere. Hanc opinionem inter errores *Abeilard* computat S. Bernardus, et S. Th. 3 parte, q. 77, art. 1, concl. ait, quosdam dicere accidentia in aere circumstante tanquam in subiecto residere, eosque refellit; 1° quia aer hujusmodi accidentium non est susceptivus; 2° quia, cum movetur aer, accidentia moverentur, quod tamen falsum est; 3° quia accidentia de subiecto in subiectum non trans-eunt; *Accidens enim numerum et individuitatem accepit a subiecto*. 4° « Quia cum aer non spoliatur accidentibus » propriis, simul haberet accidentia propria et aliena. » Nec potest dici quod hoc fiat miraculose virtute consecrationis, quia verba consecrantis hoc non significant, » quæ tamen non efficiunt nisi suum significatum. » Ibid.

III<sup>a</sup> est Guillelmi, abbatis S. Theodorici, S. Bernardi amici, qui profitebatur se nescire in quo præfata Eucharistiæ accidentia residerent; ex hypothese quod sint, ad opinandum inclinatur ea esse in corpore Christi, quamvis hæc opinio ipsi videatur contra *omnem sæcularis philosophiæ rationem et intellectum*: Monito in opusculum 11 S. Bernardi, n. 6. Tenebat igitur naturam accidentium

prorsus ignorari. Plures huic sententiæ adhæserunt.

IV<sup>a</sup> est Durandi a S. Porciano, episcopo Aniciensi et postea Meldensi, in initio decimi quarti sæculi, qui contendebat nullam substantiam in aliam converti posse, nisi aliquid prioris substantiæ in posteriori remaneat, alioquin non esset conversio, sed unius annihilatio et alterius creatio : panem autem et vinum in Eucharistia non penitus destrui per consecrationem, sed aliquid remanere animæ Christi et divinitati intime unitum, in quo eædem utriusque substantiæ qualitates sensibiles perseverabant.

Petrus *Cailly*, parochus Cadomi, et in universitate illius urbis philosophiæ professor, Durandi opinionem adoptavit et late extendit, in opusculo cui titulus, *Durand commenté, ou l'Accord de la philosophie avec la théologie, touchant la transsubstantiation de l'Eucharistie*. Multum laborabat ut Protestantes ad fidem catholicam reduceret, et sibi persuasit Durandi systema, explicatum et extensum, ad delenda eorum præjudicia circa dogma transsubstantiationis idoneum esse; verum D. *de Nesmond*, episcopus Bajocensis, non ita judicavit: per instructionem pastorem, diei 3 martii 1701, septemdecim propositiones ex opusculo excerptas proscripsit tanquam « falsas, temerarias, erroneas, scandalosas, » concilio Tridentino injurias, destructivas præsentiae » realis corporis Christi in Eucharistia, in hæresim circa » transsubstantiationem inducentes. » *Cailly* huic censuræ humiliter acquievit eamque ipse coram parochianis suis promulgavit.

V<sup>a</sup> est Cartesii, qui supponit, 1<sup>o</sup> inter panis et vini particulas aliqua reperiri spatiola, aere vel alia materia plena; 2<sup>o</sup> hanc materiam ad substantiam panis et vini non pertinere; 3<sup>o</sup> vi consecrationis substantiam panis et vini in corpus et sanguinem Christi converti, et materiam in poris earum contentam non desinere; 4<sup>o</sup> accidentia panis et vini in ea materia perseverare, et eadem nobis apparere.

Sed auctor non explicat quid sit illa materia a substantia panis et vini distincta, per se subsistens, quæ, sensibiles panis et vini qualitates habens, non tamen est panis nec vinum. Pluribus aliis vitiis laborat illud systema, et ideo ab omnibus rejicitur.

VI<sup>a</sup> est Petri *Varignon*, celebris professoris matheseos in collegio Mazarinæo, nominati anno 1688. In opere inscripto, *Démonstration de la possibilité de la présence réelle de Jésus-Christ dans l'Eucharistie*, supponit, 1<sup>o</sup> Deum ad verba consecrationis singulas hostiæ particulas etiam insensibiles in corpus organisi instructum formare; 2<sup>o</sup> animam Christi singulis hujusmodi corpusculis unire, sicque sub singulis hostiæ particulis integrum Christum delitescere; 3<sup>o</sup> moleculas materiæ insensibiles mutationem subeuntes, a situ respectivo quo panem constituebant non excidere, ac consequenter eisdem sensationibus occasionem præbere.

At, in ea hypothese, corpus Christi non esset unicum, nec idem in Eucharistia quod fuit in Maria, in cruce, in tumulo; nec videtur in quo accidentia panis et vini residerent.

VII<sup>a</sup> est *P. Magnan*, ordinis S. Francisci a Paula, qui vult post consecrationem nihil esse in Eucharistia præter corpus Christi insensibile, et Deum, nullo mediante corpore, easdem in nobis producere sensationes quæ per panem et vinum immittebantur. Unde species sacramentales nihil sunt a parte rei.

Illa autem hypothesis pluribus obnoxia est difficultatibus. 1<sup>o</sup> Eucharistia non esset realiter, sed tantum apparenter signum sensibile. 2<sup>o</sup> Non videtur quomodo esset signum permanens; nam, pyxide occlusa vel in tabernaculo deposita, nullæ essent apparentiæ, ergo nec sacramentum; et tamen, aperta eadem sacra pyxide, rediret sacramentum, cum species de novo apparerent. 3<sup>o</sup> Tunc falsa esse viderentur verba concilii Trid. *manentibus duntaxat speciebus panis et vini*. 4<sup>o</sup> Species Eucharisticæ mutari, adulterari et corrumpi non possent,

quod experientiae et sensui catholicorum communi adversatur.

VIII<sup>a</sup> est S. Th. qui, in 3 p. q. 77, art. 2, concl. ait expresse accidentia eucharistica *esse sicut in subjecto in quantitate dimensiva panis et vini remanente*, et quantitatem sine subjecto existere, idque Deum sua omnipotentia facere posse. Plerique theologi huic adhærent sententiae quæ dicitur accidentium absolutorum, eamque admittendam esse sequentibus momentis probatur : 1<sup>o</sup> auctoritate concilii Constant. in quo, sess. 8, damnata est hæc propositio Wiclefi : *Accidentia panis non manent sine subjecto* ; 2<sup>o</sup> ex verbis concilii Trid. jam citatis, *Manentibus duntaxat speciebus panis et vini* ; 3<sup>o</sup> auctoritate S. Thomæ et consensu omnium fere theologorum, a quo recedere periculosum est ; 4<sup>o</sup> praxi Ecclesiæ, quæ ubique terrarum cantat : *Sub diversis speciebus, signis tantum et non rebus, latent res eximiae* ; 5<sup>o</sup> ratione. De natura substantiæ non est ut per se subsistat, siquidem humanitas Christi absque divinitate eam perficiente nunquam fuit : ergo a pari de essentia accidentis non est ut in subjecto resideat.

Hæc ultima sententia sola admitti potest et habenda videtur ut omnino certa.

§ III. — De modo quo Christus est sub speciebus panis et vini.

Quæstio est an Christus sit totus sub utraque specie et sub singulis uniuscujusque speciei partibus.

#### PROPOSITIO.

*Christus est totus sub utraque specie et sub singulis uniuscujusque speciei partibus, saltem separatione facta.*

*Prob.* Hæc propositio est de fide ; probatur Scriptura sacra, praxi Ecclesiæ et ratione.

1<sup>o</sup> *Est de fide.* Traditur in Decreto ad Armenos, his verbis : « Totus Christus continetur sub specie panis, et totus sub specie vini ; sub qualibet quoque parte hostiæ consecratæ et vini consecrati, separatione facta, to-



» tus est Christus. » Et in concil. Trid. sess. 13, can. 3, sic definitur : « Si quis negaverit, in venerabili sacramento » Eucharistiæ, sub unaquaque specie et sub singulis cu- » jusque speciei partibus, separatione facta, totum Chri- » stum contineri : anathema sit. » Ergo 1°.

2° *Probatur Scriptura sacra.* I Cor. xi, 27 : *Quicumque manducaverit panem hunc, vel biberit calicem Domini indigne, reus erit corporis et sanguinis Domini.* Apostolus non dicit, *quicumque manducaverit et biberit*, sed *manducaverit, vel biberit* : sensus est disjunctivus, et tamen pronuntiat absolute indigne manducantem vel bibentem, fieri reum corporis et sanguinis Domini. Ergo 2°.

3° *Praxi Ecclesiæ*, quæ Christum semper venerata est sub utraque specie et sub singulis partibus separatis, fragmenta hostiæ divisæ fidelibus præbens et calicem consecratum dividens, totum Christum tradere judicabat. Ergo 3°.

4° *Ratione.* Christus resurgens ex mortuis jam non moritur : igitur dividi non potest. Unde ubi est corpus, ibi est sanguis et anima. Divinitas autem humanitati hypostatice unita, ab illa nunquam separatur : ergo 4°; aliunde, etc. Ergo.

Dixi, *saltem separatione facta*, et hoc fides docet, *ut ostendimus.* De fide vero non est totum Christum esse sub singulis specierum partibus ante divisionem, sed omnino certum videtur. Nam 1° concil. Trid. sess. 13, cap. 3, ait in fine : « Totus et integer Christus sub panis » specie et sub quavis ipsius speciei parte, totus idem » sub vini specie et sub ejus partibus existit. » Ibi nullam facit mentionem separationis; eam vero in canone 3 expressit, ne liberas scholasticorum sententias anathemate percuteret, ut narrat Palavic. l. 12, cap. 1, n. 4. 2° Totus Christus est sub singulis partibus, divisione facta : ergo et ante divisionem ; repugnat enim solam divisionem corpus Christi in parte in qua non erat producere ; alioquin laicus vel femina corpus ejusdem Christi producere et multiplicare posset, divisiones multiplicando. Ergo.



Non ideo multiplicia admittenda sunt corpora Christi sub unaquaque specie; Christus enim non est in specie modo naturali seu circumscriptive, ut aiunt theologi, sed modo sacramentali et definitive; non eo modo quo corpora naturalia sunt in locis, bene vero eo modo quo anima est in corpore: tota singulis corporis partibus unita est, et, si Deus vellet, tota uniretur partibus a se divisis et sejunctis, sine sui ipsius multiplicatione. Sic et corpus Christi et totus Christus sub singulis specierum partibus existit, sive post divisionem, sive etiam ante divisionem.

*Notandum est*, solum corpus esse sub specie panis, vi verborum, et solum sanguinem sub specie vini: nam, ut ait S. Th. verba id tantum per consecrationem producunt quod significant. Sed quia Christus non dividitur, ubi est corpus ejus, ibi est sanguis, anima et divinitas, per concomitantiam.

Quoniam Christus non est in Eucharistia sicut in loco, sequitur illum non moveri secundum se, sed tantum ratione specierum, sicut anima nostra ratione corporis: actiones ab organis sensuum pendentes exercere non potest, nisi consuetis hujus sacramenti regulis derogetur; verum nihil obstat quominus alias actiones libere exerceat, v. g. intelligat, visione beatifica gaudeat, etc.

#### § IV. — De duratione præsentiæ Christi sub speciebus panis et vini.

Primum tenuit Lutherus, cum tota Ecclesia, prolatis verbis consecrationis statim præsens esse corpus Christi, et permanere quamdiu species manent integræ. Verum anno 1536, cum de pace inter varias Reformationum sectas ageretur, *Bucer*, celebris Lutheri discipulus, Sacramentarios sibi conciliare volens, dixit Christum non diu permanere in Eucharistia, sed in usu tantum adesse. Hoc concessit Lutherus, et pace verbis inita, non fide, Lutherani et Zuingliani communem celebraverunt cœnam in signum communis fidei circa hoc sacramentum, quod evidenter falsum erat, ut experientia monstravit.

Postea docuerunt Lutherani, auctore Chemnitio, corpus Christi in sacramento manere durante cœnæ actione, dum scilicet panis benedicitur, frangitur, distribuitur, manducatur et ad absentes immediate defertur, non vero ubi in pyxide asservatur.

## PROPOSITIO.

*Christus est sub speciebus panis et vini modo permanente.*

*Prob.* Propositio est de fide; probatur Scriptura sacra, praxi Ecclesiæ et ratione.

1° *Est de fide*; definita enim fuit in concil. Trid. sess. 13, can. 4, his verbis : « Si quis dixerit, peracta consecratione, in admirabili Eucharistiæ sacramento non esse corpus et sanguinem Domini nostri Jesu Christi, sed tantum in usu, dum sumitur, non autem ante vel post, et in hostiis seu particulis consecratis quæ post communionem reservantur vel supersunt, non remanere verum corpus Domini : anathema sit. » Ergo 1°.

2° *Prob. Scriptura sacra.* Christus enim dixit, ostendendo panem consecratum : *Accipite et comedite; hoc est corpus meum*; et, ostendendo vinum benedictum : *Bibite ex hoc omnes; hic est enim sanguis meus novi testamenti.* Hæc verba, *hoc est, hic est enim*, indicant corpus et sanguinem Christi sub speciebus panis et vini jam existere, ac proinde ante usum. Unde concil. Trid. sess. 13, cap. 3 : « Reliqua sacramenta tunc primum sanctificandi vim habent, cum quis illis utitur : at in Eucharistia ipse sanctitatis auctor ante usum est; nondum enim Eucharistiam de manu Domini Apostoli susceperant, cum vere tamen ipse affirmaret corpus suum esse quod præbebat. » Ergo 2°.

3° *Praxi Ecclesiæ.* 1° In primis Ecclesiæ sæculis fideles sacram servabant Eucharistiam in domibus suis, ut ea privatim vescerentur, ut constat ex Tertull. ad Uxorem, l. 2, cap. 5 : « Non sciet maritus (infidelis) quid secreto ante omnem cibum gustes; et si sciverit,

» panem , non illum credit esse quid dicitur. » Ex S. Basilio qui , Epist. 93, alias 289, de frequenti corporis et sanguinis Domini susceptione tractans , testatur ex antiquo more fideles consuevisse, tempore persecutionis, defectu sacerdotis vel diaconi, communionem propriis manibus sibi præbere; omnes monachos in desertis habitantes, ubi non habent presbyteros, Eucharistiam conservare, ut eam sibi administrarent; et sæculares idem fecisse Alexandriæ ac in Ægypto. 2º Illud sacramentum per presbyteros vel diaconos antiquitus deferabatur ad ægrotos sub nomine viatici, ut patet exemplo venerabilis Serapionis, a Dionysio Alexandrino apud Eusebium, Hist. l. 6, cap. 44, relato. 3º Juxta Græcorum liturgiam quæ S. Basilio attribuitur, et saltem est antiquissima, cunctis diebus jejunii in quadragesima, excepto sabbato, dicitur missa præsanctificationum, sicut fit apud nos die veneris Majoris hebdomadæ, id est, non consecratur, sed offertur et distribuitur hostia prius consecrata et reservata. Ergo 3º.

4º *Ratione.* Vi consecrationis corpus Christi realiter fit præsens sub specie panis, et sanguis sub specie vini: igitur sacramentum istud non consistit, sicut alia sacramenta, in actione transitoria, sed per se subsistit: si autem aliquo instanti realiter subsistat, nulla est ratio cur non subsisteret quamdiu species manent integræ: ergo 4º; aliunde, etc. Ergo.

*Hinc* 1º etiamsi hostia consécrata vel species vini a bestia sorberetur, in immunda loca caderet, etc. nihilominus Christus præsens esset, et tamen immunditiam non contraheret, nec aliquem experiretur dolorem; quia incorruptibilis et impassibilis est.

*Hinc* 2º Christus desinit esse in Eucharistia statim atque species ita corrumpuntur, ut, juxta consuetum loquendi modum, non videantur panis et vinum: tunc eo instanti, ex lege a Deo in institutione hujus sacramenti statuta, eadem speciebus substituitur materia quæ panis et vino corruptis naturaliter succederet. Hæc tamen substitutio, generaliter contingens, non magis est miraculosa

quam animarum creatio quæ fit quando nova formantur corpora.

*Hinc* 3° quoniam vinum cum alio vino saltem ejusdem speciei mixtum non corrumpitur, nisi tota massa corrumpatur, gutta pretiosi sanguinis in dolium vini immissa, suam retineret qualitatem, et totum vinum in dolio contentum aliquatenus redderet sacrum, ita ut usibus sanctis adhibendum foret, videlicet ad celebrandam missam et ad ablutiones in fine missæ, aut infantibus usum rationis non habentibus, vel adultis in gratia sanctificante constitutis et jejunis propinandum esset.

*Hinc* 4° qui sacras species retinet in ore donec dissolvantur, sacramentum non suscipit, nec proinde gratiam sacramentalem obtinet, quia Christus non manducatur, nisi species in stomachum trajiciantur. Ita, cum pluribus aliis, Ligorio, l. 6, n. 226. Unde qui moritur dum hostia est in ore ejus, gratiam non percipit.

*Notandum*, species per communionem susceptas non diu manere integras. Refert Card. de Lugo plures medicos a se Romæ consultos, putasse formulas lacis destinatas, intra minutum corrumpi, et magnam formulam, cum specie vini, intra medium quadrantem : hoc utrumque approbat, et censet in laico intra quinque *Pater* et *Ave* consummari, et in sacerdote postquam vestibus est exutus. Saltem post quadrantem, etiam in sacerdote, utraque species omnino corrumpitur, nisi forsan stomachus propter pituitam, senium, etc. sit debilis. Sic Ligorio, l. 6, n. 225.

Requirit tamen Continuator Tournely, « propter sacramenti reverentiam, ne laici ante quadrantem, sacerdotes vero ante mediæ horæ tempus ad vomitum se provocent. »

Cum sputa ex capite vel ex pectore communiter proveniant, multo minus timenda est profanatio quam in vomitu : cavendum nihilominus ad cautelam, ne statim emittantur, aut si necessitas incumbat, in linteo vel loco mundo deponantur. Post aliquas minutas nihil est timendum.



*Hinc* 5° particulæ vel minimæ, modo sensibiles, sedulo colligendæ et custodiendæ sunt, cum Christum realiter contineant : non tamen summa et inquieta adhibenda est vigilantia, quia Christus sacramentum Eucharistiæ instituendo, quædam illius fragmenta deperdenda prævidit et solummodo curam prudentem a nobis exigit.

§ V. — De cultu Christo in divina Eucharistia debito.

Lutherani, nolentes Christum esse in Eucharistia extra usum, et Calvinistæ præsentiam ejus realem negantes, contendunt nullum cultum huic sacramento exhibendum esse, vocantque catholicos *artolatræ*, seu panis adoratores.

PROPOSITIO.

*Cultus latriæ Christo debetur in Eucharistia.*

1° Ista propositio est de fide. Concil. Trid. habet, sess. 13, can. 6 : « Si quis dixerit in sancto Eucharistiæ » sacramento Christum unigenitum Dei Filium non esse » cultu latriæ, etiam externo, adorandum, atque ideo » nec festiva peculiari celebritate venerandum, neque » in processionibus, secundum laudabilem et universalem Ecclesiæ sanctæ ritum et consuetudinem, solemniter circumgestandum, vel non publice, ut adoretur, » populo proponendum, et ejus adoratores esse idololatræ : anathema sit. » Ergo 1°.

2° *Prob. traditione.* Citari possent S. Greg. Naz. in oratione funebri suæ sororis Gorgoniæ; S. Chrysost. in Homil. 24 in I Epist. ad Cor. etc. Cæterorum teneat locum S. Aug. in Ps. 98, n. 9 : « Et quia in ipsa carne hic ambulavit, et ipsam carnem nobis manducandam ad salutem dedit, nemo autem illam carnem manducat, » nisi prius adoraverit : inventum est quemadmodum » adoretur tale scabellum Domini, et non solum non peccemus adorando, sed peccemus non adorando. » Ergo.

3° *Praxi Ecclesiæ.* In cunctis liturgiis, etiam antiquis-



simis, Christus in Eucharistia adoratur, ut fuse et clare ostendit P. *Le Brun*.

4<sup>o</sup> *Ratione*. Constat, ex dictis, totum Christum sub speciebus consecratis modo permanenti residere : atqui Christus, cum Deus sit, cultu patriæ est adorandus, ubicumque existit : ergo.

Cultus igitur quem exhibemus Christo in Eucharistia non terminatur ad species quæ suo genere tamen honorari possunt, sed ipsi personæ Christi redditur, et ideo est absolutus.

Dicamus cum synodo Trid. sess. 13, cap. 5 : « Pie et religiose admodum in Dei Ecclesiam inductum fuisse hunc morem, ut singulis annis peculiari quodam et festo die præcelsum hoc et venerabile sacramentum singulari veneratione ac solemnitate celebraretur, atque in processionibus reverenter et honorifice illud per vias et loca publica circumferretur. »

## CAPUT SECUNDUM.

### DE MATERIA SACRAMENTI EUCHARISTIÆ.

Nomine materiæ hujus sacramenti, intelliguntur elementa quæ ad illud conficiendum adhibentur : in omnibus ecclesiis, catholicis, schismaticis et hæreticis adhiberi solent panis, vinum et aqua. Itaque dicemus 1<sup>o</sup> de pane ; 2<sup>o</sup> de vino ; 3<sup>o</sup> de aqua ; 4<sup>o</sup> de modo quo materia debeat esse præsens et determinata ; 5<sup>o</sup> de unione utriusque speciei in consecratione.

### ARTICULUS PRIMUS.

#### DE PANE EUCHARISTICO.

Errarunt olim circa hoc punctum, 1<sup>o</sup> impuri Gnostici, de quibus S. Epiphanius, Hæresi 26, qui, inter alia abo-

minanda, fœtum ex utero extractum, in mortario contusum, offerebant in sacrificium et velut perfectum pascha habebant. « Nonnulli eos etiam Borboritas vocant, quasi » cœnosos, propter nimiam turpitudinem quam in suis » mysteriis exercere dicuntur, » inquit S. Aug. Hæresi 6. 2<sup>o</sup> Montanistæ seu Cataphryges, qui de sanguine infantis annui, ope punctionum in toto corpore factarum extracto et farinæ immixto, panem suum eucharisticum conficiebant. « Si puer mortuus fuerit, habetur apud » eos pro martyre; si autem vixerit, pro magno sacer- » dote; » S. Aug. Hæresi 26. 3<sup>o</sup> Artolyritæ, a verbis græcis ἀρτος, *panis*, et τυρος, *caseus*, offerebant in Eucharistiam panem et caseum, ut refert ibidem S. Aug.

## PROPOSITIO.

*Solus panis triticeus adhibendus est ad consecrationem Corporis Domini.*

*Prob.* 1<sup>o</sup> *verbis institutionis.* Christus enim accepit panem, benedixit, ac fregit, deditque discipulis suis, et ait, etc. At panis simpliciter dictus est panis triticeus. 2<sup>o</sup> Concilio Florentino, in quo Græci et Latini erant coadunati, et in sess. ultima habetur : « De pane, sive azy- » mus, sive fermentatus fuerit, non curant Græci, dum- » modo ex tritico constet; » et Decreto ad Armenos, in quo Eugenius IV, de Eucharistia loquens, ait : *Cujus materia est panis triticeus.* 3<sup>o</sup> Constanti utriusque ecclesiæ Latinæ et Græcæ atque diversarum sectarum praxi.

*Hinc* 1<sup>o</sup> panis ex milio, oryza, fabis, castaneis, nucibus, amygdalis, vel ex radicibus, ut *manioc*, *pomme-de-terre*, vel etiam ex spelta, farre vel hordeo, etc. confectus, non est materia valida; quia evidenter non est triticeus, et nonnisi cum addito dicitur panis, v. g. hordeaceus, fabeus, oryzeus, etc.

*Hinc* 2<sup>o</sup> panis de siligine est materia dubia, quia nonnulli auctores, inter quos S. Th. 3 part. q. 74, art. 3, ad 2<sup>um</sup>, Estius, Tournely, etc. arbitrantur illud granum ex vero tritico in malis terris seminato nasci, et speciem

a frumento distinctam non constituere : alii vero contendunt illud a frumento specie differre, et panem ex illo proveniente non simpliciter dici panem. Nunquam igitur talis adhibendus est panis, neque ut plebs audiat missam, neque ut moribundus suscipiat viaticum ; quia, extra casum extremæ necessitatis, materia dubia uti non licet : unde rubrica missalis, tit. de Defectibus, habet : « Si panis non sit triticeus, vel si triticeus admixtus sit granis alterius generis in tanta quantitate ut non maneat panis triticeus, vel sit alioquin corruptus, non conficitur sacramentum. »

Contra vero, si granorum alterius generis commixtio sit in parva quantitate, validitati materiæ non nocet, nec communiter reddit illicitam, quanquam valde optandum ut triticus sit purus, panis pia sollicitudine sit confectus et albedine nivi similis. Optimum religiosæ hujus sollicitudinis exemplum præbuerunt in undecimo sæculo Cluniacenses monachi qui, ut scribit Ulricus, in tractatu de Consuetudinibus celebris istius monasterii, grana frumenti, quantumvis puri, singulatim seligebant, lavabant, in sacco mundo ad hunc usum destinato deponebant ; vir bonus et commendabilis saccum ad molitrinam deferrebat, molas lavabat, alba et amicto indutus, cribrum lavabat, farinam pluries incernebat ; deinde tres monachi, sacerdotes vel diaconi, cum uno fratre converso, albis et amictis induti, summa cum cura conficiebant hostias, horas canonicas vel officium B. Mariæ interea continuo cantantes.

*Hinc 3º* massa triticea cruda, frixa aut elixa, non vero cocta per modum panis, ut sunt placenta, libum, lagnum, etc. ad validitatem sacramenti probabilius non sufficeret, quia panis usualis non reputatur. Siccata vel torrida ad summum etiam esset materia dubia, quæ igitur nunquam adhiberi posset. An autem fuerit cocta in clibano, sub cinere, vel ope ferri calidi, ut fieri solet, parvi refert, dummodo panis simpliciter dici possit.

*Hinc 4º* panis lacte, melle, butyro aliove liquore subactus, loco naturalis aquæ, non est verus panis usualis,

nec proinde materia valida : si modica esset alterius liquoris quantitas aquæ commixta, valida, sed illicita esset materia.

*Hinc* 5° panis mucidus, dummodo non sit putridus vel omnino corruptus, est validus, sed graviter illicitus.

*Hinc* 6° hostiæ rubræ quibus sigillantur litteræ, non reputantur ad consecrationem validæ; quia non sunt panis usualis, nisi admodum parva cinnabaris quantitate intinctæ fuerint, et in eo casu eis uti graviter illicitum esset. Sic Ligorio, l. 6, n. 199.

*Hinc* 7° forma panis consecrandi ad validitatem sacramenti non pertinet; sed, ex Ecclesiæ præcepto, debet esse apud nos figuræ orbicularis et integræ. Major est formula pro sacerdote celebrante, et minor pro populo. Cum minore, si alia haberi non possit, privatim celebrare licet, modo absit scandalum; imo et publice die festo vel dominica, monendo populum ut præcaveatur scandalum: item ut viaticum moribundo administretur.

Hostiam fractam vel enormiter maculatam sine causa consecrare, esset peccatum mortale; si leviter sit fracta aut maculata, peccatum est duntaxat veniale; et nullum erit peccatum si adsit causa, puta si macula vel fractura post oblationem tantum advertatur. Ita Ligorio, l. 6, n. 204 et plures apud ipsum.

*De pane azymo vel fermentato.*

Michael Cerularius, patriarcha Constantin. creatus an. 1043, primus in Latinos pane azymo utentes insurrexit contenditque eos valide non consecrare, et odioso nomine appellavit *Azymitas*. Photius autem, primus schismatis Græci auctor, in nono sæculo, Latinos odio et calumniis prosequens, eis non exprobravit quod pane azymo uterentur. Unde P. *Sirmond* concludit usum azymorum in ecclesia Occidentali intra nonum et undecimum sæculum incœpisse. Plerique eruditi, e contra, contendunt usum fermentati nunquam in ea ecclesia fuisse receptum. Card. Bona, de Rebus liturgicis, l. 1, cap. 23, docet



Græcos usum fermentati semper retinuisse, et Latinos in primis sæculis azymum vel fermentatum pro libitu adhibuisse, usque ad initium decimi sæculi, quo usus azymorum lege generali fuit præscriptus.

## PROPOSITIO.

*Valet consecratio, tum in azymo, tum in fermentato, et disciplina utriusque ecclesiæ retinenda est.*

*Prob. 1<sup>a</sup> pars.* Valet consecratio tum in azymo, tum in fermentato. Nam 1<sup>o</sup> uterque est simpliciter panis, et qualitas fermenti naturam ejus non mutat. 2<sup>o</sup> S. pontifex Leo IX, Michaellem Cerularium redarguens, non illi exprobravit quod cum Orientalibus fermentato uteretur, sed quod Latinos haberet ut hæreticos. 3<sup>o</sup> Concil. Florent. Decreto unionis, sess. ultima, apud *Labbe* dicit: « In azymo sive fermentato pane triticeo corpus veraciter confici; sacerdotes quoque in alterutro ipsum Domini corpus conficere debere, juxta suæ Latinæ vel Orientalis ecclesiæ consuetudinem. »

*Prob. 2<sup>a</sup> pars.* 1<sup>o</sup> Ex decreto concilii Florentini modo citato; 2<sup>o</sup> ex Constitutione Bened. XIV, *Etsi pastoralis*, anni 1742, § 6, n. 10, in qua, sub pœnis perpetuæ suspensionis a divinis, confirmat prohibitionem ne Latinus aut Græcus præter proprium ritum celebret. Ergo.

At, si Latinus in locis Græcorum, vel Græcus in locis Latinorum inveniatur, petitur in quo pane consecrare debeat: si existant ecclesiæ ipsius ritus, pane sibi præscripto uti decet. Est sententia communis, ut asserit *Ligorio*, l. 6, n. 203. Si vero ecclesiæ sui ipsius ritus non existant, ut si Græcus per Galliam transeat, pane in ecclesia in qua versatur usitato licite uti potest, et probabilius etiam pane sibi proprio, ut docent *Natalis Alexander*, *P. Antoine*, *Suarez*, *Tournely*, *Ligorio* et communiter alii, juxta regulam de lege locali. Contendit tamen *Biluart* sacerdotem peregrinum teneri ex Constitutione S. Pii V, *Providentia Romani pontificis*, anni 1566, et ex altera Bened. XIV, *Etsi pastoralis*, § 6, proprium ser-

vare ritum, nisi vel notabile timeat scandalum, vel fixum in ea regione acquirat domicilium et clero incorporetur. Hæc sententia est tutior et ideo sequenda.

*Dices.* Christus consecravit in azymo, et dixit: *Hoc facite in meam commemorationem* : ergo consecrandum est in azymis.

*R. Nego conseq.* Nam præceptum Christi dicentis, *hoc facite*, etc. in substantiam ipsius actionis cadit, non vero in circumstantias, alioquin eadem hora, post cœnam, cum iisdem vestibus, etc. consecrandum esset : porro fermentum in pane ad substantiam sacramenti non pertinet, *ut diximus.* Ergo.

## ARTICULUS SECUNDUS.

### DE VINO EUCHARISTICO.

Ebionitæ, quamdam sobrietatis laudem quærentes, panes quidem azymos ad conficiendam Eucharistiam adhibebant, sed loco vini aquam substituebant, ut refert S. Epiph. Hæresi 50.

Tatianus, in secundo sæculo, *aquam solam*, inquit idem Epiph. Hæresi 46, *in mysteriis usurpavit.*

Ex Tatiano orti sunt Eucratitæ, a verbo græco *Ευκρατος*, idem significante ac continens vel abstinens. Hi, juxta eundem S. doctorem, Hæresi 47, dicebant vinum esse diabolicum, id est, a diabolo creatum, et ideo in Eucharistia illo abstinebant. Idem faciebant Manichæi, propter eandem rationem.

Quidam episcopi et sacerdotes Africæ, tempore persecutionis, a vino in sacrificiis matutinis abstinebant, ne ex odore vini agnoscerentur. Non præcise contra fidem errabant, sed institutioni et præcepto Christi adversabantur, ut ostendit S. Cyp. Epist. 63.

Illi omnes dicti sunt Aquarii, ut notat S. Aug. Hæresi 64.

## PROPOSITIO.

*Solum vinum ex vite est materia consecrationis calicis.*

*Prob.* 1° *verbis institutionis.* Christus enim in cœna ait discipulis : *Non bibam de hoc genimine vitis, usque in diem illum*, etc. Pronomen *hoc* indicat materiam in calice contentam ante consecrationem fuisse jus de vite, id est vinum. 2° Decreto ad Armenos, in quo de Eucharistia dicitur, *cujus materia est panis triticeus et vinum de vite.* 3° Perpetua traditione, ut ex testimoniis Patrum supra citatis constat. 4° Praxi omnium ecclesiarum et sectarum. Ergo.

*Hinc* 1° jus ex pomis, piris, cerasis, moris, malogranatis, etc. expressum, aliusve quilibet liquor, non ex vite proveniens, ad consecrationem calicis non esset materia valida.

*Hinc* 2° non magis valeret jus in uvis adhuc contentum vel in pane imbibitum, quia non habet formam vini; nec omphacium, gallice *verjus*, quia nondum est vinum simpliciter dictum; nec acetum, quia est vinum substantialiter corruptum; nec sapa, seu vinum ad mediam aut tertiam partem coctum, quia non est amplius simpliciter vinum; nec lora, id est aqua expressis acinis superfusa, gallice *piquette*.

*Hinc* 3° vinum acescens est materia valida, siquidem substantia vini existit, sed illicita, propter honorem sacramento debitum. Si post consecrationem sacerdos prudenter dubitet an vinum sit omnino acetum, vinum certo validum consecrandum est sub conditione : consecrandum est, ne sacrificium maneat incompletum; sed conditionate, ne si prior consecratio calicis fuerit valida, aliud incipiatur sacrificium quod maneret imperfectum. Ita Ligorio, l. 6, n° 206.

Sacerdos autem vinum acescens aut etiam aliquantulum acre, extra necessitatem, consecrans, mortaliter peccat, ut expresse dicit rubrica Romana de Defectibus, § 4, n. 2. *Dico*, extra necessitatem, quia plurimi, apud

Ligorio, n° 207, quæritur 1, probabiliter docent quod, deficiente alio vino, adhibere liceat vinum parum acescens, prout facere solent viri probi: imo licitum fore, urgente gravi necessitate, uti vino notabiliter acescente, modo constet adhuc esse vinum; non vero si dubium foret, ut de pane dubio diximus.

*Hinc* 4° valida est consecratio in musto, quia mustum substantialiter est vinum, et ita nuncupatur: sed, extra casum necessitatis modo expositæ, graviter illicita esset; tum propter dispositionem rubricæ superius citatæ, tum propter naturalem indecentiam et erga sacramentum irreverentiam. Quidam existimant devotionem populi esse causam sufficientem ut primitiæ uvarum exprimantur in calice, v. g. die Transfigurationis, juxta rubricam missalis nostri; sed curandum ut in parva quantitate exprimatur jus.

*Hinc* 5° vinum aliis liquoribus vel aromatibus in modica quantitate immixtum, est materia valida, sed illicita, propter rationes in numero præcedenti expositas. Si commixtio in notabili sit quantitate, materia erit dubia, ac proinde nunquam adhibenda.

*Hinc* 6° plures dubitant an vinum congelatum valide consecrari possit; quia 1° non est potabile; 2° quia aqua congelata ad Baptismum non valeret. Alii vero communius docent illud valide consecrari posse; quia 1° substantiam vini retinet; 2° vinum nihilominus appellatur; 3° si species vini post consecrationem congeletur, sanguis Christi sub illa remanet; siquidem ex rubrica, de Defect. § 10, n. 11 habetur: « Si in hieme sanguis congeletur in » calice, involvatur calix pannis calefactis, donec lique- » fiat. » Nec valent rationes oppositæ. Non 1ª, quia si vinum congelatum non sit potabile, hoc fit per accidens, quod facile tollitur; panis nimis obduratus non est comestibilis, et tamen est materia valida: ergo *a pari*, etc. Non 2ª, quia Baptismus non est sacramentum permanens sicut Eucharistia, et conferri non potest, nisi aqua flua.

Quidquid sit, certum est non licere vinum congelatum consecrare, propter reverentiam sacramento debitam:



at si per inadvertentiam vel aliter hujusmodi vinum fuerit consecratum, valet sacrificium, et Ligorio affirmat aliud vinum non esse consecrandum, quia prima sententia nulla pollet ratione solida.

*Hinc* 7° valet et licita est consecratio in quolibet vino naturali, gallico, hispano, italo, albo, rubro, generoso, insipido, etc. quia unumquodque simpliciter est vinum. Reverentia erga sanctissimum sacramentum postulat ut, quantum fieri potest, non adhibeatur vinum odoratu vel gustu ingratum; ex alia parte, vino extraneo et delectabili; v. g. quibusdam vinis hispanicis, sæpe imprudenter uteretur, quia non raro hujusmodi vina vel omnino fuerunt fabricata, vel alienis substantiis commixta.

## ARTICULUS TERTIUS.

### DE AQUA IN CALICE CUM VINO MISCENDA.

Olim tenebant Armeni aquam cum vino non miscendam esse, et hujus erroris accusati sunt in concilio Trulano, anno 692, et in illo perseverasse videntur, siquidem Eugenius IV, in Decreto ad Armenos, *Labbe*, t. 13, sic habet: « Decernimus ut etiam ipsi Armeni cum universo » orbe Christiano se conforment, eorumque sacerdotes » in calicis oblatione paululum aquæ, prout dictum est, » admisceant vino. »

### PROPOSITIO.

*Aqua commiscenda est vino in Eucharistia.*

Propositio ista 1° est de fide, utpote definita in concil. Trid. sess. 22, can. 9: « Si quis dixerit... aquam non » miscendam esse vino in calice offerendo, eo quod sit » contra Christi institutionem: anathema sit. » 2° Probatur ex perpetua traditione: eam expresse docet S. Just. Apol. 1: « Diaconi panem, vinum et aquam, in quibus » gratiæ actæ sunt, unicuique præsentium distribuunt » et ad absentes perferunt. » S. Cyp. in Epist. 63 jam ci-

tata, ubi citans hæc Sapientiæ verba : *Venite... et bibite vinum quod miscui vobis*, ait : « Vinum mixtum declarat (Spiritus sanctus), id est, calicem Domini aqua et vino mixtum. » 3° Testimonio omnium liturgiarum Latinarum, Græcarum aliarumque Orientalium. Ergo, etc.

*Nunc quædam notanda et explicanda sunt.*

1° Hæc commixtio aquæ est quidem de præcepto ecclesiastico, et probabilius etiam de præcepto divino sub mortali; generaliter enim creditur Christum aquam cum vino commiscuisse atque voluisse ut discipuli sui eorumque successores idem facerent, in memoriam suiipsius actionis, ad repræsentandam aquam ex latere suo cum sanguine fluentem et ad significandum populum ipsi adunari, ut ait S. Cyp. in Epistola modo citata, et post eum concil. Florent. in Decreto ad Armenos, loco superius indicato. Sed non est de necessitate sacramenti : id omnes fatentur, quidquid in contrarium de catholicis dicant Protestantes.

2° Commiscenda est aqua naturalis in modica quantitate, juxta verba Eugenii IV, *paululum aquæ*, scilicet, una vel altera gutta, modo tamen sit sensibilis : tertiam partem non excedat, alioquin consecrationem redderet nullam vel saltem dubiam. *Ita communiter theologi.*

Qui misceret aquam rosaceam vel aliam artificialem, etiam in casu necessitatis, mortaliter peccaret, quia in re gravi contra consuetudinem et præceptum Ecclesiæ ageret.

Nonnulli dicunt infundere aquam calidam esse peccatum mortale; alii vero hoc nimis durum æstimant. Ligorio videtur approbare ut in regionibus frigidissimis aqua calida adhibeatur, si ita sinat consuetudo, ne vinum congelescat.

Græci solent, sicut et nos, aquam frigidam vino ante oblationem immiscere, ut ex antiquissimis eorum liturgiis, videlicet S. Jacobi, S. Basilii, S. Joannis Chrys. constat; sed insuper quasdam aquæ ferventis guttulas in calicem ante communionem infundunt, ad significandum sancti Spiritus fervorem et conditionem aquæ ex latere

Christi adhuc calido fluentis. Vide P. Goar, et P. Le Brun.

3° Quoniam in pluribus locis mos invaluerat ut nimia quantitas aquæ in calicem infunderetur, concil. Tiburiense, anno 895 celebratum, statuit, can. 19, *duas saltem in calice debere esse vini partes, tertiam aquæ* : Labbe. Non exigit ut tertia pars aquæ infundatur, sed prohibet ne excedatur.

Si plus aquæ quam vini fuerit in calice, putat Drouin valituram tamen consecrationem, quia natura vini remanet et præsumitur Christum non paucissimam misuisse aquam : cæteri vero negant, et merito; materia enim calicis est vinum simpliciter : porro commixtio vini et aquæ, in pari quantitate, simpliciter dici non potest vinum, sed vinum cum aqua vel aqua cum vino. Neque valent rationes allegatæ. Non 1<sup>a</sup>, alioquin modica vini quantitas cum aqua immixta valide etiam consecrari posset, siquidem naturam suam physice retinet. Non 2<sup>a</sup>; nam, ex traditione et agendi ratione Ecclesiæ, præsumitur Christum non multam adhibuisse aquam ad consecrandum calicem; quia non propter temperantiam sic in illa circumstantia agebat, sed ad repræsentandam aquam ex latere suo cum sanguine fluentem et ad significandum populum sibi adunari.

In eo casu igitur iterum consecrandum esset, saltem sub conditione, *ut supra diximus*.

4° Commixtio aquæ cum vino non facienda est in dolo, neque in urceolo, non domi, nec in sacristia, sed in calice, ante oblationem; a celebrante in missa privata, a subdiacono in missa solemnî.

5° Si celebrans ante consecrationem adverteret se commixtionem omisisse, aquam benedicere et infundere deberet; si post consecrationem, nihil faciendum esset.

6° De fide non est aquam converti in sanguinem Christi : Innocentius III, Decretal. l. 3, tit. 41, cap. 6, dicit probabiliorem esse opinionem quæ *asserit aquam cum vino in sanguinem transmutari*. Hæc sententia facta est communis inter theologos, qui tamen circa modum hujus conversionis sibi non consentiunt : quidam dicunt

aquam converti in aquam quæ ex latere Christi cum sanguine fluxit; sed hæc opinio generaliter rejicitur ut irrationabilis, quia tunc aqua seorsim a vino consecraretur, sicut vinum a pane. Alii communissime tenent aquam immediate converti in vinum et mediate in sanguinem Christi. Ratio eorum est, quia sola materia consecrabilis convertitur in sanguinem Christi: atqui solum vinum de vite est materia calicis: ergo. Hæc ratio supponit quod probandum foret, scilicet, aquam cum vino mixtam non esse consecrabilem. Plures sancti Patres contrarium sensisse videntur; v. g. S. Hieronymus et S. Ambros. a Ligorio citati, l. 6, Innocentius III modo relatus. Unde Layman, Card. de Lugo, Tournely, Collet et plures alii docent vinum et aquam in sanguinem Christi simul et immediate converti.

Cæterum, cum illa controversia nullius sit momenti, eam definire non intendimus.

## ARTICULUS QUARTUS.

DE MODO QUO MATERIA DEBEAT ESSE PRÆSENS ET DETERMINATA.

Apud omnes constat 1<sup>o</sup> materiam Eucharistiæ sacerdoti celebranti moraliter et sensibiliter præsentem esse debere; idque eruitur 1<sup>o</sup> ex verbis Christi, *hoc est, hic est*, quæ rem præsentem indicant; 2<sup>o</sup> ex perpetua Ecclesiæ praxi quæ materiam absentem nunquam consecravit, nec consecrari posse dixit; 3<sup>o</sup> ex natura sacrificii hostiam præsentem supponentis.

*Hinc* 1<sup>o</sup> valide consecratur vinum in calice velo, vase, vel cantharo cooperto, hostiæ in ciborio inclusæ, sub cumulo latentes: si vero sub corporali, sub mappa, in missali laterent, non ita constaret validam fore consecrationem: plurimi affirmant; aliidubitant: ideo pars tutior, casu adveniente, eligenda foret. Item valide consecrat cæcus vel alius sacerdos in tenebris celebrans; quia non requiritur ut materia videatur aut tangatur; sufficit ut in se vel in continente videri, tangi, vel mons-



trari possit. Unde auctores non probant eorum praxim qui os ita proxime admovent, ut halitum in calicem vel in panem inspirent.

*Hinc* 2° invalide certo consecraretur materia in tabernaculo inclusa, post altare posita, vel longe distans, etsi videri posset, quia reipsa moraliter præsens non esset, quamvis stricte determinari non possit quanta esse oporteat distantia ut consecratio sit nulla. Card. de Lugo et plures cum illo docent eam ad viginti passus certo valituram; saltem illicita esset ac proinde nunquam sic facienda. Similiter materia tam modica ut sensu percipi non possit, invalide consecraretur.

Apud omnes constat 2° ad validitatem consecrationis requiri ut materia in intentione consecrantis sit determinata; hoc enim 1° postulant pronomina demonstrativa *hoc* et *hic*; 2° actiones circa objecta indeterminata exerceri non possunt, sed tantum circa singularia et certa.

*Hinc* 1° invalide consecraret qui dimidiam vel tertiam partem hostiarum, juxta se positarum, consecrare vellet, eas in intentione aliter non determinando.

*Hinc* 2° invalide consecrarentur hostiæ, inscio sacerdote, etiam in corporali positæ, a cumulo sejunctæ; quia sacerdos eas penitus ignorans, veram non habuit intentionem illas consecrandi. Similiter non consecrantur guttæ calici exterius adhærentes, nec probabilius quæ interius adhærent, quia non sunt per modum continui, nec ideo includuntur in intentione celebrantis qui, dicens, *hic est*, etc. vinum in calice coadunatum, non vero guttas ab illo separatas consecrare naturaliter intendit. Hic tamen sibi non consentiunt theologi: idcirco hujusmodi guttæ, nisi formaliter consecrans eas ab intentione sua exclusisset, habendæ forent ut dubie consecratæ, et saltem cum prima ablutione sumendæ. Sedulo igitur, non tamen scrupulose, abstergendæ sunt, ante oblationem, particulæ vini et aquæ calici interius adhærentes, et melius videtur formalem habere intentionem eas quæ forte remanerent, non consecrandi. Idem dicendum est de micis in patena vel corporali se-

paratis : non autem de iis quæ adhærent hostiis consecrandis vel in ciborio sunt; simul cum hostiis consecrari debent. Vide Ligorio, l. 6, n. 215.

*Hinc* 3° sacerdos qui positivam habuit intentionem materiam præsentem consecrandi, etsi plures sint hostiæ a se vel ab alio positæ quam putat, omnes valide consecrat, quia omnes in intentione ejus realiter includuntur. Item si, ante consecrationem, de hostiis consecrandis monitus fuerit et consenserit, valide consecrat, licet actu de illis non cogitet, quia habuit intentionem virtuales ad validitatem sacramenti sufficientem.

Similiter, quamvis ciborium in corporali positum dis-cooperire, ut fert rubrica, oblitus fuerit, sive pro oblatione, sive pro consecratione, valet nihilominus consecratio, modo de illa facienda prius cogitaverit. *Est sententia communis*. Non valeret vero probabilissime si ex oblivione ciborium extra corporale relictum fuisset; quia, cum ibi consecrari non possit absque peccato, sacerdos non censetur habuisse intentionem illud sic consecrandi. Quoniam tamen nonnulli arbitrantur hostias in eo casu esse consecratas, sumi debent post primam ablutionem. Ita Ligorio, l. 6, n. 217.

*Hinc* 4° si parvæ hostiæ pro communicandis fidelibus offerantur sacerdoti consecrandæ, oblatione jam facta, sed ante præfationem, licite eas consecrat, oblationem mentaliter supplendo. Sic Gavantus et communiter theologi quibus consentit Bened. XIV, de Missæ sacrificio, l. 3, cap. 18, n. 5, si alias plures sine communione manerent; si vero unus tantum mansurus esset, potius ei danda foret pars magnæ hostiæ, v. g. ne diu exspectaret. Sic multi apud Ligorio, ibid.

*Hinc* 5° illicite consecrat, 1° qui nimiam panis aut vini quantitatem adhibet, propter periculum ne aliquid depereat aut corrumpatur; 2° qui vas in quo positæ sunt hostiæ consecrandæ non aperit; 3° qui hostias extra corporale positas consecrare sibi proponit; 4° qui guttas calici exterius adhærentes vult consecrare: adesset enim profanationis periculum.

## ARTICULUS QUINTUS.

## DE UNIONE UTRIVSQUE SPECIEI IN CONSECRATIONE.

Certum est unam speciem sine altera, saltem seclusa intentione alteram non consecrandi, valide consecrari posse: nam, prolatis verbis, *hoc est corpus meum*, statim corpus Christi sub specie panis existit; et similiter sanguis sub specie vini, dictis verbis, *hic est sanguis meus*. Ergo. Quid si celebrans positivam haberet intentionem alteram speciem non consecrandi? dicemus infra.

## PROPOSITIO.

*Jure divino prohibetur ne una species sine altera consecratur.*

*Prob. 1° Scriptura sacra.* Christus enim, postquam panem et vinum in corpus et sanguinem suum consecravit, dixit discipulis et cunctis sacerdotibus eorum successoribus: *Hoc facite in meam commemorationem*: ergo præcepit ut similiter panem et vinum consecrarent.

2° *Concilio Trid. sess. 22, cap. 1*, ubi dicitur Christum qui corpus suum et sanguinem sub speciebus panis et vini Deo Patri obtulit, Apostolis præcepisse ut idem facerent, et canone 2 ejusdem sess. ait: « Si quis dixerit » illis verbis, *hoc facite*, etc. Christum non instituisse » Apostolos sacerdotes, aut non ordinasse ut ipsi aliquæ » sacerdotes offerrent corpus et sanguinem suum: anathema sit. » Ergo, juxta mentem concilii, unam speciem ab altera separare non licet.

3° *Ratione.* Eucharistia per modum convivii spiritualis instituta est: at in omni convivio bene ordinato debet esse cibus et potus: ergo. *Neque dicatur* totum sacramentum sub una specie sumi: nam essentia sacramenti, prout Christus illud instituit et fieri præcepit, non in sumptione consistit, sed in consecratione. Ergo.

Quidam arbitrati sunt præceptum istud esse tantum

ecclesiasticum, et summum Pontificem ab illo dispensare posse : sed alii communissime docent illud esse divinum, propter rationes modo expositas, ac consequenter Pontificem maximum ab illo dispensare non posse, nequidem ut viaticum moribundo ministraretur.

*Petitur* an valida esset consecratio si sacerdos positivam haberet intentionem alteram speciem non consecrandi ? Negat Card. de Lugo, et ratio ejus est, quia essentia sacrificii in consecratione utriusque speciei consistit et dividi non potest. Alii vero communiter affirmant, quia forma unicuique speciei applicata, facit totum morale : ergo effectus producitur.

Quidquid sit, certum est gravissime peccaturum sacerdotem qui unam speciem sine altera consecrare intenderet ; « Quia divisio unius ejusdem mysterii sine grandi » sacrilegio non potest provenire : » Decreti Gratiani 3<sup>a</sup> parte, dist. 2, can. 12.

*Hinc* 1<sup>o</sup> sacerdos unam speciem sine altera consecrare non posset, etiam ad vitandam mortem ab alio ob hunc finem minatam, quia contra præceptum divinum directe ageret.

*Hinc* 2<sup>o</sup> si advertat se aquam vel alium liquorem a vino diversum consecrasse, vinum aqua immixtum et oblatum consecret, ut fert rubrica, ne sacramentum maneat imperfectum.

*Hinc* 3<sup>o</sup> si, hostia consecrata, celebrans subito moriatur, vel loquelam perdat, vel in amentiam incidat, alius, si fieri potest, accersatur sacerdos, etiam non jejunus, qui sacrificium perficiat ; et si sacerdos deficiens communicare possit, fragmentum hostiæ ab illo consecratæ ei tribuatur, ut perfectius sit sacrificium. Ita Ligorio, l. 6, n. 197, et plures apud ipsum.

Attamen obligatio alteram speciem consecrandi cessat : 1<sup>o</sup> si sacerdos non advertat se alium liquorem pro vino consecrasse, nisi postquam altare deseruit ; 2<sup>o</sup> si vinum non habeat ; 3<sup>o</sup> si illo, absque gravi scandalo, aut vitæ periculo, aut magno simili incommodo uti non possit ; 4<sup>o</sup> si, post hostiam consecratam, subitum mortis pericu-



lum immineat, ab hostibus, ab incendio, a fulmine, etc. secluso tamen scandalo et fidei contemptu; 5° si, celebrante deficiente, alius non inveniatur sacerdos qui sacrificium continuare possit, antequam moralis interruptio existat: moralis autem interruptio censetur existere si spatium duarum horarum effluxerit, inquit *Collet*. Pro diversis his exceptionibus vide rubricam, de Defectu vini, n. 8, et *Ligorio*, l. 6, n. 197.

---

## CAPUT TERTIUM.

### DE FORMA EUCHARISTIÆ.

Cum in Eucharistiæ sacramento duplex sit materia, duplex similiter debet esse forma. Sed in ea determinanda et in genuino sensu ejus assignando quidam varie errarunt.

Bucer contendebat nulla verba esse proferenda; Calvinus formam apud nos usitatam magicam incantationem appellat, vultque verba institutionis per modum concionis, ad excitandam fidem, pronuntiari. Chemnitius cum aliis Lutheranis, dicit hæc verba esse simul concionatoria et consecratoria. Hodierni Protestantes, quidquid supernaturale est rejicientes, nullam vim tribuunt verbis quibus Eucharistia consecrari censetur.

Græci, post verba consecrationis apud nos usitata, quamdam pronuntiant orationem qua petunt ut panis fiat corpus et vinum sanguis Domini: quidam inter theologos eorum dicunt hanc orationem ad formam essentialem pertinere, ut videre est apud *Arcudium*, l. 3, cap. 27 et seq. Ejusdem sententiæ est *P. Lebrun*, t. 5, et contendit invocationem quæ apud Latinos verba institutionis præcedit ac in omnibus liturgiis invenitur, ad validitatem consecrationis necessariam esse.

Innocentius III, tractatu de Sacramentis, l. 4, de sacro

altaris mysterio, cap. 6, docet sane dici posse Christum divina virtute confecisse sacramentum, et postea expressisse formam sub qua posteri consecrarent. Alii dicunt illum quædam pronuntiasse verba nobis incognita; alii denique bis dixisse, *Hoc est corpus meum, Hic est sanguis meus*, una vice ad consecrandum, et altera ad porrigendum corpus et sanguinem suum.

Certum est verba consecrationis non esse tantum concionatoria: *patet* tum ex modo quo Christus Eucharistiam instituit et ex sensu Ecclesiæ, tum ex iis quæ in tractatu de Sacramentis in genere diximus.

2° Sepositis variis opinionibus de verbis ad essentiam sacramenti requisitis, apud omnes constat valere consecrationem, dummodo verba institutionis et invocatio quæ ea apud nos antecedit et apud Græcos sequitur, debite pronuntientur. Nulla igitur est ratio cur ex diversis theologorum opinionibus aliquod suboriatum dubium.

3° Sive Christus sola benedictione, nihil dicens, consecraverit, sive verba nobis incognita pronuntiaverit, sive verbis, *hoc est corpus meum, hic est sanguis meus*, usus fuerit, ad nos parvi refert: sufficit ut sciamus quam adhibere debeamus formam.

4° Communiter docetur Christum corpus et sanguinem suum effecisse, dicendo, *hoc est corpus meum, hic est sanguis meus*; plurima enim citantur Patrum testimonia quæ alium non patiuntur sensum, v. g. Tertull. contra Marc. l. 4, cap. 40: « Acceptum panem... corpus illum suum fecit, Hoc est corpus meum dicendo. » S. Ambros. vel alius auctor, de Sacramentis, l. 4, cap. 4, de Eucharistia loquens, ait: « Consecratio autem cujus » verbis est, et cujus sermonibus? Domini Jesu. » Et eo sensu loquitur concil. Trid., sess. 13, cap. 1. Hæc tamen assertio non est de fide, ut omnes fatentur.

5° Certum est preces liturgicas consecrationem antecedentes vel immediate sequentes, ut apud Græcos, ad essentiam sacramenti non pertinere, sed sola hæc Christi verba, *hoc est corpus meum, hic est sanguis meus*; idque constat 1° ex numero præcedenti: si enim Christus

his solis verbis consecraverit, alia non sunt adhibenda ut essentialia, nisi in Scriptura vel in traditione inveniantur præscripta : atqui talia verba non inveniuntur præscripta : ergo. 2° Vi verborum corpus Christi est sub specie panis et sanguis sub specie vini : duplex ergo debet esse forma sicut duplex materia : atqui preces liturgicæ utrique materiæ sunt communes : ergo. 3° Apud Græcos sicut apud Latinos statim post verba, *hoc est corpus meum, hic est sanguis meus*, sacramentum adoratur : ergo creditur Christum esse præsentem ante Spiritus sancti invocationem. Itaque, si petatur quod panis corpus et vinum sanguis Christi fiant, id ita intelligendum est, scilicet, « Ut fiant nobis in purgationem animæ, » in remissionem peccatorum, et non fiant in iudicium et » condemnationem nostram. » Sic papæ eos interroganti responderunt ipsi Græci in concilio Florentino : *Labbe*, t. 13. Unde Latini consuetudinem eorum non redarguerunt. Ergo.

6° Attamen, quoniam in re tanti momenti pars tutior est eligenda, si ob aliquem defectum iteraretur consecratio, a verbis *qui pridie quam pateretur* incipiendum esset pro pane, et a *Simili modo*, pro vino, ut habet expresse rubrica.

7° Ad validitatem consecrationis requiritur et sufficit ut sensus verborum non mutetur substantialiter, juxta quod diximus in tractatu de Sacramentis in genere. Unde 1° nulla est consecratio, si dicatur adverbialiter : *Hic est corpus meum, hic est sanguis meus* ; vel : *Hoc corpus est meum, hic sanguis est meus* ; vel : *Illud est corpus meum, ille est sanguis meus* ; vel : *Hoc est substantia mea, hoc est corpus Christi* ; vel : *Hoc fit, hoc sit corpus meum*, etc. quia in his omnibus casibus sensus non est idem. 2° Si, e contra, dicatur : *Hic cibus, hic potus, hæc res est corpus meum ; est sanguis meus ; hic calix est novum testamentum in sanguine meo ; hic est sanguis meus infiniti valoris*, etc. valeret, sed graviter illicita esset consecratio. 3° Plures et quidem graves theologi arbitrantur, pro consecratione sanguinis, præter verba, *hic est calix sanguinis mei*, sequentia, *novi*

*et æterni Testamenti, mysterium fidei, qui pro vobis et pro multis effundetur in remissionem peccatorum, essentialia esse; quia sola virtutem sacramenti exprimunt et pleraque ab ipso Christo prolata sunt: quainvis sententia opposita communior et probabilior videatur, certum est consecrationem sine his verbis factam habendam esse ut dubiam et sub conditione iterandam. Ita Ligorio, l. 6, n° 223.*

Ponuntiatio vitiata aut imperfecta judicanda est ex iis quæ diximus in tractatu de Sacramentis.

8° Curare debet celebrans ne aliquid omittat vel imperfecte pronuntiet, et tamen ab omni repetitione sedulo abstinere; quia talis sanctissimorum verborum prolatio vera est erga Christum irreverentia: stet rubricæ sic se habenti, titulo 5, n. 2: « Si celebrans non recordetur se » dixisse ea quæ in consecratione communiter dicuntur, » non debet propterea turbari. Si tamen certo ei constet » se omisisse aliquid eorum quæ sunt de necessitate sacramenti, resumat formam. Si vero valde probabiliter » dubitat se aliquid essentielle omisisse, iteret formam » saltem sub tacita conditione. »

---

## CAPUT QUARTUM.

### DE EUCHARISTIÆ MINISTRO.

Duplex distinguitur minister Eucharistiæ, unus confectionis et alter distributionis.

### ARTICULUS PRIMUS.

#### DE MINISTRO CONFECTIONIS SACRAMENTI EUCHARISTIÆ.

Quidam veteres hæretici de quibus S. Irenæus, contra Hæres. cap. 13, n. 2, S. Aug. Hæresi 27, munia sacerdo-



talia laicis et ipsis etiam mulieribus tribuebant. Valdenses, efficaciam sacramentorum ex sanctitate ministri repetentes, dicebant sacerdotem, peccati mortalis reum, valide consecrare non posse, bene vero id posse laicum probum. Lutherus variis in locis asserit quoslibet Christianos, vi Baptismatis, potestatem consecrandi habere; eam tamen, ad vitandam confusionem, exercere non posse, nisi vel legitime fuerint vocati, vel urgens necessitas ad id eos compellat, v. g. ut ait Grotius, si desit pastor et urgeat sacramenti necessitas.

## PROPOSITIO.

*Soli sacerdotes Eucharistiam valide consecrare possunt.*

*Prob.* Scriptura sacra, traditione, concilio Trid. et ratione.

1° *Scriptura sacra.* Christus enim sacramentum Eucharistiæ instituens, solis Apostolis hic recumbentibus, ac proinde solis sacerdotibus eorum successoribus dixit: *Hoc facite in meam commemorationem*: ergo soli sacerdotes hanc habent potestatem. Ergo 1°.

2° *Traditione.* S. Epiph. Hæresi 79, ait: « Neque diaconis ecclesiastica regula concreditum est peragere sacrificii mysteria, sed ministrare tantum dum perficiuntur. » S. Hieron. Dialogo adversus Lucif. 2 part. de Hilario diacono et Luciferiano dicit: « Neque Eucharistiam conficere potest, episcopos et presbyteros non habens: » Concil. Nicæn. I, can. 18, *Labbe*, prohibet ne diaconi communionem presbyteris distribuant, eo quod « Nec canon, nec consuetudo tradidit, ut qui offerendi potestatem non habent, iis qui offerunt dent corpus Christi. » Ergo.

3° Concilio Trid. sess. 22, can. 2: « Si quis dixerit illis verbis, *hoc facite*, etc. Christum non instituere Apostolos sacerdotes, aut non ordinasse ut ipsi aliique sacerdotes offerrent corpus et sanguinem suum: anathema sit. » Propositionem nostram strictis verbis non definit, sed eam evidenter supponit. Ergo 3°.

4° *Ratione*. Si laici radicalem habuissent potestatem consecrandi, nonne Ecclesia permisisset saltem anachoretas, vitam angelicam in desertis agentes, vel confessores fidei in carceribus detentos, ea uti potestate, ne sacramento adeo sibi necessario privarentur? atqui tamen id nunquam permisit: in primis Ecclesiæ sæculis hi sancti viri et etiam simplices fideles divinam Eucharistiam asportare et sibi administrare poterant, consecrare vero nunquam. Ergo.

Si autem fideles dicantur a B. Petro, I epist. II, 9, *regale sacerdotium*, et in Apocal. I, 6, *regnum et sacerdotes Deo*, id intelligendum est lato sensu, quatenus sacrificium laudis, orationum et bonorum operum Deo offerunt: *sacerdotium sanctum*, inquit ibidem S. Petrus, ibid. v. 5, *offerre spirituales hostias*.

Quidam obijciuntur canones concilii Arelatensis, anni 314, Ancyрани, ejusdem anni, etc. ex quibus inferre volunt adversarii diaconos sacram Eucharistiam confecisse. Verum 1° non de consecratione divinæ Eucharistiæ intelligendi sunt, sed de illius administratione aut de participatione ad illius consecrationem, quatenus diaconi episcopis et presbyteris celebrantibus assistebant; 2° ad summum probarent aliquos diaconos potestatem consecrandi ex ignorantia vel ex malitia usurpasse, sed nihil inde sequeretur.

*Quæritur* an plures ministri eandem hostiam et idem vinum simul consecrare possint?

*R. affirmative*, modo oblata sint omnibus moraliter præsentia, et omnes verba consecrationis eodem instanti pronuntient; prolatis quippe verbis formæ, species certo sunt consecratæ: at consecratio uni potius quam aliis tribui non potest: ergo omnibus attribuenda est.

*Disputatur* an novi presbyteri cum episcopo in ordinatione celebrantes reipsa consecrent: quidam negant; quia 1° materia non sufficienter est præsens; 2° formam non nisi post episcopum pronuntiant; 3° sub specie vini non communicant. Alii vero probabilius affirmant, nitunturque 1° textu Pontificalis episcopum monentis « Ut bene

• advertat quod secretas morose dicat et aliquantulum  
 » alte, ita ut ordinati sacerdotes possint secum omnia  
 » dicere, et præsertim verba consecrationis, quæ dici de-  
 » bent eodem momento per ordinatos quo dicuntur per  
 » pontificem. » 2º Rubrica qua in eodem Pontificali sta-  
 tuitur absolutionem ante communionem novis presby-  
 teris non dandam esse, *quia concelebrant pontifici*. 3º In  
 consecratione episcopi, apud Latinos, consecrandus et  
 consecrator simul consecrant eandem hostiam et idem  
 vinum. 4º Juxta ritum ecclesiæ Cenomanensis, feria V  
 in cœna Domini, ad consecrationem sanctorum oleo-  
 rum, duo parochi simul cum episcopo celebrant et con-  
 secrant. 5º Apud Græcos, in locis in quibus unicum est  
 templum, presbyteri episcopum circumstantes cum illo  
 consecrant. Ergo. *Ad rationes sententiæ oppositæ respon-*  
*dent*, 1º materiam esse moraliter præsentem et hanc præ-  
 sentiam sufficere; 2º verba formæ eodem momento, ex  
 Pontificali, pronuntianda esse a novis presbyteris et ab  
 episcopo, et insuper episcopum non habere intentionem  
 consecrandi independentem a novis presbyteris, ac proinde  
 sensum verborum ab ipso prolatorum manere suspen-  
 sum donec accedant verba aliorum concelebrantium;  
 3º novos presbyteros sub unica specie communicare; quia  
 non sunt principales celebrantes, et ad perfectionem sa-  
 crificii sufficere ut principalis celebrans utramque sumat  
 speciem. Ergo, etc.

## ARTICULUS SECUNDUS.

### DE MINISTRO DISTRIBUTIONIS EUCHARISTIÆ.

Duplex est distributionis Eucharistiæ minister, unus  
 ordinarius et alter extraordinarius. Id intelligendum est  
 de ministratione licita: nam, cum sacramentum istud  
 per se subsistat, ab omni persona valide administrari  
 posset.

## PROPOSITIO PRIMA.

*Soli episcopi et presbyteri sunt ministri ordinarii  
distributionis Eucharistiæ.*

*Prob. 1º Scriptura sacra.* Soli episcopi et presbyteri sunt ministri confectionis Eucharistiæ, ex his verbis, *Hoc facite in meam commemorationem* : at qui sacramentum istud conficiunt, eo ipso illud administrare possunt. 2º Concilio Trid. sess. 13, cap. 8, ubi legitur : « Semper » in Ecclesia Dei mos fuit ut laici a sacerdotibus communionem acciperent, sacerdotes autem celebrantes » seipsos communicarent. » 3º Auctoritate S. Thomæ, 3 part. q. 82, art. 3, et omnium theologorum.

Attamen aliqua requiritur jurisdictio in sacerdote ut Eucharistiam licite administret. Nam 1º conditio est sacramentorum ut nonnisi ab habentibus jurisditionem licite administrentur. 2º Pastorum est oves suas pascere : at inter actus pascendi gregem computanda est Eucharistiæ administratio. 3º « Religiosi qui clericis aut laicis sacramentum Extremæ-Uctionis vel Eucharistiæ ministrare... præsumperint, excommunicationis incurrant » sententiam ipso facto, per Sedem apostolicam duntaxat » absolvendi ; » Clement. l. 5, tit. 12, cap. 1. Quare autem hæc censura, si nulla requireretur jurisdictio ? Ergo qui absque ulla jurisditione Eucharistiam administraret, mortaliter peccaret, et inferior sacerdote id faciens, irregularitatem incurreret. Vide Ligorio, l. 6, n. 234.

Sufficientem autem habet jurisditionem 1º qui ad celebrandum in aliqua admittitur ecclesia, nisi rector ecclesiæ positive contradicat ; 2º qui missam celebrat in oratorio privato, ubi, ex concessione episcopi, Eucharistia asservatur et fidelibus petentibus distribui solet ; seclusa vero speciali concessione, consecrare non posset in sacello privato, ut communionem petenti ministraret ; licentia quippe celebrandi missam in hujusmodi oratoriis non importat facultatem Eucharistiam asservandi, nec sacramentum aliquod ibi administrandi ; 3º regulares,



privilegiis Julii II, Pauli III et Pauli IV, bulla Clementina modo citata posterioribus, facultatem obtinuerunt ut « Omni tempore, præterquam in die Resurrectionis » dominicæ, sacramentum Eucharistiæ.... quibusvis personis licite ministrare possint. »

*Notandum*, ab hujusmodi privilegiis semper excipi, 1<sup>o</sup> viaticum quod, absque licentia parochi vel episcopi aut vicarii generalis, administrari non potest : attamen in casu summæ necessitatis hæc licentia præsumi potest ; 2<sup>o</sup> primam et secundam communionem puerorum qui sub hoc respectu proprio parochio specialiter subjiciuntur.

#### PROPOSITIO SECUNDA.

*Diaconi sunt jure divino ministri extraordinarii distributionis Eucharistiæ.*

*Prob. ex traditione.* S. Just. Apol. I, n. 65, de Eucharistia agens, dicit : « Qui apud nos dicuntur diaconi, panem, et vinum et aquam in quibus gratiæ actæ » sunt, unicuique præsentium participanda distribuunt, » et ad absentes perferunt. » Concil. Nicæn. I, can. 14 : « Quod si non fuerit in præsentem vel episcopus vel presbyter, tunc ipsi (diaconi) proferant et edant. » Concil. Aquisgran. anno 816 celebratum, cap. 7 ; *Labbe*, t. 7 : « Sicut in sacerdote consecratio, ita in ministro dispensatio est : ille oblata sanctificat, his sanctificata dispensat. » Multa alia citari possunt testimonia. Ergo.

*Dixi*, eos esse ministros extraordinarios ; qui enim ministrare non debent nisi defectu episcopi et presbyteri et ex commissione, sunt ministri extraordinarii : atqui tales erant diaconi respectu sacramenti Eucharistiæ, *ut patet* ex concilio Nicæno modo citato, ex concilio Carthag. IV, can. 38, sic se habente : « Diaconus, præsentem presbytero, Eucharistiam corporis Christi populo, si necessitas cogat, jussus eroget ; *Labbe*. Ergo. »

Usus in primis sæculis invaluerat ut diaconi universe ministrarent Eucharistiam, ex commissione generali episcopi. Nunc eam ministrare non possunt nisi specia-

lem habeant delegationem, saltem parochi. In nostra diœcesi requiritur delegatio episcopi aut vicarii ejus generalis qui de sufficientia causæ allegatæ judicant.

Plures apud Ligorio, l. 6, n. 247, dicunt communem esse sententiam quod, in extrema necessitate, diaconus adhuc posset et teneretur viaticum sine commissione moribundo administrare, et superpelliceo cum stola transversa indui deberet. Tale factum apud nos est omnino inauditum.

Nullus clericus diacono inferior fuit in Ecclesia minister etiam extraordinarius dispensationis Eucharistiæ : attamen olim quandoque sanctissimum illud sacramentum committebatur minoribus clericis vel etiam laicis qui illud ad alios deferrent, *ut patet exemplo S. Tharsicii, acolythi et martyris qui, sacramenta Domini deferens, a paganis mactatus est fustibus, Martyrol. et pueri qui a sacerdote infirmo missus, Eucharistiam propria manu Serapionis ori admovit* : Theodoreti Hist. l. 6, cap. 44.

Hæc autem consuetudo a multis sæculis inolevit, et nullus, sive clericus inferior, sive laicus, sacram Eucharistiam, sicut olim, accipere, deferre, in domo sua habere, sibi vel aliis ministrare posset sine expressa summi Pontificis dispensatione. Ita communiter theologi cum S. Th. contra plures qui tenent veterem consuetudinem non esse abrogatam pro casu extremæ necessitatis, præsertim si licentia episcopi accedat, v. g. tempore pestis. Vide Ligorio, l. 6, n. 237, quæritur 161.

*Quæritur an urgente necessitate, aliquis sanctam Eucharistiam sibi administrare possit.*

R. 1º. Habita sacerdotis copia, nullus, nequidem sacerdos, extra missam, communionem sibi licite ministrare potest; quia contra generalem Ecclesiæ disciplinam sine causa sufficienti ageret. *Sic generaliter theologi.*

R. 2º. Supposito quod sacerdos, in gravissimo mortis periculo constitutus, cui alius præsto non est sacerdos, divinam Eucharistiam e sacrario vel de manu diaconi, sacram pyxidem deferentis, sumere possit, se ita communicare potest et tenetur. Sic Durandus, Suarez, Habert,

*Collet* aliique communiter theologi qui, ultra progredientes, dicunt sacerdotem, alterius sacerdotis adiutorio privatum, sola devotionis causa, v. g. in solempni festo et secluso scandalo, seipsum communicare posse; quia nulla est irreverentia erga sacramentum nec aliqua Ecclesiæ prohibitio.

*R. 3º.* Quod de sacerdote dicitur, multi ad diaconum ministerio sacerdotis destitutum extendendum esse volunt; quia, ex concilio Nicæno I, can. 14, diaconus, in absentia episcopi et sacerdotis, Eucharistiam olim ministrare poterat: id autem pro casu necessitatis nulla lege prohibetur. Porro si aliis sacramentum istud ministrare possit, cur non sibi in pari necessitate constituto? Ergo. Sic Suarez, Wasquez, Quarti, Collet, Billuart, Ligorio, etc.

*R. 4º.* Quidam arbitrantur clericos diacono inferiores et ipsos laicos in necessitate se communicare posse: quia id ipsis olim licitum erat et nulla lege ecclesiastica prohibitum videtur: Ligorio hanc opinionem tradit ut suam. Alii vero communius eam rejiciunt, dicentes clericos inferiores et laicos non magis se aliosve communicare posse, etiam in necessitate, quam sacerdotem sine vestibus sacris celebrare; et hæc opinio sola mihi videtur admitenda.

*Notanda* circa tempus, locum et modum sacram Eucharistiam administrandi, asservandi et ad absentes deferendi.

1º *Tempus communionis.* 1º Decretum S. Cong. Rituum, diei 19 feb. 1622, prohibet ne sacra communio distribuatur fidelibus feria sexta in Parasceve: datur tantum ægrotis periclitantibus. In cunctis aliis diebus anni eam dispensare licet. 2º Qualibet hora diei, per se loquendo, communio distribui potest, inquit Ligorio cum multis aliis, quia hac de re nulla existit prohibitio. Attamen, ex hodierna disciplina, consuetudine firmata, dari non debet nocte, nec sub vesperis; sed licite datur valde mane, quando missa celebratur, et etiam post meridiem. 3º Dari non deberet in missa Nativitatis Domini quæ di-

citur de media nocte, ut definiit sacra Cong. Rit. per decretum supra citatum et per alia plura, ut docent expresse Bened. XIV, de Missæ sacrificio, l. 3, cap. 18; Ferraris, vº Euch. n. 29; Ligorio, l. 6, n. 252, etc. Quidam, attestante Ferraris, ibid. a Sacra Cong. petierunt ut « liceat in nocte Nativitatis Domini, post cantatam » primam missam, alias duas immediate celebrare et » communicare fideles. S. Cong. respondit nullo modo » licere, sed omnino prohibetur. » Contrarius usus apud nos ubique viget. 4º Convenit ut communio intra missam, statim post consumptionem sacerdotis, fidelibus distribuatur : talis fuit usus per duodecim priora sæcula. Id supponit concil. Trid. sess. 22, cap. 6, dicens : « Opta- » ret quidem sacrosancta synodus ut in singulis missis » fideles astantes, non solum spirituali affectu, sed sacra- » mentali etiam Eucharistiæ perceptione communica- » rent. » Verum nullum existit præceptum sic faciendi : unde rationabilis causa sufficit ut communio extra missam dari possit, et aliquando prohiberi posset ne intra missam daretur, ut notat Bened. XIV, Constit. 64, et de Missæ sacrificio, 3, cap. 19. 5º Idem pontifex docebat, ibid. sacram communionem in missis defunctorum cum paramentis nigris administrari posse, atque sententiam oppositam nullo modo admittendam esse : at S. Cong. Rituum, per decretum diei 2 septembris 1741, statuit eam dandam esse ex particulis in ipsomet sacrificio consecratis, non vero ex particulis reservatis. 6º Extra missam defunctorum communio nunquam in paramentis nigris danda est : hinc, juxta Merati et Ligorio, sacerdos in nigris celebraturus eam immediate ante missam dare non debet, nec dare posset immediate post missam : est consecrarium decreti modo citati.

2º *Locus communionis.* 1º Sacra communio dari potest in cunctis ecclesiis parochialibus; 2º in aliis ecclesiis vel oratoriis publicis in quibus asservatur Eucharistia, vel etiam non asservaretur si missa ibi celebretur, v. g. in capellis seminariarum, xenodochiorum, monialium. 3º In privatis autem oratoriis dari non potest, etiam ex



particulis in missa consecratis, sine expressa ordinarii licentia : ita Bened. XIV, de Miss. sacrificio, l. 3, cap. 18, ac Epist. encycli. ad episcopos Poloniæ, diei 2 junii 1751, § 23, et statuta diœcesis Cenomanensis, anni 1788.

3<sup>o</sup> *Modus dandi communionem.* 1<sup>o</sup> Intra missam, dicto *Confiteor* a ministro, sacerdos extrahit pyxidem e tabernaculo si formulas distribuendas in ea missa non consecraverit, et, post genuflexionem, vertit se ad communicaturos, dicit *Misereatur* et *Indulgentiam* in plurali numero, etiamsi unica esset persona; sequitur ea quæ præscripta sunt in missali ac in rituali; omnibus communicatis, revertitur ad altare nihil dicens, nec dat benedictionem, etiam in missa defunctorum, ut asserit Merati, part. 2, tit. 10, n. 31. 2<sup>o</sup> Si communio immediate ante vel post missam petatur et justa ratio suadeat eam dandam esse, idem observatur ritus, excepto quod semper detur benedictio. 3<sup>o</sup> Ubi communio non immediate ante vel post missam distribuenda est, duæ accendendæ sunt candelæ, juxta Merati; sacerdos, lotis manibus, superpelliceo et stola coloris officio illius diei convenientis indutus, dicto *Confiteor*, eam dat ut supra, et ad altare rediens, dicit antiphonam *O sacrum convivium*, cum versiculo et oratione (quæ tamen non sunt de præcepto, sed de consilio); digitos abluit in vasculo super altare posito, sacram pyxidem cooperit, in tabernaculo recondit, et, manu dextra signum crucis faciens, dat benedictionem quam cum pyxide nunquam dare debet, nisi super infirmos, *ut dicemus infra*. 4<sup>o</sup> Si minister non adesset, unus e communicaturis vel ipse sacerdos diceret *Confiteor* et responderet *amen*, ubi dicendum est : mulier autem hæc dicere non debet, nisi sit monialis inter claustrum. 5<sup>o</sup> In communione monialium habentium fenestrellam ex parte evangelii, sacerdos descendere debet et revertere per gradus anteriores altaris, non vero per laterales; sic S. Cong. Rit. diei 25 septembris 1736, et Ferraris, v<sup>o</sup> Benedictio, art. 5, n. 38. 6<sup>o</sup> Sacerdos qui pollice et indice vel illorum usu privaretur, sacram communionem distribuere non posset; quia

etsi tota manus sit consecrata, pollex tamen et index ad hoc ministerium, ex ritu Ecclesiæ, deputantur. Unde dispensatione summi Pontificis ipsi opus esset, similiter et ut manu sinistra uteretur. Probabile tamen videtur Ligorio, l. 6, n. 244, et l. 7, n. 408, eum sacram Eucharistiam in casu extremæ vel gravissimæ necessitatis, absque dispensatione, administrare posse : in eo casu iudicio episcopi standum esset. 7° Manu semper danda est communio, et nunquam mediante instrumento, nequidem pestis alteriusve contagionis causa, quidquid nonnulli in contrarium dicant; neque probare auderem sententiam eorum qui permittunt ut ægroto hostiam trajicere non valenti, præbeatur particula hostiæ in cochleari cum vino imposita : talis quippe praxis consuetudini Ecclesiæ opposita est et apud nos prorsus inaudita. 8° Sacerdos podagra laborans, deferri potest ad altare, ut ibi sacram Eucharistiam administret, modo in reliquis Ecclesiæ ritum servare possit, et aliunde non prohibeatur. Ita Ligorio cum aliis, l. 6, n. 244.

4° *Modus sacram Eucharistiam asservandi.* 1° In primis sæculis sanctissima Eucharistia in nulla servabatur ecclesia, propter infidelium persecutiones, sed permittebatur Christianis particulas sacras ad proprias domos deferre, ibi reverenter asservare et singulis diebus, prout moris tunc erat, se illis reficere : sed tepescente pristina fidelium pietate, sanctissimum hoc sacramentum cum debita reverentia non fuit susceptum nec asservatum. In sexto sæculo concil. Cæsaraugustanum II prohibuit, sub anathematis pœna, ne quis Eucharistiam in ecclesia acceptam reservaret. Vetus disciplina circa hoc punctum jam cessaverat et penitus fuit abrogata. 2° Statutum fuit ut sacra Eucharistia in cunctis ecclesiis sub fidei custodia, clavibus adhibitis, servaretur, ne quis manum temerariam ad illam extendere posset. 3° Nunc in qualibet ecclesia parochiali servanda est, ut opportune peccantibus semper dari possit; sed, extra parochiales ecclesias, assidue retineri non potest, sine speciali concessione episcopi ordinarii, juxta nos, et summi Pontificis, ex

pluribus sacrarum congregationum episc. et concil. decisionibus apud Ferraris, v<sup>o</sup> Euch. art. 1, n. 46, relatis.

3<sup>o</sup> Nullibi conservanda est sine lumine perpetuo ardente :

« Si, ob graviter culpabilem negligentiam parochi vel  
 » ejus cui cura ista commissa est, integro die vel aliquod  
 » integris noctibus lumen non ardeat ante venerabile  
 » Sacramentum, peccare eum mortaliter; secus si per  
 » horam tantum, » docent plures apud Ligorio, l. 6, n. 248, qui et ipse hanc decisionem approbare videtur. Omnes fatentur hanc legem per se sub peccato mortali obligare. Si ecclesia vel societas sanctissimum Sacramentum habere cupiens, nimis sit pauper, congregationes episcoporum et concilii volunt ut *instituantur quæstor vel eleemosynarum collector*. Ferraris, v<sup>o</sup> Euch. art. 1, n. 45.

4<sup>o</sup> Pyxis debet esse argentea, intus deaurata et benedicta, non vero consecrata. 5<sup>o</sup> Sacræ species renovandæ sunt *singulis octo diebus aut saltem quindecim*, inquit Bened. XIV, de Missæ sacrif. App. 3, § 6, n. 4, et prima dominica uniuscujusque mensis, juxta rituale nostrum : frequentius renovandæ essent si propter humiditatem, præmatura timeretur corruptio, et cavendum ne formulæ consecrandæ jam sint veteres aut particulæ consecratæ in pyxide remaneant, aut magna formula in ostensorio ad expositionem collocata ultra mensem existat. 6<sup>o</sup> Cautè invigilandum est, absque ridiculis tamen sollicitationibus, ut contingit scrupulosis, ne fragmenta hostiarum quantumvis parva pereant, vel irreverenter tractentur : sciendæ igitur et observandæ sunt regulæ hac de re in rituali statutæ. 7<sup>o</sup> Tabernaculum in quo asservandum est sanctissimum Sacramentum, in majori altari singularum ecclesiarum collocari debet, exceptis cathedralibus, propter functiones pontificales quæ fiunt versis renibus ad altare : sic definiit congr. episc. die 10 feb. 1579, et 29 nov. 1594. Exterior deaurari debet *ex toto*, vel *ex parte*, et interior panno serico villosa, vel serico simplici vestiri. 8<sup>o</sup> Venerandum Eucharistiæ Sacramentum, in singulis ecclesiis ubi asservatur, publice exponi potest in festo Corporis *Christi* et per octavam : in aliis temporibus

nullibi exponendum est sine licentia episcopi diœcesani; et ubi exponitur, semper aliqui saltem ante illud orare debent clerici vel fideles.

5° Modus sacram Eucharistiam ad absentes deferendi.

1° Non deferenda est sine indumentis congruentibus, scilicet, veste talari, superpelliceo et stola coloris diei, ac præcedente saltem uno lumine, et omnibus caput disco-  
opertum habentibus. Attamen in locis hæreticis licet eam in parva pyxide inclusam vel in corporali involutam cum vestibis consuetis et sine lumine deferre; item ubi, propter infideles vel incredulos, timetur persecutio vel scandalum. Quidam arbitrantur id pariter licitum esse propter tempestatem aut itineris longitudinem. Rituale Cenomanense permittit ut sacerdos, in eo casu, bursam in qua parva pyxis continetur, vitta serica collo suo suspendat, pallio et etiam pileo se cooperiat, in equo vel in curru sedens iter faciat, sed a superpelliceo, stola, lumine et tintinnabulo non dispensat. Huic dispositioni standum est. 2° Communius docent auctores sacram Eucharistiam sine lumine deferre aut administrare, aut *Confiteor* omittere, peccatum esse veniale; ministrare autem sine stola et superpelliceo, esse mortale. 3° An in necessitate viaticum sine vestibis et lumine ministrare liceat, inter se disputant theologi: *plurimi negant*, dicentes reverentiam tanto sacramento debitam potius servandam quam infirmum communicare; *alii communius affirmant*, quia præsumitur Ecclesiam quæ vestes et lumen in honorem sanctissimi Sacramenti præscripsit, in tali casu obligare noluisse. 4° Sacerdos sacram Eucharistiam cum vestibis sacris deferens, valde festinare debet si periculum immineat, non vero per viam publicam currere, propter reverentiam sacramento debitam: quidam tamem, a Ligorio citati, l. 6, n. 241, et approbati, habent ut probabile quod in necessitate sine irreverentia curri posset. 5° Sacra Eucharistia nunquam deferenda est nocte, nisi urgeat necessitas et probabile non existat profanationis periculum; quo in casu non neganda est infirmo perichitanti. 6° Nullus devotionis causa Eucharis-



tiam secum deferre vel apud se habere potest : solus Pontifex maximus habet privilegium ut ante se deferatur. 7° Eam olim præsentare licebat in criminis dubii purgationem, sicut nunc juramentum in nonnullis casibus deferitur : at, juxta disciplinam actuale, id vetatur. Bened. XIV, de Missæ sacrif. l. 3, cap. 20, n. 2 et 3.

---

## CAPUT QUINTUM.

### DE SACRÆ EUCHARISTIÆ SUBJECTO.

Duplex hic exsurgit quæstio : 1° quinam ad sacram Eucharistiam admitti possint, et 2° quas dispositiones habere debeant.

### ARTICULUS PRIMUS.

#### DE HIS QUI AD SACRAM EUCHARISTIAM ADMITTI POSSUNT.

*Certum est* 1° quoscumque infideles, id est, non valide baptizatos, ad divinum illud sacramentum admitti non posse, quia Baptismus est janua aliorum sacramentorum.

*Certum est* 2° hæreticos, schismaticos, apostatas et incredulos ad idem sanctissimum sacramentum non admit- tendos esse. *Ratio patet*, et talis semper fuit praxis Ecclesiæ : « Hoc alimentum apud nos vocatur Eucharistia, » cujus nemini alii licet esse participi nisi qui credat » vera esse quæ docemus. » S. Just. Apolog. I, n. 66.

Quædam nobis dicenda sunt 1° de infantibus et pueris ; 2° de amentibus ; 3° de surdis et mutis ; 4° de peccatoribus et capite damnatis.

1° *De infantibus et pueris.*

1° Infantes baptizati et usum rationis nondum adepti, Eucharistiam sumentes, gratiæ augmentum suscipiunt, quia status gratiæ sufficit ad fructum hujus sacramenti percipiendum.

2° Olim apud Latinos mos erat dare infantibus baptizatis et confirmatis sacram Eucharistiam, ut omnes farentur. S. Cyp. l. de Lapsis, refert, seipso teste, puellam lactentem, in cujus ore immisum fuerat vinum idolis consecratum, postea, sacra vini specie accepta, nunc ploratu concuti, nunc mentis æstu cœpisse luctuabundam jactari, donec totum evomisset : *In corpore atque ore violato Eucharistia permanere non potuit.* Hæc disciplina, cujus S. Aug. S. Greg. Magnus mentionem faciunt, diu perseveravit : sed tempore S. Th. anno 1274 defuncti, penitus desierat ; sanctus doctor enim ait, 3 part. q. 80, art. 9 ad 3<sup>um</sup>, sacra mysteria pueris recenter natis danda non esse, *quavis quidam Græci contrarium faciant.* Merito usus ille pristinus fuit abrogatus ; 1° quia Eucharistia nonnisi sub specie vini dari poterat hujusmodi parvulis, et periculum erat effusionis ; 2° quia parvuli Eucharistiam acceptam sæpe evomebant aut spuebant ; 3° quia sanctissimo Sacramento assuefacti ab infantia, illud postea minus verebantur, etc.

3° Græci veterem servant consuetudinem dandi Eucharistiam infantibus, post Baptismum et Confirmationem, ut videre est apud Arcudium, l. 3, cap. 40, et *Renaudot.*

4° Pueris qui usum rationis nondum habent non danda est communio apud nos, etiam in articulo mortis propter rationes superius expositas, et præsertim quia talis est usus Ecclesiæ Romanæ ubique receptus.

2° *De amentibus.*

Perpetuo amentibus omnino neganda est Eucharistia, etiam in articulo mortis : sic S. Th. 3 part. q. 80, art. 9,

cum illo omnes theologi et rituale Romanum sequentibus verbis : « Amentibus seu phreneticis communicare » non licet : licebit tamen, si quando habeant lucida intervalla , et devotionem ostendant , dum in eo statu » manent , si nullum indignitatis periculum adsit.

Qui ergo quædam lucida habent intervalla , interea disponi et ad communionem admitti possunt ; non vero durante amentia , nisi adsit periculum mortis ; quo in casu si usum rationis aliquando habuerint et pie vixerint, S. Th. loco citato, Catechismus concilii Trid. Ligorio et alii communiter volunt Eucharistiam eis administrandam esse, si nullum sit irreverentiæ periculum ; quia illius fructum percipere possunt et forte illo indigent , si nempe ante amentiam in peccato exstiterint et de illo tantum attritionem habeant. Usus tamen apud nos receptus est ut communio hujusmodi amentibus etiam periclitantibus non tribuatur, nisi aliqua rationis exhibeant signa : hanc praxim suadet rituale nostrum et eam tradit D. de La Luzerne, *Instr. sur le Rituel*.

Semifatuus danda est in articulo mortis si cœlestem hunc panem a cibo communi aliquo modo secernant ; non autem delirantibus aut phreneticis , epilepticis et energumenis, tempore paroxysmi aut convulsionis, propter irreverentiæ periculum : sic Ligorio, l. 6, n. 303, plures apud ipsum et ferme rituale nostrum.

### 3º De surdis et mutis.

De solis surdis-mutis seu surdis a nativitate hic agitur : alii namque surdi hujus sacramenti non sunt incapaces. Nec surdi a nativitate per se incapaces reputari debent ; frequenti enim experientia constat eos accuratas mysteriorum religionis Christianæ notiones acquirere posse. Sollicitudinis est ergo digni pastoris et aliorum sacerdotum curare ut hi omnes pro sua capacitate erudiantur, et ad sacramenta admittantur, tum in vita tum præsertim in articulo mortis. Ita rituale nostrum. Si vero defectu eruditionis aut capacitatis nihil intelligant, aut nulla vel

omnino insufficientia religionis signa exhibeant, Eucharistia eis deneganda est; Ligorio, l. 6, n. 303 : non item Extrema-Unctio, si peccare potuisse præsumantur.

*4º De peccatoribus et capite damnatis.*

Divina Eucharistia modo concedenda, modo neganda est peccatoribus, prout sunt occulti vel notorii, occulte vel publice petant. Vide quæ hac de re diximus in tractatu de Sacramentis in genere, cap. 6, art. 3.

In Gallia, in Hispania et in Sabaudia non administratur Eucharistia capite damnatis, propter reverentiam tanto sacramento debitam : in Italia vero, in Germania et fere in omnibus aliis provinciis ex indulgentia eis conceditur, non ipso die quo plectendi sunt, sed diebus præcedentibus si bene sint dispositi. Unusquisque disciplinam suæ ecclesiæ sequatur. Pietati tamen et saluti plectendorum magis consentaneum est divinam Eucharistiam eis vere pœnitentibus non denegare. Ita Bened. XIV, de Missæ sacrif. l. 3, cap. 20, n. 6, et de Synodo diœces. l. 7, cap. 11, n. 4. Prudentia autem suadet eam non concedere accusatis de crimine et nondum judicatis; quia 1º eo ipso suspecti sunt; 2º periculum esset ne communionem appeterent ex hypocrisi; 3º timendum foret scandalum.

Non ita judicandum est de iis qui propter fidem aut justitiam persecutionem patientes in carceribus detinentur; communio illis procul dubio laudabiliter datur, etiam die supplicii, ac in viaticum si jam non sint jejuni et mors immineat.

## ARTICULUS SECUNDUS.

### DE DISPOSITIONIBUS AD SUSCIPIENDAM EUCHARISTIAM REQUISITIS.

Aliæ requiruntur dispositiones ex parte animæ, et aliæ ex parte corporis.



## § I. — De dispositionibus ex parte animæ.

1° Cum divina Eucharistia sit sacramentum vivorum, nullum est dubium quin ad eam cum peccati mortalis conscientia accedere non liceat : nihil aliud esset quam iudicium sibi manducare et bibere, et enorme sacrilegii scelus admittere. *Probet autem seipsum homo, et sic de pane illo edat et de calice bibat*, I Cor. xi, 28.

2° Qui, communicaturus vel celebraturus, alicujus peccati mortalis est conscius, sacramenta em præmittere tenetur confessionem si possit, idque ex strictissimo Ecclesiæ præcepto ; sic enim habet concil. Trid. sess. 13, cap. 7, postquam verba Apostoli retulit : « Ecclesiastica » autem consuetudo declarat eam probationem necessariam esse, ut nullus sibi conscius mortalis peccati, » quantumvis contritus sibi videatur, absque præmissa » sacramentali confessione, ad sacram Eucharistiam accedere debeat, quod a Christianis omnibus, etiam ab » iis sacerdotibus quibus ex officio incubuerit celebrare, » hæc sancta synodus perpetuo servandum esse decrevit, modo non desit illis copia confessarii ; quod si, necessitate urgente, sacerdos absque prævia confessione » celebraverit, quamprimum confiteatur. » Idem repetit in canone 11 et addit : « Si quis autem contrarium » docere, prædicare vel pertinaciter asserere, seu etiam » publice disputando, defendere præsumperit, eo ipso » excommunicatus existat. »

Ut probabilius docent auctores, præceptum istud non est tantum ecclesiasticum, sed divinum, verbis Apostoli, *probet autem*, etc. promulgatum, et consuetudine ecclesiastica transmissum.

*Hinc* 1° qui vi contritionis perfectæ gratiam sanctificantem jam recuperasset, nihilominus, ad Eucharistiam accessurus vel celebraturus, teneretur sub peccato mortali, habita copia confessarii, confessionem sacramentalem emitte; quia expressum est Ecclesiæ præceptum et in materia gravi.

*Hinc* 2° qui dubitat an mortaliter peccaverit, confiteri tenetur ; quia dici non potest illum peccati mortalis non esse conscius, et in dubio pars tutior est eligenda. Est sententia communis et praxis fidelium.

*Hinc* 3° qui ante communionem recordatur se in bona fide peccatum mortale omisisse, tenetur, juxta communissimam sententiam, illud confiteri si possit; quia 1° peccati mortalis vere est conscius, ac proinde legi Tridentinæ obnoxius; 2° talis est persuasio fidelium peccatum sic omisum ante communionem ordinarie declarantium.

Alii tamen plurimi recentiores theologi, inter quos *Pontas, Collet, Ligorio*, arbitrantur hanc sententiam, licet communem, non esse fundatam; qui enim bona fide confessus est, inquiunt, vi sacramenti pœnitentiæ justificatus est; sufficienter se probavit: ergo legem implevit. Tenebitur quidem peccatum istud clavibus Ecclesiæ tempore opportuno subjicere, ut præcepto divino de integritate confessionis satisfaciatur; sed illud declarare non tenetur ante communionem, nec positivum contritionis actum de illo elicere, quia cum sit justificatus vi confessionis, præcepto Ecclesiæ satisfecit. Praxis fidelium quæ opponitur non habenda est ut regula certa obligationis, sed ut laudabilis usus.

Posterior hæc sententia fundata videtur, semper mihi arrisit et eam libenter sequor respectu animarum scrupulis vel anxietatibus laborantium: altera vero, quæ est communior et tutior, non est arguenda nec improbanda.

*Hinc* 4° ex verbis concilii Trid. citatis constat licere communionem suscipere, vel missam celebrare absque præmissa confessione, si necessitas urgeat et desit copia confessarii. Sed tres hic occurrunt difficultates, 1° quid per necessitatem urgentem intelligendum sit; 2° quandam copia confessarii deesse censeatur; 3° quæ sit latitudo clausulæ *quamprimum*.

1° *De necessitate urgente*. Per eam non intelligitur qualiscumque necessitas, sed gravis. Unde, juxta omnes, non sufficeret festi celebritas, magna devotio, indulgentia lucranda, paupertas sacerdotis qui retributione indi-

get, etc. Contra vero gravis et urgens reputatur necessitas, 1° si quis absque viatico moriturus sit, nisi missa celebretur; 2° si communio vel celebratio omitti non possit sine scandalo aut infamiæ nota, puta, si communicaturus jam ad sacram mensam accesserit, si sacerdos sit ad altare, si missam hac die celebrandam annuntiaverit vel promiserit, et eam sub aliquo prætextu in aliam diem remittere non possit; 3° si populus jam convocatus vel convocandus in die festo missam non habiturus sit, nisi parochus aut vices ejus gerens, aut probabiliter alius quilibet sacerdos ad hanc missam celebrandam designatus, in peccato constitutus, eam celebret. Si præceptum audiendi missam non subministret rationem sufficientem, ut multi dicunt contra alios, semper in his casibus adest locus timendi scandalum vel infamiæ notam. 4° Si sacerdos inter celebrandum mortaliter peccet vel peccati mortalis antea commissi recordetur, uni e suis ministris sacerdoti confiteri debet ante consecrationem, si possit; si non possit, vel si post consecrationem tantum id contingat, perfecte conteratur.

2° De defectu confessarii. Copia confessarii deesse non censetur quia confessarius ordinarius est absens, vel quia sacerdos præsens est junior, levior, notior, etc. et alius gravior, doctior, sanctior, minus notus, ætate magis proventus desideraretur. Sic omnes, et ex verbis concilii sequitur. Deesse vero censetur, 1° si nullus adsit sacerdos vel si adiri non possit absque magna difficultate, habita ratione itineris, valetudinis, ætatis, aeris, brevitatis temporis, negotiorum quibus vacandum est, etc. 2° si adsit sacerdos, sed non approbatus, vel non approbatus in hoc loco, vel surdus aut mutus, aut idiomatis ignarus, aut confessionem audire recuset; 3° si celebraturus habeat peccatum reservatum et tantummodo confessarium pro reservatis non approbatum: probabilius ei tamen confiteri debet peccata non reservata, sive reservatum declaret, ut plures volunt, sive illud reticeat, quod multi fieri posse contendunt, ut vi absolutionis justificationem obtineat, directam super peccatis non reservatis, et indi-

rectam super reservatis. Vide Ligorio, l. 6, n. 265.

3° De clausula *quamprimum*. 1° Hæc clausula solos spectat sacerdotes celebrantes : *si... sacerdos absque prævia confessione celebraverit...* 2° Non solum exprimit consilium, sed verum præceptum; nam Alexander VII sequentem damnavit propositionem : « Mandatum Tridentini » factum sacerdoti sacrificanti ex necessitate cum peccato mortali confitendi *quamprimum*, est consilium, » non præceptum. » 3° Certum est hoc præceptum diu protrahi non posse; Alexander enim VII hanc alteram damnavit propositionem : « Illa particula, *quamprimum*, » intelligitur cum sacerdos suo tempore confitebitur. » 4° Communius docent auctores illud implendum esse intra triduum, et prius si qua ratio id suadeat, v. g. quia occurrit confessarius, et, occasione transacta, non cito inveniretur; vel quia cras eadem urgeret celebrandi necessitas, etc.

Cæterum, in omni casu, qui cum peccato absque prævia confessione celebrat, perfecte conteri tenetur, alioquin sacrilegii reus fieret.

*Nota.* Præter dispositiones hucusque requisitas ut sacra Eucharistia non indigne suscipiatur, aliæ præmittendæ sunt ut divinissimum illud sacramentum debite colatur et cum abundantiori fructu percipiatur, nempe actus fidei, spei, charitatis, contritionis, desiderii, etc. ut indicatur in catechismo et in libris asceticis.

## § II. — De dispositionibus ex parte corporis.

Duplex ex parte corporis requiritur dispositio, jejunium scilicet et mundities.

### *De jejunio.*

Duplex distinguitur jejunium : nempe ecclesiasticum de quo hic non agitur, et naturale. Jejunium naturale in eo consistit ut a media nocte nihil sumptum fuerit per modum cibi, potus vel medicinæ. *Ita omnes.*



Hujusmodi jejunium ad Eucharistiam ex præcepto Ecclesiæ sub peccato mortali requiritur, ut constat 1<sup>o</sup> ex Patribus : Tertull. ad Uxorem, l. 2, cap. 5 : *Non sciet maritus quid secreto ante omnem cibum gustes* ; S. Cyp. Epist. 63, refert Christum Eucharistiam post cœnam instituisse, et addit : « Nos autem resurrectionem Domini » mane celebramus ; » S. Aug. Epist. l. 1, Epist. 54, postquam retulit discipulos corpus et sanguinem Christi non jejunos accepisse, ait : « Numquid tamen propterea » calumniandum est universæ Ecclesiæ, quod a jejunis » semper accipitur ? Ex hoc enim placuit Spiritui sancto » ut, in honorem tanti sacramenti, in os Christiani prius » corpus dominicum intraret quam cæteri cibi : nam ideo » per universum orbem mos iste servatur. » 2<sup>o</sup> Ex variis conciliis, v. g. Carthag. VII, can. 29 ; Toletan. I, can. 1 ; Constantiensi, sess. 13, dicente : « Generale concilium de- » clarat, decernit et definit... quod, licet Christus post » cœnam instituerit et suis discipulis administraverit » sub utraque specie panis et vini hoc venerabile sacra- » mentum, tamen, hoc non obstante, sacrorum cano- » num auctoritas et approbata consuetudo Ecclesiæ ser- » vavit et servat quod hujusmodi sacramentum nec » conficiatur post cœnam, nec sumatur a non jejunis, » nisi in casu infirmitatis, aut alterius necessitatis a jure » vel Ecclesia concessa vel admissa, etc. » Ergo.

Olim in aliquibus ecclesiis Africanis sacerdotes post cœnam celebrabant et fideles communicabant feria quinta Majoris hebdomadæ, in memoriam sanctissimi illius sacramenti, quod Christus, propter rationes sibi notas et probabiliter ut vetus pascha novo incipiente desineret, in ipsa cœna instituerat. Ille autem usus, quem S. Aug. commemorat in Epist. superius citata, diu permansit. Concil. Bracarense I, in initio septimi sæculi, can. 16, prohibet ne eo die missæ, soluto jejunio, celebrentur.

Agapæ, id est, pia convivia quæ tempore Apostolorum fieri solebant, probabiliter locum habebant post sanctorum mysteriorum sumptionem : propter abusus non diu substiterunt.

*Notanda circa jejunium.*

1° Incipiendum est a media nocte, id est, ab initio diei naturalis. Unde qui immediate post mediam noctem, vel etiam inter primum et ultimum horologii ictum, aliquid sumeret, jam ea die communicare non posset. Si diversa existant horologia discordantia, licet stare ei quod reputatur aliorum regula, et si nulla sit ratio unum aliis præferendi, pars tutior eligenda est : item in dubio negativo, quando quis nescit an post mediam noctem aliquid sumpserit necne, quidquid contrarium plurimi dicant probabilistæ, asserentes in tali dubio existere libertatem, a communione et celebratione abstinendum esse putamus.

2° Illud præceptum levitatem materiæ non patitur; non minus enim jejunium naturale per parum quam per multum solvitur, cum in eo præcise situm sit ut, reverentiæ causa, nihil ante corpus Christi sumptum fuerit. Hinc qui micam panis, guttulam vini, aquæ vel alterius liquoris, deliberate vel indeliberate sumpsit, mortaliter peccaret communicando.

3° Sed necesse est ut quod sumitur habeat rationem comestionis vel potationis; quia juxta communem hominum sensum, eo modo tantum frangitur jejunium naturale. Unde qui decumbendo saccharum ori suo imponit, et dormiens illud post mediam noctem deglutit, non remanet jejunus. Contra vero quod per modum respirationis aut salivæ hauritur, non frangit jejunium. *Hinc* 1° qui casualiter deglutiret cum saliva vel per respirationem, pulverem, fumum, culicem vel parvam muscam, guttulam aquæ, os lavando, vini, jusculi, gustando vinum aut jusculum, et statim expuit, lacrymas vel sudores faciem irrigantes, maneret jejunus : non item si hæc ex industria sumeret; quia tunc adesset ratio comestionis vel potationis.

4° Requiritur ut sit ab extra; quod enim ab intrinseco provenit, etsi voluntarie deglutias, non reputatur trajici

per modum cibi aut potus. Ita communiter theologicum S. Th. Unde dicunt sanguinem ex capite descendentem, ex gengivis manantem, saniem ex pustula oris proveniente, sputa non ejecta, jejunium eucharisticum non frangere. Hinc multi docent reliquias ciborum, dentibus adhærentes, absque læsione jejunii transgluti posse; quia 1° non veniunt ab extrinseco; 2° per modum salivæ sumuntur; 3° ad præcedentem refectionem pertinent et improprie novam constituunt comestionem. Attamen S. Th. 3 part. q. 80, art. 8, ad 4<sup>um</sup> ait: « Reliquiæ cibi remanentes in ore, si casualiter transglutiantur, non impediunt communionem. » Si ergo ex industria transglutirentur, communionem impedirent. Ita communius et probabilius theologi, ut *Cabassut, Layman, Sylvius, Vasquez, P. Antoine, Collet, Ligorio*, etc. Ad cavendos autem vel tollendos scrupulos, dicendum est cum Ligorio, l. 6, n. 279, reliquias a dentibus avulsas et sensibiles expuendas esse, ut docet Bened. XIV, l. 3, cap. 12; sed nullam esse obligationem adhibendi diligentiam ad eas extrahendas, etiamsi prævideantur cum saliva deglutiendæ.

« Eadem ratio est, inquit S. Th. ibid. et cum eo generaliter doctores, de reliquiis aquæ vel vini, quibus os abluitur, dummodo non trajiciantur in magna quantitate, sed permixtæ salivæ, quod vitari non posset. »

5° Requiritur ut quod sumitur habeat rationem cibi vel potus, seu alterabile sit in stomacho; alioquin, juxta communem concipiendi modum, non esset comestio, nec potatio. Unde 1° qui res omnino indigestibiles edunt, v. g. capillos, ungues, metallum, vitrum, fragmenta ligni, lapillos et alia hujusmodi, jejunium probabiliter non solvunt. Quia tamen multi contrarium sentiunt, pars tutior esset eligenda. 2° Qui, e contra, res in stomacho alterabiles, sive nutrant, sive non, deglutirent, ut chartam, paleam, filum ex lino, ceram, medicinam, etc. jam non essent jejuni.

*Quæritur* 1° an usus tabaci, sive in pulvere, sive in fumigatione, sive in masticatione, jejunium eucharisticum solvat?

*R. 1°.* Concilium Mexicanum, anni 1585, usum tabaci ante missæ celebrationem et communionem stricte prohibuit. Per edictum cardinalis Borgia, archiepiscopi Hispalensis, anni 1642, jussi sunt omnes sacerdotes, sub pœna excommunicationis latæ sententiæ, ab usu tabaci abstinere una hora ante et post celebrationem. Innocentius X et Innocentius XI sub eadem pœna vetuerunt ne quis intra Vaticanam basilicam tabacum sumere auderet, quod jam eodem modo prohibuerat Urbanus VIII fieri intra ecclesias diœcesis Hispalensis. Notat autem Bened. XIV, de Synodo diœces. l. 11, cap. 13, n. 3, hunc usum, olim turpem et indecentem, communi consuetudine fuisse coonestatum; Benedictum XIII illum in basilica Vaticana permisisse, ac proinde nimium profecto severum fore eum ante Eucharistiæ perceptionem vel missæ celebrationem interdicere.

*R. 2°.* Communius tenent auctores, contra P. *Antoine* aliosque nonnullos rigidiores, 1° tabacum in pulvere, sumptum per nasum, etsi quandoque usque in stomachum trajiciatur, jejunium non solve, quia per modum comestionis non sumitur, sed per modum attractionis; 2° nec fumum tabaci, quia non est cibus aut potus, nec per modum comestionis trajicitur; 3° nec etiam probabilius humorem in masticatione, quia humor tabaci non deglutitur, aut si quædam particulæ deglutiantur, id fit per modum salivæ, non vero per modum comestionis aut potationis.

Cæterum omnes conveniunt talem masticationem ante communionem esse indecentem, et Ligorio putat eam a culpa veniali non excusari, nisi aliqua subsit causa : usus tabaci in fumo parum decens etiam videtur, et ab eo omnino abstinendum vult Dens, t. 5.

*Quæritur 2°* an aliqua saltem temporis mora ante vel post Eucharistiæ susceptionem a cibo potuve abstinendum sit?

*R. 1°.* Non refert an post cibum potumve quis dormierit vel digestus fuerit ut ad sacram Eucharistiam licite accedat, modo mens ob indigestionem vel insomnietatem



non sit turbata. 2° Olim præcipiebatur jejunium, post sumptionem sacramenti Domini, usque ad sextam vel etiam usque ad vesperam, Decreti 3<sup>a</sup> part. dist. 2, can. 23. At præceptum istud jam diu abrogatum erat tempore S. Th. ut ipse ait, 3<sup>a</sup> parte, q. 80, art. 8, ad 6<sup>um</sup>, addens tamen : « Debet esse aliqua mora inter sumptionem hujus sacramenti et reliquos cibos. Unde et in missa oratio gratiarum actionis post communionem dicitur et communicantes etiam suas privatas orationes dicunt. »

*Casus in quibus jejunium ad sumptionem Eucharistiæ non requiritur.*

*Primus* est periculum mortis. Sive enim periculum istud proveniat ex infirmitate, sive ex causa extrinseca, modo sit reale, præceptum jejunii non obligat, nec sacerdos tenetur S. viaticum statim post mediam noctem deferre, ut moribundus illud accipiat jejunus. Si periculum non instaret, communio in sequentem diem differenda esset, ut ad illam servaretur jejunium, supposito quod facile servari posset. Verum si morbus sit periculosus, communio non est scrupulose differenda.

Ubi infirmitas protrahitur et periculum mortis perseverat, sacra Eucharistia iterum moribundo etiam non jejuno, post decem dies, ex rituali nostro, dari potest non per modum viatici, quod semel tantum in eadem infirmitate administratur, sed modo consueto, ad satisfaciendum devotioni. Ægroto bene disposito et jejunium servanti multo crebrius divinum illud sacramentum tribui posset. Si ægrotus saniozem habuerit statum, in novum incidat periculum, sacramentum non jejunus accipere poterit, licet decem dies ab ultima communionem in viatico non effluxerint. Sic habet expresse rituale nostrum.

Ægrotus vel infirmus in periculo mortis non constitutus, in viatico sacram Eucharistiam suscipere non potest, ne quidem tempore paschali : unde si manere non possit jejunus et divina Eucharistia ei convenienter de-

ferri non possit immediate saltem post mediam noctem, a præcepto communionis paschalis excusatur.

*Secundus casus* est necessitas perficiendi sacrificium, si nempe 1° sacerdos post consecrationem moriatur aut deficiat, et alius non sit sacerdos jejunus qui missam continuare possit; 2° si celebrans in sumptione calicis tantum advertat fuisse aquam pro vino; 3° si post consecrationem recordetur se non esse jejunum, quia præceptum divinum perficiendi sacrificium præcepto servandi jejunium præstat. Si ante consecrationem adverteret se aliquid sumpsisse, secluso scandalo et infamiae nota, ab altari recedere deberet, inquit S. Th. q. 83, art. 6, ad 2<sup>um</sup>, et generaliter theologi cum illo. At, nisi privatim celebraret, fere semper in eo casu esset locus scandalum vel infamiam timendi. Non item si missa non esset incœpta, quia dicere posset se ex inadvertentia aliquid comedisse vel bibisse.

*Tertius casus* est periculum profanationis, ubi videlicet timetur ne sacra Eucharistia ab hæreticis vel incredulis conculcetur, comburatur, ab animali devoretur, etc. a sacerdote vel etiam a laico non jejuno consumenda est, si desit jejunus; quia lex jejunii in honorem sacramenti constituta, in tali hypothesis cessat.

*Quartus casus* est, si sacerdos post ablutionem reperiat particulas a se in eadem missa consecratas, et adhuc vestibus sacris sit indutus, eas consumere debet, quia sunt velut complementum sacrificii quod jejunus inchoavit; etiamsi in sacristia jam esset, sed nondum vestibus sacris exutus, idem facere posset, quia eadem actio censetur perseverare. Ratione contraria, reliquias alterius sacrificii, sive a se, sive ab alio consecrati, sic absumere non posset, nec particulas ultimi sacrificii, si jam exutus esset. Ita Bened. XIV, de Missæ sacrif. l. 3, cap. 17, n. 5. Eas igitur reverenter deponeret in tabernaculo, vel in corporali reservaret, in proximo sacrificio ante ablutionem sumendas.

5° Valde controvertitur an sacerdos non jejunus celebrare debeat aut possit, ne moribundus viatico careat.

*Multi affirmant*, dicentes 1° præceptum divinum communicandi in articulo mortis præcepto ecclesiastico jejunii præstare; 2° Ecclesiam, quæ ægrotum a lege jejunii exemptum declaravit, sacerdotem in casu supposito illa lege obligatum velle non censi. *Alii tamen communius et probabilius negant*, et contendunt 1° præceptum divinum communicandi in articulo mortis non obligare, quando Eucharistia non habetur; 2° Ecclesiam formaliter eximisse moribundum a lege jejunii, non vero sacerdotem; 3° eum in stata peccati mortalis, non habita copia confessarii, absque confessione celebrare posse ad dandum viaticum; quia per contritionem perfectam supplet confessioni, et jejunii defectum supplere non potest. Excipiunt casum quo ipse sacerdos non jejunus in periculo proximo constitueretur; omnes enim fatentur eum celebrare posse, ne sancto viatico privatus decedat, quia lex jejunii non obligat eum qui in periculo mortis constituitur.

*De munditie corporis.*

Quæ actus castitati oppositos spectant in Supplemento ad tractatum de Matrimonio sufficienter exposuimus. Nonnulla tamen ad munditiam corporis attinentia hic notanda sunt.

1° Qui externam habet maculam delebilem, eam reverentiæ causa abstergere debet. Nulla vero est obligatio abstinendi a communione propter maculam occultam, aut publicam, sed indelebilem. Ita omnes.

2° Sacerdos infectus lepra vel alia difformitate horrorem excitante, in secreto celebrare potest, sed non in publico, ut in Decretal. l. 3, tit. 7, cap. 4, expresse statuitur.

3° Mulieres in ornatu sancto, modestiam redolente, pectore cooperto, ad sacram communionem accedere debent: si quæ valde indecentes se præsentarent, communio eis neganda esset, cum debitis tamen cautionibus ad præcavenda scandala.

4º Nulla lege vetatur ne vir armatus ad sacram synaxim accedat; sed ex decentia et humilitatis causa, milites arma sua deponere solent, nisi ex professione regiliosa ea deferant, ut olim equites S. Joannis Hierosolymitani.

5º Sacerdos non celebrans et ad sacram communionem accessurus, superpelliceo et stola induendus est. Ita olim statuerat concil. Bracarense III, can. 3; sic statuerunt etiam rituale Romanum, *Sacerdotes vero cum stola communicent*, et rituale nostrum. Certum est tamen ex omnium confesso, hanc circumstantiam esse duntaxat sub veniali, et nullum esse peccatum eam omittere, si rationabilis causa id fieri suadeat, ut major communicantium numerus.

## CAPUT SEXTUM.

### DE NECESSITATE EUCHARISTIÆ.

Quoniam sanctissimum illud sacramentum olim parvulis statim post baptismum administrabatur, et in Ecclesia Orientali adhuc administratur, quidam arbitrati sunt Græci illud necessarium esse necessitate medii, sicut Baptismum: hoc antiquos Patres persuasum habuisse docent Calvinistæ, et imprimis *Aubertin* et *Daillé*, quod evidenter falsum est; antiqui Patres enim Eucharistiam tribuebant parvulis tanquam utilem, non vero ut ad salutem necessariam, et ideo vetus ille usus abrogatus est sine ulla reclamazione. Unde concil. Trid sess. 21, cap. 4, « docet parvulos, usu rationis carentes, nulla obligari » necessitate ad sacramentalem Eucharistiæ communionem; » et can. 4 addit: « Si quis dixerit parvulis, antequam ad annos discretionis pervenerint, necessariam » esse Eucharistiæ communionem: anathema sit. » Semper creditum est parvulos in Baptismo regenerari, ac pro-



inde ante usum rationis decedentes, salvandos esse sine Eucharistia.

Constat igitur et de fide est Eucharistiam non esse necessariam necessitate medii ad salutem. Itaque nobis inquirendum est an sit necessaria, 1° ex præcepto divino; 2° ex præcepto ecclesiastico; 3° sub utraque specie; 4° frequenter.

## ARTICULUS PRIMUS.

AN SACRA EUCHARISTIA SIT AD SALUTEM NECESSARIA EX  
PRÆCEPTO DIVINO.

Tria hic nobis occurrunt examinanda, nempe 1° an præceptum existat; 2° quinam eo teneantur; 3° quandomam obliget.

1° Certum est dari præceptum divinum sacram suscipiendi Eucharistiam, ut constat 1° ex verbis Christi, Joan. vi, 54: *Nisi manducaveritis carnem Filii hominis et biberitis ejus sanguinem, non habebitis vitam in vobis.* Et Luc. xxii, 19: *Hoc facite in meam commemorationem.* Quæ verba veram exprimunt necessitatem, non medii, ut notavimus, sed præcepti. 2° Ex concil. Trid. sess. 13, cap. 2, dicente: *In illius (sacramenti) sumptione colere nos sui memoriam præcepit.* 3° Ex ratione. Christus divinum Eucharistiæ sacramentum per modum cibi et refectionis spiritualis instituit: noluit autem illud fore inutile: ergo illius usum præcepit. Ergo.

2° Eo præcepto omnes tenentur adulti usum rationis habentes; verba enim Christi, *Nisi manducaveritis*, etc. generalia sunt et nullos excipiunt; immediate afficiunt fideles, et mediate ipsos infideles qui religionem Christianam amplecti et ad sacram Eucharistiam se accingere tenentur.

3° Illud præceptum obligat saltem in articulo vel in proximo mortis periculo; de natura est enim præcepti affirmativi ut saltem aliquando obliget: at, si præceptum divinum sacram suscipiendi Eucharistiam non obligaret, saltem in articulo vel in proximo mortis periculo,

dicendum esset illud nunquam stricte obligatum. Unde 1<sup>o</sup> concil. Nicæn. I, can. 12, statuit *antiquæ legis regulam servandam esse, ut si forte quis recedat ex corpore, necessario viæ suæ viatico non defraudetur*. 2<sup>o</sup> Semper sollicita est Ecclesia ut sanctum viaticum moribundis tribueretur, nisi tanto beneficio judicarentur indigni. 3<sup>o</sup> Sanctum istud sacramentum infirmo petenti et sufficienter disposito denegari non posset sine gravi fidelium scandalo. Ergo.

Obligat insuper pluries in vita, præcise quia per modum refectionis spiritualis fuit institutum : tempus autem a Christo non fuit assignatum, sed Ecclesia illud determinavit, *ut infra dicemus*.

Hinc mulieres prægnantes ante primum partum, vel si partus difficiles jam habuerunt, periculose navigaturi aut præliaturi, operationem periculosam experturi, etc. Eucharistiam suscipere debent, si moraliter possint.

*Notanda circa viaticum.*

1<sup>o</sup> Quamvis existat præceptum divinum sacram Eucharistiam in periculo mortis suscipiendi, non repugnat eam aliquando prohiberi, si nempe reverentia erga sanctissimum sacramentum id postulare videatur : nam præceptum divinum directioni Ecclesiæ committitur, et ubi decenter impleri nequit, non obligat.

2<sup>o</sup> Pueris doli capacibus, qui sacram Eucharistiam a cibo communi sciunt distinguere, dandum est viaticum in periculo mortis, etsi non habeant ætatem ad primam communionem requisitam : ita Bened. XIV, de Synodo diœces. l. 7, cap. 12, n. 1 ; Ligorio, l. 6, n. 293, et rituale nostrum. In dubio de capacitate pueri, æstimamus, contra nonnullos, viaticum non esse concedendum ; quia, juxta præsentem disciplinam, dari non debet certo incapacibus : ergo nec in dubio.

3<sup>o</sup> Disputant theologi an qui heri vel hodie communionem accepit aut missam celebravit, et ante finem diei in grave periculum mortis incidit, sacrum viaticum sus-

cipere possit aut debeat. Si heri communio suscepta fuerit, datur obligatio viaticum hodie suscipiendi ; si hodie, res manet dubia. Probabilius videtur viaticum administrari posse, et strictum non existere præceptum illud dandi aut suscipiendi, quia communio eadem die accepta rationem viatici habere censetur. « In tanta  
• opinionum varietate doctorumque discrepantia, inter-  
• grum erit parochio eam sententiam amplecti quæ sibi  
• magis arriserit, » inquit Bened. XIV, de Synodo diœ-  
ces. l. 7, cap. 11, n. 2.

4° Si in ægroto adsit periculum ejectionis hostiæ, propter vomitum, tussim, sputa quasi perpetua, non danda est Eucharistia ob reverentiam ei debitam ; si periculum videatur dubium, danda est particula non consecrata, quam si rejiciat, a communione abstinendum est ; si eam retineat, administrari debet communio : Ligorio, l. 6, n. 292.

5° Si contingat ut ægrotus post sumptionem viatici evomat, et sacræ species appareant, reverenter erunt colligendæ, in vase mundo deponendæ, ad ecclesiam deferendæ, ibique custodiendæ donec fuerint corruptæ, et tunc in piscinam sacram projicientur. Si vero non appareant, tota materia vomita erit stupis extergenda, comburenda et cineres in piscinam projiciendi.

6° Sacrum viaticum tempore noctis non deferetur, nisi urgeat necessitas et absit periculum profanationis, quo in casu moribundus sine sacramento non esset relinquendus.

7° Non desunt sacerdotes qui sanctum viaticum magnis peccatoribus facile denegant, sub prætextu quod illud non sit absolute necessarium ; advertant præceptum divinum tunc urgere, sub peccato mortali obligare, et seipsos strictissime teneri tales moribundos pro posse suo ad Eucharistiam præparare. Statuitur quidem, in rituali nostro, eos sacrum viaticum suscipere non posse, quin scandalum a se datum reparaverint. Verum illud sufficienter reparant peccata confitendo, et declarando coram testibus se de anteactis dolere, atque firmum habere propositum rectius in posterum vivendi, nisi aliqua specialis

ipsis incumbat obligatio publica, v. g. restituendi, reconciliandi, concubinam ejiciendi, etc. cui prius satisfaciendum est.

8° Sacrum viaticum deferri non potest ad meretricem pœnitentem, in domo publice meretricia adhuc exstantem : exigendum est ut prius exeat et in honesta domo collocetur, ob reverentiam sanctissimo-Sacramento debitam.

9° Qui non communicavit in periculo mortis, transacto periculo, supplere non tenetur; quia obligatio viatici est duntaxat pro periculo.

10° Qui, post viaticum susceptum, mortaliter peccavit, iterum communicare probabiliter non tenetur, quia hæc obligatio nullibi præscribitur, sed sufficit confessio. Sic plures cum Ligorio. Item qui sacrum viaticum sacrilege suscepisset, illud denuo suscipere non posset ante decem dies elapsos, et ceremoniæ externæ non iterarentur in nova susceptione; quia ritus externus juxta legem ecclesiasticam fuit expletus.

11° Sancti viatici sicut Extremæ-Uctionis administratio ad solum pertinet pastorem : extraneus igitur sacerdos, sive regularis, sive sæcularis, illud administrare non potest, sub pœna suspensionis, sine legitimi ægrotantis parochi licentia expresse data, vel rationabiliter præsumpta, excepto casu urgentis necessitatis, ut fert rituale Cenomanense.

12° Parochi hoc munus committere non possunt nisi sacerdoti approbato, ne ægrotus ministerio confessarii ante communionem indigeat.

## ARTICULUS SECUNDUS.

### AN EUCHARISTIA EX PRÆCEPTO ECCLESIASTICO SIT NECESSARIA.

Per multa sæcula tam frequenter accedere solebant fideles ad sanctum Eucharistiæ sacramentum, ut præcepto divino abunde satisfacerent : cum vero adverterit



Ecclesia eos, pietate decrescente, a sacro illo convivio vel omnino recedere, vel diutius abstinere, determinavit tempus quo ad illud accedere sub peccato mortali teneantur. Hanc legem tulit primo in concilio Lateranensi IV, anno 1215 celebrato, can. 21, his verbis : « Omnis  
 » utriusque sexus fidelis, postquam ad annos discretionis  
 » pervenerit, omnia peccata sua..... confiteatur..... sus-  
 » cipiens reverenter ad minus in pascha Eucharistiæ sa-  
 » cramentum : nisi forte de consilio proprii sacerdotis,  
 » ob aliquam rationabilem causam, ad tempus ab ejus  
 » participatione duxerit abstinendum : alioquin vivens  
 » ab ingressu ecclesiæ arceatur, et moriens Christiana  
 » careat sepultura. » Eam renovavit in concilio Trid. sess. 13, can. 9 : « Si quis negaverit omnes et singulos  
 » fideles utriusque sexus, cum ad annos discretionis per-  
 » venerint, teneri singulis annis saltem in paschate, ad  
 » communicandum, juxta præceptum sanctæ matris Ec-  
 » clesiæ : anathema sit. »

*Observanda circa communionem paschalem.*

1º Soli baptizati præcepto ecclesiastico communicandi subjiciuntur : patet ex canonibus citatis, ubi dicitur, *utriusque sexus fidelis* ; et ratio est, quia Ecclesia nullam habet auctoritatem in eos qui foris sunt. In hoc præceptum istud differt a præcepto divino ipsos infideles mediate obligante.

2º Anni discretionis ex variis circumstantiis prudenter judicandi sunt : non iidem communiter æstimantur pro confessione et pro communionem. Unde pueri doli capaces ad annuam tenentur confessionem, non vero statim obligantur ad communionem ; quia 1º communis usus Ecclesiæ obligationem hujus sacramenti sic interpretavit ; 2º Eucharistia majoris est excellentiæ et non tantæ necessitatis : majorem igitur requirit præparationem, præsertim in pueris prima vice communicaturis, ut deinceps cum debita reverentia ad tantum sacramentum accedant.

3º S. Th. 3 part. q. 80, art. 9, ad 3<sup>um</sup>, dicit quod, si

pueri usum rationis habere incipiant, et devotionem erga Eucharistiam concipere possint, sanctum illud sacramentum eis conferri possit; non dicit conferendum. Unde Ligorio et plures cum illo docent, pueros in ea ætate cœlestem Eucharistiæ cibum a profano discernere scientes, ad sacram synaxim admitti posse, sed præcepto non teneri ante annum circiter nonum vel decimum, et communionem eis non differendam regulariter ultra duodecimum. Caute igitur cavere debent parentes et parochi ne sua culpa pueri ætate jam proveci ad sacram communionem non sufficienter disponantur.

*Notandum*, pueros alios aliis perspicaciores esse, ac proinde non omnes eadem ætate præcepto communionis subjectos: quidam in nono vel in decimo anno admitti debent; alii ante duodecimum vel etiam decimum quartum admitti nequeunt. Hæc prudens discretio sedula digna est sollicitudine pastoris, qui totus esse debet ut pueros etiam in teneris annis sana doctrina imbuat, moribus Christianis informet, ad primam communionem diligenter disponat, et perseverantiam eorum omni cura assecurare intendat.

4º Omnes adulti baptizati memorato Ecclesiæ præcepto tenentur sub peccato mortali; neque ab illo eximuntur increduli et publici peccatores, quia per fidem et virtutes Christianas ad sacram communionem digne suscipiendam se disponere debent.

5º Non in quolibet anni tempore, sed in paschate, juxta concil. Lateran. et Trid. verba, implendum est communionis præceptum; et idcirco hæc communio dicitur paschalis. Nomine autem paschatis, vulgo intelligitur tempus a dominica Palmarum usque ad dominicam in Albis inclusive. Sæpe, ex concessione episcopi, tempus illud anticipatur vel protrahitur, propter confessoriorum paucitatem, pastoris infirmitatem, aliasve rationes quæ judicio episcopi subjiciendæ sunt.

6º Præterea, unusquisque fidelis potest, ob rationabilem causam, ex judicio proprii sacerdotis, id est episcopi, parochi vel alterius sacerdotis approbati, communionem

paschalem ad aliud tempus differre, puta, ut convenientius sit dispositus : sed interea facere debet quod in se est ut requisitas dispositiones quam prius habeat, et contra Ecclesiæ præceptum mortaliter peccaret, si, culpa sua, tempore per confessarium statuto nondum esset paratus.

7º Qui in quindena paschali vel tempore a proprio sacerdote designato communionem omisit, ad eam semper tenetur, et eo magis peccat quo magis differt; quia tempus paschale non fuit determinatum ad finiendum præceptum, sed ne ultra illius impletio differatur. Concilium enim Trid. canone citato, definit esse obligationem communicandi *singulis annis, saltem in paschate* : qui ergo culpabiliter vel inculpabiliter non communicavit in paschate, præcepto communionis annuæ adhuc tenetur. Qui e contra communicavit ex devotione vel in viatico, sine intentione præcepto satisfaciendi, nihilominus satisfecit, quia sola communio præcipitur, non vero intentio.

8º Qui, quindena paschali jam inchoata, prævidet se in ultimis diebus a communione impeditum fore, statim communicare debet, quia tempus obligationis instat : si vero tempus paschale nondum sit inchoatum, et prævideat se, eo durante, facultatem communicandi non habiturum, ad communionem anticipandam non tenetur vi præcepti communionis paschalis, quæ ante tempus non magis obligat quam præceptum audiendi missam die dominica, die sabbati astringit, si prævideatur impedimentum ; sed vi præcepti singulis annis communicandi obligaretur, si ab ultima communione ad tempus liberum excederetur annus.

9º Qui paulo ante tempus paschale communionem accepit, sive ex devotione, sive in viatico, sive ea intentione ut præcepto communionis paschalis per anticipationem satisfaceret, nihilominus, quindena paschali decurrente, communicare debet si possit ; quia datur præceptum eo tempore communicandi, nisi legitimum adsit impedimentum. Unde rituale Romanum, de communione paschali, in fine, ait : « Ægrotis quoque parochialibus, etiam si communionem extra præscriptos paschatis dies sump-

» serint, in paschalibus diebus illam deferet ac ministrabit (parochus). » Idem habetur in rituali nostro.

Parochus igitur qui prævidet sufficiens sibi defuturum tempus ut in quindena paschali communionem ad ægrotos parochiæ suæ deferat, licentiam eam differendi ab episcopo obtinere debet.

10° Per communionem sacrilegam præcepto communionis annuæ non satisfit, ut contra probabilitates declaravit Innocentius XI, anno 1679, sequentem damnando propositionem : *Præcepto communionis annuæ satisfit per sacrilegam Domini manducationem.*

11° Unusquisque communionem paschalem in parochia sua, a proprio paroco, vel a sacerdote ab eo delegato suscipere debet, nisi, ex illius vel episcopi aut vicarii generalis licentia, privilegio aut consuetudine, in alia ecclesia communicare possit. Sic generaliter theologi, in eo sensu canones concilii Lateran. et concilii Trid. intelligentes.

Consuetudine eximuntur 1° sacerdos in aliena ecclesia celebrans; si vero non celebraret, in sua parochia communicare teneretur. 2° Peregrini et vagi, nullam parochiam habentes, vel ab illa ita absentes, ut ad eam commodè redire nequeant, præcepto communionis paschalis satisfaciunt communicando in ea parochia in qua hoc tempore inveniuntur. 3° Famuli vel famulæ in monasteriis degentes, quia ad familiam monachorum vel monialium pertinere censentur. Non item ii qui, licet monasterii famulatu annexi, extra illud degerent. Sub hoc nomine autem non designantur sorores conversæ, novitiæ nec postulantes : omnes ad familiam monasterii pertinent.

12° Ex consuetis episcoporum statutis, vel ex speciali licentia singulis domibus concessa, alumni seminariorum vel collegiorum et juniores puellæ in scholis detentæ, in sacellis suis respectivis communionem paschalem recipere solent; item magistri et magistræ in his institutionibus commorantes, non vero famuli in eis servientes. Talis est consuetudo apud nos recepta.



13° Qui, sine licentia pastoris, extra propriam parochiam tempore paschali communicavit, præcepto non satisfecit: iterum ergo in parochia sua communicare debet. Quidam excipiunt, nisi in ecclesia cathedrali suæ diœcesis communicaverit; sed probabilius nec in eo casu satisfecisset, nisi forte episcopus declarasset omnes diœcesanos præcepto communionis paschalis in cathedrali satisfacere posse. Vide Ligorio, l. 6, n. 300.

14° Licentia pastoris, id est parochi, episcopi aut vicarii generalis, pro communione paschali extra parochiam facienda, potest esse expressa, vel rationabiliter præsumpta, quando ex adjunctis certo judicatur eum consentire aut consensurum esse. Ita Ligorio et plures apud ipsum, et hæc sententia mihi videtur certa.

15° Ex consensu pastorum præsumpto et ex variis recentiorum Cenomanensium episcoporum decisionibus, non exigitur in hac diœcesi ut qui communionem paschalem omiserunt, se hoc anno in propria ecclesia sistant ad communicandum, ne talis obligatio eos a conversione removeat; sed tantum persuasione inducuntur, et finaliter eis permittitur ut pro hac vice in aliena ecclesia sacramentum suscipiant.

16° Nunc non exigitur schedula confessionis ut tribuatur communio tempore paschali, nec extraneis ad sacramentam accedentibus denegatur; quia præsumitur eos licentiam a pastore suo obtinuisse, vel in parochia sua jam communicasse, aut ante finem paschatis communicaturos esse; nec, juxta ritualis præscriptionem, describuntur nomina eorum qui præcepto non satisfecerunt, ut ad episcopum deferantur.

## ARTICULUS TERTIUS.

AN COMMUNIO SUB UTRAQUE SPECIE SIT NECESSARIA.

*Certum est* 1° eam esse necessariam respectu sacerdotis missam celebrantis, ut in secunda parte hujus tractatus ostendemus.

*Certum est* 2<sup>o</sup> eam jure divino permissam esse laicis ; frequenter enim laici, per decem et tria priora Ecclesiæ sæcula, sacram Eucharistiam sub utraque specie suscipiebant, ut omnes fatentur, et Græci eam sic adhuc recipiunt : frequenter etiam illud sacramentum sub unica specie conferebatur, v. g. 1<sup>o</sup> ægrotis, ut patet exemplo Serapionis supra memorati, et S. Ambrosii, qui referente S. Paulino, in vita ejus, t. 2, Appendice, corpore Domini ab episcopo Vercellensi *accepto, ubi glutivit, emisit spiritum*. 2<sup>o</sup> Infantibus, qui sub sola specie vini communicari poterant, et nunc apud Græcos eo modo communicantur : « Sacerdos summum digitum indicem tinget » sanguine pretioso ; mox imponet corpori, deinde digitum immittet in os infantis, cui statim aqua bibenda » præbebitur ; » *Renaudot*, t. 1. 3<sup>o</sup> Fideles qui, in primis sæculis, sacram Eucharistiam apud se reservatam singulatim sumebant, sub unica specie communicabant, et tamen integrum sacramentum suscipere credebant. 4<sup>o</sup> In missis præsanctificatorum celebrans sub unica specie communicat. Ergo.

Usus communionem sub unica specie administrandi fidelibus paulatim invaluit, ob duplicem præsertim rationem : 1<sup>o</sup> quia species panis facilius conservabatur quam species vini ; 2<sup>o</sup> quia in administratione illius sacramenti, sub specie panis, non tam frequentia occurrebant profanationis pericula quam sub specie vini. Insensibilis illa calicis desuetudo respectu laicorum nullam excitavit reclamationem ; quia jam frequenter communio sub una specie accipiebatur, et omnibus persuasum erat utramque speciem ad validitatem sacramenti non esse necessariam.

Versus initium decimi quinti sæculi, Jacobus Misnensis, cognominatus Jacobel, parochus in civitate Praga, suadente Petro Dresdensi, prædicavit usum calicis fidelibus esse jure divino necessarium. Joannes Hus hunc errorem adoptavit ; Lutherus et Calvinus postea illum, in odium Ecclesiæ Romanæ, fortiter propugnaverunt. Contra quos sit

## PROPOSITIO.

*Nullum est præceptum divinum de sacra Eucharistia  
sub utraque specie sumenda.*

*Prob.* Hæc propositio est de fide; probatur Scriptura sacra, traditione et ratione.

1° *Est de fide.* Definita enim fuit in concilio Const. sess. 13, contra Hussitas; et in concilio Trid. sess. 21, can. 1, contra Protestantes, his verbis: « Si quis dixerit, » ex Dei præcepto vel necessitate salutis, omnes et singulos Christi fideles utramque speciem sanctissimi Eucharistiæ sacramenti sumere debere: anathema sit. » Ergo 1°.

2° *Prob. Scriptura sacra.* Joan. vi, 52: *Si quis manducaverit ex hoc pane, vivet in æternum*; et y. 59: *Qui manducat hunc panem, vivet in æternum.* Unde sic. Christus eundem promittit effectum communioni sub una specie ac communioni sub utraque. Ergo B. Paulus, I Cor. xi, 27: *Quicumque manducaverit panem hunc, vel biberit calicem Domini indigne, reus erit*, etc. supponit, utendo particula disjunctiva *vel*, alterutram speciem seorsim accipi posse. Ergo 2°.

3° *Traditione*, nempe factis supra relatis, quibus constat communionem sub unica specie sæpe datam et sumptam fuisse, ut patet exemplo infirmorum, infantium, fidelium domibus suis communicantium, et sacerdotum cum præsanctificatis celebrantium. Ergo 3°.

4° *Ratione theologica.* De fide est totum et integrum Christum esse sub utraque specie: qui ergo unam suscipit speciem, totum suscipit Christum, carnem ejus manducat; et, propter concomitantiam, sanguinem ejus bibit. Ergo præcepto carnem ejus manducandi et sanguinem ejus bibendi satisfacit, nisi ex Scriptura vel ex traditione ostendatur utramque speciem sumendam esse: porro neque ex Scriptura neque ex traditione ostendi potest utramque speciem sumendam esse, sed potius contrarium monstratur: ergo 4°; aliunde, etc. Ergo.

*Dices 1º. Joan. vi, 53 : Nisi manducaveritis carnem Filii hominis et biberitis ejus sanguinem , non habebitis vitam in vobis : ergo Christus communionem sub utraque specie præcepit.*

*R. Nego conseq.* Nam 1º genuinus præcepti Christi sensus ex traditione repetendus est : at traditio , *ut ostendimus*, nos docet Christi fideles sæpe sub unica specie communionem accepisse. 2º Ipsi Calvinistæ vinum in cœna non tribuunt iis quibus grave est post alios sumere , nec iis qui vinum bibere nequeunt : ergo non arbitrantur communionem sub utraque specie jure divino esse præscriptam. 3º Concilium Trid. sess. 21 , cap. 1 , præfatum textum nobis objectum sic interpretatur : « Qui dixit : » *Nisi manducaveritis*, etc. dixit quoque : *Si quis manducaverit ex hoc pane, vivet in æternum.* Et qui dixit : *Qui manducat meam carnem et bibit meum sanguinem , habet vitam æternam*, dixit etiam : *Panis quem ego dabo , caro mea est pro mundi vita.* Et denique qui dixit : *Qui manducat meam carnem et bibit meum sanguinem , in me manet*, et ego in illo , dixit nihilominus : *Qui manducat hunc panem , vivet in æternum.* » Ergo Christus , in prædicto textu , non modum sumendi Eucharistiam , sed rem ipsam præcipit. Ergo.

*Dices 2º. Christus , sacram instituens Eucharistiam , dixit : Hoc facite in meam commemorationem : at communionem sub utraque specie dedit : ergo.*

*R. Dist. maj.* Dixit , *Hoc facite*, etc. et hæc verba solos spectabant Apostolos eorumque successores celebrantes , *concedo* ; et ipsos spectabant laicos , *nego maj.* Non omnia enim quæ fecit Christus instituendo Eucharistiam , præcepta sunt laicis ; alioquin omnes consecrare tenerentur , quod absurdum est. Standum est ergo traditioni quæ hæc verba ad presbyteros celebrantes restringit. Ergo.

*Dices 3º. Sacra Eucharistia per modum convivii fuit instituta : at in omni convivio debet esse cibus et potus : ergo.*

*R. Dist. maj.* Per modum convivii fuit instituta , quoad aliqua , *concedo* ; quoad omnia , *nego maj.* Eucharistia as-



similatur quidem convivio, quia ad refectionem animæ destinatur, sicut convivium materiale ad refectionem corporis: verum non necesse est ut convivio materiali sub omni respectu æquiparetur; comparationes enim non premendæ sunt ultra punctum similitudinis. Ergo.

*Quæritur an tanta conferatur gratia in communione sub una quanta in communione sub utraque specie?*

*R. 1º.* Certum est, « sub una tantum specie totum atque » integrum Christum, verumque sacramentum sumi, » ac propterea, quod ad fructum attinet; nulla gratia » necessaria ad salutem eos defraudari, qui unam spe- » ciem solam accipiunt; » Concil. Trid. sess. 21, cap. 3.

*R. 2º.* Non major producit gratia substantialiter in communione sub utraque specie quam in communione sub una: gratia enim non producit ratione specierum, quæ sunt mera symbola, sed ratione rei sub speciebus contentæ: atqui res contenta eadem est sub una ac sub utraque specie: ergo.

Fieri tamen potest ut, ratione majoris fervoris, vel repetitionis actuum fidei, amoris, etc. augmentum gratiæ obtineatur, sed per accidens, et non præcise quia aliquid majus suscipitur.

*Hic quære solent theologi* quo instanti gratia sacramentalis producat, an in sumptione prioris, vel in sumptione posterioris speciei. Si una species sine ordine ad alteram sumeretur, duplex esset sacramentum, ac proinde duplex gratia sacramentalis: ubi vero utraque species per modum unius refectionis spiritualis sumitur, unicum est sacramentum et unica gratia sacramentalis, quæ, juxta quosdam, in sumptione panis producit, tum virtute corporis Christi sub hac specie sumpti, tum virtute sanguinis ejus sumendi; sed alii melius dicunt, ut nobis videtur, eam non produci nisi in fine sumptionis duplicis speciei.

## COROLLARIUM.

Ergo Ecclesia usum calicis merito subtraxit laicis.

Merito enim fecit quod potuit facere et graves habuit rationes faciendi : atqui 1° Ecclesia usum calicis respectu laicorum suppressere potuit, siquidem, ex concilio Trid. sess. 21, cap. 2, hanc semper habuit potestatem, « Ut in » sacramentorum dispensatione, salva illorum substan- » tia, ea statueret vel mutaret quæ suscipientium utili- » tati, seu ipsorum sacramentorum venerationi, pro » rerum, temporum et locorum varietate, magis expe- » dire judicaret. » Usus autem calicis ad substantiam sacramenti Eucharistiæ non pertinet, *ut constat ex superius dictis*. Ergo 1°.

2° Graves habuit rationes sic agendi, nempe : 1° periculum irreverentiæ erga sanctissimum illud sacramentum ; in magno enim fidelium concursu pertimescendum erat ne quid pretiosi sanguinis e calice efflueret ; 2° difficultas speciem vini diu conservandi, quia facile acescit et corrumpitur, aut periculum est effusionis ; 3° impossibilitas hanc speciem ad ægrotos convenienter deferendi ; 4° repugnantia multorum utendi vino vel hauriendi ex calice qui jam plurimis oblatus fuerat ; 5° tanta vini raritas in quibusdam regionibus, ut vix obtineri possit quantitas sacerdotibus pro sacrificio necessaria. Ergo 2°.

Vide opus *Bossuet* inscriptum, *Traité de la communion sous les deux espèces*, et Bened. XIV, de Missæ sacrificio, l. 2, cap. 22, n. 18 et seq.

Attamen hæc mutatio disciplinæ apud Græcos non fuit acceptata ; hi enim sub sola specie panis communiant in periculo mortis et in diebus in quibus missæ præsanctificationum celebrantur : in aliis vero diebus communio publica fit in templis sub utraque specie, hoc « est in fermentato sanguine intincto, ad quam rem » perficiendam sacerdos utitur parvo cochleari quod » inserit in os suscipientis Eucharistiam. » Bened. XIV, Const. *Allatæ sunt*, diei 26 martii 1755, § 25.

Nullum est dubium quin Ecclesia usum calicis permittere possit, sed id non expedit, quia rationes ob quas suam mutavit disciplinam eadem remanent. Laici tamen speciem vini sumere possunt, 1° in periculo profanatio-

nis, puta, si pretiosum sanguinem effusum sacerdos lambere nolle, vel si post consecrationem sacerdos moriatur aut deficiat, et alius non inveniatur qui missam perficere aut sacras species colligere et in sacrarium recondere possit. 2° Si facultatem sic communicandi privilegio immemoriali vel speciali summi Pontificis concessione habeant. Sic reges Galliæ, ex privilegio Clementis VI, anno 1351 concessio, sub utraque specie communicandi habent potestatem in die suæ inaugurationis et in Viatico mortis. Item sub utraque specie ex privilegio communicant diaconus et subdiaconus in solemnibus pontificis Romani missa. Idem olim existebat privilegium in ecclesia S.-Dionysii, prope Lutetiam, et in monasterio Cluniacensi, pro certis diebus: Bened. XIV, de Missæ sacrif. l. 2, cap. 22, n. 32. 3° Si Latini communicent apud Græcos in locis in quibus nullum existit templum ritus Latini.

Communitur autem docetur, speciem vini homini periclitanti et speciem panis sumere non valenti administrari non posse, his casibus exceptis; quia præceptum divinum communicandi, in periculo mortis, non obligat quando ritus pro reverentia sacramenti ab Ecclesia stricte præscripti servari nequeunt.

## ARTICULUS QUARTUS.

### DE FREQUENTI COMMUNIONE.

*Jam ostendimus, primos fideles sacram Eucharistiam frequenter accepisse, vel apud se custoditam sumpsisse; recentioribus sæculis quidam frequentem et quotidianam communionem adeo commendaverunt, ut in excessum impeerint, dispositiones ad tantum sacramentum congruenter necessarias non requirentes: talis fuit P. Pichon, in opere inscripto, l'Esprit de J.-C. et de l'Eglise sur la fréquente communion, anno 1745 impresso, a multis episcopis Gallicanis damnato, et a suo auctore retractato. Alii, e contra, post Antonium Arnauld, qui anno 1643 in lucem ediderat librum De la fréquente communion,*

qui melius inscriptus fuisset, *Contre la fréquente communion*, tot et tam perfectas requirebant dispositiones ad sacram communionem, ut plerosque ab ea repellerent. In justo autem medio stat veritas, *ut ex sequentibus propositionibus patebit.*

PROPOSITIO PRIMA.

*Laudabilis et utilis est per se frequens communio.*

*Prob. concilio Trid. decisione Cong. concil. testimoniis Patrum et ratione.*

1° *Concilio Trid. sess. 13, cap. 8*; « Paterno affectu ad-  
 » monet sancta synodus, hortatur, rogat et obsecrat per  
 » viscera misericordiæ Dei nostri, ut omnes et singuli  
 » qui Christiano nomine censeantur, in hoc unitatis signo,  
 » in hoc vinculo charitatis, in hoc concordie symbolo  
 » jam tandem aliquando conveniant et concordent, me-  
 » mores tantæ majestatis... ut panem illum supersub-  
 » stantialem frequenter suscipere possint... » Et sess.  
 22, cap. 6 : « Optaret quidem sacrosancta synodus, ut in  
 » singulis missis fideles adstantes, non solum spirituali  
 » affectu, sed sacramentali etiam Eucharistiæ percep-  
 » tione communicarent, quo ad eos sanctissimi sacrificii  
 » fructus uberius proveniret. » Ergo 1°.

2° *Decisioni Cong. concil. diei 12 feb. 1679*, doctrinam concilii Trid. modo expositam tradentis, cujus decretum ab Innocentio XI expresse fuit approbatum, et in quo habetur : « Cum fideles ad sanctissimi Sacramenti fre-  
 » quentiam, quod facere debent, accesserint, statim ad  
 » illud sumendum de magna præparatione orationem  
 » habeant; generatimque ostendant eos qui ad frequen-  
 » tiorem aut quotidianam salutiferi cibi sumptionem de-  
 » voto studio excitantur, debere... suam agnoscere in-  
 » firmitatem; aut dignitate sacramenti ac divini judicii  
 » formidine discant cœlestem mensam, in qua Christus  
 » est, revereri; et si quando se minus paratos senserint,  
 » ab ea abstinere, seque ad majorem præparationem ac-  
 » cingere. » Ergo 2°.



3° *Testimoniis Patrum.* Citavimus S. Justinum, dicentem sacram Eucharistiam in fidelium cœtibus unicuique præsentium distribui et ad absentes deferri. S. Cypr. De oratione Dominica, ait: *Eucharistiam quotidie ad cibum salutis accipimus*, et cunctos ad quotidianam communionem hortatur. S. Hieron. Epist. 30, 2 part. « Scio Romæ hanc » esse consuetudinem ut fideles semper Christi corpus » accipiant, quod non reprehendo nec probo. » S. Aug. Epist. 54 : « Dixerit aliquis non quotidie accipiendam » Eucharistiam; quæsieris, quare? Quoniam, inquit, eligendi sunt dies quibus purius homo continentiusque » vivit, quo ad tantum sacramentum dignus accedat.... » Ille honorando non audet quotidie sumere, et ille honorando non audet ullo die prætermittere. » Ergo 3°.

4° *Ratione.* Posita enim fide in præsentiam realem et in divinam sanctissimi illius sacramenti virtutem, evidenter constat frequentem illius usum, cum dispositionibus sanctis, laudabilem et utilissimum esse; sicque doctissimi viri et animæ piæ semper judicaverunt: ergo 4°, etc. aliunde, etc. Ergo.

Nulli tamen quotidiana communio necessaria est ad salutem, ut pluribus in locis asserere visus est P. Pichon: hoc sequitur ex testimoniis relatis, ex praxi Ecclesiæ et sensu fidelium.

#### PROPOSITIO SECUNDA.

*Ad frequentem communionem non solum necessaria est immunitas a peccato mortali, sed requiritur ut nullus sit affectus ad peccatum veniale, et ardens existat desiderium communicandi.*

*Prob.* auctoritate S. Thomæ, S. Francisci Salesii, Bened. XIV, multorum episcoporum et ratione.

1° *Auctoritate S. Thomæ*, qui in 3 parte, q. 80, art. 10, de quotidiana communione agens, dicit: « In sumente » requiritur ut cum magna devotione et reverentia ad » hoc sacramentum accedat; et ideo si aliquis se quotidie » ad hoc paratum inveniat, laudabile est quod quotidie » sumat. » Ibique citat verba S. Aug. attributa: « Accipe

» quotidie quod quotidie tibi prosit : sic vive, ut quotidie  
 » merearis accipere. » Ergo 1°.

2° *Auctoritate S. Francisci Salesii, Introduction à la vie dévote*, chap. 20 : « Il serait imprudent de conseiller indifféremment à tous la communion de tous les jours, la disposition requise pour une communion si fréquente devant être fort exquise : parce que cette disposition, quoique exquise, peut se trouver en plusieurs bonnes âmes, il n'est pas bon d'en détourner généralement ; il faut en user suivant l'état intérieur de chacun en particulier... Il faut, pour être admis à cette communion, avoir surmonté la plupart des mauvaises inclinations, c'est-à-dire, non-seulement l'affection aux choses inutiles et dangereuses, comme sont les jeux, les festins, les parures, et autres choses semblables, mais encore ces inclinations naturelles qui, n'ayant point pris l'origine de nos péchés particuliers, ne sont pas proprement vices ni péchés, mais imperfections ; comme sont la légèreté, l'inclination à la colère, la mélancolie, et autres défauts, qui viennent du tempérament et du naturel, et sont souvent contre le gré de la volonté... Pour communier tous les huit jours, il est requis de n'avoir aucun péché mortel, ni aucune affection au péché véniel, d'avoir un grand désir de communier ; mais pour communier tous les jours, il faut, outre cela, avoir surmonté la plupart des mauvaises inclinations. » Ergo 2°.

3° *Auctoritate Bened. XIV, de Synodo diœces. l. 7, cap. 12, n. 9* : « Præcipue monendi sunt confessarii, ne frequenter ad Eucharistiam accessum iis aut suadeant aut permittant, qui in gravia peccata sæpe labuntur, nec de pœnitentia agenda suaque vita emendanda sunt solliciti ; sicut nec illis qui, etsi gravia evitent crimina, voluntatem tamen habent venialibus adhærentem. » Postea commendat ut legantur S. Franciscus Salesius et Joannes Thauletus. Ergo 3°.

4° *Auctoritate multorum episcoporum, qui nempe librum P. Pichon censuris affecerunt* : iis addi possunt omnes in vita ascetica magistri. Ergo 4°.

5° *Ratione*. Freuens communio maxima est familia-

ritas inter animam fidelem et Christum : si hæc familiaritas sit sancta et cum reverentia debita, erit laudabilis et utilis; si vero reverentia debita careat, Christo displicebit, et magis noxia quam utilis erit. Porro communio facta cum affectu voluntario ad venialia, non exhibet reverentiam Christo debitam : ergo 5°; aliunde, etc. Ergo.

*Quædam notanda circa frequentem communionem.*

1° Fideles prudentem et pium habeant directorem, inter mille electum, ut vult S. Franciscus Salesius; animam suam ei patefaciant, et simplici docilitate obsequantur.

2° Caveant directores ne indiscretis sermonibus a frequenti communione retrahant, ut pluries accidit; sed, e contra, pias animas sibi commissas sollicite excolant, amore divino imbuant, et ad frequentiores communionem prudenter disponant ac inducant.

3° Non raro inveniuntur personæ devotæ quæ, ex communionum frequentia, fere omnem amiserunt reverentiam erga sanctissimum Eucharistiæ sacramentum, et sine præparatione ac gratiarum actione ad illud fidenter accedunt : aliæ vero timore excessivo perculsæ, nunquam se sufficienter præparatas arbitrantur. Prudens confessorius has et illas perfecte noscere et congruentibus monitis excitare debet ad salutarem tremorem, vel ad majorem fiduciam.

4° Quandoque inveniuntur animæ, e cæno peccati vix emergentes, quæ, in primis conversionis suæ diebus, statim frequenter communicare vellent : prudens confessorius præmaturo huic desiderio non acquiescet, eas libenter in confessione audiet, ad dolendum magis ac magis de præteritis, ad agendum gratias Deo, ad colendas virtutes Christianas, ad perseverandum in proposito hortabitur; ad sacram synaxim in magnis solemnitatibus admittet, deinde in festis minus solemnibus, et postea frequentius, juxta illarum progressus in pietate.

5° Ut communionem personarum quas dirigit prudenter

determinet confessarius, sedulo attendere debet ad earum conditionem actualem et futuram : mulier conjugata, curis domesticis implicata, eodem modo ad sacram mentis admitti non potest ac pia vidua, nulla sollicitudine pressa; nec puella matrimonio destinata, eodem modo ac altera quæ mundo renuntiavit, vir, o permansura est, aut Deo consecranda, sive in congregatione sæculari, sive in monasterio regulari, etc. nec juvenis negotia sæcularia expleturus, eodem modo ac alius statum clericalem amplexus vel amplexurus, etc.

Expedire mihi videtur ut ad frequentem communionem ii non admittantur qui certo postea, ratione status aut functionum, raro communicare poterunt. Hinc probare non possum agendi rationem confessoriorum qui juniores pueros et puellas ad frequentissimas communionem inducunt : sufficit ut recte viventes identidem admittantur, v. g. in præcipuis solemnitatibus, donec futura eorum destinatio cognoscatur, et præsumi possit quid in hoc genere prudenter eis consulendum sit.

Non improbandi tamen, sed potius laudandi sunt confessarii qui pueros ad primam communionem admissos, scientia, pietate, modestia, mansuetudine, obedientia, aliisque virtutibus Christianis conspicuos, et communionem desiderantes, ad participationem divini illius sacramenti semel aut iterum inter primam et secundam, vel secundam et tertiam communionem solemnem admittunt.

6<sup>o</sup> Animæ piæ et devotæ, in virtutibus Christianis probatæ, a peccato mortali abhorrentes, ad venialia nullum affectum retinentes, pravas inclinationes suas superare nitentes, ab illecebris creaturarum alienæ, seipsas contemnentes, ad perfectionem tendentes, magnum communicandi desiderium habentes, et præ conditione sua piis exercitiis vacare valentes, ad quotidianam communionem admittendæ sunt, aut saltem admitti possunt; alioquin fere nullus sacerdos quotidie celebrare posset. Sic communicare solebant SS. Gertrudis, Catharina Sinenensis, Theresia, Joanna de Chantal, etc. Communiter



tamen prudentes confessarii unum excipiunt diem singulis hebdomadis, in quo facienda est confessio.

7° Aliæ personæ in sanctitate minus eminentes, quæ nihilominus sibi invigilant, peccatum fugiunt, ad perfectionem tendunt et communionem desiderant, omnibus diebus dominicis et festivis, et insuper duabus vel tribus vicibus per unamquamque hebdomadam admitti possunt. Talis est praxis piorum confessoriorum.

8° Nulla conditio per se a frequenti communione excludit, ut fert decretum Cong. supra citatum: « Fre-  
 » quens accessus (ad Eucharistiam) confessoriorum  
 » judicio est relinquendus, qui ex conscientiarum pu-  
 » ritate et frequentiae fructu, et ad pietatem processu,  
 » laicis negotiatoribus et conjugatis, quod prospiciunt  
 » eorum saluti profuturum, id illis præscribere debe-  
 » bunt. »

9° Qui ex mera fragilitate in aliqua passim incidunt peccata venialia, sed cito gement, dolent, emendationem sibi proponunt, et communionem velut robur ad perseverandum desiderant, ea non privandi sunt. Si e contra, non obstante frequenti communione, in via perfectionis non proficiant, in culpas veniales deliberatas incidant, neque se emendent; v. g. voluptatibus sensuum in videndo, audiendo, edendo, libenter indulgeant, cum aliqua vanitate se vestiant, etc. usus communionis restringi et quandoque suspendi debet, donec de sua emendatione serio cogitent. Ita Ligorio, Praxi conf. n. 155.

10° *Advertendum*, cum eodem Ligorio, devotionem quæ ad frequentem communionem requiritur, non necessario debere esse summam et sensibilem: sufficit ut director in corde pœnitentis quamdam detegat alacritatem ad facienda quæque Deo placita sunt, cum dispositionibus supra expositis. Prudens confessorius aliquando animam ad communionem nimis inclinatam probat et mortificat, quasdam communionem ei subtrahendo, præsertim si ex tali subtractione tristetur, quia *hujusmodi tristatio*, inquit Ligorio, loco citato, *est argumentum su-*

*perbiæ quæ eam vere reddit indignam.* Aliquando vero animam siccam, aridam, tædium sentientem, et ex illo statu gementem, ad frequentem Eucharistiæ suspensionem impellit, ut ex sacramento vires acquirat.

11° Curet confessarius ut sui pœnitentes ad sacram communionem imparati non accedant, et post communionem in gratiarum actione convenienti tempore immorentur : « Paucissimi sunt directores qui sedulo id » faciant, ait Ligorio, n. 156, quia paucissimi sunt sacerdotes qui, post missæ sacrificium, cum Jesu Christo » in gratiarum actione subsistant; et ideo pudet eos aliis » insinuare quod ipsi non faciunt. Gratiarum actio ordinarie per horam integram durare deberet; fiat saltem » per dimidiam, in qua anima in amando et petendo se » exerceat. » Nos petimus ut fiat gratiarum actio saltem per unum quadrantem, in summa recollectione, cum plena fide, ardenti amore, etc.

---

## CAPUT SEPTIMUM.

### DE EFFECTIBUS EUCHARISTIÆ.

Varios hujus sacramenti effectus recenset et evolvit S. Th. in tota quæstione 79, 3 part. De illis quædam breviter dicemus.

1° Eucharistia producit ex opere operato gratiam sanctificantem, et hoc habet commune cum cæteris sacramentis; sed excellentius est, quia ipsum gratiæ auctorem continet. Gratia autem hujus sacramenti per modum spiritualis nutritionis producitur : *Caro mea vere est cibus, et sanguis meus vere est potus*, Joan. vi, 56. Supponit ergo animam vivere, quia prius est esse quam nutriri : ideo dicitur sacramentum vivorum, et gratia ejus est per se augmentum gratiæ sanctificantis, cum jure ad gratias actuales suo tempore obtinendas, si obex eis non appona-

tur. Unde Eug. IV, in Decreto ad Armenos, ait : « Hujus sacramenti effectus , quem in anima operatur digne summentis , est adunatio hominis ad Christum. Sequitur quod per hoc sacramentum in summentibus digne gratia augeatur ; omnemque effectum quem materialis cibus et potus quoad vitam agunt corporalem , hoc idem quoad vitam spiritualem et hoc sacramentum operatur. »

2º Dat jus ad æternam gloriam , juxta hæc ipsius Christi verba, Joan. VI, 55 : *Qui manducat meam carnem et bibit meum sanguinem , habet vitam æternam , et ego resuscitabo eum in novissimo die.* Hinc ab Ecclesia dicitur *pignus gloriæ.*

3º Quicumque conscientiam peccati mortalis habens, ad sanctissimum illud sacramentum accederet, ex omnium confesso enormis sacrilegii reus fieret, judicium sibi manducaret et biberet : sed communius et probabilius docent theologi cum S. Th. q. 79, art. 3, illud sacramentum ab eo susceptum qui est in peccato mortali, cujus conscientiam et affectum non habet, nihilominus conferre gratiam sanctificantem, quæ per accidens fit gratia prima, sicut pœnitentiæ sacramentum homini jam justificato collatum, producit gratiam ex se primam, quæ per accidens fit secundaria. Vide quæ in tractatu de Sacramentis diximus. Hæc sententia recte intellecta nullum habet periculum , cum peccati mortalis conscientiam et omnem ad illud affectum excludat.

4º Peccata venialia remittit, vel directe, vires animi reficiendo, sicut cibus materialis vires corporis restaurat; vel indirecte, charitatis fervorem peccato veniali oppositum augendo. Unde concilium Trid. sess. 13, cap. 2, ait, Christum illud dedisse, *tanquam antidotum*, quo liberemur a *culpīs quotidianis.* Hinc in oratione pro ablutione secunda, in fine missæ, congruenter dicimus : *Præsta ut in me non remaneat scelerum macula, quem pura et sancta refecerunt sacramenta,* ut deleantur tum peccata venialia, tum per accidens peccata mortalia ignota.

5º Eo sensu etiam intelligi possunt præcedentia verba

quo Eucharistia, ut sacramentum, pœnam peccatis debitam indirecte remittat, fervorem excitando : si vero ut sacrificium spectetur, hujusmodi pœnam directe potest remittere, *ut in secunda parte ostendemus.*

6° Divina Eucharistia præservat a peccatis, ut in concilio Trid. sess. 13, cap. 2, habetur : « Quo liberemur a » culpis quotidianis, et a peccatis mortalibus præservedur. » Et hoc fit dupliciter, ut ait S. Th. art. 6 : « Uno » modo, in quantum natura hominis interiorius roboratur » contra interiora corruptiva... alio modo, per hoc quod » munitur contra exteriores impugnationes. »

7° Gratia hujus sacramenti ex opere operato producit, in ipso instanti quo sacræ species in stomachum trajiciuntur ; quia tunc proprie fit manducatio vel potus sumptio.

8° Eucharistiæ sacramentum aliis quam realiter summentibus prodesse potest ; quia 1° ut opus religionis præstantissimum, pro aliis tam vivis quam defunctis offerri potest. 2° Qui hoc sacramentum digne suscipiunt, strictiorem cum Christo acquirunt unionem, et efficacius pro aliis orare possunt. 3° Anima quæ divinam hanc alimoniæ realiter suscipere non potest, eam ardentè desiderando, gratiam aliquam ex opere operantis consequitur, et est communio spiritualis. Ergo.

9° Peccata venialia actu complacentia, vel in ipsamet communione admissa, ut vana gloria, voluntaria distractio, etc. substantiam gratiæ sanctificantis non impediunt, sed illius mensuram minuunt, quia charitatem ex parte lædunt. Sic omnes post S. Th. q. 79, art. 8.





## PARS SECUNDA.

### DE EUCHARISTIA QUATENUS EST SACRIFICIUM.

Vox *sacrificium*, a sacro faciendo derivata, significat, latiori sensu, id omne quod Deo in ipsius honorem et cultum offertur, videlicet orationes, laudes, adorationes cæterosque actus virtutum, præsertim virtutis religionis. Eo sensu dicitur in Scripturis : 1° *Sacrificate sacrificium justitiæ, et sperate in Domino*, Ps. VI, 6; 2° *Immola Deo sacrificium laudis, et redde Altissimo vota tua*, Ps. XLIX, 14 et ibid. y. 23 : *Sacrificium laudis honorificabit me*; 3° *Sacrificium Deo spiritus contribulatus, cor contritum et humiliatum Deus non despicias*, Ps. L, 19; 4° *Sacrificium salutare est attendere mandatis, et discedere ab omni iniquitate*, Eccli. xxxv, 2, et ibid. v. 4 : *Qui facit misericordiam, offert sacrificium*; 5° *Obsecro vos, fratres, per misericordiam Dei, ut exhibeatis corpora vestra hostiam viventem, sanctam, Deo placentem*, Rom. XII, 1.

Nullum est dubium quin sacrificium, sic generaliter sumptum, semper, pro cunctis hominibus et in omni statu, fuerit necessarium, etiam jure naturali; quia omnes homines libere agentes Deum amare, laudare, benedicere et cultu saltem interno honorare tenentur. Ergo.

Sacrificium vero, stricte sumptum, specialis est virtutis religionis actus, quo supremum Dei dominium in omnes creaturas per alicujus rei sensibilis oblationem et destructionem agnoscitur, et recte definitur : *Oblatio externa rei sensibilis, divinitus instituta, soli Deo per ministrum legitimum facta, cum destructione rei oblatae, vel aliqua ejus immutatione, ad recognoscendum supremum Dei dominium in omnes creaturas.*

Dicitur 1° *oblatio* : quæ vox tenet locum generis : omnis

quippe oblatio non est sacrificium, sed omne sacrificium est oblatio.

Dicitur 2° *externa*; quia, juxta omnes, sacrificium proprie dictum ad cultum Dei externum pertinet: non sufficeret ergo oblatio interna.

Dicitur 3° *rei sensibilis*, ut scilicet oblatio aliis hominibus pateat et vinculum sit religionis: sic etiam omnes apprehendunt.

Dicitur 4° *divinitus instituta*; quia exterior cultus non est certe Deo gratus, nisi ab ipso immediate vel mediate fuërit determinatus: sacrificium autem præcipuus est cultus externi actus. Ergo.

Dicitur 5° *soli Deo facta*; quia sacrificium stricte sumptum eminentior est actus supremæ religionis. Ergo soli Deo competere potest, et ideo additur in definitione: *ad recognoscendum*, etc.

Dicitur 6° *per ministrum legitimum*; quia, cum ille actus propter Deum et nomine religiosæ societatis offeratur, non a quocumque homine, sed a solo legitime deputato convenienter exerceri potest.

Dicitur 7° *cum destructione rei oblatæ, vel aliqua ejus immutatione*; ad rationem quippe sacrificii proprie dicti requiritur vel rei destructio, ad supremum Dei dominium perfecte significandum, vel saltem aliqua immutatio, cujus naturam et necessitatem hic non expendimus.

Si quod apud nos existat sacrificium proprie dictum, est missa et aliud assignari non potest: itaque hanc secundam tractatus de sanctissima Eucharistia partem in septem dividemus capita. Primum erit de sacrificiis in genere; secundum, de existentia sacrificii missæ; tertium, de ejus essentia; quartum, de illius effectibus; quintum, de iis pro quibus offerri potest; sextum, de ejus ministro; septimum, de conditionibus ad legitime celebrandum requisitis.

## CAPUT PRIMUM.

## DE SACRIFICIIS IN GENERE.

De solis sacrificiis stricte sumptis vel proprie dictis hic nobis agendum est, *ut ex jam notatis patet.*

Sacrificium autem proprie dictum sub triplici respectu considerari potest, ratione materiæ scilicet, ratione formæ et ratione finis.

Ratione materiæ, dividitur in victimam seu hostiam, immolationem et libamen: hæc nomina et sequentia ex Veteri Lege deducuntur. *Victima* seu *hostia* dicebatur sacrificium quo offerebantur Deo animalia, sive quadrupedia, ut boves, vituli, oves et capræ; sive volatilia, ut colom bæ, turtures et passerres: *immolatio* erat sacrificium quo offerebantur Deo res inanimæ, sed solidæ, ut fruges terræ, panes, thura et alia hujusmodi: *libamen* erat sacrificium quo offerebantur liquida, v. g. vinum, oleum, sanguis, etc.

Ratione formæ seu modi quo fiebat sacrificium, dividebatur in holocaustum, hostiam pacificam et hostiam pro peccato. *Holocaustum* erat sacrificium, in quo tota res oblata comburebatur, et in fumum resoluta, sursum ascendebat, ut per totalem destructionem ejus supremum dominium Dei clarius significaretur. *Hostia pacifica* dicebatur sacrificium in quo una pars rei oblatae comburebatur in honorem Dei, altera in usum sacerdotum cedebat, et tertia in usum ipsorum offerentium: sic quædam perficiebatur communio inter Deum, sacerdotes et populum. *Hostia pro peccato* erat sacrificium in quo una pars in honorem Dei comburebatur, et altera cedebat in usum eorum tantum sacerdotum qui in atrio templi vescebantur, et ideo peccata populi comedere dicebantur.

Ratione finis, dividebatur in latreuticum, eucharis-

ticum, impetratorium et propitiatorium. Dicebatur *la-treuticum*, si per se totum in honorem Dei exhibebatur, ut holocaustum; *eucharisticum*, si ad gratias Deo agendas pro beneficiis acceptis offerebatur; *impetratorium*, si ad nova obtinenda beneficia destinabatur; et *propitiatorium*, si ad satisfaciendum Deo pro peccatis admissis fiebat.

*His notatis, quædam statuenda sunt.*

1º Certum est varia hæc sacrificia in lege Mosaica fuisse jure divino necessaria; ab ipso enim Deo fuerant determinata et præscripta.

2º Non minus certum est a Deo præscripta fuisse sacrificia in ipsa origine mundi; ea quippe videmus in usu a primis temporibus usque ad Moysen: Cain et Abel, Noe, Melchisedech, Abraham, Jacob, Job, etc. varia obtulerunt sacrificia: *Cain de fructibus terræ*, *Abel de primogenitis gregis sui, et de adipibus eorum*, Gen. iv, 3, 4; *Noe, tollens de cunctis pecoribus et volucris mundis, obtulit holocausta super altare*, ibid. viii, 20; *Melchisedech protulit panem et vinum, erat enim sacerdos Dei altissimi*, Gen. xiv, 18; *Abraham arietem inter vepres hærentem cornibus assumens, obtulit holocaustum pro filio*, Gen. xxii, 13; *Jacob lapidem crexit in titulum, fundens oleum desuper*, Gen. xxviii, 18, etc. Hæc autem mandatum Dei positivum supponunt, alioquin non fuissent tam uniformia et tam constantia.

3º Si status innocentiae diu perstitisset, quædam etiam necessaria fuissent sacrificia; quia, ut ait S. Th. 2 2, q. 35, art. 1, conclus. « Est modus conveniens homini ut » sensibilibus signis utatur ad aliqua exprimenda, quia » ex sensibilibus cognitionem accipit; et ideo ex naturali » ratione procedit, quod homo quibusdam sensibilibus » rebus utatur, offerens eas Deo in modum debitæ sub- » jectionis et honoris, secundum similitudinem eorum » qui dominis suis aliqua offerunt in recognitionem do- » minii: hoc autem pertinet ad rationem sacrificii, et » ideo ratio sacrificii pertinet ad jus naturale. » De na-



tura igitur est veræ religionis ut quoddam sacrificiorum genus Deo offeratur : at modus lege positiva determinatur.

4° Sacrificia cruenta post lapsum hominis a Deo præscripta, in quibus sanguis victimarum effunditur, profunda indicant mysteria, videlicet, 1° hominem peccatorem redemptione indigere; 2° sanguine redimendum et a peccatis abluendum esse, quia carni et sanguini acquiescendo, peccaverat; 3° Deum condignam non exigere satisfactionem ab ipsis peccatoribus, sed meritorum et satisfactionum substitutionem misericorditer accipere; 4° non omnes victimas pari modo ipsi gratas esse : unde animalia fera, nociva, horrorem excitantia, ut lupi, tigres, aquilæ, serpentes, etc. Deo non offerebantur in sacrificium : bene vero animalia mansueta, pura, ad usum humanum apta : hinc mundorum et immundorum distinctio, tempore Noe jam existens, et per Moysen renovata ac firmata.

Hæc penetrationem intelligentiæ nostræ longe superant, et nihilominus velut certa admittenda sunt, propter summam Dei auctoritatem.

5° Ex divina sacrificiorum cruentorum institutione, in ipso mundi exordio facta, varii orti sunt ritus, apud diversas gentes usitati, victimas immolandi : omnes populi persuasum habuerunt, et innumeræ gentes ethnicæ nunc exstantes adhuc persuasum habent, divinitatem sacrificiis placari et propitiam erga homines reddi. Hinc ubique præcipuus religionis actus, in honorem Dei veri aut ficti exercitus, fuit effusio sanguinis, sive animalium purorum, raro immundorum, sive hominum; fere ubique enim, in falsis religionibus, immolatae sunt victimæ humanæ, saltem in extraordinariis periculis, quia credebatur hostias minoris pretii pro tanta obtinenda gratia sufficientes non fore.

6° In crudelibus istis consuetudinibus et in monstruosis hujusmodi erroribus quædam supersunt traditionis vestigia, communem originem attestantia, nempe lapsum hominis, redemptionis necessitatem, Redemptoris pro-

missionem, sacrificiorum cruentorum præscriptionem, in figuram cruenti et pretiosissimi sacrificii quo redimendus esset mundus. In ea quippe hypothese, diversæ populorum consuetudines, circa sacrificia Deo offerenda, facile explicantur, et, sepositis his fundamentalibus fidei nostræ dogmatibus, nulla illarum assignari potest ratio.

7° Soli Deo offerri potest sacrificium proprie dictum : sic omnes apprehendunt, juxta hæc S. Aug. de Civitate Dei, l. 10, cap. 4, verba : « Quis sacrificandum censuit, » nisi ei quem Deum aut scivit, aut putavit, aut finxit? » Fuerunt enim homines qui se deos haberi voluerant. « Rarissimi autem commemorantur, qui sibi ut sacrificium caretur, cum regia potestate possent, ausi fuerint imperare, » inquit S. Aug. contra adversarium Legis et Proph. l. 1, cap. 18. Sacrificia igitur falsis numinibus apud gentes oblata, a dæmonibus veri Dei æmulatoribus inducta fuerunt, et in ipsorum honorem cedunt : in eo namque positum est gravissimum idololatriæ crimen, quod honores soli Deo debiti ad creaturas maxima impietate transferantur. Unde Apostolus, I Cor. x, 20 : *Quæ immolant gentes, dæmoniis immolant, et non Deo.*

8° Cuncta Veteris Legis sacrificia ingens sacrificium a Christo pro salute mundi in cruce offerendum adumbrabant : *Finis enim Legis Christus, ad justitiam omni credenti,* Rom. x, 4. Est agnus, *qui occisus est ab origine mundi,* Apoc. xiii, 8, nempe in victimis eum repræsentantibus, quæ multiplices erant et diverso ritu offerebantur, ut varias magni sacrificii circumstantias significarent, et efficerent ut res una tanquam verbis multis diceretur atque sine fastidio commendaretur. Facile autem monstrari potest, vetera sacrificia eorumque cæremonias cum Christo ejusque sacrificio optime quadrare : v. g. mactabantur victimæ, Christus immolatus est; sacrificium pro peccato simpliciter dicebatur peccatum; Deus *Eum qui non noverat peccatum, pro nobis peccatum fecit, ut nos efficeremur justitia Dei in ipso,* II Cor. v, 21; præscribebantur victimæ mundæ, Christus autem erat *Sanctus, innocens, impollutus, segregatus a peccatoribus et excelsior*

*cœlis factus*, Hebr. vii, 26; corpora victimarum extra castra cremabantur, Christus extra portam Jerusalem passus est, etc.

9° De fide est Christum figuras sacrificiorum Veteris Legis adimplevisse, et cruci affixum, seipsum Patri pro peccatis totius mundi offerendo, verum consummasse sacrificium: *Tradidit semetipsum pro nobis oblationem et hostiam, in odorem suavitatis*, Eph. v, 2; *Christus semel oblatus est, ad multorum exhaurienda peccata*, Hebr. xxviii, 9; *Cum clamore valido et lacrymis offerens, exauditus est pro sua reverentia*, Hebr. v, 7; *Una enim oblatione consummavit in sempiternum sanctificatos*, ibid. x, 14.

Dogma istud est fundamentum totius religionis Christianæ et ab hæreticis adhuc credentibus non negatur, bene vero a rationalistis qui vix nomine sunt Christiani; et in tractatu de vera Religione confutantur.

## CAPUT SECUNDUM.

### DE EXISTENTIA SACRIFICII MISSÆ.

Jam monuimus Eucharistiam non consistere in actione transitoria, sicut alia sacramenta, sed in ea distingui confectionem et statum permanentem: actio qua divinum illud sacramentum conficitur, variis nominibus appellatur, scilicet, apud Græcos, *μυσταγωγία*, id est, *introductio ad mysteria*; *συναξίς*, seu *conventus* aut *cœtus*; *ιερουργία*, *opus sacrum*; *ευλογία*, *benedictio*; *λατρεία*, *adorationis cultus*; *θυσία*, *sacrificium*, et præsertim *λειτουργία*, idem significans ac *opus sacrum publicum*, quia confectio divinæ Eucharistiæ præcellentissimum est opus sacrum: apud Latinos vero præcipue dicitur *collecta* vel *collectæ*, quia illius occasione populus in unum colligitur; *dominicum*, quia sacratissima est actio, ex institutione Domini facta; *oblatio*, quia divinæ majestati offertur, et communius *missa*,

quæ vox neque Hebraica neque Græca est, ut quidam voluerunt, sed evidenter Latina, apud solos auctores Latinos usitata, a verbo *mittere* derivata; quia, re consummata, populus dimittebatur, publice dicendo, *Ite, missa est*. Missa pro missione ponitur, sicut collecta pro collectione, et sensus est: *Missio seu dimissio vobis datur, ite*.

Duplex olim fiebat populi dimissio, inter ritus pro conficienda sacra Eucharistia constitutos: una post evangelium, quando dimittebantur pœnitentes et catechumeni, et altera in fine operis sancti, clamante diacono, *Ite, missa est*. Pars prior vocata est *missa catechumenorum*, et posterior *missa fidelium*. Hinc S. Aug. Sermone 49: « Ecce » post sermonem fit missa catechumenorum; manebunt » fideles. »

Hinc mos invaluit totam liturgiam, sive publice, sive privatim celebratam, vocandi *missam*. S. Avitus, episcopus Viennensis, anno 524 vita functus, in Epist. 1 Gundobaldo regi, dicit: « In ecclesiis palatiisque, sive prætoriiis, missa fieri prænuntiatur, cum populus ab observatione dimittitur; » Biblioth. Patrum, t. 9. Hanc esse vocis Missæ etymologiam plerique docent auctores, ut Card. Bona, l. 1, cap. 1; P. Le Brun, t. 1; Bossuet, *Explication de la Messe*, etc.

Quæstio est igitur an sanctissima illa divinæ Eucharistiæ confectio proprie dictum sit sacrificium: negant quicumque dogma præsentiae realis rejiciunt, et in hoc sibi consentiunt. Lutherani, præsentiam realem retinentes, nihilominus rationem sacrificii proprie dicti abjiciunt: patriarcha eorum totam retinuit liturgiam usque ad finem Symboli; reliquam vero vocat abominationem. Dicit in libro de Missa privata, anni 1534, *Sibi a dæmone suggestum et persuasum fuisse missæ sacrificium abrogandum esse*; in confessione sua, declarat se missam super omnes abominationes habere, et maxime dolere eam per quindecim annos more catholicorum celebrasse.

Henricus VIII totam conservavit liturgiam, expunctis tantum nominibus summi Pontificis, S. Thomæ Cantuariensis et nonnullis aliis: verum sub Eduardo VI, vetus



abrogata, vel universim mutata est liturgia, et deinde generalia regni comitia declaraverunt, anno 1549, Eucharistiam esse quidem sacramentum, non vero sacrificium.

Diversæ igitur Protestantium sectæ, sicut Mahumetani, nonnisi sacrificia improprie dicta, videlicet laudum, precum, etc. in cultu suo habent.

Cæteri Christiani catholici, schismatici et hæretici in missa proprie dictum agnoscunt sacrificium.

## PROPOSITIO.

*In Eucharistiæ confectione, quæ dicitur Missa, verum Deo offertur sacrificium.*

*Prob.* Propositio est de fide; probatur ex prophetiis, ex verbis Christi, ex Apostolorum praxi, ex testimoniis Patrum, ex præscriptione et ex rationibus theologicis.

1° *Est de fide.* Traditur enim in concilio Nicæno I, can. 14, ubi prohibetur ne, qui offerendi sacrificii potestatem non habent, *His qui offerunt corpus Christi porrigant.* In Ephesino, generali III, dicitur, *Labbe*, t. 3 : « Sanctum ac vivificum incruentumque in ecclesiis sacrificium peragimus; corpus quod proponitur, similiter et pretiosum sanguinem. » In Chalcedonensi, t. 4, Eucharistia vocatur, nemine reclamante, *Terribile et incruentum sacrificium.* Tandem in concilio Trid. sess. 22, can. 1, expresse definitur his verbis : « Si quis dixerit in missa non offerri Deo verum et proprium sacrificium.... anathema sit. » Ergo 1°.

2° *Prob. ex prophetiis.* Ps. cix, 4 : *Juravit Dominus, et non pœnitebit eum : tu es sacerdos in æternum, secundum ordinem Melchisedech.* Dubitari non potest quin hæc verba de Christo sint intelligenda, cum Apostolus, Hebr. iii, v et vi, dicat : *Christus non semetipsum clarificavit ut pontifex fieret, sed qui locutus est ad eum.... Tu es sacerdos in æternum, secundum ordinem Melchisedech.* Unde missa proprium est sacrificium, si 1° Melchisedech verum obtulerit sacrificium; si 2° Christus si-

mile offerre debuerit sacrificium, et si 3° tale sacrificium nonnisi in missa reperiri possit : atqui hæc tria constant.

1° Melchisedech verum obtulit sacrificium; legitur enim in Gen. xiv, 18 : *Melchisedech, rex Salem, proferebat panem et vinum, erat enim sacerdos Altissimi, benedixit ei.* Per verba *panem et vinum*, non intelligenda sunt alimenta quæ Melchisedech, Abraham et militibus ejus obtulisset, ut volunt Protestantes. Nam 1° Abraham et milites ejus magnam referebant substantiam; 2° Abraham *dedit ei decimas ex omnibus*; 3° ideo panem et vinum obtulit, quia erat sacerdos Altissimi. Ergo 1°.

2° Christus debuit offerre sacrificium cujus sacrificium Melchisedech fuit typus seu figura; est enim sacerdos, juxta Prophetæ et Apostoli verba : sacerdos autem dicitur, quia sacrum facit, seu sacrificat. Porro non esset sacerdos secundum ordinem Melchisedech, si ipsius sacrificium quamdam non haberet similitudinem cum sacrificio Melchisedech, et excellentius esse debet, quia ante Christum *omnia in figura contingebant illis*, I Cor. x, 11. Si autem B. Paulus, Christum cum Melchisedech conferens, circumstantiam sacrificii non meminerit, id contigit quia illa ad scopum suum non attinebat. Ergo 2°.

3° Hujusmodi sacrificium in sola missa inveniri potest, nempe sacrificium panis et vini, sicut Melchisedech obtulerat, sed modo longe perfectiori, quod generaliter adverterunt et docuerunt SS. Patres; v. g. S. Cyp. Epist. 63 : « Ut ergo in Genesi, per Melchisedech sacer- » dotem benedictio circa Abraham posset rite celebrari, » præcedit ante imago sacrificii Christi, in pane et vino » scilicet constituta : quam rem perficiens et adimplens » Dominus, panem et calicem mixtum vino obtulit, et » qui est plenitudo veritatis, veritatem præfiguratæ ima- » ginis adimplevit. » Tota legatur Epistola. S. Aug. de Civitate Dei, l. 16, cap. 22 : « Sed plane tunc benedictus » est (Abraham) a Melchisedech, qui erat sacerdos » Excelsi..... Ibi quippe primum apparuit sacrificium » quod nunc a Christianis offertur Deo, toto orbe ter- » rarum. » Ergo 3°.

Malac. 1, 10 : *Non est mihi voluntas in vobis, dicit Dominus exercituum, et munus non suscipiam de manu vestra. Ab ortu enim solis usque ad occasum, magnum est nomen meum in gentibus, et in omni loco sacrificatur et offertur nomini meo oblatio munda, quia magnum est nomen meum in gentibus, dicit Dominus exercituum.* Sacrificium hic prænuntiatur, est vel sacrificium Aaronicum, vel sacrificium crucis, vel sacrificium bonorum operum, vel sacrificium missæ; alia hypothesis excogitari non potest: atqui tria priora dici nequeunt. 1° Non sacrificium Aaronicum, siquidem Deus expresse dicit Judæis se munus de manu eorum non suscepturum, et aliquid magnum, futurum ac novum prænuntiat. 2° Non sacrificium crucis, quod semel et in uno loco tantum oblatum est. 3° Non sacrificium imperfectum seu bonorum operum; quia 1° bona opera non simpliciter dicuntur sacrificia, sed cum addito, v. g. sacrificium laudis, sacrificium justitiæ, etc. 2° quia prænuntiari non poterant ut novum constituentia sacrificium, cum semper a Judæis offerri potuerint; 3° quia, in Protestantium principiis, hæc opera dici non possent *oblatio munda*, siquidem omnes actiones nostras, quantumvis ex se laudabiles, ut totidem habent peccata. Unde S. Just. Dial. cum Tryph. n. 41, integrum Malachiæ citat textum, et addit: « De iis autem quæ in omni loco a nobis gentibus offeruntur ei sacrificiis, hoc est, de pane Eucharistiæ et de calice similiter Eucharistiæ, jam tum prædicit. » Ergo 2°.

3° *Ex verbis Christi.* In institutione enim Eucharistiæ, Christus dixit: *Hoc est corpus meum quod pro vobis datur; Hic est calix, novum testamentum in sanguine meo, qui pro vobis fundetur, vel funditur, ut habet textus Græcus.* Unde sic. Eo instanti Corpus Christi erat sub specie panis, et sanguis sub specie vini, vi sacramenti, ac proinde tunc Christus aderat sacramentaliter in statu mortis; corpus et sanguis ejus in remissionem peccatorum Deo Patri offerebantur, cum precibus, benedictionibus et gratiarum actionibus: in ea igitur actione sacra omnes reperiuntur characteres sacrificii proprie dicti. Porro

Christus dixit Apostolis eorumque successoribus : *Hoc facite in meam commemorationem*, Luc. xxii, 19. Ergo 3°.

4° *Ex Apostolorum praxi*. Exemplo Christi et ex mandato ejus, Apostoli sacram confecerunt Eucharistiam, eamque velut sacrificium obtulerunt : *Erant perseverantes in communicatione fractionis panis*, Act. ii, 42. *Una sabbati cum convenissemus ad frangendum panem*, ibid. xx, 7, etc. B. Paulus enim, I Cor. x, 16, ait : *Calix benedictionis cui benedicimus, nonne communicatio sanguinis Christi est ? Et panis quem frangimus, nonne participatio corporis Domini est ?* Deinde, fideles a cultu idolorum detertere volens, addit *ŷ*. 20 : *Sed quæ immolant Gen̄es, dæmoniis immolant, et non Deo. Nolo autem vos socios fieri dæmoniorum. Non potestis calicem Domini bibere et calicem dæmoniorum. Non potestis mensæ Domini participes esse et mensæ dæmoniorum.* Et Hebr. xiii, 10 : *Habemus altare de quo edere non habent potestatem qui tabernaculo deserviunt.* Ex his textibus constat Apostolum sacræ Eucharistiæ confectionem sacrificiis apud paganos usitatis comparare : at vera apud paganos fiebant sacrificia. Ergo 4°.

5° *Ex testimoniis SS. Patrum*. Jam citavimus testimonia non dubia S. Justini, S. Cypriani et S. Aug. Tertul. de Corona, cap. 3 : « Oblationes pro defunctis, pro » natalitiis, annua die facimus... calicis aut panis nostri » aliquid decuti in terram anxie patimur. » S. Ambros. de Officiis, l. 1, cap. 41, n. 214, verba S. Laurentii ad S. Sixtum, ad martyrium properantem, sic refert : « Quo, » sacerdos sancte, sine diacono properas tuo ? Nunquam » sine ministro sacrificium offerre consueveras. »

S. Hieron. in cap. 46 Ezech. loquens de Eucharistia, dicit eam esse *legitimum Dei sacrificium, juge atque perpetuum*.

S. Aug. multis in locis de sacrificio Eucharistiæ loquitur, et præsertim in Conf. l. 9, cap. 11, refert matrem suam prope morituram sibi et fratri suo dixisse : « Po- » nite hoc corpus ubicumque, nihil vos ejus cura con- » turbet; tantum illud vos rogo, ut ad Domini altare » memineritis mei ubi fueritis. » Postea circumstantias



funeris ejus describens, dicit, n. 32, *Sacrificium pretii nostri pro ea oblatum fuisse, sicut illic fieri solet*. Certe nihil clarius desiderari potest. Ergo 5°.

6° *Ex præscriptione*. Omnes ecclesiæ, per orbem dispersæ, Latinæ, Græcæ, omnesque sectæ Orientales antiquissimæ, solis Protestantibus exceptis, habent et semper habuerunt altaria in quibus immolarent, sacerdotes qui sacrificarent, liturgias quæ ritum immolandi et offerendi continerent, et omnes, saltem quoad substantiam, perfecte sibi consentiunt, ut videre est apud Card. Bona, *Rerum liturgic. lib 1, c. 6*; P. *Martene*; P. *Scheffmacher, lettre 1*; P. *Le Brun*. Impossibile est autem ritum tam sanctum, tam antiquum, tam veneratum, tam diffusum et uniformem in re, decursu temporum fuisse introductum. Ergo 6°.

7° *Ex rationibus theologicis*. 1° In Ecclesia verum existit sacerdotium, ut ait B. Paulus, *Hebr. vii, 12*: *Translato sacerdotio, necesse est ut et legis translatio fiat*, et universa testatur traditio: at præcipuum munus sacerdotis est offerre sacrificium: *Omnis namque pontifex, ex hominibus assumptus, pro hominibus constituitur in iis quæ sunt ad Deum, ut offerat dona et sacrificia pro peccatis*, *Hebr. v, 1*. Ergo. 2° Semper in Ecclesia exstiterunt altaria, ut constat ex verbis Apostoli supra citatis, *habemus altare*, etc. ex antiquissimis Patribus et ex toto historiæ ecclesiasticæ decursu: porro altaria non dicuntur nisi propter sacrificia in illis offerenda; quod adeo verum est, ut Calvinus sacrificium Eucharistiæ tollens, nomen altaris mutaverit in mensam, *Inst. lib. 4, cap. 18, n. 12*. 3° In confectione sacræ Eucharistiæ omnes reperiuntur conditiones ad constituendum sacrificium proprie dictum, nempe victima divina instituta, minister rite deputatus, sensibilis oblatio soli Deo facta, et mystica victimæ immutatio per consecrationem, cum vi verborum corpus sit sub specie panis et sanguinis sub specie vini, ac entis sacramentalis destructio per specierum consumptionem. Ergo 7°, aliunde, etc. Ergo.

*Solvuntur objectiones.*

*Obj.* 1°. Christus in ultima cœna recubuit cum discipulis, panem accepit, benedixit ac fregit deditque illis; sed non legitur eum sacrificium obtulisse : ergo sacræ Eucharistiæ confectionem non instituit velut sacrificium.

*R. Nego conseq.* Nam 1° omnia quæ Christus in ultima cœna dixit, non fuerunt scripta. 2° Legitur eum oculos ad Patrem levasse et gratias egisse : hæc autem evidenter significant oblationem, ac proinde sacrificium. 3° Res per se denotat sacrificium. Ergo.

*Inst.* 1°. Christus sacrificium crucis prænuntiare voluit, et ideo de sanguine suo dixit, *qui pro vobis fundetur* : ergo verum non obtulit sacrificium.

*R. Nego ant.* 1° Enim si Christus solummodo sacrificium crucis repræsentare aut significare voluisset, nudum adhibuisset signum, non vero præsentiam realem. Attamen de fide est illum convertisse panem in corpus et vinum in sanguinem suum. Ergo. 2° In textu Græco non habetur futurum, sed præsens, *funditur*. 3° Etsi legendum esset *fundetur*, ad exprimendam realem sanguinis effusionem, nihilominus actualis mystica effusio existisset, cum de præsentia reali constet. Ergo.

*Inst.* 2°. Si Christus verum obtulisset sacrificium valoris infiniti in ultima cœna, jam sacrificium crucis fuisset inutile. Ergo.

*R. Nego ant.* Singulæ actiones Christi infiniti fuerunt pretii, et tamen mundum independentem a sacrificio crucis non redemerunt; quia, ex decretis Dei, Christus moriturus et superabundanter satisfactorus erat : ergo *a pari* sacrificium ultimæ cœnæ, licet verum et valoris infiniti, sacrificium crucis non evacuavit. Præterea suum habebat valorem ex futuro crucis sacrificio, cujus realis erat repræsentatio. Ergo.

*Inst.* 3°. Plures theologi in concilio Trid. dubitabant an Christus in ultima cœna verum obtulisset sacrificium, ut narrat Palavic. l. 18, cap. 1, n. 10, et cap. 2. Ergo.

*R. 1º. Negari potest ant.* Non præcise enim quidam in concilio Trid. dubitabant an Christus in ultima cœna verum obtulisset sacrificium, sed an ipsius sacrificium fuisset propitiatorium, sicut est sacrificium missæ, ut videre est apud Palav.

*R. 2º. Nego conseq.* Nam 1º omnes Patres qui circa naturam potiusquam existentiam sacrificii Christi dubium movebant, de veritate sacrificii missæ non dubitabant. Unde ad summum sibi contradixissent. 2º Etiam si concederetur eos de existentia sacrificii Christi, vel de ipso sacrificio missæ dubitasse, quid inde? Nonnullorum opinio, ante positivam Ecclesiæ definitionem, fidei dogma non concutit. Ergo.

*Obj. 2º.* Apud B. Paulum, Hebr. ix, 12, legitur Christum semel introisse in sancta, *Æterna redemptione inventa*; et *ŷ. 26, Semel in consummatione sæculorum, ad destitutionem peccati per hostiam suam apparuisse*; et cap. x, 14 : *Una oblatione consummasse in sempiternum sanctificatos*. Ergo aliud, præter sacrificium crucis, non requirendum est sacrificium.

*R. Nego conseq.* Christus equidem seipsum Deo Patri in cruce offerens, abunde pro peccatis totius mundi satisfecit quoad pretium : sed Deus, ex rationibus sibi cognitis, statuit ut pretium istud valoris infiniti specialibus modis applicaretur individuis : hinc sacramenta a Christo instituta, aliaque media apud ipsos Protestantes usitata, ut actus fidei, spei, charitatis, religionis, orationes, elemosynæ, etc. quæ plus minusve directe gratiam producant, suam efficaciam ex sacrificio crucis hauriunt : ergo similiter missa potest esse sacrificium propriè dictum, nec ideo virtus sacrificii crucis evacuatur aut minuitur.

Juxta enim fidem Ecclesiæ, sacrificium missæ non differt substantialiter a sacrificio crucis, sed tantum in modo illud offerendi : eadem quippe est hostia et idem sacerdos principalis, nempe Christus, qui, *Eo quod maneat in æternum, sempiternum habet sacerdotium* : unde et *salvare in perpetuum potest accedentes per semetipsum ad Deum, semper vivens ad interpellandum pro nobis*, Hebr. vii, 23.

*Obj. 3º.* Mactatio, id est victimæ destructio, aut notabilis in illa mutatio, de essentia est veri sacrificii : at in missa nulla est mactatio victimæ. Ergo.

*R. Nego min.* Non est quidem mactatio victimæ cruenta, instar veterum sacrificiorum, sive paganorum, sive Judæorum, aut sicut ipsum sacrificium in cruce consummatum : sed cum Christus, vi verborum consecrationis, in statu mortis mystice constituatur, in commemorationem sacrificii crucis realis ejus fit repræsentatio : ergo verum et sublime offertur sacrificium, sed incruentum.

Hinc missa recte dici potest sacrificium spirituale, licet verum et sensibile, per oppositionem ad vetera sacrificia ipsius typica, et ad sacrificium crucis, cujus est mystica renovatio. Sic ubique verificantur sequentia verba Christi, Joan. iv, 23 : *Venit hora et nunc est, quando veri adoratores adorabunt Patrem in spiritu et veritate.* Frustra igitur a Calvinistis nobis objiciuntur, quasi sacrificium missæ excludentia.

## CAPUT TERTIUM.

### DE ESSENTIA SACRIFICII MISSÆ.

Apud omnes constat duo ad rationem sacrificii omnino necessaria esse : rem offerendam seu victimam, et actionem offerentis. Quærendum est igitur 1º quænam res in sacrificio missæ Deo sit offerenda, et 2º quænam actio ad essentiam illius sacrificii pertineat.

### ARTICULUS PRIMUS.

#### DE RE IN SACRIFICIO MISSÆ ESSENTIALITER OFFERENDA.

Plerique Protestantes, saltem Lutherani et Anglicani, nomen sacrificii retinent, et sanctæ cœnæ, ut aiunt, illud applicant. Sed Melanchton, in Apologia confessionis Au-



gustanæ, contendit illud esse tantum eucharisticum seu gratiarum actionem, a fidelibus Deo reconciliatis factam, pro remissione peccatorum et aliis beneficiis acceptis; non vero propitiatorium dici posse, sine grandi in sacrificium crucis contumelia.

P. *Le Courayer*, canonicus regularis S. Genovesæ Parisiensis, in opere dicto, *Dissertation sur la validité des ordinations Anglicanes*, anni 1723, et in altero, *Défense de la Dissertation*, etc. anni 1726, contendit Anglos, præsentiam realem negantes, omnia ad essentiam sacrificii necessaria nihilominus retinere, et controversiam hoc in puncto inter eos atque catholicos esse duntaxat nominis: vult autem naturam sacrificii in sola mortis Christi repræsentatione consistere, etiam absque reali præsentia, et solummodo esse sacrificii crucis commemorationem.

Catholici vero libenter concedunt illud revera sacrificii crucis esse commemorationem, sed veram, realem, et non nudam. Cum quibus sit

## PROPOSITIO.

*Nuda sacrificii crucis repræsentatio ad essentiam sacrificii missæ, prout a Christo fuit instituta, non sufficit, sed præsentia realis est omnino necessaria.*

*Prob. concilio Trid. testimoniis Patrum et rationibus theologicis.*

1º *Concilio Trid.* sess. 22, cap. 1, ubi sic habetur :  
 « Dominus noster... ut dilectæ sponsæ suæ Ecclesiæ visibile, sicut hominum natura exigit, relinqueret sacrificium, quo cruentum illud semel in cruce peragendum repræsentaretur, ejusque memoria in finem usque sæculi permaneret; atque illius salutaris virtus in remissionem eorum, quæ a nobis quotidie committuntur peccatorum, applicaretur... corpus et sanguinem suum sub speciebus panis et vini Deo Patri obtulit : ac sub earundem rerum symbolis, Apostolis, quos tunc novi testamenti sacerdotes constituabat, ut sumerent tradi-

» dit; et eisdem eorumque in sacerdotio successoribus  
 » ut offerrent præcepit per hæc verba : *Hoc facite*, etc. »

In capite 2 : « In divino hoc sacrificio quod in missa  
 » peragitur, idem ille Christus continetur et incruente  
 » immolatur, qui in ara crucis semel seipsum cruento  
 » obtulit. » Et in canone 3 ejusdem sess. anathemate per-  
 cutit eum qui dixerit *missæ sacrificium tantum esse laudis  
 et gratiarum actionis, aut nudam commemorationem sacri-  
 ficii in cruce peracti*. Concilium non præcise propositionem  
 nostram definit, quia necessitatem præsentiae realis non  
 directe exprimit, sed eam in his textibus evidenter sup-  
 ponit. Ergo 1°.

2° *Testimoniis Patrum*. Relegantur testimonia superius  
 ad probandam sacrificii missæ existentiam citata, et com-  
 perietur Patres non aliter dictum intellexisse sacrificium,  
 nisi de vera corporis et sanguinis Christi oblatione : ergo  
 semper arbitrati sunt præsentiam realem ad illius essen-  
 tiam pertinere. Ergo 2°.

3° *Rationibus theologicis*. 1° Sacrificium missæ longe  
 præstantius esse debet veteribus sacrificiis quibus adum-  
 brabatur : at, in adversarium sententia, præstantius non  
 esset, siquidem vetera etiam crucis sacrificii erant repræ-  
 sentationes seu figuræ. 2° In sacrificio proprie dicto res  
 aliqua sensibilis cum notabili immutatione offerenda  
 est : at si missa nuda esset sacrificii crucis repræsentatio,  
 nulla res sensibilis cum notabili immutatione Deo offer-  
 retur : ergo. 3° Apud omnes catholicos certum est sacri-  
 ficiu missæ a sacrificio crucis non differre, nisi in modo  
 illud offerendi : si autem essentia ejus in sola repræsen-  
 tatione vel commemoratione sacrificii crucis consisteret,  
 manifestum est quod utrumque substantialiter differret.  
 Ergo 3°.

Sæpe tamen Patres et alii doctores missæ sacrificium  
 vocant similitudinem, memoriam, commemorationem,  
 figuram, imaginem, symbolum, etc. sacrificii crucis, et  
 quidem rectissime ; sed dicendum est illud esse simul fi-  
 guram, imaginem, etc. et realitatem : quod, *ex dictis*,  
 optime intelligitur.

## ARTICULUS SECUNDUS.

DE ACTIONE IN QUA ESSENTIA SACRIFICII CONSISTIT.

Sex præscriptæ sunt vel distinguuntur actiones in celebratione missæ, nempe 1° offertorium, quod est oblatio panis et vini; 2° consecratio; 3° oblatio corporis et sanguinis Christi, post consecrationem, per hæc verba : *Unde et memores nos servi tui... offerimus præclare Majestati tuæ, de tuis donis ac datis, hostiam puram*; 4° fractio hostiæ; 5° communio seu sacramenti consumptio; 6° sacramenti distributio.

*Certum est* 1° nullam ex his actionibus voluntarie omitti posse sine peccato mortali, quia esset mutatio in re gravi; et aliunde, his omnibus peractis, sacrificium missæ esse completum : nihil quippe aliud exhiberi potest ut essenziale.

2° Essentia sacrificii missæ non consistit in offertorio : siquidem panis et vinum duntaxat offeruntur, dum oblatio corporis et sanguinis Christi de essentia est hujus sacrificii, *ex supra dictis*.

3° Non consistit in oblatione quæ fit post consecrationem. Nam 1° illa oblatio non fit nomine Christi, sed nomine Ecclesiæ. 2° In ea nulla fit victimæ immutatio. 3° Christus in ultima cœna fecit quidquid pertinebat ad essentiam sacrificii quod instituebat : atqui nihil probat eum hanc secundam oblationem fecisse : ergo.

4° Non consistit in fractione hostiæ; hæc enim fractio rem ipsam offerendam nullo modo afficit, ac consequenter sacrificii essentiam constituere non potest. Unde S. Th. 3 p. q. 83, art. 6. ad 6<sup>um</sup> et omnes theologi cum illo : « Dicendum quod fractio fiat hostiæ consecratæ, et  
 • quod una sola pars mittatur in calicem, respicit corpus mysticum, sicut admixtio aquæ significat populum;  
 • et ideo horum prætermissio non facit imperfectionem sacrificii, ut propter hoc sit necesse aliquid reiterare circa ejusdem celebrationem. » Ergo.

5° Non in distributione quæ fit populo; alioquin

1° missa non esset sacrificium respectu eorum qui non communicant. 2° Distributio ex hostiis in ea missa consecratis necessario facienda esset. 3° Missa in qua solus communicaret sacerdos celebrans, vera non esset missa. 4° Solus sacerdos celebrans communionem distribuere posset : atqui hæc omnia falsa sunt : ergo 5°.

6° Contra vero nullum est dubium quin consecratio ad essentiam sacrificii missæ pertineat ; per eam enim actionem Christus in ente sacramentali realiter constituitur, mystice mactatur, et seipsum Deo Patri per sacerdotem offert. Ergo.

7° Quamvis consecratio unius speciei seorsim sumptæ sit valida , *ut in prima parte ostendimus*, consecratio utriusque speciei ad essentiam sacrificii necessaria est ; quia secus, sacrificium crucis non realiter repræsentaretur, Christus in statu mortis Deo non offerretur, sacrificium in ultima cœna institutum non renovaretur, nec proinde hæc implerentur verba, *Hoc facite in meam commemorationem*. Ergo.

8° Bellarminus, Melchior Canus, Tournely et plures alii crediderunt communionem sacerdotis ad essentiam sacrificii missæ pertinere ; quia illud sacrificium per modum convivii fuit institutum, nec concipitur sine sumptione. Alii vero generaliter theologi fatentur communionem sacerdotis esse integram hujus sacrificii partem, jure divino strictissime præscriptam : et inde natam esse rubricam, ut si sacerdos post consecrationem et ante communionem deficiat, alius substituatur sacerdos, etiam non jejunos, qui missam perficiat : sed negant eam ad naturam illius sacrificii pertinere : quia 1° sacrificium perfectum existere potest sine sumptione, ut olim holocausta. 2° Communio seu sumptio est participatio victimæ, et ideo supponit eam esse mactatam atque oblatam. 3° Certum est Christum in ultima cœna verum obtulisse sacrificium, et incertum an proprium corpus et sanguinem sumpserit, licet hoc habeatur ut valde probabile : ergo saltem concipitur essentiam sacrificii communionem non absolute supponere. Ergo.



## CAPUT QUARTUM.

## DE EFFECTIBUS SACRIFICII MISSÆ.

Tria hic inquiri possunt, scilicet, 1° quos effectus sacrificium missæ producat; 2° quomodo eos producat, et 3° quis sit ejus valor.

## ARTICULUS PRIMUS.

## QUOS EFFECTUS SACRIFICIUM MISSÆ PRODUCIT.

Ratione finis seu effectus, quadruplex olim distinguebatur sacrificium, videlicet latreuticum, eucharisticum, propitiatorium et impetratorium.

At libenter concedunt Protestantes sacræ Eucharistiæ confectionem esse sacrificium latreuticum, ad Deum supremo cultu adorandum, et eucharisticum, ad gratias ei persolvendas. Sed pertinaciter negant illud esse propitiatorium et impetratorium, sub prætextu quod tunc sacrificio crucis illuderet. Contra quos sit

## PROPOSITIO PRIMA.

*Sacrificium missæ est propitiatorium.*

*Prob.* Propositio est de fide : probatur testimoniis Patrum, liturgiis et ratione.

1° Est de fide, utpote in concilio Trid. definita, sess. 22, can. 3 : « Si quis dixerit missæ sacrificium tantum esse laudis.... non autem propitiatorium.... anathema sit. » Ergo 1°.

2° *Probatur testimoniis Patrum.* S. Cyrillus Hierosoly. Catech. mystag. 5, n. 10 : « Christum mactatum pro nostris peccatis offerimus, clementem Deum pro nobis demereri et propitiare satagentes. »

S. Ambr. de Officiis, l. 1, cap. 48, de Eucharistiæ sacrificio agens, ait : « Offert sese quasi sacerdos (Christus), » ut peccata nostra dimittat. »

S. Hieron. in cap. 1, Epist. ad Tit. : « Quid de episcopo sentiendum est, qui quotidie pro suis populique peccatis illibatas Deo oblaturus est victimas? » Ergo 2°.

3° *Liturgiis*. In cunctis enim liturgiis, etiam antiquissimis, Orientalibus et Occidentalibus, hæreticorum et schismaticorum, sicut catholicorum, sacrificium missæ pro remissione peccatorum offertur. Ergo 3°.

4° *Ratione*. Christus est propitiatio pro peccatis nostris : atqui ipse Christus in sacrificio missæ Deo exhibetur realiter præsens, et tanquam pro peccatis nostris immolatus : ergo sacrificium istud debet esse propitiatorium, nec ullo modo sacrificio crucis ad sensum Protestantium derogat : quod sic exponit Bossuet, *Exposition de la doctrine de l'Eglise catholique* : « C'est la doctrine exposée de l'Eglise catholique dans le concile de Trente, » qui enseigne, sess. 22, cap. 1, que ce sacrifice n'est institué qu'afin de représenter celui qui a été une fois accompli en la croix ; d'en faire durer la mémoire jusqu'à la fin des siècles, et de nous en appliquer la vertu salutaire pour la rémission des péchés que nous commettons tous les jours. Ainsi, loin de croire qu'il manque quelque chose au sacrifice de la croix, l'Eglise, au contraire, le croit si parfait et si pleinement suffisant, » que tout ce qui se fait ensuite n'est plus établi que pour en célébrer la mémoire, et pour en appliquer la vertu. » Ergo 4°.

#### PROPOSITIO SECUNDA.

*Sacrificium missæ est impetratorium.*

*Prob.* Est de fide ; probatur usu Ecclesiæ et ratione.

1° *Est de fide*. Concilium Trid. sess. 22, can. 3, post verba superius citata, dicit anathema eis qui contende-

rent sacrificium missæ offerri non debere *pro pœnis, satisfactionibus et aliis necessitatibus*. Ergo 1°.

2° *Probatur usu Ecclesiæ*. In omnibus quippe liturgiis sacrificium missæ offertur ad obtinenda bona spiritualia, *pro nostra et totius mundi salute*, et etiam ad sollicitanda bona temporalia : sic olim offerebatur *pro salute imperatoris*, teste Tertul. lib. ad Scapulam, cap. 2. « Pro communi ecclesiarum pace, pro recta mundi compositione, pro imperatoribus, pro militibus et sociis, pro iis qui infirmitatibus laborant, pro his qui afflictionibus premuntur, et universim pro omnibus qui opis indigent, » inquit S. Cyrill. Hierosol. Catech. mystag. 5, n. 8. Similiter et nunc celebrans commendat Deo totam Ecclesiam catholicam, papam, episcopum, regem, etc. Ergo 2°.

3° *Ratione*. 1° In sacrificio missæ Christus realiter præsens Deo offertur : atqui talis oblatio idonea est ad impetranda bona, sive spiritualia, sive etiam temporalia, quatenus ad salutem conducere possunt. 2° Sacrificium istud est propitiatorium, *ex dictis*. Obtinet igitur gratiam peccatorum et pœnarum peccatis debitarum remissivam. Cur ergo alia dona ad salutem conducentia obtinere non posset? 3° Vetera sacrificia, novum sacrificium obumbrantia, erant propitiatoria et impetratoria. Ergo et sacrificium missæ.

## ARTICULUS SECUNDUS.

QUOMODO SACRIFICIUM MISSÆ EFFECTUS SUOS PRODUCAT.

*Constat, ex dictis*, sacrificium missæ, veteribus sacrificiis æquivalens, esse simul latreuticum, eucharisticum, propitiatorium et impetratorium. Verum petitur an huiusmodi effectus producat immediate vel mediate, ex opere operato vel ex opere operantis?

1° Quatenus est latreuticum et eucharisticum, immediate et ex opere operato effectus producit ; per seipsum enim, et independenter a dispositionibus celebrantis vel assistentium, Deum cultu patriæ honorat, et gratiarum actionem pro collatis beneficiis solvit.

2° Quatenus impetratorium, bona tam spiritualia quam temporalia et pœnarum peccatis debitarum condonationem immediate sollicitat, absque merito sacerdotis, ac proinde ex opere operato. Verum, ex decretis Dei, per modum suffragii operatur, et ideo non semper obtinet effectum ad quem destinatur.

3° Ut propitiatorium, remissionem peccatorum, sive mortalium sive venialium, non producit immediate, sed mediate, obtinendo gratias eliciendi actus pœnitentiæ, congruentes dispositiones ad sacramenta quibus gratia sanctificans, prima vel secunda, annexa est, etc. Sic expresse habet concil. Trid. sess. 22, cap. 2 : « Hujus oblatione placatus Dominus, gratiam et donum pœnitentiæ concedens, crimina et peccata etiam ingentia dimittit. » Unde ingens datur discrimen inter sacramenta et missæ sacrificium, quoad modum operandi; ritus enim sacramentalis sic a Christo fuit institutus, ut, eo posito, effectus in obicem non ponentibus infallibiliter producat; missæ vero sacrificium, licet pretiosissimum, infallibiles hujusmodi effectus non producit, idque ex sapienti divina institutione quam venerari et non scrutari debemus : idcirco sæpissime pro eodem fine iterari potest.

4° Nihilominus divinissimum illud sacrificium suum habet effectum, etiam quatenus est propitiatorium, ex opere operato. Ipse enim Christus, qui in cruce mactatus est, super altare immolatur, et Deo in remissionem peccatorum offertur : atqui talis oblatio peccatorum remissionem sollicitat, independenter a dispositionibus sacerdotis : ergo. Sed valoris hujus sacrificii applicatio a variis pendet circumstantiis nobis ignotis : propterea ejus efficaciam nunquam certo noscimus.

5° Quamvis missæ sacrificium ex opere operato prosit, et principalem suum effectum independenter a dispositionibus ministri habeat, certum est tamen sanctitatem celebrantis, fervorem assistentium et dispositiones eorum pro quibus offertur ad ejus efficaciam seu applicationem non parum inservire : est sententia communis doctorum et fidelium.



## ARTICULUS TERTIUS.

## QUIS SIT VALOR SACRIFICII MISSÆ.

1° *Certum est* sanctissimum illud sacrificium in se spectatum, esse valoris infiniti, cum ipse Christus simpliciter infinitus offeratur : infinitos igitur producere potest fructus.

2° *Certum est* illud ut latreuticum et eucharisticum, esse pretii infiniti, id est, Deum infinite honorare et laudare, quia omnes actiones Christi sunt valoris infiniti; *a fortiori* præstantissima illa actio qua sacrificium crucis incruente renovatur.

3° *Certum est* fructum hujus sacrificii homini communicatum seu applicatum, non esse simpliciter infinitum; nam 1° efficacius esse non debet quam sacrificium crucis : atqui sacrificium crucis non fuit infinitum quoad applicationem, alioquin omnes homines de facto ab omnibus peccatis fuissent justificati. 2° Missa pluries offerri non deberet pro eodem fine, quod praxi Ecclesiæ adversatur. 3° Creatura applicationis simpliciter infinitæ non est capax. Ergo.

4° Cum valor sacrificii missæ sit in se infinitus, et unicuique finito modo tantum applicetur, *certum est*, cum multis simul, æqualiter vel inæqualiter, juxta Dei beneplacitum, applicari posse. Unde qui audit missam coram multitudine celebratam, tantum percipere potest fructum, sine aliorum præjudicio, quantum perciperet si solus assisteret : talis est communis fidelium et totius Ecclesiæ sensus. Secus enim melius esset missam parochialem deserere, et quærere missam privatam; satius esset habitare in parochia exigua quam in numerosa, etc.

*Notandum*, triplicem in sacrificio missæ distingui fructum : unum generalem omnibus assistantibus communem; alium specialem, qui, vi intentionis ministri, alicui potest applicari, et tertium specialissimum, qui ad celebrantem essentialiter pertinet, quatenus rem bonam facit.

5° *Certum est* missam pro aliquo specialiter oblatam,

ipsi specialius prodesse, quamvis ignoremus quomodo id fiat. Theologi rem illustrent exemplis : sol, v. g. coram multitudine lucens, non ideo minus illuminat singulis; vox a multitudine audita, non minus de singulis auditur; et nihilominus, sine aliorum præjudicio, intensitas luminis vel caloris aut soni vocis ope artificiali augeri potest respectu privatorum. Ergo.

6° *Disputatur* inter theologos an missæ sacrificium pro multis specialiter oblatum, tantum unicuique proficiat quantum proficeret, si pro eo solo offerretur. Multi negant, ea præsertim innixi ratione, quod, ex institutione Christi, valor missæ in se infinitus, finito modo tantum applicetur. Vide Ferraris, v° Missa, art. 1, n. 14. Alii vero multo plures, ut Suarez, Concina, Habert, Juenin, Tournely, Collet, Ligorio, affirmant, contendentes effectum missæ limitari, non ex institutione Christi, ut volunt patroni primæ sententiæ, sed ex finita capacitate hominum pro quibus offertur : unde concludunt æque singulis pluribus prodesse ac si uni tantum applicaretur.

7° Omnes tamen fatentur, sacerdotem qui plura accipit stipendia, vel plures promisit missas, tot singulatim celebrare ex iustitia teneri, sub peccato mortali. 1° Quia prior sententia, a multis defensa, non est improbabilis. 2° Quia per susceptionem stipendiorum vel promissionem missarum factus est contractus, cui ex iustitia standum est. 3° Quia Alexander VII hanc damnavit propositionem : • Non est contra iustitiam pro pluribus sacrificiis • stipendium accipere, et sacrificium unum offerre. • Ergo.

## CAPUT QUINTUM.

DE HIS PRO QUIBUS MISSÆ SACRIFICIUM OFFERRI  
POTEST.

Duplicis generis sunt personæ pro quibus divinum illud sacrificium offerri potest, nimirum viventes et mortui.

*De viventibus.*

1° Nullus est dubitandi locus quin missæ sacrificium offerri possit pro omnibus Ecclesiæ membris adhuc viventibus, sive justi sint, sive peccatores; est enim propitiatorium et impetratorium, *ex dictis*: igitur offerri potest ad obtinendam remissionem peccatorum, et ad impetranda bona ad salutem conducentia. Porro si quidam homines tales obtinere possint effectus, maxime qui sunt membra Ecclesiæ viventia. Ergo. Unde in canone missæ, oratione *Te igitur*, dicimus: *Quæ tibi offerimus pro Ecclesia tua sancta catholica... pro omnibus orthodoxis, atque catholicæ et apostolicæ fidei cultoribus.*

2° Pro schismaticis, hæreticis et etiam infidelibus offerri potest per modum deprecationis, ut convertantur, pœniteant et gratiam justificationis obtineant; pro iis quippe omnibus deprecari licet, juxta hæc B. Pauli verba, I Tim. II, 1: *Obsecro primum omnium fieri obsecrationes, orationes, postulationes, gratiarum actiones, pro omnibus hominibus, pro regibus et omnibus qui in sublimitate sunt.* Porro sacrificium missæ, quatenus impetratorium, per modum deprecationis offerri potest. Ergo.

3° Communius docent auctores, missam licite offerri pro excommunicatis toleratis, et eis prodesse quatenus offertur in persona Christi; quia, vi Constitutionis Martini V, *Ad evitanda scandala*, cum eis communicare licet in divinis. Non tamen eis proderit quatenus nomine Ecclesiæ offertur, quia Martinus V *non intendit excommunicatos in aliquo relevare, nec eis quomodolibet suffragari.*

4° Pro excommunicatis non toleratis missæ sacrificium offerri potest indirecte, si nempe offeratur pro omnibus peccatoribus, pro conversione hæreticorum et impiorum: sed directe offerri non potest pro iis etiam generaliter spectatis, nullum in particulari nominando; et communiter docent auctores eum qui sic ageret, mortaliter peccaturum, quia contra gravem Ecclesiæ prohibitionem iret.

*Hæc melius intelligentur ex dicendis in tractatu de Censuris.*

*De mortuis.*

1° De fide est missæ sacrificium offerri posse pro defunctis in purgatorio existentibus; sic enim habet concil. Trid. sess. 22, can. 3: « Si quis dixerit missæ sacrificium esse tantum laudis.... neque pro vivis et defunctis, pro peccatis, pœnis, satisfactionibus et aliis necessitatibus offerri debere: anathema sit; » et sess. 25, decreto de Purg. definit, « Animas ibi detentas fidelium suffragiis, potissimum vero acceptabili altaris sacrificio, » adjuvari. » Addi possent testimonia Patrum et praxis totius Ecclesiæ. Ergo.

2° Ignoramus autem qua ratione sacrificium salutare, eleemosynæ aliaque bona opera mortuis prosint. « Non » omnino ambigendum est ista prodesse defunctis, sed » talibus qui ita vixerunt ante mortem, ut possint eis » hæc utilia esse post mortem; » S. Aug. Serm. 172. Fructus igitur sacrificii applicatur defunctis modo finito, in quantitate dispositionibus quas habebant moriendo proportionata, et nobis prorsus ignota. Ideo, multis pro eadem anima iteratis missis, non constat eam a pœnis purgatorii esse liberatam. 3° Attamen missæ sacrificium prodest defunctis ex opere operato; quia principalis fructus ejus a dispositionibus celebrantis non pendet. Parvi refert ergo, sub hoc respectu, ut missa a bono vel a malo celebretur ministro, ut dicatur missa defunctorum, vel occurrentis sancti aut feriæ; idem quippe est valor substantialis sacrificii: sed, ex parte orationum, magis prodest illa in qua sunt orationes ad hoc determinatæ: verum hic defectus compensari potest per majorem devotionem, vel ejus qui dicit missam, vel ejus qui jubet dici, vel iterum per intercessionem sancti cujus fit officium.

4° Pro infidelibus et hæreticis defunctis missa offerri non potest, neque pro impiis, quamvis Christiani fuerint, ut expresse habetur in Decreto, secunda parte, causa 13, q. 2, can. 21: « Nec pro illis quos constat decessisse in



• mortali... ut cum quis suspendit se, vel præcipitat, aut alio modo se interficit : » sunt verba Glossæ, in loco citato Decreti. Hinc nullo modo offerri potest pro infante sine Baptismate decesso.

5° Pro excommunicatis vitandis, ante absolutionem defunctis, missa offerri non potest, nec orationes Domino porrigendæ, nisi viventes evidentia pœnitentiæ signa dederint, et etiam defunctis beneficium absolutionis impendatur, ut docet Innocentius III, Decretal. l. 5, tit. 39, cap. 38.

6° *Sequitur, ex dictis*, missam aliaque Ecclesiæ suffragia publice offerri non posse pro iis quibus neganda est sepultura ecclesiastica, quia tunc vera esset contradictio. Unde Ecclesia non orat, nec orationibus fidelium commendat eos qui mortui sunt in infidelitate, in hæresi, in schismate, in impœnitentia finali certo cognita, in voluntario suicidio, in duello, vel in alio flagranti delicto.

7° Privatum vero orare et missæ sacrificium per modum suffragii offerre possumus pro iis omnibus quorum reprobatio non est certa, ut apud Deum adjuventur, si reipsa adjuvari possint; quia *Melius supererunt ista eis quibus nec obsunt, nec prosunt, quam eis deerunt quibus prosunt*, inquit S. Aug. lib. de Cura gerenda pro mortuis, cap. 18.

8° *Certum est* missæ sacrificium offerri non posse sanctis, *sed soli Deo qui illos coronavit*, ut docet concil. Trid. sess. 22, cap. 3. Ex canone 5 sequenti, de fide est missas celebrari posse *in honorem sanctorum, et pro illorum intercessione apud Deum obtinenda, sicut Ecclesia intendit*, et quotidie facit.

9° Quidam opinati sunt animas damnatorum aliquantulum a pœnis sublevari per eleemosynas et sacrificia ad eorum intentionem oblata, ut videre est apud P. Petau, t. 3, dogm. l. 3, cap. 8, n. 15; verum hæc singularis opinio nullo innixa fundamento, explodenda est velut absurda. Imo, cum quidam concionator hanc emisisset sententiam, ex resolutione S. Cong. Inquisitionis, ab In-

nocentio XI approbata, coactus est se retractare : Ferraris, v<sup>o</sup> Missæ sacrif. art. 7, n. 20.

10<sup>o</sup> Ad Sacram Cong. concil. delata est quæstio an ante mortem celebrare vel celebrari facere liceat missas *de requiem*, pro suffragio animæ suæ, per anticipationem : congregatio rem non definivit, teste Ferraris, ibid. n. 21. Etiam si liceret, quod improbable videtur, saltem dici non potest missas sic oblatas eodem modo prodesse ac si post mortem offerrentur.

## CAPUT SEXTUM.

### DE MINISTRO SACRIFICII MISSÆ.

Christus principalis est offerens in sacrificio missæ. *Idem nunc offerens sacerdotum ministerio, qui seipsum tunc in cruce obtulit*, ait concil. Trid. sess. 22, cap. 2. *Per hoc et sacerdos est, ipse offerens, ipse et oblatio*, inquit S. Aug. de Civitate Dei, l. 10, cap. 20.

*Probavimus in prima parte*, solum sacerdotem esse ministrum Eucharistiæ sacramenti quoad confectionem : inde sequitur eum solum missæ sacrificium valide offerre posse. Circa hoc punctum nullum moveri potest, nec de facto movetur dubium.

Simplices tamen fideles aliquo sensu dici possunt missæ sacrificium offerre, quatenus videlicet oblationem a sacerdote factam approbant, ei consentiunt, et Christo victimæ cordis affectu conjunguntur. Unde in canone legitur : *Memento, Domine, famulorum famularumque tuarum...*, *pro quibus tibi offerimus vel qui tibi offerunt hoc sacrificium laudis, pro se suisque*, etc.

Dispositiones in sacerdote requisitas ad licite celebrandum, supra descripsimus, agendo de dispositionibus ad suscipiendam Eucharistiam necessariis. Nunc specialiter nobis agendum est 1<sup>o</sup> de obligatione quam habent sacer-

dotes missam celebrandi; 2° de frequenti celebratione; 3° de obligatione fructum missæ applicandi; 4° de stipendio et obligationibus ex stipendio nascentibus.

## ARTICULUS PRIMUS.

### DE OBLIGATIONE QUAM HABENT SACERDOTES MISSAM CELEBRANDI.

1° Longè communius docent theologi, v. g. S. Th. Suarez, Layman, Bonacina, Concina, Habert, Juenin, Collet, contra Card. de Lugo et nonnullos alios, omnes sacerdotes, non legitime impeditos, teneri sub peccato mortali saltem aliquando celebrare; idque concludunt, 1° ex verbis B. Pauli Hebr. v, 1 : *Omnis namque pontifex, ex hominibus assumptus, pro hominibus constituitur in iis quæ sunt ad Deum, ut offerat dona et sacrificia pro peccatis*; 2° ex verbis Christi, *hoc facite in meam commemorationem* : quæ verba, ex concilio Trid. sess. 22, cap. 1, verum continent præceptum. 3° Ex Decretal. l. 3, tit 41, cap. 9, ubi Innocentius III fortiter arguit sacerdotes *qui missarum solemnia vix celebrant quater in anno*; 4° auctoritate S. Pii V, qui contradictoriam opinionem ex operibus Cajetani eam defendentis expungi iussit, referente Ligorio, l. 6, n. 313, dub. 1.

2° Non sibi consentiunt theologi quoties in anno celebrare teneatur sacerdos, ut non peccet mortaliter. « Saltem videtur quod celebrare teneatur in præcipuis festis, » et maxime in illis diebus in quibus fideles communicare consueverunt, » inquit S. Th. 3 part. q. 82, art. 10, concl. Præcipua autem festa in quibus fideles communicare consueverunt, sunt Nativitas Domini, Pascha et Pentecostes, ut explicatur apud Bened. XIV, l. 3, cap. 1, n. 5 et 6.

Concilium Trid. sess. 23; de Reformatione cap. 14, sic habet : « Curet episcopus ut ii saltem diebus dominicis et festis » solemnibus; si autem curam habuerint animarum, tam » frequenter, ut suo muneri satisfaciant, missas cele-

• brent. • S. Carolus Bor. concilio Mediol. I, tit. de Freq. divini sacrificii oblatione, auctoritate concilii Trid. innixus, omnibus sacerdotibus, cujuscumque gradus, dignitatis et conditionis præcipit ut his diebus celebrare non omittant. Hinc Bened. XIV, l. 3, cap. 1, n. 9, concludit dari obligationem sub peccato, pro sacerdote non impedito, singulis diebus dominicis et festivis celebrandi: sed definire non vult an illa obligatio sit sub veniali tantum, an sub mortali.

Longe probabilius videtur aliquas hujus generis omissiones, sine causa excusante, esse duntaxat peccata venialia, modo audiatur missa: imo Ligorio ut multo probabiliorē habet sententiam quæ docet sacerdotem non teneri, sub peccato mortali, celebrare pluries quam ter aut quater, in solemnioribus festis. Pius sacerdos periculo mortaliter in hoc genere peccandi nunquam se committet.

3<sup>o</sup> Qui curam habent animarum, missam celebrare tenentur singulis diebus dominicis et festibus de præcepto: his quippe diebus fideles missam audire tenentur, et, quantum *commode fieri potest*, in propria parochia, juxta concil. Trid. sess. 24, cap. 4, de Refor. Verum obligatio missam audiendi supponit in pastore strictam obligationem eam celebrandi per se vel per alium. Unde qui celebrare non vult, vel est impeditus, curare debet, juxta communem opinionem, ut alius pro se missam parochialem celebret; sic Bened. XIV, l. 3, cap. 3, n. 6. Excusari igitur non potest parochus nec vicarius, qui, legitime non impeditus, missam die dominica omittit celebrare; vel, absque licentia episcopi, propriam deserit ecclesiam, et in causa est cur fideles præcepto audiendi missam satisfacere nequeant.

## ARTICULUS SECUNDUS.

### DE FREQUENTI CELEBRATIONE MISSÆ.

S. Bonaventura, de Præparatione ad missam, cap. 5,



ait : « Sacerdos qui non celebrat , quantum in ipso est ,  
 » privat Trinitatem laude et gloria , Angelos lætitia , pec-  
 » catores venia , justos subsidio et gratia , in purgatorio  
 » existentes refrigerio , Ecclesiam Christi speciali bene-  
 » ficio , et seipsum medicina et remedio contra quotidiana  
 » peccata et infirmitates. » Idem ferme habet auctor ex-  
 quisiti operis de Imitatione Christi , l. 4 , cap. 5 , in fine.  
 Suarez et multi theologi cum illo statuunt , *ad spiritum*  
*Ecclesiæ propius accedere et convenientius esse , singulis*  
*diebus sacrificium facere , idque sacerdotibus inculcandum ;*  
 Bened. XIV , l. 3 , cap. 2 , n. 1.

2° Plurimi tamen allegant frequentiam generare indif-  
 ferentiam ; quod raro fit , pretiosius fieri ; in primordiis  
 Ecclesiæ non ita sæpe , sed majori cum devotione missam  
 celebrari consuevisse ; sacerdotes qui rarius celebrant ,  
 sensibiliiori compunctione cordis et multis cum lacrymis  
 sacrificium offerre , et denique pios animarum rectores  
 consilium sacerdotibus dare ut aliquoties missam omit-  
 tant , nec quotidie celebrent.

3° His rationibus Bened. XIV respondet , 1° melius  
 quidem esse quotidie vel frequentissime celebrare , sed  
 bene semper et cum dispositionibus requisitis celebran-  
 dum esse ; 2° Apostolos eosque qui Apostolis proxime suc-  
 cesserunt frequenter vel etiam quotidie celebrasse ; et id  
 probari posse , tum ex Act. II , 46 : *Quotidie perdurantes*  
*unanimiter in templo , et frangentes circa domos panes ;* tum  
 ex S. Cyp. Epist. 54 : « Episcopatus nostri honor gran-  
 » dis et gloria est pacem dedisse martyribus , ut sacerdo-  
 » tes qui sacrificia Dei quotidie celebramus , hostias Deo  
 » et victimas præparemus ; » tum ex pluribus aliis testi-  
 moniis quæ hic referre longius esset. 3° Quoad sensibi-  
 lem devotionem et lacrymas , negat eas esse donum quo  
 necessario careant qui frequentius celebrant , vel disposi-  
 tionem ad digne celebrandum requisitam ; citat testimo-  
 nium Joannis Gerson , qui docet satis esse , ad missam  
 digne celebrandam , si sacerdos post discussam diligenti  
 examine suam ipsius conscientiam , moraliter certus sit  
 se esse in statu gratiæ , nec omnem fervoris aut atten-

tionis defectum obstare quominus missa digne celebretur.

4<sup>o</sup> Sacra Cong. Rituum, per decretum diei 11 februarii 1690, ab Alexandro VII die 11 martii approbatum, sic statuit : « In sabbato sancto, etiamsi occurrat festum » Annuntiationis B. Mariæ Virginis, celebratio missarum » privatarum omnino prohibetur, in quibuscunque ec- » clesiis et oratoriis tam publicis quam privatis, non » obstante quacunque consuetudine, sed unica tantum » missa conventualis una cum officio hujus diei celebre- » tur. » Alia citantur decreta ejusdem Cong. in eodem sensu, et Bened. XIV, l. 3, cap. 3, n. 10, contendit nullam esse causam cur eis non pareatur.

Communiter tamen apud nos, ex usu recepto et ex missalium nostrorum rubricis, missæ privatæ celebrantur feria V in cœna Domini, nunquam feria VI in Parasceve; et in pluribus diœcesibus, v. g. in Cenomanensi et Parisiensi, permittuntur, sed non suadentur, in sabbato sancto.

Ubi autem feria V in cœna Domini missæ privatæ non celebrantur, omnes sacerdotes missæ majori assistunt et de manu celebrantis sacram suscipiunt communionem, in memoriam institutionis sanctissimi hujus sacramenti, et hoc ritui Romano consonum valde congruit, ac rectissime ab episcopis instituitur vel renovatur.

Alius non est dies in anno in quo celebrare non liceat.

5<sup>o</sup> Juxta veterem disciplinam, usque nunc per orbem catholicum vigentem, singuli sacerdotes tres celebrare possunt missas in festo Nativitatis Domini. Mos ille ad Telesphorum papam, versus medium secundi sæculi existentem, juxta plures, ascendit, quod alii judicant improbabile : quidquid sit, certum est illum exstitisse tempore S. Gregorii, qui, lib. 1, Homil. 8 in Evang. aiebat : « Quia, largiente Domino, missarum solemnities ter hodie » celebraturi sumus, loqui diu de Evangelica lectione » non possumus. »

Celebrari solebant una in media nocte, altera ad auroram, et tertia in die; sic in missalibus inscribuntur, et ita celebrari debent in cathedralibus, collegiatis et

parochialibus ecclesiis, ut populus eis alternatim assistere possit.

- 6º Olim plures missas aliis diebus celebrare licebat, sic S. Albertus, monachus, factus presbyter, duas in die celebrabat missas, unam pro vivis et alteram pro defunctis. Leo III, summus pontifex in fine octavi sæculi, septem in eodem die, et aliquando novem celebrare consueverat missas; *Fleury*, l. 46, n. 20, et Bened. XIV, l. 3, cap. 4, n. 12. Concilium Selingstadense, prope Moguntinum, anno 1022, can. 6, prohibuit ne sacerdos plus quam tres celebraret missas in eodem die. Alexander II, in Decreto, 3 part. dist. 1, can. 53 relatus, declaravit sufficere sacerdoti unam missam una die celebrare. Innocentius III, Decretal. l. 3, tit. 41, cap. 3, consulenti respondet : « Quod, excepto die Nativitatis » dominicæ, nisi causa necessitatis suadeat, sufficit sacerdoti semel in die unam missam solummodo celebrare. »

Bened. XIV plures refert casus in quibus, causa necessitatis, duas in eodem die missas celebrare liceret, v. g. si, missa jam dicta, sepeliendus esset defunctus, si deesset sacramentum ad viaticum, si benedicendæ essent nuptiæ, etc. sed hæc apud nos non usitantur. Vide Constit. Bened. XIV, *Declarasti*; Bullar. t. 2.

7º Parochi qui duas simul habent parochias, si populus in alterutram convenire non possit, et alius desit sacerdos qui missam celebret, duas missas singulis dominicis et festivis diebus celebrare potest, ex licentia episcopi, juxta plurimos, vel ex jure communi, ut alii multi dicunt. Omnes fatentur rem fieri non posse inscio episcopo, qui perspiciet an necessitas sic agendi revera existat.

Episcopus autem duplici hujusmodi celebrationi consentire non potest, ex pluribus conciliis provincialibus et ex resolutione Congr. Episc. et Regul. a Bened. XIV, l. 3, cap. 5, n. 4, citata, nisi sub sequentibus conditionibus : 1º ut ipsius judicio vera existat necessitas, locorum natura, vel sacerdotum paucitate, vel infidelium

persecutione fundata; 2° ut in prima missa, post summptionem corporis et sanguinis Domini ablutiones non sumantur, sed post secundam missam sumendæ reserventur; 3° ad breve tempus et personæ tantum alicujus sacerdotis concedatur, non vero tanquam privilegium alicui parochiæ adnectatur; 4° pro solis diebus dominicis et festivis tribuatur; 5° in diversis tantum ecclesiis duæ missæ celebrentur.

Qui tali potiuntur facultate, officium diei veneris in Parasceve bis celebrare non possunt, quia post missam præsanctificationum jam non sunt jejuni.

8° Bened. XIV testatur nullum in Ecclesia Orientali reperiri monumentum quo appareat sacerdotem uno eodemque die plures missas celebrasse; imo in ea ecclesia prohiberi ne quis sacerdos eodem die missam celebret ad altare in quo alius celebravit, nisi gravis necessitas aliter fieri postulet. Sed plura esse possunt altaria in eadem ecclesia, vel plures sacerdotes in eodem altari simul celebrare possunt.

9° Ex veteri consuetudine, quilibet sacerdos sæcularis binas, et regularis ternas missas celebrare solebant, in die Commemorationis fidelium defunctorum, per totum Aragoniæ regnum; ad preces Ferdinandi VI et Joannis V, Hispaniarum et Portugaliæ regum, Bened. XIV, ut ipse narrat, l. 3, cap. 4, n. 11, omnibus presbyteris, tam sæcularibus quam regularibus, in utriusque regis dominiis existentibus, concessit facultatem, ante se pluries negatam, ut, die Commemorationis omnium fidelium defunctorum, tres missas celebrare possent, etiam duabus horis post meridiem, ea conditione ut omnibus fidelibus defunctis, sine quacumque eleemosyna, applicarentur.

## ARTICULUS TERTIUS.

### DE OBLIGATIONE APPLICANDI FRUCTUM MISSÆ.

1° Omnes qui curam habent animarum tenentur jure divino missam, saltem aliquando, pro ovibus suis offerre,



ut docet concil. Trid. sess. 23, cap. 1, de Refor. « Cum » præcepto divino mandatum sit omnibus quibus animarum cura commissa est, oves suas agnoscere, pro his » sacrificium offerre, etc. » Non dicit ante eos celebrare, ut sacro assistant, sed pro eis offerre, id est, fructum sacrificii eis applicare. Cum autem non exprimat quoties hæc applicatio fieri debeat, sacra ejusdem concilii Congr. definit, per decretum 10 maii 1681, ab Innocentio XII die 24 aprilis 1699 approbatum, eos qui pingues habent redditus, singulis diebus, et qui tenues, saltem diebus festivis missam pro ovibus applicare teneri.

2º Verum Bened. XIV, ut difficultatibus ex distinctione inter pingues et tenues redditus nascentibus occurreret, per Constit. *Cum semper*, diei 19 augusti 1744, Bullar. t. 1, statuit : 1º omnes curam animarum habentes, quo nomine intelliguntur parochi et vicarii, sive perpetui, sive ad tempus, missam pro populo sibi commisso applicare teneri singulis diebus dominicis et festivis, in quibus missa ex præcepto audienda est, etiamsi congruentes non haberent redditus; 2º parochos pauperes dispensationem ab ordinario obtinere posse, ut missam aliis diebus, infra hebdomadam, pro populo applicent; 3º patriarchales, metropolitanas, cathedrales et collegiatas ecclesias missam conventualem quotidie pro benefactoribus in genere applicare teneri, et per missam pro aliquo benefactore, vel pro benefactoribus in genere oblatam, sed impositam, obligationi missæ conventualis non satisfieri; 4º canonicum parochum, vel alias onere missarum gravatum, si missam conventualem celebret, eam pro benefactoribus applicare teneri, et per alium supplere missas quibus specialiter manet adstrictus.

3º Eadem obligatione tenentur papa respectu totius Ecclesiæ, et episcopi respectu suæ diocesis; curam enim in eminentiori gradu habent animarum: frequentius missam pro populo offerre non videntur teneri, propter Constitutionis Bened. XIV auctoritatem, quamvis plures docuerint eos ad quotidianam applicationem teneri. Sic Ferraris, vº Missæ sacrif. art. 3, n. 13; Ligorio, l. 6, n. 327, etc.

4° Prælati et superiores monasteriorum regularium quotidie, sicut canonici, missam conventualem pro fratribus sibi subditis, et simul pro benefactoribus in genere, celebrare debent. Habent enim curam animarum, et, sub hoc respectu, vi Constitutionis Bened. XIV, ad applicationem in diebus dominicis et festivis reducuntur: sub alio respectu, capitulis et collegiatis assimilari debent. Itaque missa conventualis quotidie videtur applicanda benefactoribus in genere, nisi, ob nimiam paupertatem, obtenta fuerit dispensatio a Congr. concil. juxta quod dicit Bened. XIV, Const. citata, n. 19.

Nullibi inveniri potuit capella nos monialium, confraternitatum, sæcularium congregationum, militum, collegiorum et seminariorum præpositos missam diebus dominicis et festivis applicare teneri. De facto illam apud nos non applicant, nisi id speciali conventionem fuerit sancitum, et recte judicatur eos ad talem applicationem non teneri.

5° *Sequitur, ex dictis*, 1° episcopos, parochos aliosque curam animarum habentes, teneri ex justitia supplere missas diebus dominicis et festivis correspondentes, quæ, a tempore suæ institutionis vel commissionis, omissæ fuissent, quacumque ex causa; 2° tenuitatem reddituum ab illa obligatione non liberare, nec totam reddituum suppressionem, dum titulus cui annexa est cura animarum, retinetur: unde Pius VI, hac de re consultus a sacerdotibus Gallicanis in Hispania exsulibus, respondit eos ad applicationem missæ diebus dominicis et festivis adhuc teneri; sed facultate dispensandi utens onus illud ad aliquot missas reduxit; 3° ipsam parochialem missam, cui scilicet convocantur parochiani, applicandam esse, et non aliam, sine dispensatione episcopi ob gravem causam concessa: qui ergo alium pro se substituit sacerdotem, curare debet ut missa pro subditis offeratur; et qui talem accipit delegationem, eo ipso censetur promittere se applicaturum missam parochianis, etc. 4° vicarium qui, ex commissione episcopi, moriente paroco, directioni parochiæ ad tempus præponitur, jura parochialia percipere, sed missam parochianis applicare teneri; 5° eum qui ecclesiæ annexæ vel capellæ vicariali deser-

vit, et cuncta parochi munia respectu fidelium sibi commissorum implet, eo ipso missam parochialem applicare debere : non item eum qui affixus est capellæ vulgo dictæ, *auxiliaire*, in qua nonnullas tantum functiones sacras dependenter a paracho exercere potest, nisi aliter expresse fuerit conventum; 6º eos qui duas habent parochias, et duas missas singulis diebus dominicis et festivis celebrant, utramque pro respectivis parochianis offerre teneri : non vero illos qui, ut in diœcesi nostra, vacanti parochiæ vicinæ invigilare, et quosdam actus, nempe bannorum publicationes, matrimonia et sepulturas, exercere jubentur; cura enim illius parochiæ, stricte loquendo, ipsis non committitur.

6º Parochi et vicarij ecclesiis præpositi tres missas in die Nativitatis Domini ad utilitatem populi celebrare probabilius tenentur : id docet Bened. XIV, l. 3, cap. 9 in fine; sed definire non audet an tres missas vel unam tantum applicare teneantur; idem movet et non solvit dubium de obligatione clericorum in cathedralibus et collegiatis, non solum pro festo Nativitatis, sed pro aliis diebus in quibus, ex rubricis, plures celebrandæ sunt missæ.

7º Ligorio, l. 6, n. 327, cum pluribus aliis doctoribus, quos se consuluisse affirmat, docet parochos et episcopos infirmos, vel aliter a celebratione impeditos, obligationem habere missam diebus dominicis et festivis per alium pro populo offerendi; quia onus illud non est tantum personale, sed reale, ut onus prædicandi, vel administrandi sacramenta, ac consequenter per alium impleri potest. Ergo. Hinc parochus, cui datur vicarius propter infirmitates, retributiones consuetas pro missis parochialibus solvere debet, seclusa speciali alia conventionem.

## ARTICULUS QUARTUS.

DE STIPENDIO ET OBLIGATIONIBUS EX ILLO NASCENTIBUS.

Dicemus 1º de ejus origine et legitimitate; 2º de ejus

quantitate et ad alios transmissione; 3° de modo satisfaciendi pro illo; 4° de missis fundatis et earum reductione.

§ I. — De origine et legitimitate stipendii pro missa.

1° Sicut in veteri Lege magna pars hostiarum cedebat in usum sacerdotum et levitarum, sic in primis Ecclesiæ sæculis mos fuit ut quotquot ad missarum solemnia convenirent, suam sacrificii partem, id est, panem et vinum consecrandum, offerrent: subdiaconi oblationes fidelium colligebant vel suscipiebant, et tantum de illis super altare ponebant quantum populo communicaturo sufficere posset; et quoniam unusquisque, pro sua facultate, plures sæpe offerebat panes, cum larga vini amphora, ut ait Bened. XIV, l. 3, cap. 21, exigua pars consecrabatur, et reliqua massa sacerdotibus ac clericis cedebat.

Qui non offerebant, graviter increpabantur. « Locuples et dives es, et dominicum te celebrare credis, quæ in dominicum sine sacrificio venis, quæ partem de sacrificio, quod pauper obtulit, sumis: » sunt verba S. Cyp. feminam divitem alloquentis, lib. de Opere et Eleem. Sic omnes fideles aliquo sensu recte dicebantur sacerdotes; quia panem et vinum offerentes, ad sacrificium altaris concurrebant.

2° Canon 3 Apostolorum prohibuerat ne aliud, præter panem et vinum, ad altare offerretur: excepta tamen fuerunt novæ spicæ, uvæ, oleum ad luminaria et thymiana. Cæteri fructus, quos fideles offerre volebant, mittebantur ad episcopum et presbyteros, per quos diaconis et aliis clericis distribuebantur.

In die Paschatis, suscipere licebat mel et lac, de quibus sacro fonte egressis aliquid dandi mos erat.

3° Postea statutum fuit ut ad offertorium missæ nihil, præter panem et vinum, offerretur, et soli jus communionis habentes ad oblationem præstandam admitterentur, videlicet clerici, laici, viri ac mulieres, principes et plebei; non vero excommunicati, catechumeni, energumeni, pœnitentes et alii quibus sacra communio denega-



batur. Ea autem quæ clericorum usibus destinabantur, ante missam vel saltem ante evangelium aut immediate post evangelium erant offerenda : vide P. Martène, de Antiquis Eccl. rit. l. 1, cap. 4, art. 6, modum suscipiendi oblationes describentem; et Card. Bonam, Rerum Liturg. l. 2, cap. 9.

4° An in primis sæculis, pecunia, sicut res aliæ, ad altare oblata fuerit non constat. Bened. XIV dicit hoc nobis ignotum esse, sed ab ipsis Ecclesiæ incunabilis in singulis Christianorum ecclesiis expositam fuisse arcam, quam Baronius, ad an. 44, n. 69, gazophylacium appellat, in quam pecuniæ a fidelibus inferebantur. Illius arcæ meminerunt Tertul. Apol. cap. 39; S. Just. Apol. 1, n. 67; S. Aug. S. Paulinus, etc.

5° Duodecimo sæculo, teste Honorio Augustodunensi, in Gemma animæ, de antiquo Ritu missæ, l. 1, cap. 66, Bibl. Patr. t. 20, vetus jam existebat consuetudo, *ut populus, pro oblatione farinæ, denarios offerret*. Antea sacerdotes e singulis domibus vel familiis accipiebant farinam, ex qua fiebat panis consecrandus. Ignoramus autem quo præcise tempore hæc consuetudo incœperit. Chrodogangus, episcopus Metensis, in medio octavi sæculi canonicorum institutor, in sua regula, cap. 32, unicuique canonico sacerdoti permittit ut eleemosynam pro missa oblatam accipiat, et exinde quod voluerit faciat; in undecimo sæculo Joannes, auctor vitæ S. Petri Damiani, narrat, cap. 2, eum adhuc puerulum, cum invenisset nummum, et mente revolveret quid eo mercari posset, divinitus inspiratum dixisse : « Melius est ut tradam presbytero, qui Deo sacrificium offerat pro patre meo defuncto. »

6° Quamdiu voluntariæ populi oblationes sufficientes fuerunt et ad sacrificium, et ad honestam clericorum sustentationem, missæ omnibus in communi applicatæ fuerunt, nisi ageretur de mortuis Deo commendandis, ut patet exemplo matris S. Aug.

Sed pietate fidelium decrescente, raræ fuerunt communionones, et adeo exiguæ factæ sunt oblationes, ut nec cle-

ricorum sustentationi, nec sæpe ipsi sacrificio sufficerent: hinc nata est consuetudo primo tolerata, deinde positive approbata, ut fideles missam pro seipsis, vel pro alia persona vivente aut mortua a se designata, peculiariter offerri postularent, aliqua eleemosyna ante vel post missam præstita.

7° Hæc autem eleemosyna, quæ vulgo dicitur stipendium vel honorarium missæ, recta intentione dari et accipi debet : si haberetur quippe ut divini sacrificii pretium, grande foret simoniæ scelus, in eo præcise consistens, quod res spiritualis re temporali æstimetur. Solo igitur sustentationis titulo dari et accipi potest. Unde S. Th. 2 2, q. 100, art. 2, ad 2<sup>um</sup>, ait : « Sacerdos non accipit pecuniam quasi pretium consecrationis Eucharistiæ, aut missæ decantandæ, hoc enim esset simoniæ cum ; sed quasi stipendium suæ sustentationis. »

8° Negari non potest stipendium sic spectatum esse licitum. Nam 1° Christus dixit, apud Matth. x, 10 : *Dignus est operarius cibo suo* ; et B. Paulus, I Cor. ix, 13 : *Qui altari deserviunt, cum altari participant*. Unde concluditur, sacerdotem ex altari vivere posse, id est, habere jus ut fideles, occasione sacri ministerii, ea præstent quæ ad ejus sustentationem necessaria sunt. 2° Totius Ecclesiæ praxis erronea esse non potest : at in tota Ecclesia, saltem a duodecimo sæculo, dantur et accipiuntur stipendia pro missis. Ergo.

Cum Ecclesia inter sacerdotes divites et pauperes non distinguat, omnes stipendia consueta accipere possunt, quia omnes æquale jus habent ex altari vivendi. Stipendia pro aliis sacramentis similiter accipere liceret, si Ecclesia permitteret : secus, simonia esset.

## § II. De quantitate stipendii et ejus ad alios transmissione.

1° Non dissimulandum est rem in se bonam, ex abusu mox factam esse scandalorum fomitem : multi namque sacerdotes, turpis lucri gratia ducti, eleemosynas pro missis colligere cœperunt, et modo plures missas eodem :

die celebrabant, modo tres aut quatuor incipiebant missas usque ad offertorium; deinde, unico facto offertorio, tres aut quatuor dicebant collectas, postea unum canonem, unam consecrationem, unam communionem, et tres aut quatuor communiones et postcommuniones; alii tot offerebant et consecrabant hostias quot acceperant eleemosynas, vel quot erant missæ promissæ; alii credebant se pro multis stipendiis per unicam missæ celebrationem satisfacere posse, quia pretium sacrificii est infinitum; alii denique de stipendiis promissis turpiter paciscebantur, sicut de vilissimæ rei pretio actum esset.

Ut gravissima hæc mala de medio tollerentur, concilium Toletanum, anno 1324 celebratum, strictissime prohibuit, cap. 6, ne ullus sacerdos quidquam vel minimum pro missa exigeret, sed eleemosyna sponte oblata contentus esset. Malo adhuc perseverante, concilium Trid. sess. 22, decreto de Observ. et Evit. in celebratione missæ, injunxit episcopis ut illud omnino tollerent, addens: « Ut multa paucis comprehendantur, inprimis, »  
 • quod ad avaritiam pertinent, cujusvis generis merce-  
 • dum conditiones, pacta et quidquid pro missis novis  
 • celebrandis datur, necnon importunas atque illibe-  
 • rales eleemosynarum exactiones potius quam postu-  
 • lationes, aliaque hujusmodi quæ a simoniaca labe vel  
 • certe a turpi quæstu non longe absunt, omnino prohi-  
 • beant. »

2° Episcopi autem scandala hujus generis auferre non potuerunt in radice, nisi taxando in sua respectiva diœcesi stipendium ultra quod nemo quidquam exigere posset. Wilhelmus, archiepiscopus Eboracensis, hujusmodi taxam ante concilium Trident. jam præfixerat; post concilium Trid. omnes episcopi similiter egerunt, et nunc nulla est diœcesis in qua specialis non existat index eleemosynarum pro functionibus sacris, et maxime pro missis celebrandis solvendarum.

3° Quantitas taxationis omnino relinquitur arbitrio episcopi, qui eam, vel in synodo, vel extra synodum,

juxta prudentiam suam, determinat, habita ratione circumstantiarum loci, temporis, antiquarum consuetudinum etc.

Illā taxatio vim non habet in foro civili apud nos, nisi approbatione regia muniatur.

4° Nullus sacerdos, sive sæcularis, sive regularis, aliquid supra taxationem, sub quocumque prætextu, exigere potest, et exigendo, non solum contra mandatum Ecclesiæ, sed contra justitiam peccaret, et ad restitutionem obligaretur: hoc quippe augmentum evidenter absque titulo proprietatis transmissivo possideret.

5° Non prohibentur tamen regulares aut sæculares uberiores stipem a sponte offerentibus accipere, modo absit dolus et quodcumque pactum etiam implicitum. Sic Suarez, Card. de Lugo, Bened. XIV, l. 3, cap. 21, n. 13, et ita censuit S. Cong. concil. die 6 januarii 1649.

6° At qui pinguiorem accepit stipem pro una missa celebranda, eam alteri celebrandam minori stipendio committere non potest, sed totam eleemosynam acceptam tradere debet: sic ab Urbano VIII statutum fuerat, et Alexander VII, die 25 septembris 1665, hanc damnavit propositionem: « Post decretum Urbani VIII, potest » sacerdos cui missæ celebrandæ traduntur, per alium » satisfacere, collato illi minore stipendio, alia parte » stipendii sibi retenta. » In ea damnatione comprehenditur non videtur sacerdos qui, pingua habens stipendia, a parrocho, v. g. rogatus, missam parochialem parochianis applicat, ea conditione ut parochus unam e missis a se promissis dicat.

7° Quilibet sacerdos potest aut nullum aut minus stipendium pro missa a se postulata exigere, quia juri suo cedere potest: at se præbere non posset tanquam minori stipendio celebrans, ut numerosiora obtineret stipendia; tunc enim quædam videretur fieri mereatura divino sacrificio prorsus indigna. Unde Congr. concil. die 16 julii 1689, respondit talem praxim ab episcopo sub aliqua pœna imponenda prohiberi posse.

8° Urbanus VIII decrevit nihil de consuetis eleemo-



synis detrahendum esse in commodum ecclesiæ sacra indumenta et utensilia sacerdoti subministrantis; sed tantum ex missis fundatis in ea ecclesia celebrandis.

9° Quoniam plurimi sacerdotes, avaritia ducti, alias invenerant vias stipendia multiplicandi et missas promissas imminuendi, Urbanus VIII, Innocentius X, Congr. concil. et Alexander VII statuerunt: 1° eum qui stipendia pro missis accepisset, licet stipendiis in diœcesi taxatis inferiora, tot missas celebrare teneri; 2° item qui plura exigua stipendia a diversis personis concessisset; 3° qui majus percepisset, totum tradere teneri sacerdoti quem sibi vult substituere; 4° duplex stipendium accipi non posse, unum pro fructu satisfactorio, et alterum pro fructu impetratorio ejusdem sacrificii; 5° duplex accipi non posse stipendium, unum pro applicatione fructus specialis, et alterum pro applicatione fructus specialissimi ad celebrantem pertinentis; 6° pluribus missarum intentionibus promissis per unicam celebrationem satisfieri non posse.

10° An sacerdoti ad celebrandum unice addicto duplex stipendium percipere liceat, unum pro celebratione, et alterum pro applicatione? Bened. XIV, l. 3, cap. 22, n. 6 et 7, quætionem perpendit nec dirimit. Duplex stipendium communiter apud nos sine scrupulis percipitur: v. g. sacerdos conducitur ad celebrandum die dominico vel festivo in ecclesia vel in sacello, retributio ipsi pro celebratione datur, et applicatio missæ relinquitur libera. Sic expresse Dens.

11° Ut omnes avaritiæ causæ vel suspensiones efficacius tollerentur, statuit S. Ignatius, societatis Jesu fundator, nulli e suis sacerdotibus licitum fore stipendium pro missæ sacrificio percipere.

*Notandum*, quemlibet sacerdotem, intuitu stipendii principaliter celebrantem, peccato simoniæ inquinari, Christum pro argento iterum tradere, et mortaliter peccare. Unde valde suspectus est ille qui non celebrat nisi stipendia habeat.

## § III. — De modo satisfaciendi pro stipendiis acceptis.

*De Intentione.*

1° Qui promisit se missam pro fine aliquo particulari applicaturum, sive stipendium acceperit, sive non, ad id tenetur ex justitia, quia verus adest contractus, et probabilius tenetur sub peccato mortali, ut volunt *Collet* et plures alii, dicentes omissionem unius missæ grave damnum spirituale inducere; contra *Billuart*, putantem hoc damnum in genere spiritualium non esse grave, cum levi stipendio redimi possit. Res saltem videtur dubia, et talis ommissio sedulo cavenda est.

2° Specialis divini sacrificii applicatio a sola voluntate celebrantis pendet; ipsius igitur intentio debet esse formaliter determinata: non sufficeret interpretativa, quam non habuit, sed habuisset si cogitasset; nec interminata, quia fructus sacrificii manere non potest suspensus; nec conditionata, nisi conditio sit impleta. Valeret vero applicatio a superiore graviter prohibita, quia actus voluntatis, etsi prohibitus et peccaminosus, est tamen validus.

3° Ad validam sacramentorum administrationem aut confectionem, virtualis saltem necessaria est intentio in ministro: ad validam vero sacrificii missæ applicationem, habitualis sufficit intentio, quæ scilicet habita est et non fuit retractata. Talis est sententia vulgatio, juxta *Bened. XIV*, l. 3, cap. 16, n. 8, addens: « Applicatio enim est quasi quædam donatio seu translatio fructus qui e missa percipiendus est; quæ donatio seu fructus translatio valida est, etsi multo tempore ante facta sit et multis actibus interrupta, dummodo revocata non fuerit. » Hinc valida est applicatio pridie facta, etsi ipso die celebrans de illa non cogitet, modo aliam non habuerit in mente.

4° In qua autem parte missæ facienda est applicatio ut sit valida, non conveniunt theologi. Quidam, arbitantes communionem ad essentiam sacrificii pertinere,

dicunt applicationem fructus valide fieri posse etiam post consecrationem; alii vero, longe communius docentes totam sacrificii essentiam in consecratione sitam esse, absolute requirunt ut applicatio fiat ante consecrationem. Audiamus Bened. XIV, ibid. n. 9, dicentem : « Verum » sacerdos, se ut omnibus expediat difficultatibus, in » præparatione ad missam, antequam sacris se vestibus » induat, ne omittat sacrificii fructum applicare. » Deinde consulit ut habeatur tractatus asceticus Cardinalis Bonæ, de sacrificio Missæ.

5° Docet etiam idem pontifex, « Ad arcendos scrupulos, primo debere sacerdotem fructum ei applicare pro » quo tenetur celebrare, vel beneficii, vel eleemosynæ, » vel promissionis, vel alicujus præcipuæ obligationis » ratione; deinde, sine illius præjudicio, fructum sacrificii applicare in charitate sibi conjunctis, seu quovis » nomine sibi commendatis, suam ipsius intentionem » Christi summi sacerdotis intentioni subjiciens. »

6° Quæstio est inter theologos an applicatio sacrificii poni possit in voluntate Dei, qui ejus fructum ut sibi libuerit applicet : alii affirmant, et alii negant. « Sed tutissima regula est, inquit iterum Bened. XIV, ut sacerdos, antequam ad altare accedat, eas personas determinet pro quibus intendit orare, ut illis missæ sacrificium » applicetur. »

7° Valde probabile est sacerdotes qui cum episcopo vel cum alio sacerdote concelebrant, ut in die ordinationis, feria V in cœna Domini, in die consecrationis episcopi, et frequenter apud Græcos, eleemosynas pro hujusmodi missis diversis personis applicandis accipere posse; unusquisque enim vere celebrat. Ita Bened. XIV, post Card. de Lugo, Suarez et alios. Semper tamen recentior ordinatis consulimus ut intentioni episcopi se conforment et pro sua perseverantia maxime orent.

8° Plures, sine stipendio celebrare nolentes, sibi persuaserant se, quando stipendium deerat, pro illo qui primus stipendia conferret, valide missam celebrare posse : sacra Congr. concil. ex mandato Clementis VIII, rem

examinavit, et singularem hanc opinionem proscripsit per Decretum diei 15 nov. 1605, quod Paulus V approbavit. Hinc si parochus missam anticipate dicat juxta præsumptam intentionem sacerdotis missam parochialem pro se celebraturi, invalide eam applicat, nisi dictus sacerdos suam intentionem de facto prius determinaverit.

Qui tamen prævideret missas pro tali defuncto postulandas fore, eas ante postulationem valide applicaret, et stipendium percipere posset, quia persona vere est determinata. Ligorio, l. 6, n. 337.

9° Ad validam applicationem non necesse est ut intentio exterius prodeat, voce aut scripto, aliove signo, modo interius formaliter sit determinata, quod variis modis recte fieri potest, v. g. dicendo intra se : Volo celebrare pro tali persona, vel pro ea quæ tale stipendium mihi dedit, vel pro ea quæ prima, secunda, tertia, etc. missam a me postulavit, vel pro ea quæ a me primum promissa fuisset, vel pro eo in purgatorio existente et magis derelicto aut magis mihi conjuncto, aut qui se orationibus meis magis se commendavit, etc.

10° Si fructus specialis missæ applicetur incapaci, docent theologi illum in thesauro ecclesiæ remanere, vel sacerdoti aut illis pro quibus specialiter tenetur offerre cedere, quia celebrans talem censetur habere intentionem implicitam. Sic Layman, de Lugo, Ligorio, etc. Quidquid sit, consultum est in missis gratuitis eas secundario applicare vel nobis vel aliis personis, ex hypothesi quod persona principalis sit incapax : in missis ex stipendio debitis, præsumendum est stipendium offerentem velle ut fructus sacrificii, defectu personæ a se commendatæ, in beneficium propinquorum suorum vergat : non-nisi ergo post hanc præsumptam intentionem, alias secundarias intentiones habere possumus. Ita Ligorio, l. 6, n. 336.

11° Qui decem accepisset stipendia pro missis decem personis diversis applicandis, earum nomina et ordinem ignorans, non satisfaceret singula sacrificia pro singulis indeterminate applicando, quia nullus esset finis reipsa



determinatus; sed unamquamque missam omnibus simul applicando satisfaceret, quia, cum, nemine dubitante, fructus sacrificii sit divisibilis, unusquisque decimam partem in singulis sacrificiis accipiendo, quod sibi debetur obtineret.

*De altari privilegiato.*

1° Altare privilegiatum illud est cui plenaria annexa est indulgentia, his applicanda defunctis pro quibus missa celebratur, vel quotidie, vel quibusdam diebus in singulis hebdomadis. Aliquando privilegium istud inhæret personæ sacerdotis, qui ubicumque celebret, indulgentiam privilegii applicare potest.

Antiqua citantur exempla hujusmodi privilegiorum, et unum tribuitur Paschali I, anno 817.

2° Ex consueta forma Brevium apostolicorum, privilegium altaris concedentium, indulgentia ab applicatione missæ separari non potest. Unde missa principaliter offerri non potest pro vivente, aut pro alio mortuo, ab eo cui applicanda est indulgentia diverso.

3° Supponitur etiam missam debere esse defunctorum seu *de requiem*, et S. Congr. Rituum sic definiisse perhibetur: sed Alexander VII, anno 1667, Clemens IX, anno 1669, et Innocentius XI, anno 1688, ab ea regula exceperunt festa duplicia, dies dominicas, dies intra octavas Paschatis, Ascensionis, Pentecostes, Corporis Domini, et generatim dies in quibus rubrica colorem nigrum non permittit.

• Cum in multis diœcesibus speciales existant rubricæ, quæsitum est an ad validitatem privilegii missa celebranda esset juxta rubricam Romanam, vel juxta rubricam propriæ diœcesis, et theologi Romani ad nos responderunt, anno 1828, sequendam esse rubricam propriæ diœcesis.

4° Si privilegium, sive reale, sive personale, non sit quotidianum, sed, ut frequenter, pro tribus diebus in singulis hebdomadis, videtur quod sacerdos, aliunde non

impeditus, eligere debeat dies in quibus missam *de requiem* dicere possit; siquidem per quamdam dispensationem tantum indulgentia privilegii cum missa diei applicari potest.

5° Quando dicitur missa diei, non necesse est ut inse-ratur oratio pro defuncto cui applicanda est indulgentia; nullibi enim eam inveni præscriptam, et mihi responsum est Romæ eam non requiri.

6° Si sanctissimum Sacramentum in altari privilegiato exponeretur, cum, ex rubricis, missæ *de requiem* ante illud dici nequeant, quælibet aliæ missæ, sive diei, sive votivæ, ad applicationem indulgentiæ sufficerent, ut expresse decrevit Congr. Rituum, die 21 julii 1751.

7° Qui in suo breviario habet officium duplex, et celebraturus est in ecclesia ubi fit officium semiduplex vel infra, dicere debet missam *de requiem*, si privilegio altaris uti velit, quia nullum est impedimentum; missa enim secundum ritum ecclesiæ in qua celebratur dici potest, et etiam dicenda est si sit publica.

7° Ex decreto Congr. Indulg. a Clemente XIII, die 19 maii 1761 approbato, quilibet sacerdos, sive regularis, sive sæcularis, gaudet privilegio personali pro die commemorationis omnium fidelium defunctorum.

9° Majus exigere aut petere non licet stipendium ob indulgentiam altaris privilegiati applicandam: tunc enim quoddam esset mercimonium rei sacræ, ac proinde grave simoniæ piaculum.

10° Nihilominus stricta existit obligatio tot celebrandi missas ad altare privilegiatum quot fuerunt promissæ, et quisquis aliter ageret, contra justitiam peccaret. Unde qui, ex culpa vel sine culpa, plures accepisset missas ad altare privilegiatum celebrandas quam celebrare potest, tenetur curare eas ad aliud altare certo privilegiatum celebrandas, vel obtinere a summo Pontifice privilegium personale his missis correspondens.

11° Confessio sacramentalis et aliqua oratio, secundum intentiones summi Pontificis, ad lucrandas indulgentias plenarias ordinariæ requisitæ, pro applicatione indulgen-

tiæ altaris privilegiati non præcipiuntur. Nec status gratiæ in ministro ad validitatem indulgentiæ necessarius est, quia indulgentia in eo non suscipitur, nec a dispositionibus ejus pendet, sed ipsi sacrificio missæ annexa est.

12° *Notandum*, brevia altaris privilegiati ordinarie ad septennium a die expeditionis numerandum concedi, et ideo cavendum ne tempus ultra limitem concessionis protrahatur.

Quædam alia minus necessaria circa altare privilegiatum videri possunt in nostro tractatu Gallico, *des Indulgences*.

### *De qualitate missarum.*

1° *Generatim loquendo*, eæ celebrandæ sunt missæ quæ fuerunt promissæ, id est, *de requiem*, de Spiritu sancto, de B. Virgine Maria, de aliquo sancto, etc. sunt enim fideles qui majorem habent devotionem pro tali quam pro tali missa, eam quæ sibi magis arridet licite postulare possunt: ergo qui precibus eorum acquiescit, promissum tenere debet.

Dixi *generatim loquendo*; quia si missa postulata fuerit pro die in qua rubrica missas votivas non permittit, per missam diei in honorem sancti, aut sanctæ, aut mysterii, aut pro defunctis oblatam, satisfiet petitioni.

2° Qui tamen missam *de requiem*, vel aliam votivam promisit, et missam diei celebrat, graviter non peccat; imo nullum est peccatum si id ob aliquam rationabilem causam fiat, quia grave non videtur inferri nocumentum, cum substantia sacrificii semper sit eadem. Ita plures apud Ligorio, qui eos, l. 6, n. 328, probat.

3° Qui missam promisit in tali ecclesia vel capella, pro tali die, ad tale altare, eam sic tenetur celebrare, saltem sub peccato veniali, quia verus existit contractus, et sub peccato mortali, si rationabilis non existat causa promissionem non servandi, et contrahens ex illa infractione graviter sit offensus.

4° Si postuletur missa hora intempestiva vel in loco remoto celebranda, majus exigere licet stipendium arbi-

trio episcopi taxandum, si jam consuetudine non sit determinatum, quia incommoda horæ, temporis vel itineris sunt onera pretio æstimabilia. Ita *Collet*.

Sic episcopi majora statuerunt stipendia pro missis in quibusdam locis piarum peregrinationum celebrandis, vel pro missa et assistentia officio defunctorum in vicinis parochiis.

5° *Petitur* an presbyteri recenter ordinati tres missas ab episcopo sibi impositas, *unam de Spiritu sancto, aliam de B. Virgine et tertiam pro defunctis*, sub peccato dicere teneantur, qua intentione, quo tempore et quales missas? Suarez, Lessius, Layman et alii putant eas persolvendas esse sub mortali. At communius et probabilius docetur, 1° hanc obligationem non esse sub gravi, quia nullibi sic exprimitur; 2° intentionem illarum missarum non determinari ab episcopo, qui tantummodo dicit, *et etiam Deum pro me orate*: unde concluditur non esse obligationem eas applicandi juxta intentionem episcopi; 3° dicendas esse missas votivas de Spiritu sancto, nisi intra octavam Pentecostes celebranda sit; de B. Virgine, nisi festum ejus aut officium in sabbato occurrat, et *de requiem*; 4° has missas non prius dicendas esse quam occurrant dies non impediti, et interea alias celebrari posse missas rubricis præscriptas. Ligorio, l. 6, n. 829.

#### *De dilatione missarum.*

1° S. Congr. concil. decretis diei 21 junii 1625, ex auctoritate Urbani VIII latis et ab Innocentio XII confirmatis, declaravit sacerdotes eleemosynas manuales pro missis celebrandis accipere non posse, nisi infra modicum tempus omnibus sibi impositis oneribus satisfacere valeant. Hinc Ligorio, l. 6, n. 317, quærit. 2, aperte dicit sacerdotem qui missas ex accepto stipendio celebrandas diu differt, mortaliter peccare.

2° Quanta autem esse debeat dilatio ut censeatur longa, vel ut *modicum tempus* a congregatione assignatum excedatur, res a diversis pendet circumstantiis. 1° Si missa



pro aliqua urgente necessitate petatur, v. g. pro agonizante, pro muliere parturiente, pro terminanda lite hodie judicanda, etc. dilatio in crastinam diem mortalis esset, quia circumstantia temporis ad substantiam petitionis pertinet: imo, elapso tempore, restituendum est stipendium, et monenda persona quæ missam postulaverat quia intentio ejus non fuit impleta, nec jam impleri potest. Ita plures apud Ligorio. 2º Idem B. Ligorio docet, eum peccare sacerdotem qui, accepta eleemosyna ut tali die festo celebret, non ipso die, sed crastino celebrat: quod quidem mihi videtur certum, etsi peccatum non semper futurum sit mortale. 3º Si eleemosynam præstans, ab accipiente rogatus, in dilationem consentiat, nulla est difficultas; celebrationem missarum per totum tempus concessum differre licet.

3º Præcisus vero his casibus, quid intelligendum sit per modicum tempus, non sibi consentiunt auctores: plures tamen illud ad duos menses extendunt ad summum, et alii non rigidiores, ut Salmanticenses, Paludanus, Escobar, Sporer, Roncaglius et La Croix. apud Ligorio qui eis consentit, dilationem unius mensis, in missis pro defunctis, reputant gravem. Tutius est igitur consensum a præstantibus eleemosynam petere, ut missæ tempore magis opportuno celebrari vel aliis celebrandæ committi possint.

4º Ubi magna missarum quantitas eidem sacerdoti simul traditur, vel ubi stipendia offerens scit eum sacerdotem multis oneratum esse missis, aut missas sibi commissas aliis sacerdotibus stipendio carentibus distribuere, data occasione, consuevisse, tunc legitime præsumitur consensus in longiorem et rationabilem dilationem.

5º Si magna missarum quantitas tribuatur communitati in qua multi sunt sacerdotes, præsumendum est non tantam concedi dilationem; eleemosynam enim tribuens rationabiliter sperare potest fore ut missæ inter plures sacerdotes distribuendæ sint, non tamen inter omnes, nisi id expresse sibi promissum fuerit, quia judicare debet communitatem alia habere onera quibus satisfaciendum est.

## § IV. De missis fundatis et earum reductione.

1° Ultima testatoris voluntas, quoad pia onera, reputatur sacra; et qui, sine justa causa, ei non satisfacit, quoad locum, tempus, intentionem et qualitatem missæ, evidenter peccat, et quidem graviter, si ita sæpe faciat, etiamsi hæredes consentirent, inquiunt Sylvius, Navarrus, Azor, etc. quia neque sacerdos neque hæredes voluntati testatoris derogare possunt. Episcopi, justa de causa, a conditionibus apposis dispensare possunt, quia « Tan-  
» quam Sedis apostolicæ delegati, in casibus a jure con-  
» censis, omnium piarum dispositionum, tam in ultima  
» voluntate quam inter vivos, sunt executores: » sunt verba concilii Trid. sess. 22, cap. 8, de Refor. Arbitrantur in Gallia se hanc habere facultatem vi suæ dignitatis, et illa quotidie utuntur.

2° Plures a peccato mortali excusant eum qui, uno alterove die singulis mensibus, in alio loco quam a testatore determinato, celebrat, nisi in altari privilegiato celebrare teneretur; et nullo modo peccare, si ex necessitate sic agat, v. g. quia locus designatus fuit destructus, aut factus est indecens: sed in eo casu, quam primum recurrendum est ad episcopum, qui statuet quid faciendum erit, nisi res per se pateat et non sit duratura, ut si altare cui celebrandum est exsecretur, aut si tunc impediatur.

3° Rationes ob quas episcopi a conditionibus per testatorem apposis dispensare valeant, sunt utilitas ecclesiæ in qua celebrandæ sunt missæ, infirmitas capellani, ejus applicatio ad studium aut alia pretiosiora officia, nimia adeundi ecclesiam difficultas, et alia similia: quæritur quid rationabiliter voluisset defunctus in tali circumstantia, si eam prævidisset; et, cum suam voluntatem manifestare nequeat, episcopus eam interpretatur.

4° Sæpe contingit ut onera a fundatoribus imposita census annuos ab eis relictos excedant, sive quia illi census decursu temporum imminuti sunt, sive quia pars illorum periit. Concilium Trid. sess. 25, cap. 4, de Refor. dedit

facultatem « Episcopis, ut in synodo diœcesana, abbati-  
 » bus et generalibus ordinum, ut in suis capitulis gene-  
 » ralibus, re diligenter perspecta... possent statuere circa  
 » hæc quidquid magis ad Dei honorem et cultum atque  
 » ecclesiarum utilitatem viderent expedire. »

Verum S. Congr. concilii, per decretum diei 21 junii 1625, jussu Urbani VIII editum, et ab Innocentio XII, die 23 decembris 1697 confirmatum, districte prohibuit ne episcopi in synodo diœcesana, aut generales in capitulis generalibus, missarum onera post concilium Trid. imposita, aut in limine foundationis reducerent vel commutarent, sed pro his reducendis, moderandis aut commutandis, ad Sedem apostolicam recurrendum esse. Decretum igitur concilii Trid. de solis missis antea fundatis intelligendum est. In ipsomet tamen decreto Congregationis declaratum est, episcopos facultate missas recenter fundatas reducendi uti posse, si testator eam expresse ipsis concesserit.

5° Causæ vero ob quas Sedes apostolica missas reducere consuevit, sunt : paucitas sacerdotum, stipendii tenuitas, augmentum stipendii currentis, reddituum monasterii extenuatio, majores expensæ ad victum, necessitas communitatis vel ecclesiæ in qua est fundatio.

6° Si redditus in principio sufficientes, facti fuerint oneribus impares, Fagnani, Ligorio aliique Ultramontani opinantur non sublatam fuisse episcopis facultatem, quam de jure communi habent, missas moderandi vel commutandi. Nituntur Decretal. l. 3, tit. 25, cap. 3, et concil. Trid. sess. 25, cap. 8, de Refor. et dicunt, hanc suppressionem in præfato Congregationis decreto non contineri.

7° In Gallia autem semper viguit consuetudo ut episcopi, extra synodum diœcesanam et absque canonicorum assistentia, missas foundationis, sine ulla exceptione, pro arbitrio reducerent, moderarentur ac commutarent, ea ratione quæ magis expedire ipsis videretur ad Dei honorem et cultum, atque ecclesiarum utilitatem, « Ita tamen  
 » ut eorum semper defunctorum commemoratio fiat,

» qui, pro suarum animarum salute, legata ea ad pios  
 » usus reliquerunt; » concil. Trid. sess. 25, cap. 4, de  
 Refor. Idem *a fortiori* faciunt pro officiis, anniversariis  
 et quibuscumque precibus fundatis.

8° In foundationibus, sive creandis, sive reducendis,  
 aliqua reddituum portio, et ordinarie tertia pars circiter  
 assignatur fabricæ ecclesiæ quæ onus habere debet invigilandi ut redditus annui percipiantur, missæ celebrentur,  
 officia pia expleantur et titulus non pereat: hæc quippe  
 sunt onerosa et nulla ecclesia gratis ea ferre teneri potest.  
 Unde si casu, calamitatibus temporum, aliove modo  
 justo vel injusto, census pereat, obligatio ei annexa ex-  
 stinguitur: secus, semper remanet, nec adversus illam  
 censu remanente, præscribi potest, ut probat Ligorio,  
 l. 6, n. 325, contra non paucos.

## CAPUT SEPTIMUM.

### DE CONDITIONIBUS AD LEGITIME CELEBRANDUM REQUISITIS.

Multa in eo capite dici possent: præcipua et in praxi  
 frequentiora colligentes, dicemus 1° de diversis litur-  
 giis; 2° de singulis liturgiæ nostræ partibus; 3° de variis  
 missarum speciebus; 4° de loco ubi missa celebranda  
 sit; 5° de altari et ejus ornamentis; 6° de vestibis sacris;  
 7° de vasis sacris; 8° de rubricis servandis; 9° de defec-  
 tibus in missa occurrentibus; 10° de hora qua celebrari  
 liceat; 11° de præparatione et gratiarum actione cele-  
 brantis; 12° de interruptione missæ.

## ARTICULUS PRIMUS.

### DE DIVERSIS LITURGIIS.

1° Liturgiæ nomine, intelligitur ordo lectionum, pre-  
 cum et cæremoniarum quæ in offerendo missæ sacrificio



adhiberi solent : tot igitur sunt liturgiæ diversæ quot existunt hujusmodi ordines in celebrando missæ sacrificio usitati.

2° Christus divinum illud sacrificium instituens, partes ejus essentielles determinavit, nempe panem, vinum aquæ mixtum, oblationem, orationem, consecrationem, sump-tionem, et assistantibus communicare volentibus distributionem; hæc semper facienda esse jussit dicendo : *Hoc facite in meam commemorationem*. Cætera vero minus essentialia Apostolis eorumque successoribus reliquit determinanda, prout ipsis viderentur magis expedire. Hinc missa in omnibus ecclesiis catholicis eadem esse debet quoad partes essentielles a Christo determinatas, sed innumeris modis variari potest relative ad partes quæ dicuntur accidentales.

3° Valde probabile est, ut docet Card. Bona, Apostolos prima vice missam celebrasse solummodo post Pentecostem, quando, per effusionem Spiritus sancti, induti sunt virtute ex alto, et ideo legitur in Act. II, 42 : *Erant perseverantes in doctrina Apostolorum, et communicatione fractionis panis, et orationibus*.

4° Circumstantiæ orationum ac cæremoniarum quas adhibuerunt Apostoli, non reperiuntur descriptæ, nec in Actibus Apost. nec in aliis libris Novi Testamenti, nec in antiquioribus Patrum operibus. Imo P. *Le Brun* variis testimoniis ac rationibus probat, per quatuor priora Ecclesiæ sæcula, nullam exstitisse liturgiam scriptam, sed ritus in celebranda missa solitos memoria tantum fuisse retentos et transmissos, ne profanis innotescerent sanctissima mysteria et contemnerentur.

5° Apostoli per orbem dispersi alii alias addiderunt vel subtraxerunt orationes, lectiones et cæremonias; eorum successores eandem habebant facultatem idemque pluries fecerunt : inde variæ ortæ sunt liturgiæ, tum in Orientali, tum in Occidentali ecclesia, et in quinto sæculo cœperunt colligi et scribi, ut ex pluribus monumentis ostendit P. *Le Brun*, t. 3.

Tres præcipue numerantur in ecclesia Græca, quæ

tribuuntur, prima S. Jacobo, secunda S. Basilio, et tertia S. Chrysostomo; et quatuor in Ecclesia Latina, videlicet Romana, Ambrosiana, Gallicana et Hispanica, seu Mozarabica.

*Liturgia S. Jacobi.*

Protestantes generatim hanc volunt rejiciendam esse liturgiam tanquam apocrypham; multi catholici, inter quos Card. Bona, t. 1, contendunt eam ab ipso S. Jacobo fuisse scriptam, et ad ejus normam cæteras fuisse institutas; sic etiam eruditissimus Allatius, in speciali hac de re Dissertatione inter opuscula ejus relata. P. *Le Brun*, t. 4, demonstrat mediam tenendam esse viam; hanc quidem liturgiam revera esse B. Jacobi, qui eam instituit Jerusalem et ad successores suos transmisit; sed illam in quinto sæculo tantum scripto fuisse exaratam, et sancto Apostolo merito attributam, licet quædam in ea factæ fuerint mutationes: v. g. post concilium Nicæn. I, addita est vox *consubstantialis* nomini Filii Dei, et vox *Deiparæ* nomini B. Mariæ; post concil. Eph. quædam suppressæ vel additæ sunt orationes, quædam cæremoniæ commutatæ. Sed nihilominus eadem substantialiter remansit liturgia quæ fuit tempore S. Jacobi et cæterorum Apostolorum qui primum celebraverunt Jerusalem. Unde hæc liturgia recte judicatur prima, cæterarum norma, et merito vocatur Hierosolymitana simul et sancti Jacobi. Constans Græcorum et Syriorum traditio eam tribuit B. Jacobo; Patres concilii Constantin. III in Trullo, eam velut opus hujus Apostoli citaverunt, ut ex illa probarent adversus Armenos aquam cum vino miscendam esse in calice.

*Liturgia S. Basilii.*

Testatur ipse S. Basilius, in Epistola ad clerum Neocæsariensem, se præparasse orationes in celebranda missa recitandas, ad usum sui monasterii: cæteræ Orientis ecclesiæ eas laudaverunt, adoptarunt suisque consuetudinibus respectivis accommodarunt. Hinc perplures pro-

dierunt liturgiæ, non solum Græcæ, sed Syriacæ et Armenicæ, quæ, licet in pluribus a se discrepantes, nomine S. Basilii decoratæ sunt. Ea quam Constantinopolitani ritibus suis accommodarunt et sequuntur, proprie dicitur liturgia S. Basilii : est in usu apud Græcos nonnullis tantum diebus, nempe in dominicis Quadragesimæ, dempta dominica Palmarum, in feria V in cœna Domini, in sabbato Sancto, in vigiliis Nativitatis et Epiphaniæ Domini, et in festo S. Basilii ; P. Goar. Duplicem liturgiam S. doctor composuit, unam prolixiorem qua diutius Deo vacaret ; et alteram brevior, ne tædium populo ipsisque ministris sacris pareret, et quæ certe adhuc longa est, ut videri potest apud P. Goar, ubi refertur in extenso, græce et latine.

*Liturgia S. Chrysostomi.*

S. Joannes cognomento Chrysostomus, eadem ratione pulsus qua S. Basilus, liturgiæ in sua Ecclesia usitatæ, quæ dicebatur apostolica, manum admovens, eam concisiorem et pressiorem reddidit, ut imbecillitati humanæ magis esset accommodata. Ita B. Proclus, ejus discipulus et successor, in opusculo de Liturgia. Leo Allatius et Richardus Simon de authenticitate illius opusculi dubitant ; P. Le Brun contendit illud non esse B. Procli, et liturgiam Constantinopolitanam S. Joanni non fuisse attributam, nec cognomen Chrysostomi, in illa pluries inscriptum, ei impositum nisi 300 circiter post mortem ejus annis. Concilium in Trullo, anno 692 celebratum, hunc S. doctorem semper vocat Chrysostomum, et præbuit locum liturgiam Constantinopolitanam ei attribuendi, dicendo, adversus Armenos, illum Ecclesiæ tradidisse aquam vino miscendam esse, quando incruentum peragitur sacrificium.

Quidquid sit, hæc liturgia quam P. Goar refert integram in græco et in latino sermone, est antiquissima et communiter usitata, exceptis diebus supra memoratis, in quibus juxta liturgiam S. Basilii celebratur, et diebus

Quadragesimæ, in quibus missa præsanctificatorum dicitur, apud omnes Græcos schismaticos et catholicos, in tota Russia, in Bulgaria, in Georgia et Mingrelia, ubi tamen adhibetur lingua Sclavona vel Georgiana, etc.

*Liturgia Romana.*

Liturgia Romana, a B. Petro instituta, ab eodem et a successoribus aucta et emendata, atque per quatuor priora sæcula sola memoria fuit tradita. Sic generaliter auctores catholici qui hac de re scripserunt, ut Bona, Martène, Merati, Le Brun, etc. Innocentius I, Romanus pontifex, ad Decentium, Eugubinum episcopum, anno 416 scribens, ait ( *Constant* ) : « Quis nesciat aut non advertat id quod a principe Apostolorum Petro Romanæ ecclesiæ traditum est, ac nunc usque custoditur, ab omnibus debere servari; nec super induci aut introduci aliquid quod aut auctoritatem non habeat, aut aliunde accipere videatur exemplum: præsertim cum sit manifestum in omnem Italiam, Gallias, et Hispanias, et Africam atque Siciliam, nullum instituisse ecclesias, nisi eos quos venerabilis Apostolus Petrus aut ejus successores constituerint sacerdotes. » Hinc videtur, 1º tunc liturgiam nondum fuisse scriptam; 2º omnes Occidentis ecclesias ab ecclesia Romana ortum habuisse; 3º omnes in prima origine eandem in substantia habere debuisse liturgiam. S. Gelasius I, summus pontifex anno 492 electus, primus instituit Sacramentarium in quo vetus ecclesiæ Romanæ liturgia continebatur. Vigilius, anno 538 creatus papa, in Epistola ad Eutherium seu ad Profuturum, in Hispania episcopum, loquitur de canone scripto, ex apostolica traditione suscepto, qui eodem tenore semper dicitur, cum nonnullis tamen mutationibus in memoriam sanctæ solemnitatis, quemadmodum nunc fit in orationibus *Communicantes* et *Hanc igitur*.

S. Gregorius Magnus, multas orationes e Sacramentario Gelasii detrahens, quasdam addens et alium instituens ordinem, novum composuit Sacramentarium, in



quo Romana invenitur liturgia fere de verbo ad verbum, ut est hodie, quoad ordinarium missæ : sed ex hoc tempore multæ additæ sunt novæ missæ, aliæque mutationes non paucae factæ sunt.

*Liturgia Ambrosiana.*

Vicecomes, doctor Mediolanensis, in l. 2 de Ritibus missæ, anno 1620 edito, contendit ritus ecclesiæ Mediolanensis a S. Barnaba Apostolo fuisse institutos, a S. Miroleute auctos, a S. Ambrosio illustratos et inde nomine ejus decoratos. Walfridus Strabo, abbas, in nono sæculo scribens, ait, de Rebus eccles. cap. 22, Biblioth. Patr. t. 15, 2 part. : « Ambrosius, Mediolanensis episcopus, » tam missæ quam cæterorum dispositionem officiorum » suæ ecclesiæ et aliis Liguribus ordinavit. Quæ et usque » hodie in Mediolanensi tenentur ecclesia. » Huic gravissimi momenti testimonio suffragatur ecclesiæ Mediolanensis et totius Italiæ traditio, a qua sine evidenti ratione, inquit Card. Bona, l. 1, cap. 10, *recedendum non est.*

Quando Carolus Magnus et papa Adrianus I exigere voluerunt ut omnes ecclesiæ Occidentales ritum Romanum adoptarent, Mediolanenses fortiter obstiterunt : plures auctores referunt miracula in gratiam ritus sui patrata. Sive hæc prodigia sint vera, sive non, certum est neque Adrianum I, neque Nicolaum II, neque alios pontifices obtinere potuisse ut ritus Romanus Ambrosiano substitueretur, et etiam nunc missa Romana vel privatim dici non potest in cathedrali Mediolanensi, nisi in capella subterranea S. Caroli.

Attamen plurimæ diversis temporibus factæ sunt mutationes in ritu Ambrosiano, auctoritate archiepiscoporum, ut ex collatione variarum missalis editionum aperte videtur.

Ordo missæ, juxta hunc ritum, reperitur apud Martène, et apud P. Le Brun.

*Liturgia Gallicana.*

Liturgia Gallicana ea est quæ in Galliis, ante Pepinum et Carolum Magnum, erat usitata. Non erat una sub omni respectu, sed idem servabatur ordo precum, licet orationes essent diversæ : unde communius judicatur illam plures habuisse auctores, qui adhuc sunt ignoti. Probabile tamen videtur eam, maxima ex parte, tribuendam esse S. Hilario Pictaviensi, versus annum 367 mortuo.

Certum est hanc liturgiam a Romana fuisse diversam, et plurimæ sunt rationes judicandi eam ex liturgiis Orientalibus magna ex parte ortum habuisse per primos Galliarum episcopos, qui fere omnes, ut S. Pothinus, S. Irenæus, S. Trophimus, S. Saturninus, ab Oriente venerant, licet missionem suam, juxta veterem traditionem, a Romano pontifice obtinuissent.

Pepinus, deinde Carolus Magnus, tantam rituum diversitatem in celebratione sanctissimorum mysteriorum ægre ferentes, jusserunt ut Sacramentarium S. Gregorii ab ecclesia Romana acceptum, ritibus Gallicanis ubique substitueretur; et Carolus Calvus, in Epistola ad clerum Ravennatem, ait : « Usque ad tempora abavi nostri Pi-  
» pini, Gallicanæ ecclesiæ aliter quam Romana vel Me-  
» diolanensis ecclesia divina celebrabant officia, sicut  
» vidimus et audivimus ab eis qui ex partibus Toletanæ  
» ecclesiæ ad nos venientes, secundum morem illius ec-  
» clesiæ coram nobis sacra officia celebrarunt. Celebrata  
» sunt etiam coram nobis missarum officia more Hiero-  
» solymitano, auctore Jacobo Apostolo, et more Constan-  
» tinopolitano, auctore Basilio : sed nos sequendam dici-  
» mus Romanam ecclesiam in missarum celebratione. »

Ex eo tempore, antiqua liturgia Gallicana fuit derelicta et in Romanam mutata : in plerisque tamen ecclesiis retenti, vel, decursu temporis, adjecti sunt ritus unicusque peculiare, qui huc usque perseveraverunt, v. g. in ecclesia Lugdunensi, in Rhotomagensi, in Parisiensi, in Cenomanensi, etc. Sed in omnibus eadem est

ordinatio missæ, videlicet introitus, *Kyrie eleison*, *Gloria in excelsis*, collecta, epistola, evangelium, Symbolum certis diebus, offertorium, etc. idem canon ex Sacramentario S. Gregorii excerptus, etc. Ergo revera eadem est substantialiter liturgia, licet eadem non sint verba in cunctis partibus, nec eadem cæremoniæ.

Quatuor exstant missalia veterem liturgiam Gallicanam continentia; Card. Bona duo indicat; Card. Tommasi hæc duo cum alio tertio recentius reperto collegit et typis Romæ mandavit anno 1680. Doctissimus *Mailhon* quartum invenit in monasterio Bobiensi, et in suum *Musæum Italicum* inseruit. Tria alia etiam edidit et illustravit in opere inscripto, de Liturgia Gallicana, anno 1685.

Mathias Flaccus Illyricus, Lutheranus, missam latinam ex veteri codice vulgavit Argentinæ, anno 1557, ut catholicis oppositam; sed, re maturius perpensa, ipsi Lutherani agnoverunt eam sibi non favere. Plurimi volunt, illam in Gallia et Germania, ante ordinis Romani introductionem, fuisse usitatam, pro antiqua Gallicana habendam et ad S. Greg. tempora referendam esse. Sic ipse Illyricus. Alii vero, ut P. *Ménard*, notis in Sacram. S. Greg. Card. Bona, l. 1, cap. 12, P. *Martène*, id negant: fatentur tamen eam esse saltem decimi sæculi, et probabiliter noni.

In pluribus Galliarum ecclesiis quædam existunt consuetudines, plus minusve antiquæ, v. g. dandi benedictionem episcopalem ante communionem, preces publicas pro diversis personis et necessitatibus fundendi, denuntiationes festorum et jejuniorum faciendi intra missam solemnem quod vulgo dicitur *prône*, sanctissimum Sacramentum supra altare suspendendi, etc.

### *Liturgia Hispanica seu Mozarabica.*

P. *Le Brun*, t. 3, docet et probat, fidem catholicam in Hispaniam fuisse importatam per viros à Sede apostolica missos, ac proinde liturgiam Romanam ibi primum fuisse

usitatam ; sed in quinto sæculo innumeri populi barbari hanc regionem invaserunt, omnia turbaverunt, novos ritus passim induxerunt, præsertim Gothi ex Oriente venientes, et variæ jam cœperunt existere liturgiæ. Anno 538, Vigilius, S. pontifex, ordinationem missæ Romanæ misit ad Euthereum seu Profectum, in Hispania episcopum, et concilium Braccarense jussit, anno 563, ut omnes sacerdotes juxta illam deinceps celebrarent, quod supponit liturgiam tunc vigentem a liturgia Romana discrepare.

Non obstante hoc statuto, variæ consuetudines a liturgia Romana alienæ, vel perseveraverunt, vel ab aliis regionibus, v. g. a Gallia et præsertim a Constantinopoli introductæ fuerunt, et inde aucta est confusio. Versus finem sexti sæculi, et in initio septimi, S. Leander, Hispalensis episcopus, et S. Isidorus, ejus frater ac successor, conati sunt novam ordinare liturgiam, quæ in concilio Toletano IV, anno 633 celebrato, adoptata, facta est communis omnibus ecclesiis Hispaniæ et Galliæ Narbonensis, Gothis Hispaniarum tunc subjectæ.

Hæc liturgia vocata est Gothica, a nomine gentis tunc regnantis : deinde in octavo sæculo, dicta est Mozaraba vel Mozarabica, quia, cum Arabes pene omnem Hispaniam occuparent, Christiani inter eos degentes appellati fuere *Mixtarabes*, et per corruptionem *Mozarabes*, id est, mixti Arabibus. Sic communiter auctores, aliis tamen aliam originem assignantibus, ut videri potest apud *Labbe*.

Quidam errores in hanc liturgiam, ex inadvertentia, ignorantia aut negligentia irrepserant, vel saltem quibusdam illius verbis abusi sunt Felix Urgelitanus et Elipandus, Toletanus episcopus, in octavo sæculo, ut suam tuerentur sententiam, qua volebant Christum ratione humanitatis dici posse filium Dei adoptivum.

In undecimo sæculo, Alexander II, Gregorius VII et Urbanus II nihil omiserunt per triginta annos ut officium Romanum per totam Hispaniam reciperetur : cooperantibus Constantia regina, ex Galliis oriunda, et regibus



Remiro, Sanctio, ac præsertim Alphonso, tandem abolitus fuit ordo Mozarabicus, et ordo Romanus Gallicus ei substitutus.

Illustris Card. *Ximénès*, anno 1500, missale Mozarabicum novis characteribus excudi mandavit, totum ritum veterem, nonnullis mutationibus adjectis, propria auctoritate instauravit, collegium instituit sacerdotum qui juxta hunc ritum, in sacello quod ipse in majori ecclesia Toletana fundavit, et in quinque parœciis, quotidie celebrarent, Sic ritus Mozarabicus fuit restitutus et usque nunc perseveravit : ejus ordo reperitur apud *Bona, Martène et Le Brun*.

### *Aliæ liturgiæ.*

Præcipuas memoravimus liturgias, tum Orientalis, tum Occidentalis ecclesiæ : sed insuper aliæ sunt plures non parvi momenti.

1<sup>o</sup> *Liturgia S. Marci*, quæ etiam dicitur S. Cyrilli Alexandrini, quia ab eo, S. Marci successore, primum scripta et perfecta fuit, in quinto sæculo. Non est dubium quin scripta fuerit in lingua græca tunc communi, sicut duæ aliæ liturgiæ in ecclesia Alexandrina atque in toto Ægypto simul usitatæ, nempe liturgia S. Basilii, et altera S. Gregorii Nazianzeni, cognomento Theologi. Verum Dioscorus, patriarcha Alexandrinus, factus Eutychianus, in concilio Chalcedonensi damnatus, et suæ damnationi subscribere nolens, magni schismatis fuit pater. Catholici, definitionibus concilii Chalcedonensis adhærentes, vocati sunt Melchitæ, a verbo arabico idem significante ac regii, gallice *royalistes*; quia mandato imperatoris Marcii qui concilium Chalcedonense recipiendum jusserat, otemperaverunt. Qui vero partes Dioscori secuti sunt, appellati fuerunt Jacobitæ, a quodam Jacobo Syro, vehementi concilii Chalcedonensis adversario, episcopo Edesseno, anno 577 æræ nostræ defuncto; et Monophysitæ, quia unicam admittebant naturam in Christo. Melchitæ lingua græca uti perrexerunt, sed Jacobitæ in lingua

vulgari ægyptia officium celebrabant : unde arabice , per corruptionem , a verbo græco Αἴγυπτος dicti sunt Cophthæ. Hucusque exstiterunt in Ægypto, in Æthiopia et in Abyssinia ; suam liturgiam , quæ est vetus Alexandrina , seu S. Marci, diu habuerunt in lingua ægyptia seu cophtica, postea in lingua arabica quæ facta est communis. Ordo ejus legi potest apud P. *Le Brun*, t. 4.

2° *Liturgia Æthiopica*. S. Frumentius, a S. Athanasio in Æthiopiam missus, anno 331, liturgiam Alexandrinam secum importare debuit, et P. *Le Brun* putat eam probabiliter primam omnium fuisse scriptam in lingua æthiopica. Æthiopes cum Ægyptiis seu Cophthis conjuncti, diversas eorum liturgias adoptarunt, et duodecim habent : quæ communior est apud illos, sub nomine Apostolorum, ex lingua chaldæa, sive æthiopica in latinam conversa, Romæ impressa est anno 1549.

3° *Liturgia Syriaca*. Liturgiæ S. Jacobi et S. Basilii in quinto sæculo scriptæ fuerunt græce, pro magnis urbibus in quibus omnes loquebantur græce, et simul in lingua syriaca pro Syria, sicut in lingua cophtica pro Ægypto. Christiani divisi sunt in Oriente, sicut in Ægypto, occasione concilii Chalcedonensis, in Melchitas et Jacobitas : hi et illi communem retinuerunt liturgiam syriace scriptam : cujus ordo legi potest apud P. *Le Brun*, t. 4.

4° *Liturgia Maronitica*. Maronitæ sunt populus ex Phœnicia oriundus, in monte Libani et in quibusdam civitatibus Syriæ habitans, cujus primus Apostolus fuit S. Simeon stylita, qui, per vitam suam singularem et sua miracula multos attrahens, atque e columna sua erudiens ac dehortans, eos ad amplectendam religionem Christianam determinavit in quinto sæculo. Monothelitarum hæresi imbuti sunt; sed anno 1182, errores suos inter manus Aimerici, patriarchæ Antiocheni, catholici, abjecerunt, et, ex eo tempore, Sedi apostolicæ firmiter adhæserunt. Nomen suum probabiliter sortiti sunt, ut vult P. *Le Brun*, a Joanne, dicto Marone, quia religiosus erat e monasterio S. Maronis, in diœcesi Apamiensi, et eorum fuit patriarcha in initio octavi sæculi.

Missale eorum, in lingua chaldaica syriaca, impressum fuit Romæ, an. 1592 et 1594, et quatuordecim continet liturgias, sub titulis S. Xisti papæ, S. Joannis Chrysostomi, Joannis Evangelistæ, S. Petri principis Apostolorum, duodecim Apostolorum, S. Dionysii, S. Cyrilli, S. Matthæi, S. Jacobi, S. Marci, etc. Omnes, una excepta, reperiuntur apud *Renaudot*, t. 2, cum doctissimis notis.

5<sup>o</sup> *Liturgia Armenica*. Armeni, juxta antiquam et generalem traditionem, ab Aram filio Sem descendunt et suum habent nomen. Magnam occupant regionem, cui nomen suum imposuerunt, inter mare Caspianum et mare Rubrum, secus flumen Araxen, trans et citra illud : successive vexati a Persis, Romanis, Sarracenis et Turcis, multi ex illis in alias regiones migraverunt, et inveniuntur in Tartaria, Moscovia, Polonia, Turcia.

Tenent Armeni, Apostolos Thaddæum et Bartholomæum fidem apud eos prædicasse : certum est in initio tertii sæculi numerosos jam exstitisse Christianos in illo regno, cum, ex Euseb. Hist. Eccl. l. 9, cap. 6, imperator Maximus bellum Armenis, huc usque Romanorum amicis, indixerit, anno 235, quia erant Christiani, et multi coronati fuerint martyrio sub Decio et Diocletiano. Tenent insuper, magnam Armeniam ad fidem adductam esse, quarto ineunte sæculo, cura Gregorii Illuminatoris, qui primum regem Tiridatem converterat. Certum videtur hunc Gregorium a Leontio, Cæsareensi episcopo, ordinatum fuisse episcopum et in Armeniam missum, ac multos alios episcopos a S. Basilio, Leontii sucessore, in Armenia fuisse constitutos : unde concluditur, Armeniam nondum habuisse patriarcham, sed Cæsareensi metropoli subjectam esse.

In sexto sæculo, Armeni errores Monophysitarum adoptarunt, vincula unionis cum catholicis ruperunt, et in conciliabulo ad hoc convocato, anno 551, actum suæ separationis solemniter confirmarunt. Æram suam ab hoc anno vel ab anno 552, in memoriam hujus actus, numerant, et universalem ex hoc tempore semper habuerunt patriarcham, in urbe Etzmiazim residentem, qui viginti

sex archiepiscopos et septuaginta quinque episcopos habebat sibi subjectos anno 1670.

Alius est patriarcha in Armenia minori, quinquaginta habens suffraganeos, qui in septimo sæculo se declaravit a patriarcha Etzniazium independentem. Alii etiam nunc existunt patriarchæ Armeni Constantinopoli et Jerusalem, sed a magno patriarcha dependentes.

In variis temporibus Armeni ostenderunt se paratos esse hæresim abjicere et Ecclesiæ Romanæ se adjungere; exigua provincia nomine Naxivan, ab anno 1333 fere tota est catholica, habet archiepiscopum catholicum et monachos, olim S. Basilii, qui regulam FF. Prædicatorum amplexi sunt: plurimi sunt catholici in Moscovia et in Polonia. Dum celebraretur concil. Florent. anno 1438, patriarcha minoris Armeniæ quosdam misit legatos ad papam Eugenium IV, qui, concilio expleto et Græcis jam profectis, cum pluribus episcopis Latinis adhuc Florentiæ manentibus celebre edidit Decretum ad Armenos. Magnus patriarcha, archiepiscopi et episcopi ipsi subjecti nunquam illud decretum admittere voluerunt, sicque in erroribus suis permanent obstinati. Ex tunc tamen multi exstiterunt catholici Armeni, tum in ipsa Armenia, tum Constantinopoli et in aliis Orientis partibus. Religiosus, e monasterio Armenorum catholicorum, in parva insula prope Venetias sito, nobis anno 1825 dixit, 2,000,000 circiter existere catholicos suæ gentis in Armenia. Qui Constantinopoli degunt, ab anno 1830 catholicum habent patriarcham.

Liturgia Armenorum ortum habuit a S. Athanasio et a S. Joanne Chrysostomo, qui apud eos relegatus mortuus est: in lingua eorum fuit scripta et usque in hodiernum diem sic perseveravit, tum apud hæreticos, tum apud catholicos, cum nonnullis tamen mutationibus ad substantiam non pertinentibus, ut videre est apud P. Le Brun, t. 5.

6° *Liturgia Nestoriana.* Nestorius in concilio Ephesino, anno 431, damnatus ac depositus, definitioni concilii acquiescere noluit; relegatus et miserrime mortuus, mul-



tos reliquit asseclas qui errores ejus per magnam Orientis partem propagaverunt, in Perside, in India, in Malabar, in vasto imperio Sinensi, ut constat ex celebri inscriptione, anno 1625, in urbe Sigamfu, provinciæ Xinsi, repta, characteribus Sinensibus et Syriacis constanti, et in Tartaria.

Omnes semper et ubique servaverunt liturgias Nestorii et Theodori Mopsuesteni, in lingua syriaca scriptas, quia originem habuerunt in Syria et in Mesopotamia, ubi hæc lingua erat vulgaris: missalia eorum tertiam continent liturgiam quam vocant Apostolorum. Earum ordines et differentiæ legi possunt apud P. *Le Bruin*, t. 4.

*Notandum*, cum eruditissimo *Renaudot*, diversas linguas Orientales in quibus scriptæ sunt liturgiæ recensitæ, licet olim vulgares, a multo tempore esse mortuas, et tamen in officiis ecclesiasticis semper usitatas: morem igitur ecclesiarum Orientalium invocare non possunt hæretici contra praxim Ecclesiæ Romanæ.

Aliæ multæ exstiterunt liturgiæ apud Orientis Christianas gentes: auctor a Card. Bona citatus, l. 1, cap. 9, n. 9, ait, supra quinquaginta numerari, partim communes, partim singularium gentium proprias.

7° *Aliæ liturgiæ Occidentis*. Præter autem præcipuas liturgias Latinas supra expositas, aliæ non paucae a Romana diversæ numerari possent, ut Africana, Clementina, quæ in lib. 8 Constit. Apostolicarum reperitur, Hibernica, Dionysiana, Aquileiensis, Illyrica, Trevirensis Bobiensis, etc.

Præterea innumeras omitto diœceses quæ, in singulis regionibus, et præsertim in Gallia, peculiare habent consuetudines ac propria missalia ad instar Romani composita, ab eo tamen in multis diversa: ita similiter et plures religiosi ordines. Eo sensu igitur ritum Romanum sequuntur, quod in forma et dispositione cum Romanis conveniant, omnes scilicet habentes confessionem, introitum, collectam, epistolam, gradualem, versum vel tractum, evangelium, symbolum, offertorium, præfationem, eundem canonem, communionem, gratiarum actionem et finem; licet alii psalmum *Judica* omittant,

alii breviorē confessionis formulam habeant, alii diversis verbis panem et vinum offerant, alias epistolas, diversa evangelia legant, non easdem festivitates celebrent, aliter procedant, incensum adoleant, etc. Hæc enim notant Bona, l. 1, cap. 7, n. 5, Cavalerii apud Merati, t. 1, ipse Merati, et nullo modo increpant, quamvis post Constitutionem *Quod a nobis*, S. Pii V, usum breviarii Romani præscribentis, scripserint, quia supponunt has ecclesias in exceptione bullæ S. Pii V versari.

In infra dicendis ordinem missalis Romani secuturi sumus.

## ARTICULUS SECUNDUS.

### DE VARIIS LITURGIE NOSTRÆ PARTIBUS.

Breviter unamquamque liturgiæ nostræ partem hic exponemus.

1° *Antiphona Introibo*. Antiphona, a verbo græco ἀντιφωνέω, olim significabat id omne quod alternatim cantabatur, et nunc significat notabiliorem partem ex psalmo cantando excerptam ut ante psalmum cantetur vel saltem incipiatur, et post psalmum integra repetatur. Versus *Introibo*, ex psalmo *Judica* eductus, optime congruit actioni quæ incipienda est.

2° Psalmus *Judica* statim dicitur. Utrumque, scilicet antiphona *Introibo* et psalmus *Judica*, non semper fuerunt in usu, nec etiam nunc in pluribus liturgiis usitantur. Verumtamen in missalibus Gallicanis, Germanicis, Anglicis et Romanis, saltem a nono sæculo reperiuntur, sed non in Sacramentario S. Gregorii : unde institui debuerunt inter septimum et nonum sæculum.

3° *Confessio*. In veteri Lege, summus sacerdos, hircum viventem pro peccatis oblaturus, confitebatur. *Omnes iniquitates filiorum Israel, et universa delicta atque peccata eorum*, Lev. xvi, 21; omnes qui sacrificia offerebant, suas iniquitates confitebantur, ut ex quatuor primis Lev. cap. colligitur, et rabbinus Maimonides formulam hujus confessionis in suo tractatu de Sacrif. refert. Tuncio pecto-

ris semper habita est ut signum doloris et pœnitentiæ : ideo in antiquissimis liturgiis aliqua præscribitur vel supponitur confessio ante missæ sacrificium, sed multum variant formulæ. Ea qua nunc utitur Ecclesia Romana papæ Damaso, anno 384 mortuo, vel etiam Pontiano, anno 235 defuncto, tribuitur : sed in Sacramentario S. Greg. non invenitur, nec in missalibus decimo tertio sæculo antiquioribus. Nunc autem in omnibus ecclesiis Latinis est usitata cum nonnullis variantibus, v. g. in Hispania et in ordinibus religiosis nomen patroni nominibus Petri et Pauli additur. Nemo talem additionem propria auctoritate facere potest.

4° *Orationes Misereatur et Indulgentiam* in antiquis ritualibus seu pœnitentialibus ac missalibus non reperiuntur, saltem in ea forma qua nunc existunt : attamen *Grancolas* probat eas jam esse veteres et universales, paucis mutationibus exceptis.

5° *Versus, Deus, tu conversus, etc.* in plerisque missalibus non inveniuntur, inquit *Grancolas*.

6° *Aufer a nobis*. In omnibus liturgiis aliqua præcipitur oratio sacerdoti ad aram sacram accedenti, sed vel forma non determinatur, vel multum varia est. Oratio *Aufer a nobis*, in pluribus antiquis sacramentariis reperitur, et in Ordine Romano XIV, § 71, apud *Mabillon*, Museo Italico, t. 2; in quibusdam ecclesiis dicitur ante confessionem; in aliis ad infimum gradum altaris, etc.

7° *Oramus te*. Hæc oratio reperitur in pluribus sacramentariis veteribus, et in Ordine Romano citato : in aliis vero deest. Carthusiani et Dominicani eam non dicunt. Carmelitæ illam non dicebant ante reformationem missalis sui, anno 1584, nec clerus Parisiensis ante adoptionem Ordinis missæ S. Pii V, anno 1615.

8° *Introitus*, sic dictus, quia, sacerdote ad altare introeunte, canitur, non semper fuit in usu : in primis temporibus missa per lectiones Scripturæ incipiebat, sicut hodie feria VI in Parasceve. Tenetur probabilius, papam Cœlestinum I, in quinto sæculo, statuisse ut unus psalmus cum sua antiphona cantaretur a choro, dum sacer-

dos cum suis assistantibus e sacrario ad altare procederet. S. Greg. hunc psalmum ad antiphonam cum uno versu reduxit, cui semper addita est doxologia *Gloria Patri*, excepto tempore Passionis, et missa ejus per introitum sic formatum incipit. Sacerdos ad altare perveniens se signabat, dicens, *In nomine patris*, etc. deinde introitum recitabat : hinc mos se adhuc signandi, sine formula *in nomine Patris*, quæ ante psalmum *Judica* dicta est. Nunc quidam introitus, non ex Psalmis, sed ex aliis Scripturæ partibus vel etiam ex compositione ecclesiastica formantur.

9° *Kyrie eleison*. Hæc verba græca verbis latinis, *miserere, Domine*, correspondentia, antiquissimi sunt usus in orationibus ad Deum. Isaias, cæcus prope Jericho, mulier Chananaea et decem leprosi sic oraverunt, dicentes : *Miserere mei*. Hic modus orandi in ecclesia Græca primum usurpatus, in ecclesiam Latinam sine conversione sermonis fuit inductus, ignoramus quo præcise tempore. Concil. Vasense II, in Gallia anno 529 habitum, loquitur de hac praxi tanquam de re usitata, et statuit eam deinceps in Gallia sicut in Italia et Græcia sequendam esse.

Apud Græcos solus populus repetit *Kyrie eleison*, sine mutatione *in Christe*; in liturgia Ambrosiana ter dicitur *Kyrie eleison* post *Gloria in excelsis*, ter post evangelium et ter in finem missæ, ante benedictionem, sine *Christe eleison*.

Primitus non erat statutum in ecclesia Latina quoties hæc formula reperetur : hoc pendebat a nutu celebrantis vel diaconi, qui aliquo signo finem imponebat. Inter verba *Kyrie* et *eleison* pluries quædam addita sunt verba, v. g. *Kyrie rex genitor ingenite, vera essentia, eleison*; *Kyrie luminis fons et rerum conditor, eleison*; *Kyrie qui nos imagini tuæ signasti specie, eleison*, etc. Illæ additiones sæpe longiores, ut in missali sub Paulo III impresso videri potest, deletæ sunt, et cantus fuit retentus; unde contigit, ait *Grancolas*, cantum *Kyrie eleison* nunc adhuc esse longum in missa solemnī.

Mos invaluit, sive a S. Gregorio, ut quidam volunt, sive ab alio, ut novies diceretur *Kyrie* vel *Christe elei-*



son, ter pro unaquaque persona sanctissimæ Trinitatis.

9<sup>o</sup> *Gloria in excelsis*. Hic hymnus vocatur Angelicus, quia incipit per verba quibus Angeli nativitatem Christi celebrarunt, dicentes : *Gloria in altissimis Deo, et in terra pax hominibus bonæ voluntatis*, Luc. II, 14. Est antiquissimus; in Constitutionibus Apostolicis, l. 7, cap. 47, referatur sub nomine *Orationis matutinæ*; S. Athanasius volebat Christianas virgines eum singulis diebus mane recitare; Latini illum antiquo more dicebant in officio matutino, saltem diebus dominicis, et Græci illum adhuc recitant, non solum in missa, sed in Laudibus, et vocant magnam doxologiam : *Gloria Patri* est minor doxologia. Plurimi hunc hymnum tribuerunt S. Hilario Pictaviensi, in quarto sæculo; alii, papæ Telesphoro, in secundo sæculo; alii, Symmacho, in quinto sæculo; sed antiquior videtur ipso S. Hilario. IV concil. Tolet. anno 633, dicit reliqua quæ sequuntur, post verba evangelica, a doctoribus ecclesiasticis composita fuisse. Nihil ultra certo scire possumus.

S. Gregorius, in suo Sacramentario, præscribit ut ille hymnus singulis diebus dominicis et festivis ab episcopis post *Kyrie eleison* dicatur, et a presbyteris in sola Pascha : hæc consuetudo viguit usque ad undecimum sæculum, quo permissum est ut a presbyteris, sicut ab episcopis, cunctis diebus dominicis et festivis diceretur. Sub S. Pio V, statutum fuit ut, quotiescumque in officio nocturno dictus fuisset hymnus lætitiae, *Te Deum*, diceretur in missa hymnus exultationis, *Gloria in excelsis*. Dicitur insuper feria quinta in cæna Domini et sabbato Sancto, in missa de die; non vero per Adventum et a Septuagesima usque ad Pascha, nisi occurrant festa, nec in feriis majoribus aut per annum.

In nonnullis missalibus decimi quarti et decimi quinti sæculi quædam insertæ sunt additiones inter verba prædicti hymni, sicut inter verba *Kyrie eleison*, v. g. *Laudamus te; Laus tua, Deus, resonet coram te, rex; Benedicimus te, qui venisti propter nos, rex Angelorum*, etc. Nicolaüs V has prohibuit additiones.

10<sup>o</sup> *Dominus vobiscum*. Hæc salutationis forma legi-

tur in II Paralip. xv, 2; populus respondet, *et cum spiritu tuo*, utendo verbis Apostoli, Gal. vi, 18 : *Gratia Domini nostri Jesu Christi cum spiritu vestro*. Celebrans osculatur altare in medio, ut salutationem Christi accipiat, et versus ad populum, eum, quasi personam Christi gerens, salutatur, omnem gratiam et benedictionem precans. Usque ad tempus Durandi, in decimo tertio sæculo existentis, omnis populus salutationi respondebat, gratiam et ipse celebranti adprecans : nunc autem solus minister in missa privata, et soli cantores in missa solemni, respondent pro se et pro astantibus.

Græci dicunt, *Pax omnibus*, alludendo verbis hymni Angelici, *pax hominibus bonæ voluntatis* : apud Latinos, episcopi, qui diu soli dicebant *Gloria in excelsis*, excepto die Paschatis, et quia personam Christi plenius repræsentant, verbis quibus ipse discipulos pluries salutavit utentes, dicunt, *Pax vobis*, quando dixerunt, *Gloria in excelsis*; in aliis vero missis dicunt, *Dominus vobiscum*, sicut simplices presbyteri : ita et in cæteris missæ partibus in quibus salutandus est populus; septies enim hæc salutatio repetitur in missa, videlicet post introitum, ante evangelium, ante offertorium, in præfatione, ante *Agnus Dei*, ubi dicitur, loco *Dominus vobiscum*, *Pax Domini sit semper vobiscum*, ante postcommunionem et in fine missæ.

Olim *Kyrie eleison*, *Gloria in excelsis* et *Dominus vobiscum*, vel *Pax vobis*, dicebantur ad cornu epistolæ, quia non erat crux in medio altaris, et sic perrexerunt agere Carthusiani, Dominicani, Carmelitæ et episcopi solemniter celebrantes, qui suam sedem ad cornu epistolæ semper habere debent.

Asserit *Grancolas*, t. 1, p. 475, obligationem audiendi missam, a salutatione celebrantis incipere, et præcedentia non esse de præcepto; sed nullam dat rationem suæ assertionis.

12<sup>o</sup> *Collectæ*. Post salutationem, celebrans se et assistentes ad orandum excitat, dicens, *Oremus*; apud Græcos diaconus dicit, *Oremus Dominum*: deinde celebrans dicit collectam, sic probabilius appellatam quia prima est ora-

tio quæ super populum collectum pronuntiatur. Usus sic orandi a traditione Apostolica descendit; devotissimæ enim collectæ apud antiquissimos inveniuntur auctores, v. g. apud S. Clementem, in Epist. ad Cor. S. Polycarpum, S. Irenæum, Origenem, etc. Primitus celebrans orationes pro sua devotione vel necessitate componebat, sed concil. Milevitanum, in Africa, anni 416, decrevit ut deinceps nulla adhiberetur oratio in missa, nisi prius in concilio episcoporum fuisset probata.

Pleræque orationes quibus nunc utimur in officiis et missis de tempore, in Sacramentariis S. Greg. et S. Gelasii reperiuntur: credendum est igitur in conciliis fuisse probatas. Orationes autem quæ in officiis et missis novis mysteriorum, sanctorum, etc. adhibentur, a diversis auctoribus compositæ fuerunt ab Ecclesia approbata, dum in calendario fuerunt adscriptæ.

In missali Gelasii tres præscriptæ erant collectæ: S. Greg. eas reduxit ad unam. Numerus postea multum variavit, et nunc diversus est pro diversa missarum qualitate, *ut mox dicturi sumus.*

Olim, statim atque celebrans dixerat *Oremus*, omnes genuflectebant, ad vocem diaconi dicentis *Flectamus genua*, aliquo tempore secreto orabant, postea surgebant, dicente diacono, *Levate*. Hodie hæc formula in solis diebus jejunii servatur, diaconus dicit, *Flectamus genua*; subdiaconus, nulla interposita mora, subjungit, *Levate*; qui stant, genua flectere, et qui sunt genuflexi, inclinari debent usque ad *per omnia*, vel *qui tecum*, juxta Merati, t. 1. Communius tamen, ut notat *Romsée*, omnes statim surgunt. Deficiente diacono, ipse celebrans dicit, *Flectamus genua*, et minister vel cantores, nomine totius populi, respondent *Amen*. Vox ista, quæ est Hebræa, significat, Verum est, Ita sit, Assentio, prout quod præcessit erat aliquid credendum, exoptandum vel faciendum.

Olim celebrans objectum orationis populo annuntiabat, dicens, *Oremus, fratres charissimi*, v. g. *pro Ecclesia sancta Dei, ut eam Deus*, etc. postea dictis, *Oremus, Flectamus genua*, et *Levate*, subjungebat orationem. Mos iste feria sexta Majoris hebdomadæ servatur.

13° *Epistola*. Apud Judæos officium publicum in sabbato incipiebat per lectionem librorum Moysis vel Prophetarum, ut patet ex Act. Apost. XIII, 15, et XV, 21. Primi Christiani hanc consuetudinem in cœtibus suis servaverunt; hunc ritum in ipsomet Ecclesiæ exordio adhiberi consuevisse testatur S. Justinus, Apol. 1. Hæc instructio diebus dominicis et festivis ex scriptis Apostolorum regulariter deducitur; in feriis, ex Veteri vel ex Novo Testamento; in feria quarta quatuor temporum, una ex Veteri et altera ex Novo Testamento, excepta feria quarta infra octavam Pentecostes; et in sabbatis quatuor temporum, ad instructionem ordinandorum, quinque leguntur ex Veteri et ultima ex Novo Testamento.

Pars autem ista officii dicitur *Epistola* vel apud quosdam auctores, *Apostolus*; quia ex epistolis Apostolorum communiter deducitur. Intitulatur *lectio*, quia olim non cantu, sed alta voce legebatur ab uno e lectoribus, in ecclesiæ loco qui dictus est *lectorium*, vel *lectrium*, unde gallice *lutrin*. Liber diversas lectiones per annum legendas continens, dictus est *lectionarius* (*liber*), vel *lectionarium*.

Apud Græcos diaconus legit vel cantat epistolam; apud Latinos nunc subdiaconus eam in missa solemni cantat, et in ordinatione sua, a decimo tertio sæculo, specialem ad hoc suscipit potestatem per libri Epistolarum traditionem. Ubi celebrans cantat missam sine diacono et subdiacono, Rubrica Romana, tit. 6, n. 8, permittit ut lector, superpelliceo indutus, epistolam in loco consueto cantet. Si desint subdiaconus et lector, celebrans ipse epistolam cantat: eam vero ab alio cantatam (et generaliter quod cantatur), tam submisso dicere debet, ut chorus vocem ejus non audiat; P. *Le Brun*, t. 1.

14° *Graduale*. Ut instructioni jungatur oratio, post epistolam cantatur psalmus vel quidam versus unius psalmi, et hæc portio officii dicta est *graduale*, quia ad gradus pulpiti seu ambonis cantabatur.

15° *Alleluia*, vox hebræa significans jubilationem in laudando Deo, quæ in alienam linguam accurate converti posse non visa est, et ideo in propria lingua servata



est, Graduali bis subjungitur, et, dicto versu, in fine ante evangelium repetitur, excepto tempore a Septuagesima ad Pascha, et missis defunctorum. « Alleluia nobis cantare » certo tempore solemniter moris est, secundum Ecclesiæ antiquam traditionem, » inquit S. Aug. in Ps. cvi.

16° *Neuma*. Durandus alique liturgiæ interpretes dicunt, neuma, quæ est continuatio cantus, sine articulatione, post *alleluia* et antiphonas, significare tantam esse mentis jubilationem ut exprimi nequeat.

17° *Sequentia seu prosa*. Neuma a quibusdam dicta est sequentia, quia cantum *alleluia* sequebatur. *Sequitur jubilatio, quam Sequentiam vocant*, inquit Ordo Romanus. Nonnulli suppressentes neumam, substituerunt ei aliquos hymnos liberioris compositionis, similem ultimorum verborum habentes sonantiam: hujusmodi hymni dicti sunt Sequentiæ, quia sequebantur *alleluia* et locum tenebant neumæ: appellantur etiam Prosæ, quia non constant versibus proprie dictis.

Arbitratur *Grancolas*, t. 1, p. 511, eas adhiberi incœpisse in nono sæculo, pro magnis solemnitatibus primum exstitisse, deinde ita multiplicatas fuisse, ut unaquæque missa propriam haberet prosam, excepto tempore a Septuagesima ad Pascha. Multæ erant inconcinnae et injundæ: Carthusiani et Cistercienses eas e liturgiis suis expunxerunt, et missale Romanum quinque tantum servavit, *Victimæ paschali*, quæ tribuitur Notkero abbati, in nono sæculo; *Veni, sancte Spiritus*, quæ attributa est regi Roberto, vel probabilius Hermannò Contracto, in undecimo sæculo; *Lauda, Sion*, quæ est S. Thomæ Aquinatis; *Dies iræ*, quæ a Card. Frangipani, cognomento Malabranca, in decimo tertio sæculo, fuit composita. Hæc ultima, contra prosarum institutionem, est tristis, et *Alleluia* non sequitur. Ejusdem generis est *Stabat Mater*, a pluribus attributa Innocentio III, et a P. Wadding restituta Jacoponi, qui ex mundano factus est simplex frater Minor S. Francisci, in decimo tertio sæculo. Hæc recenter in Missale Romanum pro festo Septem Dolorum B. Mariæ Virginis fuit introducta.

18° *Tractus*. Quando non dicitur *alleluia* post graduale, cantatur tractus, sic dictus a verbo trahere, quia tractim, id est, sine interruptione, vel lente et lugubriter, non ab omni choro, sed a solis cantoribus cantatur. Ex nonnullis alicujus psalmi versibus componitur, et aliquando ex psalmo integro, ut prima dominica Quadragesimæ.

19° *Munda cor meum*. Dum oblationes fidelium, ante offertorium, super altare, ad cornu epistolæ deferebantur, liber ad aliud cornu erat deferendus: hinc mos illum sic adhuc transferendi ante evangelium. Interea sacerdos dicit, *Munda cor meum*, etc. ad petendam gratiam verba Christi recte et sancte annuntiandi. Deinde petit benedictionem dicens, *Jube, Domine, benedicere*; dicit *Domine*, quia supremum Dominum cœli et terræ alloquitur; et non *domne*, qui est titulus homini in dignitate constituto attributus: unde diaconus, benedictionem petens, sive a simplici sacerdote, sive ab episcopo, dicere non debet *Domine*, sed *domne*, et ita quotiescumque benedictio ab homine petitur. Ipse summus Pontifex in Litaniis vocatur domnus apostolicus, ut *domnum apostolicum*, etc.

20° *Evangelium*. Omnes liturgiæ cognitæ præscribunt evangelium in qualibet missa, voluntque illud non legi aut cantari sine pluribus cæremoniis venerationem spirantibus, maxime in solempni missa, ut sunt, *Munda cor meum*, benedictio, thurificatio, etc. Sacerdos sic paratus, ad librum semiversus tantum, ut populum alloqui censeatur, salutatur assistentes, dicendo, *Dominus vobiscum*, librum, frontem suam, os et pectus signat, annuntiat evangelium, nominans Evangelistam, et respondetur, *Gloria tibi, Domine*, quæ responsio jam usitata erat in octavo sæculo, ut ostendit *Romsée*.

Græci cum majori adhuc solemnitate ad cantandum evangelium procedunt.

S. Cyprianus, Tertullianus, S. Justinus aliique antiqui auctores testantur morem suo tempore exstitisse legendi evangelium in missa; et Eusebius, l. 2, cap. 14, dicit a B. Petro institutum esse ut Evangelium S. Marci in ecclesiis legeretur.

Finito evangelio, olim respondebatur *Amen*, vel *Deo gratias*, aut *Laus tibi, Christe*: hæc ultima formula sola prævaluit. Statim celebrans, in signum devotionis erga verbum sanctum, prima verba evangelii deosculatur, dicens, *Per evangelica dicta*, etc.

In Ordine Romano præscribitur crucis signum quo sacerdos et populus se olim muniebant post evangelium, quia tunc finita erat missa catechumenorum.

21° *Prædicatio*. Omni tempore mos fuit in Ecclesia ut pastores vel ab eis deputati sermonem ad populum haberent, post lectionem Scripturæ, id est, finito evangelio: existentiam veteris hujus consuetudinis astruunt testimonia S. Justini, Apol. 1, n. 67; Tertul. l. de Anima, cap. 9; S. Aug. Serm. 176, etc.

Hæc prædicatio dicta vulgo *prône*, a verbo græco *πρόνας*, significante primam navem Ecclesiæ, quia in ea parte stabat populus sermonem auditurus, erat modo familiaris, et dicebatur homilia; modo solemnior, et nomen retinebat sermonis. In plures tamen non dividebatur partes, ut in posterioribus sæculis factum est, nec dicebatur *Ave Maria*: hæc invocatio post exordium inserta est a decimo tertio vel decimo quarto sæculo tantum. *Gerson* eam continuo adhibuit in sermonibus quos, durante concilio Constantiensi, ad populum et clerum habuit.

Post prædicationem annuntiabantur præscriptiones Ecclesiæ, festa, jejunia, matrimonia, ordinationes, excommunicationes, ii omnes pro quibus missæ sacrificium offerendum erat indicabantur, et quædam fiebant preces, sicut hodie in Gallia: hæc tamen apud nos fieri solent ante instructionem.

22° *Symbolum*. In primis Ecclesiæ temporibus, Symbolum non dicebatur in missa: deinde semel in anno, die veneris in Parasceve recitabatur ad instructionem catechumenorum. Fertur Timotheum, episcopum Constantinopolitanum, jussisse anno 510, ut in omnibus ecclesiis sibi subjectis, ad veram profitendam fidem contra hæreticos, in singulis collectis recitaretur. Inde mos illud sic dicendi transiit in Hispaniam et in Gallias: concil. To-

let. III, anno 589, statuit ut per omnes ecclesias Hispaniæ et Galliæ, ante Orationem Dominicam, secundum formam Orientalium ecclesiarum recitaretur. Circa finem octavi et initium noni sæculi, cœpit cantari in Gallia et in Germania cum additione *Filioque*. Ordo Romanus II, quem fertur octavo sæculo scriptum fuisse, dici Symbolum, dicto evangelio, ab episcopo inchoandum esse. Si ergo S. Henricus imperator conquestus fuerit anno 1014, illud Romæ non cantari sicut in aliis ecclesiis, et si ad preces ejus Benedictus VIII illud cantandum jusserit, intelligendum est, aut antea fuisse tantum recitatum, aut morem illud cantandi desiisse.

Saltem ab eo tempore semper dicitur singulis diebus dominicis, in festis mysteriorum Christi, B. Mariæ Virginis, sanctorum Apostolorum, sanctorum doctorum, et in quibusdam aliis solemnioribus festis.

Ab omnibus cantari debet tanquam publica omnium professio, non agentibus organis, nec interposita musica, nisi simplici, ut verba ab omnibus audiri possint. Vide P. *Le Brun*, t. 1.

23<sup>o</sup> *Offertorium*. Catechumeni præcedentibus orationibus et instructionibus assistebant; iis absolutis, dimittebantur, et tunc incipiebat missa fidelium. Sacerdos versus ad populum, eum salutabat per *Dominus vobiscum*; et responso ejus accepto, dicebat *Oremus*, nihil addens; omnes sub silentio orabant, dum fidelium oblationes acceptæ in altare ponebantur. Tempore S. Aug. mos apud Carthaginem introductus, et inde per totam ecclesiam Latinam diffusus est, ut hymni dicerentur de Psalmorum libro; S. Aug. *Retract.* l. 2, cap. 11, t. 1. In Antiphonario S. Greg. notantur versus cantandi quorum primus erat antiphona, quæ inter versus repetebatur donec absolveretur oblatio: suppressa oblatione omissi sunt versus, etsola retenta est antiphona, nunc vocata offertorium.

Vestigium antiqui moris oblationes ad offertorium præsentandi remansit in ordinationibus, in episcoporum consecratione, in abbatis et abbatissæ benedictione, et, in quibusdam locis, ad missam pro defunctis. Dabatur os,



culum pacis iis qui oblationem suam præstabant : inde usus præsentandi annulum deosculandum in ordinationibus. Quidam sacerdotes præsentabant populo aliquid offerenti patenam osculandam : S. Pius V id prohibuit. Apud quosdam est in usu deosculari rem offerendam et manum celebrantis, quod Gavanto et Merati non videtur inconueniens, modo id non fiat in missis defunctorum, et mulieres ab osculo manus celebrantis abstineant.

Eulogiæ, vulgo *pain bénit*, sunt etiam quoddam antiquarum oblationum vestigium : vetustissimi sunt usus, tum in Orientali, tum in Occidentali ecclesia : olim distribuebantur in fine missæ, vice communionis sacramentalis, in signum unionis inter fideles. Nunc intra missam distribui solent, et communius in principio missæ offeruntur ac benedicuntur. Patena offerenti deosculanda præsentari non debet, sed crux aliave imago sacra, exceptis missis defunctorum.

24° *Orationes Suscipe... Offerimus... In spiritu humilitatis... et Veni, sanctificator...* quasi de verbo ad verbum in missali Mozarabico inveniuntur : unde circa finem undecimi sæculi in missam Romanam transierunt. In duodecimo sæculo altera oratio, nempe *Suscipe, sancta Trinitas*, quæ Mediolani et in pluribus Galliarum ecclesiis antiquitus usitata erat, missam Romanam similiter ingressa est. Antea nulla fiebat oratio super oblata usque ad secretam.

25° *Deus qui humanæ*. Hæc oratio in Sacramentario S. Greg. pro die Natalis Domini invenitur, exceptis his verbis, *per hujus aquæ et vini mysterium*, et in missa ab Illyrico data ; sed in Ordine Romano ante sæculum decimum quartum non reperitur. Dicenda est benedicendo aquam vino immiscendam, nisi alia instituta sit formula pro missa solemni, ut apud nos. Dicimus enim, *de latere Domini*, etc. loco *Deus qui humanæ*, etc.

26° *Lavabo*, etc. Antiquissimi est usus lavare manus sub missa ; sed mos eas, oblatione facta, lavandi, dicendo, *lavabo manus meas*, etc, non ascendit ultra decimum quartum sæculum, et non fuit generaliter receptus in

Ecclesia Latina ante decimum quintum sæculum. Ita *Romsée*, t. 4. Sed in missa S. Chrysost. apud Goar, lotio et *lavabo* in extenso sicut apud nos præscribuntur in initio missæ; in Ordine Romano VI, statuitur ut episcopus se-deat, duo acolythi genuflectentes sinum ejus manutergio cooperiant, et tertius, aquam ministraturus, in medio eorum genuflectat. Hinc factum est ut, qui dat aquam episcopo ad lavandum, adhuc genuflectat. A nono sæ-culo manuum lotio fieri solet post oblationem et incen-sationem; P. *Le Brun*, t. 1.

27º *Orate, fratres.* Post lotionem, dicta oratione *Suscipe, sancta Trinitas*, de qua supra, celebrans versus ad popu-lum, hortatur eum ad orandum, dicens media voce, *Orate, fratres*, etc. Olim dicebatur tantum *Orate*, ut in Or-dine Romano II, n. 9, habetur; et assistentes nihil re-spondentes secreto orabant. In Ordine Romano VI, n. 10, legitur, *Orate pro me*, et missa Illyrici, quæ est saltem decimi sæculi, legitur, *Orate pro me peccatore, fratres et sorores, ut meum et vestrum*, etc. *Martène*, t. 1. Legi-tur etiam responsio, *Suscipiat*, etc. Attamen hujus peti-tionis et responsionis usus non fuit communis, donec in missali Romano adoptatus fuerit, anno 1551. Carthusiani et Cistercienses eum adhuc non sequuntur.

28º *Secreta.* Quidam volunt hanc orationem dici se-cretam a verbo *secerno*, quia super oblationes consecran-das, et non super alias pronuntiatur; sed multo commu-nius et probabilius docetur eam sic vocari, quia secreto dicenda est; tum quia cantus offertorii usque ad præfa-tionem sæpe protrahitur; tum ut celebrans magis sit re-collectus: non præmittitur *oremus*, quia ante offertorium dictus est, et aliunde populus ad orandum sufficienter invitatur per *Orate fratres*. Hæc oratio ejusdem est anti-quitatis ac collecta, et in Sacramentariis S. Greg. et S. Gelasii exprimitur tanquam super oblationes dicenda. Si plures sint, sacerdos primam concludendo, sibimetipsi respondet *Amen*. In ultima autem conclusione, quasi di-vino amore flagrans, in altam vocem erumpit, dicens vel cantans, *Per omnia sæcula sæculorum*; et omnis populus

accinit dicens *Amen*. Verba ista, propter cantum, præfationi junguntur, et reipsa tamen ad secretam pertinent.

29° *Præfatio*. Præfatio idem significat ac prælocutio, et adhibetur ut celebrantis et assistantium mentes ad choros Angelorum erigantur, et ad tremenda quæ perficienda sunt mysteria præparentur. Antiquissimæ est institutionis, siquidem inveniuntur præfationes fere singulis missis propriæ in Sacramentariis S. Greg. et S. Gelasii; antiquiores auctores eas commemorant ut consuetas, v. g. auctor Constit. Apost. l. 8, cap. 16, S. Cyp. l. de Orat. Domin. « Sacerdos ante orationem, præfatione præmissa, parat fratrum mentes dicendo, *Sursum corda*; ut, dum respondet plebs, *Habemus ad Dominum*, admoneatur nihil aliud se quam Dominum cogitare debere. » Reperiuntur in omnibus liturgiis, tum Orientalibus, tum Occidentalibus: ab ipsis ergo Apostolis vel ab Apostolicis viris usus earum fuit institutus.

In decimo vel undecimo sæculo numerus præfationum ad novem fuit reductus, nempe pro Pascha, Ascensione, Pentecoste, Natali Domini et Epiphania, pro festis Apostolorum, pro sanctissima Trinitate, pro Quadragesima et Passione. Concilium Londinense, anno 1175 celebratum, cæteras prohibuit, et has novem dicendas statuit; eis addita est communis quæ est antiquior, et postea præfatio B. Virginis Mariæ, quæ Urbano II, in fine undecimi sæculi, tribuitur: tales sunt præfationes quæ in missali Romano reperiuntur.

30° *Sanctus*, etc. est hymnus adorationis, ex Isai. vi, 3, et Apoc. iv, 8, eductus, qui est publica fidei in sanctissimam Trinitatem professio: vocatur *trisagium*, a verbo græco Τρισάγιος, *ter sanctus*, quod est nomen Deo proprium. In cunctis et antiquissimis liturgiis Latinis, Græcis, Syriacis, etc. invenitur. Olim ab omnibus inclinatis alta voce dicebatur vel cantabatur: ideo sacerdos, eum dicendo, nunc profunde se in signum adorationis inclinat. Subsequitur versus jubilationis, *Benedictus*, quem dicens sacerdos se erigit et signat: missale fratrum Prædicatorum præscribit ut omnes qui sunt in choro pariter se signent ad *Benedictus*.

*Hosanna* est vox Hebræa acclamationis, significans : Salva, quæso, vel simpliciter salus; sensus igitur est : salus illi qui habitat in excelsis. Vox illa in propria lingua servatâ est, sicut *amen* et *alleluia*, quia perfecte converti non potest.

Dum cantatur vel dicitur *Sanctus*, pulsatur campanula, ut moneantur fideles majorem adhibendam esse attentionem. Ita communiter recentiores liturgistæ.

31° *Canon missæ*. Vox Græca Κεϋων proprie significat arundinem rectam qua, velut regula, sæpe utuntur artifices ad aliquid metiendum : per metaphoram adhibita est in conciliis, ad exprimendum fidei articulum ita statutum ut sit immutabilis, et in liturgia ad designandam eam missæ partem quæ consecrationem sub utraque specie continet, et variari non debet. Incipit a *Te igitur*, et terminatur immediate ante Orationem Dominicam. Vocatus est canon preces, oratio, textus canonicæ precis, et a multis dictus est actio, qua voce utitur missale Romanum indicando *Communicantes*; dicit quippe, *infra actionem*.

Canon missæ, prout eum habemus, in Sacramentario S. Gregorii reperitur; excepto quod in oratione *Communicantes* plura sint nomina sanctorum : ab eo tempore igitur fuit invariabilis. A quo fuerit compositus, non convenit inter doctores : S. Isidorus eum tribuit B. Petro; S. Greg. dicit factum fuisse a Scholastico, quem aliter non nominat. Sed Concil. Trid. sess. 22, cap. 4, de illo hæc habet : « Is enim constat cum ex ipsis Domini ver- » bis, tum ex Apostolorum traditionibus, ac sanctorum » quoque pontificum piis institutionibus. » Diversos ergo habuit auctores, et in diversis temporibus fuit conditus.

Idem non erat canon in veteribus Ecclesiæ Gallicanæ liturgiis, nec unicus, sed proprius et brevissimus ad singulas missas, ut refert *Martène*, t. 1.

32° *Te igitur*. In ea oratione, quæ fit cum signis crucis super oblata, oratur specialiter et nominatim, 1° pro papa sedem Petri tunc occupante, qui nominatur : hæc consuetudo est antiquissima, et diu in Ecclesia Græca sic-



ut in Latina exstitit. Notatur in historia ecclesiastica, ut factum gravissimi momenti, quod Dioscorus, Alexandrinus patriarcha, nomen S. Leonis papæ e sacris diptychis tollere ausus fuerit, anno 449. Alia facta similiter demonstrant in Orientalibus ecclesiis usum primitus exstistisse papam in missa nominandi. Apud Latinos, concil. Vasionense, in Gallia anno 529, jussit *ut nomen papæ, quicumque Apostolicæ sedi præfuerit, in ecclesiis nostris recitetur* (cap. 4). 2º Pro episcopo diœcesis in qua celebratur: hoc in omnibus sacramentariis et liturgiis reperitur. 3º Græci semper hic nominaverunt imperatorem: pleræque Latinæ ecclesiæ, ex apostolica traditione, nominant regem cui subjiuntur; volebat enim B. Paulus, I Tim. II, ut fierent orationes *pro regibus et omnibus qui in sublimitate sunt*. Verba *pro rege nostro N.* reperiuntur in Sacramentario S. Greg. suppressa sunt in missali Romano, edito Romæ sub Pio V, anno 1570, et sub Clemente VIII, anno 1604; forte quia ecclesiæ status ecclesiastici regi a papa diverso non subjiuntur: reperiuntur vero in eodem missali ad usum ecclesiarum Galliæ et Hispaniæ impresso. *Romsée* testatur, t. 4, nomen regis exprimi in Hispaniis ex concessione S. Pii V, et in Galliis ex inveterata consuetudine. Extra hos casus, nomen alterius personæ, cujuscunque gradus aut dignitatis, hic absque indulto pontificio exprimere non licet.

33º *Memento* (pro vivis). In ea oratione, post verba *famulorum famularumque tuarum*, nomina eorum pro quibus specialiter orandum erat, alta voce legebantur a sacerdote in missa privata, et a diacono vel subdiacono in missa solenni, juxta P. *Martène*, t. 1. Hic usus adhuc vigeat in undecimo sæculo, ut colligi potest ex Micrologo, cap. 13; sed paulo post totaliter fuit extinctus, propter abusus: plures enim dona offerebant ex vanitate, ut nomina eorum publice legerentur; et qui non nominabantur, id ægre ferebant. Ideo præscripsit Ecclesia ut commendatio fieret secreto; nequidem necesse est ut nomina voce articulata exprimantur, et vocibus, *qui tibi offerunt*, quæ solæ dicebantur, additæ sunt voces, *pro qui-*

*bus tibi offerimus, vel, etc.* Particula *vel* est conjunctiva pro *et*, non vero disjunctiva.

34° *Diptycha*. Hoc verbum a vocibus græcis δις, bis, et πτυχή, plica, veniens, significabat tabellam bis plicatam, ita ut tres columnas exhiberet lectori. In prima, scripta erant nomina episcoporum qui eam ecclesiam rexerant et sanctis moribus claruerant; in secunda, nomina personarum adhuc viventium, dignitate vel beneficiis ecclesiæ collatis conspicuarum, nempe Romani pontificis, proprii antistitis, principis, magistratuum, eorum qui oblationibus ad sacrificium concurrebant, et quandoque conciliorum generalium; in tertia, nomina eorum qui in fide catholica decesserant. Prima columna dicebatur diptychum sanctorum; secunda, diptychum viventium, et tertia, diptychum mortuorum. Omnia hæc nomina publice legebantur, et idcirco oratio *Memento* vocabatur oratio super diptycha.

Qui in diptycho sanctorum intra missæ canonem legendo inscripti erant, dicebantur canonizati: hinc nomen canonizationis adhuc existens pro alicujus in fastis sanctorum inscriptione.

Quædam veterum diptychorum vestigia in canone nostro remanent, ut notat *Romsée*, t. 4; in *memento* quippe vivorum litteræ N. et N. locum tenent nominum quæ olim alta voce legebantur, et quæ nunc vel secreto vel sola mente referuntur. In orationibus *Communicantes* et *Nobis quoque peccatoribus*, est imago diptychi sanctorum, et *Memento* defunctorum supplet tabellam in qua scripta erant nomina mortuorum. Litteræ N. et N. nunc inutiles, cum negligantur, et oratio pro mortuis fiat tantum post verba *in somno pacis*, sunt testimonium antiquitatis.

35° *Communicantes*. Hæc oratio inscribitur *infra actionem*, quia intra canonem, qui est actio sacrificii, dicitur: vox *communicantes* exprimit communionem, seu unionem communem cum sanctis in cælo regnantibus, quorum memoria veneratur, et simul cum fidelibus in terra viventibus. Nominantur B. Virgo Maria, duodecim

Apostoli et duodecim Martyres; nulli vero confessores: unde concluditur hanc canonis partem, quæ integra est apud S. Greg. scriptam fuisse antequam alii sancti Albo sanctorum solemniter adscriberentur.

In Ecclesia tum Græca tum Latina, mos olim fuit ut sanctus cujus agebatur festum hic nominaretur: hæc institutio tribuitur Gregorio III. In nonnullis veteribus sacramentariis, post nomina SS. Cosmæ et Damiani, inveniuntur nomina quorundam aliorum sanctorum, v. g. SS. Hilarii, Martini, Augustini, Gregorii, Hieronymi, Ambrosii, Benedicti, Isidori.

In missali Romano speciales sunt Communicantes pro feria quinta in cœna Domini, et pro quinque solemnioribus festis, nempe Nativitate Domini, Epiphania, Pascha, Ascensione et Pentecoste.

36° *Hanc igitur.* Ante decimum quintum sæculum celebrans, hanc dicendo orationem, manus extensas habere pergebat: nunc vero, a trecentis circiter annis, eas super oblata tenet expansas, sicut veteris Legis sacerdotes illas super victimam ponebant, ad proprias vel alienas iniquitates in eam transferendas. Hæc oratio est in Sacramentario S. Greg. et in aliis veteribus.

37° *Quam oblationem.* Hæc oratio reperitur in Sacramentariis S. Greg. S. Gelasii et in aliis, cum paucis varietatibus circa cruces. De illa nihil ultra dicemus, neque de verbis consecrationis, quia in prima parte hujus tractatus, ubi de forma Eucharistiæ, de illis sufficienter egimus.

38° *Elevatio hostiæ et calicis.* In omnibus liturgiis mos semper fuit corpus et sanguinem Domini post consecrationem adorare, sed idem non semper fuit modus. Usque ad sæculum undecimum omnes ab initio canonis inclinabant se, supremam adorantes Majestatem; sic perseverabat usque post Orationem Dominicam: tunc aliquantula fiebat elevatio hostiæ cum calice, sicut hodie, dicendo, *omnis honor et gloria, vel per omnia sæcula sæculorum*, ut habetur in Micrologo, cap. 7.

In undecimo sæculo, quando insurrexerunt Berengarii,

incœpit consuetudo quæ postea formata est in Gallia, in Germania et Romæ, hostiam et calicem, post consecrationem, separatim elevandi, et tintinnabulum ter pulsandi, ut omnes, vel genuflexi, vel facie in terram prostrati usque ad *Pater*, sacras species adorarent. Nihilominus calix et hostia, ante *Pater*, ad verba *omnis honor et gloria*, paulatim elevantur, et tintinnabulum denuo agitur, ut iterum adorentur : est parva elevatio.

Apud Græcos immediate ante communionem elevatur hostia ut adoretur ; diaconus clamat, *Attendamus*, et celebrans respondet, *Sancta sanctis*. Sic populus ut ad sacram synaxim cum debita reverentia accedat monetur.

39° *Unde et memores*. Carthusiani, Carmelitæ et Dominicani hanc orationem dicunt manibus seu brachiis in forma crucis extensis; ut memoriam passionis Christi verius exprimant : id olim in pluribus Galliæ ecclesiis similiter fiebat, et nunc fit Lugduni, Senonibus, etc. Ille ritus Romæ non fuit acceptus.

40° *Supra quæ propitius*. Hæc oratio est antiquissima, cum non tantum, sicut præcedens et sequens, in Sacramentario S. Gregorii inveniatur, sed in liturgiis SS. Petri et Basilii, quoad substantiam : attamen ultima verba, *sanctum sacrificium, immaculatam hostiam*, tribuuntur S. Leoni, in quinto sæculo sedem apostolicam tenenti.

41° *Supplices*. In Ordine Romano XIV, Musæo Italico, præscribitur ut celebrans hanc dicendo orationem se inclinet et habeat brachia in modum crucis posita, *ita quod dextrum brachium sit supra sinistrum*, ut in multis missalibus antiquis legitur : quidam regulares, nempe Carmelitæ et Prædicatores seu Dominicani, sic agunt. Verum, his exceptis, omnes, manibus junctis et in altare positis, profunde se inclinant, dicentes : *Supplices te rogamus*, etc.

42° *Memento pro defunctis*. In ea oratione, ut jam monuimus, loco litterarum N. et N. nominabantur mortui pro quibus specialiter orandum erat. Antiquissima est praxis Ecclesiæ sacrificium missæ pro animabus defunctorum offerendi et eas commendandi, ut constat exemplis a nobis superius allatis. Nunc mortui pro quibus missæ



sacrificium offertur nominari non solent, et litteræ N. et N. in nonnullis missalibus supprimuntur.

Apud quosdam Orientales, nempe Syros, Maronitas, Æthiopes et Alexandrinos, B. Virgo Maria nominatur in Memento defunctorum, ex errore; quia hi populi, licet Virginem Mariam sanctam putent eamque invocent, persuasum habent eam cum animabus sanctorum in paradiso terrestri usque ad diem resurrectionis detineri: orant igitur pro futura ejus glorificatione. Sic pariter SS. Hilarius, Martinus et Athanasius in missali Mozarabico commendantur, non ut a pœnis purgatorii liberentur, sed ut quoddam gloriæ accidentalis augmentum obtineant, vel ad gratias Deo pro beneficiis eis collatis agendas; Card. Bona, l. 2, cap. 14, n. 4.

43° *Nobis quoque peccatoribus.* Post defunctorum commendationem, conveniens est ut celebrans pro se et pro aliis viventibus deprecetur; se aliosque peccatores esse confitetur, pectus in signum doloris sicut Publicanus tundit, et vocem elevat, ut adstantes ad dolorem et tusionem pectoris excitet. Micrologus dicit, cap. 17, ad prædicta verba vocem esse elevandam, et Innocentius III, l. 5, Mysteriorum missæ, docet pectus esse tundendum, ad repræsentandam contritionem et confessionem latronis in cruce.

Verba, *Per quem hæc omnia creas*, etc. canonem missæ terminant: hic ex antiquis missalibus et liturgiis, ut probat Card. Bona, l. 2, cap. 14, n. 5, celebrans novos fructus et alia quælibet usibus humanis destinata, v. g. legumina, mel, lac, carnes, poma, uvas, etc. benedicere consueverat, et formam benedictionis clausula solita terminans, *per Dominum nostrum Jesum Christum*, addebat, *per quem*, etc.

Hic feria V in cœna Domini oleum infirmorum episcopus benedicit, et papa agnum paschalem.

44° *Oratio Dominica.* In omnibus liturgiis, etiam vetustissimis, Orientalibus et Occidentalibus, semper dicta est Oratio Dominica ante communionem: unde merito concluditur hanc praxim institutionis esse Apostolicæ,

Brevis præfatio, ad excitandam celebrantis et fidelium attentionem idonea, Orationem Dominicam antecedit.

Olim pluribus in locis, et nunc etiam apud Græcos, populus Orationem Dominicam sicut Symbolum fidei canebat; mos semper fuit Romæ ut solus celebrans prædictam orationem diceret vel cantaret: sed populus ultimam pronuntiabat petitionem: ideo nunc minister vel cantores dicunt alta voce, *Sed libera nos a malo*, et sacerdos secreto respondet *amen*.

Interea patena a subdiacono, deinde a diacono elevata, populo ostenditur, ut qui communicaturi sunt, se præparent et accedant. In ecclesia Romana et in pluribus aliis, v. g. in Senonensi, in Claromontana, etc. hæc cæremonia omittitur utpote nunc inutilis.

45° *Libera nos, quæsumus*. In quibusdam antiquissimis sacramentariis sacerdos, post Orationem Dominicam, non respondet *amen*, sed immediate dicit, *Libera nos*, etc. sumpta patena vel a diacono accepta, eam subtus hostiam ponit. Post invocationem S. Andreæ, invenitur S. Stephanus in Sacramentario S. Greg. et P. *Ménard*, n. 87, asserit olim licuisse sacerdoti quoslibet sanctos, pro sua devotione, hic addere, quod certe nunc illicitum est.

46° *Fractio hostiæ*. Ritus frangendi et dividendi hostiam tam antiquus est quam ipsum sacrificium: Christus fregit panem, et in fractione panis, post suam resurrectionem, duobus discipulis se manifestavit; Apostoli erant perseverantes in orationibus et fractione panis. Successores eorum idem fecerunt et mos ille nunquam desiit. Hæc autem divisio hostiæ cultro aliove instrumento nunquam peracta est, sed more Christi et Apostolorum per fractionem manibus factam.

Hostia apud Græcos in novem rumpebatur partes, in memoriam Christi et sanctorum; in ritu Mozarabico etiam in novem, in memoriam novem mysteriorum Christi. Nunc Græci eam in quatuor dividunt partes, ut videre est apud Goar: una pars immittitur in calicem; secundam sumit celebrans, tertiam dividit in communionem populi, et quartam pro infirmis reservat.

Ex Micrologo, cap. 17, hostia in tres dividenda erat partes, quarum una immittebatur in calicem, alia ad communionem celebrantis inserviebat, et tertia in communionem populi et infirmorum subdividenda erat. Ad memoriam veteris hujus consuetudinis, in consecratione episcopi, consecrans unam partem hostiæ a se consecratæ immittit in calicem, secundam sumit et tertiam episcopo consecrato tribuit.

Quo tempore autem celebrans totam hostiam sibi reservare incœperit, non constat : morem veterem adhuc viguisse in undecimo sæculo colligitur ex Micrologo. Verum ab illo tempore, sacerdotibus et missis privatis admodum multiplicatis, usus de hostia celebrantis communicandi penitus cessavit ; et Durandus, in decimo tertio sæculo scribens, loquitur de more nostro communicandi in missa tanquam in omni Ecclesia Latina recepto ; Rationale div. off. l. 4, cap. 51, n. 1 et seq.

Pro fidelium et infirmorum communione minores formulæ consecrantur et in ciborio reservantur : in casu necessitatis, nihil vetat quominus pars hostiæ sacerdoti destinatæ ad dandum viaticum periclitanti reservetur.

47° *Commixtio specierum.* Ex constitutionibus summorum pontificum Melchiadis, Siricii et Innocentii I, apud *Coustant*, patet antiquum exstitisse usum ut papa et alii Italiæ episcopi aliquas portiones hostiæ a se consecratæ singulis diebus dominicis ad presbyteros titulares sibi subjectos in signum unionis mitterent. Papa et episcopi, ante quartum sæculum, hujusmodi sacras particulas ab ecclesiis remotis accipiebant. Sanctissimæ illæ portiones dicebantur *fermentum*, quia velut fermentum unionis et charitatis inter papam, episcopos et presbyteros habebantur, et manifesta demonstratio idem ubique offerri sacrificium. Quandoque particula ab ipso celebrante in futurum sacrificium reservabatur, ut in Ordine Romano I, n° 18, supponitur.

Qui sanctam habebant particulam, eam reverenter in capsula reservatam, super altare die dominica ante sacrificium depositam, adorabant in initio missæ, et in fine

orationis *Libera nos*, eam in calicem commiscebant, dicentes : *Pax Domini*, etc. Venerabili illa consuetudine abolita, nihilominus permansit usus particulam hostiæ in calicem immittendi, dicendo : *Pax Domini*, etc.

Adduntur verba, *Hæc commixtio*, etc. quæ in antiquis Ordinibus Romanis, in Amalario et in Micrologo reperiuntur, desunt vero in pluribus sacramentariis et missalibus, v. g. in Sacramentario S. Greg.

48° *Agnus Dei*. Illa oratio, sine *Miserere nobis*, reperitur in Sacramentario S. Greg. sed doctissimus *Mabil- lon*, Comment. in Ordine Romano, pag. 55, arbitratur illam fortasse a solis cantoribus dictam fuisse. Fertur Sergium I, anno 687, statuisse ut a clero et populo ter diceretur, et in fine adderetur, *miserere nobis*. Ad hæc verba pectus in signum compunctionis tundebatur. Verba, *Dona nobis pacem*, nonnisi in duodecimo sæculo verbis *miserere nobis*, pro ultima vice, substitui cœperunt. Hinc provenit mos pectus tundendi etiam dicendo, *Dona nobis pacem*, ex veteri usu. In missis defunctorum dicitur, *Dona eis requiem*, et pectus non tunditur.

49° *Oratio pro pace et osculum pacis*. Dicto *Agnus Dei*, celebrans dicit orationem, *Domine Jesu Christe, qui dixisti apostolis tuis*, qua postulat pacem Christi [pro tota Ecclesia. Hæc oratio in Ordine Romano non existebat tempore quo scriptus est Micrologus, circa annum 1090, sed in missa Illyrici et in Sacramentario Trevirensi decimi sæculi reperitur, non vero in antiquioribus missalibus.

Finita oratione, sacerdos, accepta pace Christi per osculum altaris eam dat diacono, diaconus subdiacono, et subdiaconus cæteris. Christus post resurrectionem suam discipulos salutavit, dicendo eis : *Pax vobis*; alibi dixerat : *Pacem relinquo vobis; pacem meam do vobis*. B. Paulus hortabatur fideles ut se invicem salutarent, in osculo sancto, I Cor. xvi, 20. Hinc in signum mutæ sanctæque charitatis mos invaluit ut fideles in fine missæ, ante communionem, se invicem modeste oscularentur; viri viros, sicut fratres, et feminae feminas, sicut sorores;



et ob hanc causam præcipue uterque sexus erat separatus, viri in una parte ecclesiæ et feminæ in altera parte. Ille usus adhuc vigeat in duodecimo et decimo tertio sæculo : de eo quippe loquuntur Innocentius III, anno 1198 electus, et Durandus, l. 4, cap. 53, n. 9, ubi dicit : « Viri et mulieres non sibi invicem osculum in ecclesia porrigunt, ne forte aliquid lasciviæ subrepat... » propter quod situ sequestrantur locali. »

In cunctis ecclesiis usum missalis Romani habentibus pax semper datur per osculum etc. Si insignes quidam adsint laici in choro, ut principes, magistratus, etc. pax eis præstanda est cum instrumento. Sacra Rituum Cong. die 22 aprilis, 1690.

In aliis vero ecclesiis a seculo decimo tertio grassari cœpit consuetudo instrumentum ad dandam pacem adhibendi et solis in choro assistantibus præsentandi. Imo nunc instrumentum pacis solis præsentatur in choro assistantibus.

Osculum olim per applicationem oris ad os dabatur : in missali enim Gothico-gallicano, a P. Mabillon edito, petitur a Deo, ut osculum quod in labiis datur, cordibus non negetur : nunc vero præscribitur ut dans et recipiens pacem genas sinistras ad invicem admoveant, se leviter tangentes physice, juxta Merati et Cavalieri, vel saltem moraliter, quod sufficiens æstimat Romséc.

In missa ordinationis pax per osculum hodie, sicut olim, datur.

In multis Galliarum ecclesiis celebrans accipiebat pacem Christi, non ab altari, ut hodie, sed ab ipsa hostia, quam deosculabatur : sic habent Durandus, l. 4, cap. 53, n. 1, et multa missalia a decimo tertio usque ad decimum septimum sæculum. P. Le Brun.

Diu, saltem in pluribus ecclesiis, pax dabatur ad hæc verba, *Pax Domini sit semper vobiscum.*

Cum illa cæremonia sit testimonium vinculi pacis inter fideles, omittitur in missis defunctorum sicut et præcedens oratio.

50° *Orationes ante communionem.* Statim post osculum pacis sacra distribuebatur communio; sed pietas quo-

rundam sacerdotum plures induxit orationes devotas, quæ essent quasi immediata ad communionem præparatio : abhinc 700 vel 800 annis Ecclesia duas elegit, et ab omnibus dicendas serius præcepit. Ambæ inveniuntur in missa Illyrici; prima tantum in missali Romano anni 1158, et in liturgia Carthusianorum ac Dominicanorum : eam solam suo tempore recitari testatur Micrologus, cap. 18. Sed Durandus, l. 4, cap. 53, n. 8, supponit tres suo tempore dici consuevisse orationes quas hodie habemus. Unde concluditur eas in ritu Romano insertas fuisse versus decimum tertium sæculum.

51° *Communio celebrantis.* Sacerdos, hostiam accipiens, dicit *Panem cœlestem* : in missa Illyrici et in multis antiquis missalibus alia sunt verba præsentiam realem manifeste exprimentia, quibus subjungebatur sequens salutatio : *Ave in ævum, sanctissima caro, mea in perpetuum summa dulcedo.*

Oratio *Domine, non sum dignus*, ter repetita, licet actioni faciendæ optime congruens et apud Origenem, Homil. 5 in Evang. memorata, non invenitur in ordinibus Romanis sæculo decimo quarto anterioribus, nec illius mentionem facit Micrologus; sed de illa tanquam consueta loquitur Durandus, l. 4, cap. 54, n. 10 et 11.

Parvæ orationes, *Panem cœlestem*, et *Quid retribuam*, in missa Illyrici leguntur. Duæ aliæ, *Corpus Domini nostri*, et *Sanguis Domini nostri*, ibidem inveniuntur quoad substantiam, non vero in antiquis ordinibus Romanis. Eas supponit usitatas Durandus, exceptis verbis, *Sanguis Domini*.

Quoad modum communicandi, si multi essent communicaturi, plures consecrabantur hostiæ; secus, omnes ex hostia celebrantis communicabant, in ordine sequenti, juxta Const. Apost. l. 8, cap. 1, presbyteri, diaconi, subdiaconi, lectores, cantores, monachi, diaconissæ, virgines, viduæ, pueri et omnis populus. « Presbyteri » et diaconi, osculando episcopum, corpus Christi ab eo » manibus accipiant : subdiaconi autem osculando » num episcopi, ore accipiant corpus Christi ab eo. » Sunt verba VI Ordinis Romani, apud Mabillon, n. 12.

In communione sub specie vini, episcopi portionem vini consecrati sumentes, particulam cum reliquo vini consecrati relinquebant in calice pro diacono et subdiacono; quem ritum pontifex Romanus in missa solemnī adhuc sequitur: diaconus sanguinem eadem parte calicis sumebat, et subdiaconus ope fistulæ. Eodem modo cæteri pretiosum sanguinem pluribus in locis sumebant, fistula in calice usque ad finem communionis remanente, quæ postea dabatur diacono purificanda; Ord. Rom. VI, n. 13.

*Notandum*, fideles olim consuevisse, ante corporis Christi susceptionem, dicente sacerdote, *Corpus Domini nostri*, etc. respondere *Amen*, ut testatur S. Aug. variis in locis, v. g. Sermone 272, 1 part. *Audis Corpus Christi, et respondes Amen*; et, dicente diacono, sanguinem præbente, *Sanguis Christi, calix vitæ*, similiter assentire, dicendo *Amen*, id est, Verum arbitror. Quanto autem tempore ille ritus perseveravit, non constat: probabile æstimatur illum desiisse in duodecimo vel decimo tertio sæculo, quando cessavit usus communionem fidelibus sub utraque specie dandi.

52º *Ablutiones*. Usque ad decimum tertium sæculum, ablutiones post communionem non erant determinatæ ut fiunt hodie: sacerdos simpliciter manus lavabat et aqua lotionis in sacram piscinam mittebatur: sic omnes antiqui liturgistæ, et Innocentius III, nondum summus pontifex, in tractatu *Mysteriorum*, in fine duodecimi sæculi scribens. Sed idem Innocentius, factus summus pontifex, anno 1212, ad episcopum Magalonensem, nunc Montepessulanum, respondens, præscribit ut celebrans ablutionem calicis cum vino semper agat, eamque sumere non omittat, nisi secundam missam eadem die celebrare debeat. De duplici ablutione cum vino loquitur S. Th. 3 part. q. 83, art. 5 ad 10. In concilio Coloniensi, anno 1280, præscripta est purificatio cum vino et aqua: ex eo tempore ritus duplicis ablutionis, unius cum vino, ad purificandum os et calicem, et alterius cum vino et aqua, ad abluendos digitos, factus est communis.

Oratio, *Quod ore sumpsimus*, reperitur in missali Co-

thorum, ante Carolum Magnum existente, in missa Illyrici; indicatur in Ordine Romano IV, et Micrologus notat eam, ex Ordine Romano, dicendam esse secreto; est igitur antiquissima, sicut et posterior, *Corpus tuum*, quæ in missa Gothico-gallicana, pro die Natalis Domini, reperitur quoad substantiam. Verum illæ orationes ablutionibus supra expositis primitus non applicabantur.

53° *Communio*. Sic vocatur antiphona quæ olim inter versus psalmi qui tempore communionis fidelium cantabatur, iterari solebat, usque dum celebrans signo indicaret dicendum esse *Gloria Patri*. Ita expresse statuunt vel supponunt Ordines Romani a secundo usque ad sextum. Hæc consuetudo adhuc vigeat in undecimo sæculo, quando scriptus est Micrologus. Sed paulo post factum est ut sola antiphona, post communionem, in gratiarum actionem cantaretur. Additur oratio apud nos vocata postcommunio, quæ in veteribus sacramentariis inscribitur *ad complendum*, quia ultima dicitur, et postea missale plicatur.

54° *Ite, missa est*. Missa finita, celebrans ultima vice salutatur populum, per *Dominus vobiscum*; deinde ipse vel diaconus alta voce annuntiat missam esse finitam, dicendo: *Ite, missa est*.

Hic modus dimittendi populum est antiquissimus: voces, *Ite, missa est*, leguntur in primo Ordine Romano, qui est saltem nono sæculo anterior, et ætatem Gregorii Magni sapit, inquit *Mabillon*, in Admonitione et aliis in sequentibus. A sabbato Sancto ad sabbatum proxime sequens, propter solemnitatem Paschæ, post *Ite, missa est*, duo adduntur *alleluia*, secundum ritum Romanum, quibus a populo, vel a ministro, nomine populi, respondetur, *Deo gratias, alleluia, alleluia*.

Ab undecimo sæculo cœptum est dicere *Benedicamus Domino*, loco *Ite, missa est*, in missis ferialibus, tempore Quadragesimæ; deinde in omnibus missis in quibus hymnus angelicus, *Gloria in excelsis Deo*, non erat dicendus; quia dimissio populi, per *Ite, missa est*, judicabatur solemnibus et missis ferialibus non congruens: Micro-



logus, anno 1090 scriptus, primus hanc tradit regulam.

Apud Græcos dicitur, *Ite in pace*, vel *In pace procedamus*.

Quoniam post missam defunctorum solemniter celebratam aliud communiter sequitur officium, vel sepultura, vel absolutio, populus non dimittitur, et ideo non dicitur *Ite, missa est*, sed *Requiescant in pace*, et respondetur *Amen*.

Propter eandem rationem in prima missa Nativitatis Domini olim non dicebatur, *Ite, missa est*, sed *Benedicamus Domino*, quia sequuntur Laudes. Ita Micrologus. In plerisque Galliarum ecclesiis incipiuntur Laudes antequam missa terminetur, et post earum conclusionem, dimittitur populus per *Ite, missa est*.

55° *Placeat*. In nono sæculo verba *Ite, missa est* dicebantur absolutio, id est, finis missæ; nihil enim addebatur: populus respondebat *Deo gratias*, et discedebat. Oratio *Placeat* in multis invenitur sacramentariis noni sæculi et posterioribus; verum ad missam non pertinebat. « Finis omnibus, osculatur altare sacerdos, dicens: *Placeat tibi, sancta Trinitas*. Deinde sacris vestibus se exuens, etc. » ait Micrologus, cap. 22. Habebatur ergo ut privata sacerdotis oratio.

Notatur in Ordine Romano XIV, et in missali Romano sub S. Pio V reformato, præscribitur ut pars missæ: saltem ab eo tempore ad missam pertinet.

56° *Benedictio*. Olim ab episcopo celebrante sollemnis dabatur benedictio post Orationem Dominicam, ante communionem, et statim dimittebantur fideles qui non erant communicaturi, juxta hæc verba ad exorcistas ordinandos: *Oportet dicere populo ut qui non communicat, det locum*. Concilium Tolet. IV, an 633, præscribit ut, « Post Orationem Dominicam, et conjunctionem panis et calicis, benedictio in populum sequatur. » In ritu Mozarabico et Gallicano benedictio episcopalis ante communionem dari consueverat, ut probat Mabillon, de Liturg. Gal. Hæc benedictio adhuc est usitata in pluribus Galliarum ecclesiis.

In Sacramentario S. Greg. reperitur benedictio unicuique missæ propria, similiter et in multis veteribus liturgiis : at illæ benedictiones sunt tantum orationes super populum recitandæ, similes ei quam in feriis quadragesimalibus ante *Benedicamus Domino* recitare soleamus.

In primis Ordinibus Romanis legitur quod, papa vel episcopo, missa finita, ab altari descendente in presbyterium sive sacristiam, episcopi primum, dicant, *Jube, domine, benedicere* ; resp. *Benedicat nos Dominus* ; resp. *Amen*. Post episcopos, presbyteri ; post presbyteros, monachi ; deinde schola, etc. idem faciebant.

P. *Le Brun* probat, simplices presbyteros hujusmodi benedictionem ante sæculum undecimum nunquam edisse, sed eo tempore, ex canone concilii Aurelianensis, anni 511, male intellecto, credidisse se, in absentia episcopi, populum benedicere posse.

Micrologus autem contendit, cap. 21, presbyteros a tali benedictione non esse prohibendos, imo eam, absente episcopo, omittere non posse sine gravi scandalo. Eam tamen non impertiuntur in ecclesiis Lugdunensi, Augustodunensi, Lingonensi, Senonensi, Trecensi, Vesuntina, Virodunensi, Remensi, Suessionensi, etc. juxta P. *Le Brun* ; eam pariter omittunt Cathusiani in propriis ecclesiis celebrantes : secus, si in aliis ecclesiis celebrent.

Communior tamen est consuetudo populum in fine missæ sic benedicendi, et ubi recepta est, ab illa recedere non licet. Olim, ante orationem *Placeat* fiebat, et usque ad medium sæculi decimi sexti tria forinabantur signa crucis : sed Pius V, in missali Romano, anni 1587, usum ter benedicendi in missis privatis abrogavit, et Clemens VIII illum penitus exstinxit respectu presbyterorum, et solis episcopis reservavit, ad majorem missæ episcopalis dignitatem.

Forma etiam est diversa : presbyteri simpliciter dicunt : *Benedicat vos omnipotens Deus, Pater*, etc. episcopi vero dicunt : *Sit nomen Domini benedictum*, etc. *Adjutorium*, etc. deinde *Benedicat vos*, etc.

Hæc benedictio in missis defunctorum omittitur, quia est quid solemne.

Sacerdos coram episcopo celebrans, antequam in fine missæ benedicat, faciet episcopo profundam reverentiam, veluti facultatem postulans populo benedicendi: si vero episcopus assistens extra suam diœcesim esset, hæc omitteretur reverentia. Cærem. episc. lib. 1, cap. 30 et Ferraris, vº *Benedictio*, art. 5, n. 42.

57º *Ultimum evangelium*. In decimo tertio sæculo, finita missa, non dicebatur evangelium, nisi ex devotione, ut patet ex Durando, dicente, l. 4, cap. 24, n. 5: « Qui-  
dam volentes dicere, finita missa, evangelium S. Joannis, vel aliud, imprimunt primo signum crucis super altare et postea in fronte. » Multi sacerdotes illud secreto recitabant, se in cornu dextro altaris exuendo, vel ad sacristiam redeundo. Fideles illud ex devotione audire volentes, petierunt ut super se, vel saltem alta voce recitaretur, sicut in fine Baptismi recitari consueverat: semper enim evangelium istud venerati sunt, et in gravibus circumstantiis illud recitabant, vel a sacerdote super se recitari petebant. Non mirum ergo si quidam sacerdotes devotionem habuerint illud statim post missam dicendi, si hæc devotio ad alios et ad ipsos fideles transierit, et si tandem facta fuerit communis. Pius V, post medium decimi sexti sæculi, ordinavit ut in fine missæ a sacerdotibus diceretur evangelium S. Joannis, quod antea non ex mandato dicebatur.

Non obstante hac S. pontificis præscriptione, Cluniacenses, Cistercienses et Carthusiani ultimum in fine missæ non dicunt evangelium; Lugduni, Remis, Metis, in cathedrali Cenomanensi et in pluribus aliis ecclesiis evangelium S. Joannis dicitur redeundo ab altari ad sacristiam; et si aliud dicendum sit, nempe diebus dominicis, feriis majoribus et vigiliis, ubi fit de aliquo sancto, dicitur in sacristia, juxta consuetudinem ante Constitutionem S. Pii V existentem.

Cæremoniale episc. l. 2, cap. 8, sub fine, statuit ut episcopus, in fine missæ, data benedictione, dicat *Domi-*

*nus vobiscum, Initium sancti evangelii, etc. et prosequatur cundo ad locum ubi a principio accepit paramenta.*

Cum evangelium S. Joannis recitaretur memoriter, mos fuit et perseveravit signandi altare, loco libri evangeliorum, vel tabellam in qua scriptum est : ideo igitur osculum primorum ejus verborum omittitur in fine.

## ARTICULUS QUARTUS.

### DE VARIIS MISSARUM SPECIEBUS.

Breves exponemus notiones de missis solemnibus, privatis, præsanctificatorum, siccis, de tempore, de sanctis, votivis, defunctorum, de sponsalibus, et coram SS. Sacramento.

#### *Missa sollemnis.*

1<sup>o</sup> Missa sollemnis ea est quæ cum cantu et sollemni cæremoniarum apparatu, ministris et clero assistantibus ac functiones ordinum suorum exercentibus, celebratur. A pluribus dicitur etiam publica, sed improprie : missa enim publica ea est cui concursus populi admittitur : fieri autem potest ut missa sollemnis sine concursu populi celebraretur, et sine cantu dicatur missa cui populus admittatur.

2<sup>o</sup> Missa principaliter instituta est ut esset sollemnis et publica, clero scilicet et populo assistente, offerente et communicante; id omnes fere illius partes evincunt, *Dominus vobiscum; Oremus; Sursum corda; Habemus ad Dominum, etc.*

3<sup>o</sup> Primitus non erant sacerdotes in monasteriis, et monachi diebus dominicis ac festivis in vicinam ecclesiam veniebant ut missæ assisterent. Quando autem cœperunt habere ecclesias et officia sollemnia, pontifices maximi et concilia prohibuerunt ne publicas celebrarent missas, propter periculum retrahendi populum a cœtibus quibus præesse debent pastores.

4<sup>o</sup> Nihilominus sollemnes missas cum ministris et cæremoniarum apparatu celebrare licet in monasteriis etiam in eis in quibus arctissima servatur solitudo.



5° Ad missam solemnem revocatur missa parochialis, ad quam scilicet convocantur parochiani, in qua publicæ fiunt preces, indicantur festa et jejunia, publicantur matrimonia, docentur et explanantur veritates Christianæ : non tamen essentialiter est sollemnis ; sæpe est simpliciter cantata, sine ministris et cæremoniæ apparatu, licet existant cæremoniæ quæ hujusmodi missis sunt propriæ et omitti non debent. Imo aliquando sine cantu dicitur ; verum necessario est publica.

Ad hoc missarum genus pertinent missa conventualis et missa capitularis.

### *Missæ privatæ.*

1° Multiplici ratione missa dici potest privata, videlicet 1° ratione loci privati in quo celebratur ; 2° ratione diei, quia non in die festo dicitur ; 3° ratione personæ privatæ cui applicatur ; 4° ratione assistantium, qui pauci sunt numero ; 5° ratione altaris privati, non vero majoris, ad quod celebratur ; 6° ratione horæ et destinationis, per oppositionem ad missam parochialem, conventualem aut capitularem ; 7° denique ratione communicantium, si nempe solus celebrans Eucharistiam suscipiat.

Adversus missas privatas ultimo sensu intellectas debacchatus est Lutherus, in Tractatu de abroganda missa privata, asserens se a diabolo didicisse hujusmodi missam veram esse idololatriam. Eidem sententiæ, de abroganda missa privata, subscripserunt Calvinus, Instit. l. 4, cap. 18, Chemnitius, in Examine concilii Trid. et generaliter Protestantes, qui ipsummet missæ sacrificium sustulerunt.

Contra hos hæreticos concil. Trid. sess. 22, can. 8, sic statuit : « Si quis dixerit missas in quibus solus sacerdos sacramentaliter communicat, illicitas esse ideoque abrogandas : anathema sit. » Licet enim semper optaverit Ecclesia ut in singulis missis fideles adstantes, non solum spirituali affectu, sed sacramentali etiam Eucharistiæ perceptione communicent, id nunquam præcepit :

Card. Bona multis testimoniis et argumentis demonstrat, l. 1, cap. 14, laudabilem missæ privatæ consuetudinem Patribus fuisse cognitam et in Ecclesia semper viguisse.

In præcedenti capite, n. 4, loquitur de missa solitaria quæ olim a solo sacerdote, nemine præsentem et respondente fiebat in monasteriis, et ostendit eam a pluribus conciliis et pontificibus fuisse prohibitam, quia non verificarentur verba *Dominus vobiscum, Sursum corda*, etc. si nullus esset qui responderet. Asserit tamen a Romano pontifice quibusdam monachis vel eremitis perpetuo inclusis aliquando indultum fuisse ut soli, sine respondente, sacrificium offerre possent. Seclusa speciali hac concessione, hujusmodi missa graviter esset illicita, nisi necessitas excusaret. Gavantus et Merati æstimant sufficientem existere causam sine ministro celebrandi, si viaticum moribundo sit dandum; si die festo populus missa privaretur, et nullus respondere possit, si tempore pestis timeatur contagio. Præterea, etiam extra casum necessitatis, si haberi non possit minister qui respondeat, sed tantum qui serviat, aut si, missa incepta, minister abeat, sacerdos ipse poterit respondere.

Missa vero privata, cui solus adest minister, nihil habet redarguendum; minister enim respondet nomine totius Ecclesiæ quam celebrans salutatur et alloquitur.

Expresse prohibetur in Decretal. l. 3, tit. 2, cap. 1, et in rubricis Missalis, de defectib. tit. 10, n. 1, ne femina ministret ad missam: potius sine ullo ministro celebrandum foret. Mulier longe ab altari posita, vel monialis in choro respondere posset sacerdoti, viro circa altare ministrante: id nullo jure prohibitum esse docet Card. de Lugo quoad monialem. Vide Ligorio, l. 6, n. 391 et 392.

Celebrare sine ministro, extra necessitatem, peccatum esset mortale: ita omnes, inquit Ligorio. Minor autem sufficit necessitas ad celebrandum cum ministro nesciente respondere, quam sine ministro.

Si celebrans advertat ministrum male pronuntiare, eumque facile corrigere non possit, non se neque cir-

cumstantes turbet, neque ordinem missæ invertat, sed omissa a ministro suppleat, si commode potest.

Ex decreto sacræ Congr. Rit. diei 7 augusti 1627, non competit vicariis generalibus celebrantibus duos ministros, aut duos capellanos cum cottis, honoris causa, habere : id solis reservatur prælatis.

*Missa præsanctificationum.*

Improprie dicitur missa, cum in illa non consecratur; in eo enim consistit ut particula, prius consecrata, inter aliquem precum, rituum ac cæremoniarum ordinem, liturgiæ missæ fere similem, a sacerdote sumatur; ideo hoc liturgiæ genus vocatum est missa præsanctificationum. Antiquissimi est usus apud Græcos, qui tenent consecrationem corporis et sanguinis Christi cum tristitia jejunii quadragesimalis non recte conciliari. Unde concilium Laodicenum, anni 314, sancivit, can. 49, *Non oportere in quadragesima panem offerre, nisi sabbato et dominicis tantum.* Concilium in Trullo formaliter dicit, can. 52, in omnibus Quadragesimæ diebus, exceptis sabbato, dominicis et die Annuntiationis *sacrum præsanctificationum ministerium fieri.* Quæ disciplina usque in hodiernum diem apud Græcos viguit. Die dominica, præter formulam in ea missa a celebrante consumendam, quinque aliæ consecratur, pro quinque sequentibus diebus, et unaquaque die præsanctificationum ministerium officio vespertino conjungitur.

Excipitur etiam, ab immemoriali tempore, feria V in cœna Domini.

Apud Latinos missa præsanctificationum sola die veneris in Parasceve celebrantur, et ab ecclesiâ Orientali fuit importata versus octavum sæculum.

*Missa sicca.*

Sic vocabatur quædam veræ missæ simulatio, ab indiscreta quorundam devotione sæculo duodecimo in-

ducta : sacerdos vestibibus sacris indutus, ad altare accedebat, ibique omnia sicut in vera missa faciebat, præter secretas, canonem aliasque partes consecrationem et communionem directe respicientes. Hæc missa dicta est nautica, quia in mari præcipue fuit usitata, quando vera missa, propter fluctuum commotiones, celebrari non poterat. S. Ludovicus habebat devotionem audiendi hujusmodi missam, cum e transmarinis partibus rediret in Galliam, referente Guillelmo *de Nangis*. De illa tanquam licita mentionem facit Durandus, l. 4, cap. 1. Sed, provida episcoporum cura, a multo tempore ubique hæc praxis est abrogata.

### *Missæ de tempore.*

Annus ecclesiasticus, sicut annus civilis, in varia divisus est tempora, quibus propria respondent officia. Initium ejus est prima Adventus dominica : Adventus autem ante Gregorium Magnum certe notus, est præparatio ad solemnitatem Nativitatis Domini : festa Nativitatis, Epiphaniæ, Resurrectionis et Ascensionis Christi, Pentecostes et sancta Quadragesima ab Apostolis vel a proximis eorum successoribus fuerunt instituta, ut ex Constit. Apostolicis, Tertul. l. de Jejuniis, Theoph. Alexandrino, epist. Paschalibus, S. Irenæo apud Euseb. Hist. l. 5, colligitur. Dies dominicæ per annum ab his festis et temporibus pendent, et feriæ, in singulis hebdomadis, diebus dominicis vel festivis coordinantur. Exstant ergo officia pro toto anni cursu sic statuta, quæ propria de tempore dicuntur, et in antiquissimis liturgiæ libris fere sic partita reperiuntur, v. g. in Ordine Romano I, qui sæculo nono certo est anterior, in Sacramentariis SS. Greg. et Gelasii, et in Lectionario S. Hieronymi.

### *Missæ sanctorum.*

Morem semper fuisse sacrificium missæ offerendi, non quidem pro sanctis, sed in illorum honorem, certissime



constat ex vetustissimis Patrum testimoniis, nempe ex Epist. ecclesiæ Smyrnensis, attestantis se ossa S. Polycarpi collegisse, et sibi proponere natalem ejus martyrii diem cum hilaritate et gaudio celebrare; ex Tertul. l. de Corona mil. cap. 3, dicente : « Oblationes pro defunctis et pro natalitiis annua die facimus; » ex S. Cyp. Epist. 34, et Epist. 37, asserente *oblationes et sacrificia*, ob commemorationes martyrum, die annua eorum mortis celebrari; ex S. Aug. de Civit. Dei, l. 8, cap. 27, clamante : « Quis audivit aliquando fidelium stantem sacerdotem ad altare, etiam super sanctum corpus martyris, ad Dei honorem cultumque constructum, dicere in precibus : offero tibi sacrificium, Petre, vel Paule, vel Cypriane; cum apud eorum memorias offeratur Deo, qui eos et homines et martyres fecit? »

Citati Patres de solis martyribus loquuntur, quia festivitates in memoriam aliorum sanctorum serius in Ecclesia receptæ sunt : prima fuit in honorem S. Martini Turo-nensis, anno 402 defuncti. Postea multi in catalogo sanctorum adscripti sunt, et, sicut martyres, specialia habuerunt officia, quæ vocantur *Propria Sanctorum*.

Communia etiam existunt officia pro colendis sanctis proprium non habentibus.

### *Missæ votivæ.*

1° Sic appellantur missæ quæ officio diei in quo dicuntur non conveniunt, et pro aliqua necessitate publica vel privata, aut in B. Mariæ virginis aliorumve sanctorum honorem, extra eorum festivitates, celebrantur. Micrologus refert, cap. 60, Alcuinum in octavo sæculo, rogatu S. Bonifacii archiepiscopi, composuisse missas votivas de sanctissima Trinitate, pro dominica, de sapientia, de Spiritu sancto, de charitate, de Angelis, de Cruce et de B. Maria pro aliis hebdomadæ diebus, ut presbyteri Germaniæ officiis ecclesiasticis nondum instructi, vel librorum copia nondum præditi, *aliquid haberent eum quo officium suum qualibet die possent explere*.

Tempore quo scriptus est Micrologus, in fine undecimi sæculi, missa de Cruce feria sexta, et de sancta Maria sabbato, communiter adhuc dicebatur, *non tam ex auctoritate quam ex devotione*, et missarum votivarum pro aliis diebus statutarum fiebat memoria in missa de die.

2º Aliæ erant missæ votivæ, etiam Alcuino longe antiquiores, pro mortalitate, pro sterilitate, ad petendam pluviam, tempore belli, pro pace, etc. ut videtur in Sacramentariis S. Greg. et S. Gel. Ejus generis erat sacrificium quod, referente S. Aug. de Civ. Dei, l. 22, cap. 8, n. 6, presbyter in aliqua domo obtulit ut spirituum malignorum vexatio cessaret.

3º Devotio dicendi missas votivas, præsertim in honorem B. Virginis, ita excrevit, ut versus undecimum sæculum, singulis diebus, etiam dominicis et festivis, præter missam solemnem, una dicebatur missa de B. Virgine, et altera *de requiem*.

4º At in Rubr. 1 part. tit. 4, n. 3, missæ votivæ prohibentur diebus dominicis et duplicibus. Item intra octavas Nativitatis Domini, Epiphaniæ, Paschatis, Pentecostes, in die Cinerum, hebdomada Majori, in vigiliis Nativitatis Domini et Pentecostes, ex decreto Cong. Rit. diei 28 augusti 1627. Similiter intra octavam corporis Christi, ex alio decreto 21 junii 1670.

5º Aliis diebus dici possunt missæ votivæ, pro arbitrio sacerdotum, cum commemoratione ejus de quo factum est officium : « *Id tamen passim non fiat, nisi rationabili de causa, et quoad fieri potest, missa cum officio conveniat* ; » Rubr. 1 part. tit 4, n. 5. Rationabilis autem non esset causa, ad missas votivas passim celebrandas, desiderium promptius se expediendi, vel alia similis et levis excusatio, inquiunt Merati et Ligorio : sufficit vero sola dantis eleemosynam petitio, et probabiliter singularis erga tale mysterium, talem sanctum vel sanctam devotio.

*Notandum* quod missæ conventualis et capitularis cum officio semper concordare debeant, ex pluribus S. Congr. Rit decretis.

6º Diebus vetitis missam votivam celebrare, est ad minus peccatum veniale, et sæpe mortale, vel ratione contemptus et scandali; vel etiam, juxta plures, quia res in se gravis est: communius tamen docetur peccatum non esse mortale, secluso scandalo et contemptu, quia notabilis non videtur ordinis inversio, nisi forte publica diceretur missa, vel missa *de requiem*, sine causa excusante.

7º Cæterum omnes fatentur missas votivas solemnes, non privatas, diebus vetitis ob graves causas celebrari posse: graves autem causæ reputantur, 1º necessitas vel utilitas publica, quæ scilicet totam respicit communitatem vel notabilem ejus partem, vel notabilem familiam ex cujus conservatione pendet bonum communitatis; in eo casu habendæ sunt, v. g. processio, quæ nunquam fit nisi in re gravi, missa pro salute principis, pro obtinenda victoria, ad gratias agendas pro beneficio obtento; 2º si clerus cum episcopo conveniat, ex Congr. Rit. 19 mai 1607.

« Receptio vero ad habitum vel ad professionem religiosam sub re gravi numerari non potest, ut ex consuetudine cantari possit missa votiva sollemnis, etiam de Spiritu sancto, in dominicis vel duplicibus, et hic abusus omnino abrogandus; » Decret. Congr. Rit. diei 24 julii 1683.

8º Prædictæ missæ votivæ solemnes, pro re gravi vel publica causa, dici possunt diebus dominicis et omnibus festis duplicibus, modo non sint primæ classis: possunt igitur celebrari dominicis privilegiatis secundæ classis.

9º Quoad modum eas dicendi, sciendum est 1º in missa solemni unicam dicendam esse orationem, sine commemoratione feriæ, festi simplicis aut semiduplicis; non vero omittenda esset commemoratio dominicæ, feriæ majoris, octavæ aut duplicis. 2º In missis privatis tres necessariæ sunt orationes; secunda debet esse de feria vel de festo cujus fit officium, et tertia ad libitum, id est, tertia dicenda est, sed a celebrante pro libitu eligitur. Aliæ addi possunt ex devotione in pari vel impari numero. 3º In missa solemni semper dicitur *Gloria in excelsis* et *Credo*:

in missis vero privatis et votivis nunquam dicitur *Credo*, et nunquam *Gloria in excelsis*, nisi in missa de Angelis.

4° Si missæ votivæ propriam non habeant præfationem, dicenda est præfatio de tempore vel de octava currente : dicitur *Communicantes*, etiamsi dicatur præfatio propria. Dici non debent, pro missis votivis, missæ propriæ festis Nativitatis Domini, Epiphaniæ, Paschatis, Assumptionis, B. Mariæ aliorumve similium, proprios introitus vel collectas habentium ; quia verba, extra proprios dictorum festorum dies vel octavas, absurdum exhiberent sensum. Ita decretum S. Congr. Rit. a Paulo V approbatum. Missæ vero aliorum festorum, in quibus veritas et ritus verborum non violatur, aut verba propria, v. g. *hodie, natalitia, solemnitatis*, facile vertuntur in voces, *commemoratio, memoria*, dici possunt ut missæ votivæ, quamvis melius sit uti missis votivis in fine missalis expressis, ne ritus Ecclesiæ ad cujuslibet arbitrium mutari videantur.

5° Si petatur missa votiva alicujus festi B. Mariæ aut sanctorum, intra octavam ejusdem festi, die quo fit de octava, ipsa missa festi ritu pro octava notato dicitur : die vero quo de occurrente festo fit officium, cum commemoratione octavæ, missa festi dicenda est more missarum votivarum, sine *Gloria* et *Credo*. Ita Merati, part. 1, tit. 4, § 4.

10° Missæ votivæ dici possunt de quolibet sancto certe canonizato, id est, totius Ecclesiæ cultui proposito, sive per insertionem nominis ejus in Martyrologio Romano, sive per festum publicum, sive per actum summi Pontificis authenticum : de beato vero missæ dici nequeunt extra locum, ecclesias, personas et dies a pontifice determinata.

### *Missæ defunctorum.*

1° Sacrificium missæ pro defunctis oblatum esse apostolica traditione constat ; testimonia enim Tertulliani et S. Aug. jam retulimus : idem habent S. Cyprianus, Epist. 66, prohibens ne oblatio fieret pro laico qui presbyterum ausus fuerat tutorem constituere ; S. Epipha-



nus, Hæresi 75; S. Chrysost. Homil. 69 ad populum Antiochenum; Constitutiones Apost. etc.

2° In Sacramentariis S. Greg. et S. Gelasii, in veteri liturgia Gallicana, in Mozarabica, etc. speciales erant missæ pro defunctis, pro sacerdote, pro abbate, pro nuper baptizato, pro laicis, etc.

3° Mos erat missas hujusmodi die depositionis, die tertia, septima, trigesima et præsertim anniversaria celebrandi. S. Greg. Dialog. l. 4, cap. 55, abbati Pretioso præscripsit ut curaret sacrificium offerri pro monacho justo defuncto per triginta dies continuos: hinc natus est ritus universalis et adhuc in multis locis perdurans, triginta celebrandi missas pro defunctis. Non necesse est ut omnes sint *de requiem*, nec ut ab eodem sacerdote celebrentur, nec communiter exigitur ut per triginta continuos dies sine intervallo dicantur.

4° Missæ defunctorum in suo genere sunt votivæ et ferme eisdem subjiciuntur regulis; sunt privatæ vel solemnes: privatæ dici nequeunt diebus quibus aliæ missæ votivæ prohibentur; si pro mortuo celebrandum sit, ad intencionem ejus offertur missa de die.

Missa sollemnis omnibus dominicis et festis de præcepto, præsentem corpore, cantari potest, exceptis duplicibus primæ classis, videlicet Nativitate Christi, Epiphania, prima die Paschatis et Pentecostes, festo Corporis Christi, Ascensione Domini, Assumptione B. M. Virginis, festo SS. Apostolorum Petri et Pauli in universali Ecclesia, festo Patroni in unaquaque ecclesia, festo alterius sancti cum maxima solemnitate et populi concursu celebrato, ac ultimo Majoris hebdomadæ triduo. Si in his diebus facienda sit sepultura, *Officium ac preces mandatur recitari privatim*; Ferraris, v° Miss. art, 14, n. 88: idem habet Merati, ex decreto S. Congr. Rit. diei 5 julii 1698.

5° Contendit Merati, part. 1, tit. 5, pariter excipiendos esse dies sequentes, nempe primam dominicam Adventus, feriam quartam Cinerum, primam dominicam Quadragesimæ, dominicam Palmarum cum tota Majori hebdomada, et duobus diebus festa Resurrectionis et Pente-

costes immediate sequentibus. Sed S. Congr. Rit. decreto diei 2 sept. 1741, apud Ferraris, ibid. n. 87, relato, statuit, unicum missam solemnem *de requiem* celebrari posse, corpore præsente, feria secunda, *a fortiori* et tertia Paschæ et Pentecostes. Unde concludit Ferraris sola festa solemniora superius recensita excipienda esse.

6° Missæ privatæ *de requiem* dominicis et festis duplicibus dici non possunt, etiam corpore præsente. Sic S. Congr. Rit. resolvit die 10 jun. 1693.

Nec missa parochialis, sive cantata seu major, sive prima seu minor, pro sepultura, corpore præsente, celebrari potest. Id apud nos prohibetur, et ex decreto S. Cong. Rit. 5 jul. 1698, et ex aliis apud Merati citatis, in indice, n. 528.

7° Nulla missa *de requiem* celebrari potest ad altare ubi expositum est sanctissimum Sacramentum, etiam in pyxide; sed ad aliud altare dici potest, dummodo oratio coram Sacramento non sit pro publica causa; S. Congr. Rit. 7 maii 1746. Congruentius est tamen ab hujusmodi missarum celebratione abstinere, etiamsi ex præscripto testatorum celebrandæ essent. Eadem Congr. 27 aprilis 1697. In diebus dictis *Quadraginta Horarum*, missæ defunctorum prohibentur per totam Ecclesiam, quia oratio fit pro causa publica.

8° Missæ solemnes defunctorum de die tertio, septimo, trigesimo et anniversario obitus celebrari non possunt dominicis nec festis duplicibus de præcepto, *a fortiori* non aliis majoribus festis aut diebus quibus eadem missæ, corpore præsente, prohibentur; nec diebus intra octavas Nativitatis Domini, Paschæ, Pentecostes et Corporis Christi, ut ex variis S. Congr. Rit. decretis constat; nec vigiliis Nativitatis Domini et Pentecostes. Bene vero vigilia et intra octavam Epiphaniæ: id colligitur ex decreto Congr. Rit. 27 martii 1779, apud *Romsée*.

9° Si ergo dies tertia, septima, trigesima vel anniversaria in unam ex his diebus prohibitis incideret, officium defunctorum, ex decreto S. Congr. Rit. 23 maii 1603, transfertur in diem sequentem non impeditam, vel anti-

cipatur cum eadem solemnitate, id est, unica oratione quæ dicta fuisset in ipsomet die, et prosa *Dies iræ*. Dies isti numerantur non a die obitus, sed a die sepulturæ.

10° Ubi vero agitur de missis quotidianis defunctorum quæ per annum petuntur, si rubrica missas votivas permittat, dicendæ sunt *de requiem*; secus, dicitur missa de die ad intentionem defuncti; S. Cong. Rit. 2 septemb. 1741.

11° In missis quotidianis defunctorum, simpliciter cantatis aut non cantatis, tres dicuntur orationes, ut assignantur in missali: « In missis autem defunctorum nulla » fit commemoratio pro vivis; » Rubr. missalis Rom. 1 part. tit. 7, n. 6: nec dicuntur *Communicantes* aut præfatio propria tempori, sed communis, vel pro defunctis si existat. In missis vero de semiduplici, simplici feria, etc. specialis dici potest oratio pro defunctis, vel pro uno defuncto; sed, ex decreto S. Congr. Rit. 2 decemb. 1684, in penultimo loco ponenda est, et nulla ex orationibus pro tempore assignatis omitti debet.

12° In missis solemnibus aut privatis diebus commemorationis omnium fidelium defunctorum, obitus tertio, septimo, trigesimo vel anniversario celebratis, et in alia qualibet missa solemnī defunctorum, unica dicitur oratio, prout in missali est determinata.

13° Quoties autem unica dicitur oratio, prosa *Dies iræ* non omittitur: in aliis vero missis pro defunctis dicitur ad arbitrium sacerdotis, ut fert rubrica.

14° Quædam omittenda sunt in missis defunctorum, sive privatis, sive solemnibus: sciri ac observari debent omnes hac de re dispositiones rubricæ.

Quæ inter omittenda non notantur, accurate servanda sunt: v. g. in initio evangelii celebrans librum et seipsum signat. In fine, loco *benedicamus Domino*, semper dicitur *requiescant in pace*, et non *requiescat*, etiamsi pro uno celebraretur.

#### *Missæ sponsalium.*

1° S. Congr. Rit. per decretum 20 decembris 1783, a

Pio VI approbatum, præcedens reformans decretum 3 maii 1761, sancivit missam propriam pro sponso et sponsa celebrari posse etiam in festo duplici, sive minori, sive majori, per annum, non tamen in festis primæ et secundæ classis, nec in dominicis et festis de præcepto. Alio decreto, diei 28 febr. 1818, a Pio VII 3 martii sequentis approbato, declaravit missam pro sponso et sponsa, juxta præfatum decretum 1783 celebratam, esse « votivam » privatam, proindeque semper celebrandam sine hymno » Angelico et Symbolo, cum tribus orationibus, prima » videlicet ejusdem missæ votivæ propriæ, ut habetur in » fine missalis, secunda et tertia diei currentis... Benedi- » camus Domino in fine et ult. evang. S. Joan. » *Romsée.*

2° Eadem S. Congr. per aliud decretum, 20 april. 1822, quædam suborta resolvens dubia, respondit missam votivam pro sponso et sponsa dici non posse diebus festa duplicia excludentibus, v. g. intra octavam Epiphaniæ et alias octavas similiter privilegiatas, ac consequenter si his diebus benedicendæ sint nuptiæ, dicendam esse missam de die cum commemoratione nuptiarum.

In missis votivis de sponsalibus dicitur præfatio de tempore vel de octava occurrente, ubi propria de sponsalibus non existit.

*Missæ coram exposito SS. Sacramento.*

1° « Missam in altari majori, ubi est expositum publice SS. Sacramentum, non licet celebrare, præsertim » si in ecclesia adsint alia altaria in quibus celebrari possit; » Decret. Congr. Rit. 9 aug. 1670. Excipitur in Const. Clementis XI, 20 januarii 1705, missa pro exponendo et reponendo SS. Sacramento sub precibus Quadraginta Horarum. Si cantanda sit alia missa, durante expositione, in alio altari cantari debet. *A fortiori* missæ privatæ in altari expositionis dici nequeunt. Id stricte servatur Romæ.

2° In missis privatis de die, in ecclesia ubi expositum est SS. Sacramentum, fit commemoratio SS. Sacramenti



per secundam orationem : si officium non sit duplex aut alias privilegiatum, missa celebranda est votiva SS. Sacramenti, sine *Gloria* et *Credo*. Ita Clemens XII, in longa instructione sua auctoritate publicata, 1 sept. 1730, a Merati et a Ferraris relata.

3<sup>o</sup> Missa pro expositione venerandi Sacramenti debet esse votiva de Sacramento, quæ habetur in fine missalis, non vero missa de festo Corporis Christi, nisi infra ejus octavam ; aut si rubrica missam votivam non permittat, dicitur missa diei cum commemoratione SS. Sacramenti.

4<sup>o</sup> Missæ de SS. Sacramento fundatæ diebus missas votivas non excludentibus, dicuntur votivæ de SS. Sacramento : aliis diebus celebratur missa de die cum commemoratione SS. Sacramenti.

5<sup>o</sup> Apprime sciendum est quid omittendum et quid addendum sit in celebranda missa coram venerabili Sacramento.

## ARTICULUS QUINTUS.

### DE LOCO UBI MISSA CELEBRARI POTEST.

Pauca dicenda sunt de origine ecclesiarum, de earum forma, consecratione, pollutione, reconciliatione et necessitate ; de imaginibus, reliquiis sanctorum, campanis et aqua benedicta.

#### *De ecclesiarum origine.*

1<sup>o</sup> In ipsis religionis Christianæ incunabulis specialia exstiterunt loca ubi fideles conveniebant ad frangendum panem : *Una sabbati, cum convenissemus ad frangendum panem*, Act. xx, 7 ; *Convenientibus ergo vobis in unum, jam non est cœnam dominicam manducare*, I Cor. xi, 20. Testimoniis veterum Patrum, puta Origenis, Tertull. Eusebii, Constit. Apost. etc. Christiani habebant domos ad cœtus religiosos destinatas : eas non vocabant templa, quia nomen istud magnis ædificiis cultui falsorum deorum consecratis proprium erat, sed illas per nomen suæ congregationis designantes, appellaverunt ecclesias.

*Forma ecclesiarum.*

1<sup>o</sup> Dubitari non potest quin ante persecutionem Diocletiani, anno 303 præcipue furem, Christiani multas habuerint ecclesias solis muneribus ecclesiasticis destinatas, ut expresse testantur Eusebius, Hist. eccl. l. 8, cap. 1; S. Optatus, l. 2, cap. 20; et auctor Const. Apost. saltem in quarto sæculo scribens, formam ecclesiarum, tanquam ab Apostolis determinatam, describit in l. 2, cap. 57: « Primo quidem, *inquit*, ædes sit oblonga, ad orientem versa, ex utraque parte pastophoria versus orientem habens, et quæ navi sit similis. »

2<sup>o</sup> Erat ergo 1<sup>o</sup> oblonga sicut navis, et inde præcipua pars ejus semper vocata est navis, gallice *nef*. Plurimæ tamen ædificatæ sunt ecclesiæ a Constantino et a S. Helena, rotundæ vel octogonæ, v. g. in Bethleem, in monte Olivarum, Antiochiæ; octogona est etiam celebris capella, curante Carolo Magno, in loco suæ residentiae exstructa, adhuc existens, cujus cognomen habuit civitas vulgo dicta *Aix-la-Chapelle*. 2<sup>o</sup> Ad orientem versa. Vetustissimus enim et generalis fuit mos Christianorum respiciendi orientem in orando, quia Christus vocatur *Oriens*, *Sol justitiæ*; et sol oriens est imago Christi, qui est vera lux mundum illuminans. Nonnullæ tamen, in maxima antiquitate, exstiterunt ecclesiæ contrarium habentes situm, ut refert Socrates, Hist. l. 4, cap. 22, de ecclesia Antiochiæ Syriæ, cujus altare occasum spectabat. Talis etiam fuit ecclesia S. Sepulcri ab Eusebio, l. 3, cap. 37, descripta. Hinc ecclesiæ ad orientem communiter vertuntur, sed nulla lex hunc præscribit situm. 3<sup>o</sup> Pastophoria apud Græcos idem significant ac sacristiæ apud nos. 4<sup>o</sup> In duas partes cancellis separata erat ecclesia: pars superior, versus orientem, dicebatur sanctuarium: in medio erat solium episcopi, utrinque sedes presbyterorum ac diaconorum, populum respicientium et ante habentium altare, sæpe vocatum *thusiasterium*. Pars ista erat elevata. Eandem formam nunc exhibent ecclesiæ cujus altare di-

citur à la romaine. 5° In altera parte erant laici cum quibusdam inferioribus clericis; mulieres et viri erant separati, hi in australi et illæ in boreali latere navis sedentes. In medio erat locus elevatus in quo stans legebat lector. Ille locus dicebatur *ambo*, a verbo Græco ἀναβαῖνω, *ascendo*. 6° Duæ erant portæ laterales, una pro mulieribus cui præposita erat diaconissa, et altera pro viris ostiario commissa. 7° Quando spatium sufficiens erat, pueri utriusque sexus, virgines, viduæ et mulieres distincta habebant loca, et diaconus providebat ut ingredientium quisque locum suum peteret. 8° Postea, crescente numero monachorum qui publicis officiis in ecclesia assistebant, et prope sanctuarium collocabantur, majores fabricatæ et divisæ fuerunt naves: pars inferior, ubi sistebant pœnitentes diversorum graduum, catechumeni, energumeni, etc. dicta est græce νερθηξ, quamdam significans plantam, qua olim magistri manus percutiebant puerorum ad corrigendum eos: huic voci respondet vox latina *ferula*, unde vox gallica *férule*, bene nota. Illa ecclesiæ pars dicta est νερθηξ aut *ferula*, quia eis destinata erat qui ab Ecclesia plectebantur, vel sub ferula ejus erant constituti: appellata est etiam πρῶνας, id est *pro-navis*, *avant-nef*: unde vox gallica *prône*, ut supra diximus. Apud Latinos ecclesia in tres partes, sicut hodie, similiter erat divisa, videlicet in sanctuarium, chorum et navem. 9° Tres erant portæ: una tantum exterior, quæ dicebatur magna, per quam intrabatur in narthem seu pronavem; secunda, appellata speciosa, ad ingrediendum in secundam navem, ubi erat ambo; et tertia vocata sancta, ad ingressum sanctuarii.

3° Ecclesia igitur recte definitur: *Locus sacer, murorum ambitu circumdatus*, et varia sortitur nomina juxta diversas classes ad quas pertinere potest: si præ aliis sit insignis, dicitur *basilica*, a verbo græco βασιλειη, significante domum regiam vel palatium: eo sensu legitur II Paralip. iv, 9, et vi, 13, Salomonem atrium sacerdotum et grandem basilicam fecisse. Nunc communis opinio est quod solæ ecclesiæ majores, principales ac digniores vocentur basilicæ, inquit Ferraris, v° *Ecclesia*, art. 3,

n. 4. Si episcopi sedem contineat, est cathedralis. In quibusdam locis, v. g. in Italia, simpliciter dicitur domus, sicut in civitate ædes regia palatium simpliciter dictum, de habitaculo principis intelligitur. Si communitatem habeat clericalem, quæ capitulariter congregari et agere possit, cum libero usu sigilli, appellatur collegiata. Cathedrales dicuntur etiam matrices, quia matres et magistræ aliarum ecclesiarum totius episcopatus reputantur, et sic habetur in jure, Decretal. l. 5, tit. 4, cap. 22; matrices etiam vocantur ecclesiæ quæ alias habent ecclesias aliquo modo sibi subjectas, et subjectæ dicuntur earum filiæ. Quæ habent fontes baptismatis, dicuntur baptismales; et illæ quibus præest rector, habens populum sub certis locorum limitibus constitutum, cum potestate fori pœnitentialis, parochiales appellantur, et generaliter sunt baptismales, quamvis omnes baptismales non essentialiter sint parochiales.

### *Consecratio ecclesiarum.*

1° Nomine consecrationis ecclesiæ, intelligitur dedicatio ejus ad cultum divinum, ritu speciali a legitimo ministro facta, ut opera religionis in ea recte exerceri possint. Ignoramus quomodo sanctificatæ fuerint ecclesiæ tempore persecutionum; sed a tempore Constantini solemnes cœperunt fieri basilicarum, cathedralium aliarumque generaliter ecclesiarum dedicationes, ut videre est in historia ecclesiastica et apud P. Martène. Quamvis consecratio et dedicatio promiscue sumi soleant, inter utramque vocem aliquod nihilominus datur discrimen; dedicatio enim, quæ etiam dicitur encœnia, initiatio, a verbo græco ἐγκαινία, est primus illius usus, et consecratio est ritus sacer quo ecclesia sanctificatur.

• 2° Missarum celebrationes non alibi quam in sacratis Domino locis, absque magna necessitate, fieri debere liquet omnibus, quibus sunt nota Veteris et Novi Testamenti præcepta; • Decret. 3 part. dist. 1, cap. 1. et cap. 12, etc.



3<sup>o</sup> Missa igitur celebrari non potest in nova ecclesia vel capella ritu ecclesiastico nondum sanctificata. Duplici modo autem sanctificari potest, nempe per benedictionem et per consecrationem. Benedictio, prout in rituali Romano et in aliis ritualibus describitur, a quolibet sacerdote, ex speciali delegatione episcopi, fieri potest. Consecratio vero, cujus ritus et cæremoniæ in pontificali Romano reperiuntur, proprio diœcesis episcopo reservatur; alieno episcopo delegari potest, sed non simplici presbytero. Episcopus qui, absque legitima delegatione, alienam consecraret ecclesiam, peccaret mortaliter et insuper maneret suspensus per annum; Decret. part. 2, causa 7, q. 1, cap. 28. Valet tamen consecratio.

4<sup>o</sup> Ecclesiæ consecrari possunt qualibet die etiam non festiva, sed intra missam duntaxat, ut expresse habetur in Decretal. l. 3, tit. 40, cap. 2; et in Decreto, part. 3, dist. 1, cap. 3. Valida tamen, licet graviter illicita, consecratio extra missam facta; Ferraris, v<sup>o</sup> *Eccl.* art. 4, n. 3. Bened. XIV, Epist. 1 et 2 ad R. P. Engelbertum, diei 16 nov. 1748, Bull. App. de consecratione et reconciliatione ecclesiarum longe disserit, et affirmat 1<sup>o</sup> potestatem consecrandi ecclesias episcopatu in hærentem esse et a nullo pendentem; 2<sup>o</sup> auctoritate Apostolica presbyteris delegari posse, et reipsa nonnullis abbatibus delegatam fuisse, ea conditione ut chrismate ab episcopo consecrato uterentur; 3<sup>o</sup> consecrationem ecclesiæ a pluribus episcopis simul fieri posse, et sic pluries consecratas fuisse ecclesias ab episcopis ad hoc congregatis, non ut assisterent, sed ut comministri essent, suas quique partes expleturi, ut refert P. Martène. Unus potest consecrare ecclesiam, alter altare, tertius celebrare missam, plures ungere cruces, etc. idque sine ulla summi Pontificis dispensatione.

5<sup>o</sup> Ecclesia semel consecrata non est iterum consecranda: at si dubitetur eam fuisse consecratam, consecranda est, ex expresso textu Decreti, part. 3, dist. 1, cap. 16, 18 et 20.

6<sup>o</sup> De consecratione autem ecclesiæ constare potest per

unum testem de visu vel auditu, per notam in libris ecclesiæ, vel pariete, vel tabula marmorea scriptam, quia sufficiunt semiplenæ probationes quando nemini fit præjudicium; Ferraris, art. 4, n. 79. Unde inferimus cruces numero duodecim in parietibus depictas, vel sensibilia earum vestigia, sufficere ad probandum ecclesiam fuisse consecratam.

7º In vigilia consecrationis populus et clerus, quibus ecclesia consecranda est, jejunare tenentur, ex pontificali; canendæ sunt primæ Vesperæ, Matutinæ et Laudes in honorem sanctorum quorum reliquiæ sunt recondendæ.

### *Exsecratio ecclesiarum.*

Ecclesia dicitur exsecrata, quando amissa est ipsius consecratio vel benedictio, ita ut missa in ea celebrari non possit: id autem fieri potest per ipsius destructionem aut pollutionem.

1º *Per destructionem totalem.* Res quidem est evidens, et ex Decreto, part. 3, dist. 1, cap. 24, constat. Etiam si ergo ecclesia sic diruta, ex iisdem materiis reædificaretur, iterum consecranda esset. Item si major vel nobilior pars, v. g. altare et sanctuarium destruaturs aut addatur, minore parte relictas, quia non est eadem moraliter ecclesia; Ferraris, varia citans capita juris, vº *Eccl.* art. 4, n. 23 et 24. Si ecclesia igne comburatur, et interiores parietes ex toto vel ex majori parte sint devastati et abrasi, quamvis non corruant, nova necessaria est consecratio; quia in his partibus præcipue censetur residere consecratio, ubi videlicet sunt cruces et fiunt unctiones; Decreto, part. 3, dist. 1, cap. 20.

Contra vero si minor pars destruaturs vel addatur, majori remanente, v. g. unus paries dirutus reædificetur, pavementum renovetur, tecta comburanturs, parietibus integris remanentibus, etc., non iteratur consecratio nec benedictio; quia eadem moraliter remanet ecclesia, et ex regula 42 juris, in Sexto, *Accessorium naturam sequi congruit principalis*. Nec obstat quod ecclesia per partes

successive renovata, tota fuisset mutata; semper enim eadem moraliter remansisset.

Ex cap. 24, dist. 1, part. 3 Decreti jam citato, eruitur quod notabiles partes additæ, licet ecclesia maneat consecrata, cum aquæ benedictæ aspersione exorcizari congruat. Ita Ferraris et plures alii.

2° *Per pollutionem*. Ecclesia est polluta quando, propter aliquam indecentiam aut repugnantiam, ad usus sacros jure declaratur inhabilis. Quadruplici modo id contingere potest, scilicet per homicidium, per sanguinis effusionem, per seminis humani emissionem et per infidelis sepulturam: 1° per homicidium voluntarium et injuriosum, etiam sine sanguinis effusione, non vero per homicidium casu eventum, ab amente vel ob justam sui defensionem commissum. Ita Ferraris aliique canonistæ, ex Decreto, part. 3, dist. 1, cap. 19, et Decretal. l. 3, tit. 40, cap. 3.

Voluntaria rei juste condemnati occisio in ecclesia, eam pollueret, quia injuriosa esset ecclesiæ et ipsi reo jus habenti ut ibi non occidatur.

Si quis, accepto vulnere extra ecclesiam, ad eam confugiat ibique moriatur, eam non polluit; si, e contra, vulnus mortale intra ecclesiam acceperit et extra moriatur, polluta est. Ita Ferraris, art. 4, n. 40.

Si quis ab extra hominem in ecclesia positum occidat, eam polluit; non vero si ab ecclesia aliquem extra perimat; quia in priori casu et non in posteriori homicidium in ecclesia patrat. *Sic communiter canonistæ.*

2° *Per sanguinis effusionem* ecclesia polluitur, ut propriis verbis statuitur in Decreto, part. 3, dist. 1, cap. 20, Decretal. l. 3, tit. 40, cap. 10, et Sexto, l. 3, tit. 21, cap. unico. Quædam autem conditiones requiruntur, nempe 1° ut sanguis effusus sit humanus, non vero alterius animalis; 2° ut sit in notabili quantitate, alioquin non esset proprie effusio; 3° ut effusio sit voluntaria, quia supponitur crimen, ac proinde actus humanus: unde si per accidens, puta ex casu, aliquis graviter vulneretur et magna quantitas sanguinis effundatur, ecclesia non erit polluta; 4° graviter injuriosa, secus non esset

crimen nec gravis irreverentia erga locum sacrum. Hinc si ex levi vulnere sanguis copiose effundatur per nasum, ut quandoque accidit in pugnis inter pueros, ecclesia non censetur polluta : pollueretur vero si hæc quantitas ex gravi percussione in nasum proveniret : gravitas aut levitas percussione ex communi hominum æstimatione judicatur ; in dubio, ecclesia habenda est ut non polluta, juxta regulam juris, *Odia restringi convenit* ; 5° ut gravis percussio in ipsa ecclesia facta fuerit, eo modo quem diximus de homicidio.

3° Per seminis humani effusionem, ut in dissertatione nostra de sexto præcepto diximus.

4° Per infidelis aut excommunicati denunciati sepulturam ; Decretal. l. 3 , tit. 28 , cap. 12 , et tit. 40., cap. 7. Nomine infidelis, intelligitur infans sine baptismo decessus, nisi ex utero matris non fuerit extractus et cum illa sepeliatur, quia nondum natus, portio viscerum matris videtur esse. Ita multi apud Ferraris, v° *Eccl.* art. 4 , n. 52. Nonnulli tamen infantes fidelium excipiunt, dicentes eos tales censi quales sunt parentes : sed opinio quæ tenet illos non excipiendos esse, longe communior est et probabilior videtur.

Sepultura hæretici publici, sed non denunciati, ecclesiam non polluit ; quia cum non sit vitandus vivus, nec obligatio est eum vitandi mortuum.

Concil. Trid. sess. 25 , cap. 19 , de Refor. vult ut qui in duello decesserint, *perpetuo careant ecclesiastica sepultura* ; et Bened. XIV , Const. *Detestabilem*, 10 nov. 1752 , §9, declarat privationem sepulturæ ecclesiasticæ a concil. Trid. inflictam, « incurrendam ante sententiam judicis, a » decedente quoque extra locum conflictus, ex vulnere ibi- » dem accepto, sive duellum publice, sive privatim indic- » tum fuerit, ac etiamsi vulneratus ante mortem non incer- » ta pœnitentiæ signa dederit, atque a peccatis et ordina- » riis solutionem obtinuerit, sublata episcopis et ordinariis » locorum super hac pœna interpretandi ac dispensandi » facultate ; Bul. t. 4. » Hinc annotator Ferraris concludit, ecclesiam ac proinde et cœmeterium violari per sepul-



turam ejus qui decessit in duello, etiamsi denuntiatus non fuerit. Sed Ferraris, plures alios citans, contrarium sentit, et talis violatio in Gallia non admittitur, licet honores sepulturæ ecclesiasticæ in duello decedentibus absque pœnitentiæ signis et reparatione scandali denegentur.

Prædicti autem casus ecclesiam non violant, nisi sint publici aut publice innotuerint. Sic omnes, ex variis textibus juris, et habent ut occultum quod duobus vel tribus notum est testibus discretis: si autem factum prius occultum fiat publicum, ex eo tempore ecclesia habenda erit ut polluta; Ferraris, art. 4, n. 57.

### *Effectus pollutionis ecclesiæ.*

1º Effectus violationis alicujus ecclesiæ sunt: 1º ut reconciliari non possit quin prius amota fuerit causa pollutionis adhuc subsistens, v. g. cadaver infidelis exhumatur; 2º ut nemo in ea vel in cœmeterio polluto sepeliatur ante reconciliationem; 3º ut nec missa, nec aliud officium ecclesiasticum in ea celebretur; quicumque enim secus ageret aut mortuum sepeliret, mortaliter peccaret; Ferraris et alii multi cum illo, art. 4, n. 59.

2º « Si, sacerdote celebrante, violetur ecclesia ante canonem, dimittatur missa; si post canonem, non dimittatur: » sunt verba miss. Rom. de Defect. tit. 10, n. 2. Statim, juxta rituale nostrum, SS. Sacramentum auferatur, altaria exspolientur, etc.

3º Causæ quæ polluunt ecclesiam, polluunt cœmeterium; loca enim juris cœmeterium sicut ecclesiam spectant. Unde polluitur cœmeterium si reus ad mortem damnatus, in eo occidatur.

4º Polluta ecclesia, eo ipso polluitur cœmeterium ei contiguum; quia censetur res una cum ecclesia, et *accessorium naturam sequi*, etc. secus si ab ea esset separatum. Contra vero, polluto cœmeterio, non ideo pollueretur ecclesia ei contigua; quia non convenit principale naturam accessorii sequi. *Ita omnes.*

*Reconciliatio ecclesiarum.*

1° Ecclesia penitus vel ex majori parte reædificata, vel etiam parietibus renovata, debet nova consecratione dici, inquit Ferraris, v° *Consecrat.* n. 9 : etenim non eadem, sed altera est ecclesia.

2° Contra vero ecclesia solemni ritu consecrata, quocumque etiam enormi crimine polluat, iterum consecrari non debet, quia consecratio assimilatur Baptismo, et circa idem objectum nunquam iteratur : sic expresse Ferraris, v° *Eccl.* art. 4, n. 74 et seq. Devoti alique canonistæ, quamvis caput 20, dist. 1, partis 3 Decreti contrariam dispositionem habere videatur. Procedendum est igitur ad ejus reconciliationem, quæ ab episcopo facienda est, secundum ritum in pontificali præscriptum, utendo aqua ad hoc specialiter benedicta, cum vino et cinere, ad significandam peccatorum reconciliationem ; semper enim cinis fuit signum pœnitentiæ.

3° Episcopus diœcesanus alium delegare potest episcopum ad hanc reconciliationem faciendam, non vero simplicem sacerdotem ; id expresse prohibetur a Greg. IX, in Decretal. l. 3, tit. 40, cap. 9, et sic S. Congr. Rit. pluries decrevit.

4° Romanus autem pontifex hanc facultatem delegare potest simplicibus sacerdotibus ; sic S. Congr. Rit. decrevit 19 maii 1607 ; ita habet Bened. XIV, in I epist. superius citata, § 2. Ex speciali Leonis X concessione, hoc privilegium habent generales, provinciales, etc. ordinum Mendicantium et aliorum quorundam non mendicantium, ea conditione ut aqua ab episcopo diœcesano benedicta utantur, nisi episcopus duobus diebus, circiter 13 vel 15 leucis, ab ecclesia reconcilianda distet. Pius VII facultatem concessit, 3 martii 1821, vicario generali diœcesis Carpensis, referente *Romsée*, « sive per se, sive » per alios sacerdotes ab ipso specialiter deputandos, re-  
» conciliandi ecclesias consecratas (*quæ variis modis pro-*  
» *fanatæ fuerant*), de quibus in precibus, servato ritu a

• pontificali Romano præscripto, adhibita aqua per catholicum episcopum benedicta. »

5º Si ecclesia non fuerit consecrata, sed tantum benedicta, per simplicem sacerdotem ab episcopo aut a vicario generali delegatum reconciliari potest, juxta formam in rituali Romano et in aliis ritualibus statutam. Sic Glossa in cap. 10, tit. 40, lib. 3 Decretal. rituale Rom. Ferraris, art. 4, n. 72 et alii.

6º Etsi ecclesia per sacrilegia publica, ab homicidio, sanguinis aut seminis effusione, infidelis vel excommunicati sepultura distincta, per exercitia hæretica, profana, impia, per hominum vel animalium in ea stabulatorum spurcitas, etc. stricte, ad sensum juris canonici, non polluitur, maxime tamen decet et praxis est ut per episcopum vel per sacerdotem ab eo delegatum cum aliqua cæremonia reconcilietur et abluatur. Ita Ligorio, l. 6, n. 368, post Layman.

7º Cœmeterium pollutum reconciliari potest per simplicem sacerdotem ab episcopo aut vicario generali deputatum, et sequendus est ritus specialis in rituali præscriptus.

8º Si per gravem aliquam indecentiam, non quidem stricte pollutum, sed profanatum fuisset, aliqua cæremonia expiatoria sanctificandum foret, quemadmodum de ecclesia diximus, idque juxta episcopi judicium.

#### *Necessitas ecclesiarum.*

1º *Constat, ex dictis*, ecclesias semper exstitisse et aliquo ritu sacro sanctificari debuisse : jure communi et ordinario prohibetur ne missa extra loca sacra celebretur, et Concil. Trid. hanc dispositionem juris renovavit ac confirmavit. sess. 22, decreto de Observ. et vitandis in celeb. missæ.

2º Certum est tamen, in primis Ecclesiæ sæculis, tempore persecutionum, missam frequenter celebratam fuisse in domibus privatis, in speluncis, in cavernis, in carceribus, etc. et in Decreto, part. 3, dist. 2, cap. 1, legitur missarum celebrationes alibi quam in sacratis Domino

locis, *absque magna necessitate*, fieri non debere. Adveniente ergo magna necessitate, v. g. peste, bello, persecutione, ecclesiæ dirutione, itinere per regiones infidelium, etc. missam in loco non sacro, aliunde honesto, celebrare licet, *etiam absque licentia episcopi, si absens sit et difficulter adiri possit*, ait Ferraris, vº *Missa*, art. 4, n. 4; concilium enim Trid. talem celebrationem in hujusmodi casibus prohibere voluisse non censetur, *quoniam*, ut fert cap. 11, dist. 1, tertiæ partis Decreti, *necessitas legem non habet*. Sic S. Th. 3 part. q. 83, art. 3, ad 2<sup>um</sup>; Suarez, Bened. XIV, Ligorio, l. 6, n. 356, etc. Hinc missa celebratur in castris etiam sub dio pro exercitu, sed festivis tantum diebus, aut aliis diebus pro generalibus et primariis ducibus in eorum tentoriis.

In his tamen et similibus casibus, si per tempus liceat, semper impetranda est concessio episcopi, qui aut judicabit causam esse sufficientem, aut per dispensationem in dubio relaxabit legem.

3º Quilibet sacerdos missam omni die celebrare potest, 1º in omni ecclesia publica, consecrata, vel benedicta, non polluta, aut reconciliata, positis aliunde ponendis; 2º in oratorio benedicto, ad usus sacros destinato, et januam in via publica habente, etsi privata in eo existat janua domui alicujus sæcularis affixa; 3º in oratoriis seu capellis communitatum, puta hospitiorum, seminariorum, collegiorum, monialium, etc. sic declaravit S. Congr. Rit. 2 sept. 1661; 4º in oratoriis quæ habent episcopi, sive in palatiis suis, sive in domibus rusticanis, etiam extra proprias diœceses, ut ex decreto Congr. Concil. 22 sept. 1640 concluditur, quia domus episcopi non censetur privata.

4º In oratoriis autem privatis sæcularium legitime erectis celebrare non licet diebus in diplomate reservatis, nempe in solemnioribus festis.

5º Privilegio gaudent episcopi et cardinales altare viaticum habendi, illud ubicumque fuerint in propria vel in aliena diœcesi erigendi, atque in eo celebrandi vel celebrare faciendi; cap. 12, tit. 7, lib. 5, in Sexto.



6° Clemens XI, per decretum 15 decembris 1703, hanc facultatem episcopis et cardinalibus abstulerat quoad domos laicas, etiam in propria diœcesi; sed Innocentius XIII, bulla diei 3 maii 1723, a Bened. XIII anno sequenti, 17 sept. confirmata, declaravit prohibitionem Clementis XI non intelligendam esse « de domibus etiam  
 • laicis, in quibus dicti episcopi forte occasione visitatio-  
 • nis vel itineris hospitio excipiuntur; ut nec etiam  
 • quando episcopi in casibus a jure permissis, vel de speciali Sedis apostolicæ licentia, absentes a domo propriæ  
 • ordinariæ habitationis, moram idcirco faciunt in aliena  
 • domo per modum similis habitationis. »

7° Has juris communis restrictiones in Gallia admissas fuisse non arbitrator.

8° Cum autem prædictum episcopi privilegium sit personale, alii sacerdotes etiam ipsius comites, eo absente, in domibus privatis celebrare non possent; Ligorio, l. 6, n. 358.

9° Olim episcopi facultatem habebant permittendi ut missa extra loca Deo dicata celebraretur: verum hæc eorum facultas per decretum concilii Trid. sess. 22, supra citati, multum fuit restricta; communiter tamen docetur eos talem adhuc concedere posse licentiam pro determinatis casibus, vel pro aliquo tempore, si justa adsit causa, non magnæ necessitatis, quæ nullam requirit dispensationem, sed difficultatis ecclesiam adeundi, missam alibi audiendi, etc. si aliunde persona dispensatione videatur digna.

10° Restrictio igitur a concilio Trid. inducta, de licentia in domibus privatis perpetuo celebrandi aut celebrare faciendi intelligenda est: hæc itaque licentia a solo pontifice Romano obtineri potest, et obtenta, personæ privilegiati inhæret eamque semper sequitur. Executioni tamen demandari non potest quin episcopo diœcesano præsentata, et ab eo agnita fuerit ut authentica; pro unica missa coram privilegiato celebrata valet, et non aliter; vide Ligorio, l. 6, n. 359.

11° Privilegia hujus generis, quæ nonnulli regulares

sibi vindicabant, omnino fuerunt revocata per decretum concilii Trid. sess. 22, ut expressis verbis declaraverunt Clemens XI, Innocentius XIII et Bened. XIV.

12<sup>o</sup> Diu disputatum est an in mari aliquando celebrare liceat : alii affirmabant, alii negabant, et rationes ex utraque parte afferebantur. Sed Bened. XIV, de Missæ sacrif. l. 3, cap. 6, n. 11, dicit quod per Sedis apostolicæ praxim omnis sublata fuerit disputatio, et apostolicum nunc semper requiratur indultum, quod nonnisi sub illis conceditur conditionibus : 1<sup>o</sup> ut tutum sit navigium ; 2<sup>o</sup> ut longe absit a littore ; 3<sup>o</sup> ut mare sit tranquillum ; 4<sup>o</sup> ut adsit alter sacerdos vel diaconus qui, coorientem motu, calicem manu tenere possit.

### *Imagines in ecclesiis.*

1<sup>o</sup> Cum in veteri Lege omnè sculptile stricte prohiberetur, primi Christiani imagines non colebant, nec in ecclesiis, et multo minus super altaria habebant, ubi nec Crux diu ponebatur. A statu is et sculpturis maxime alieni erant, non quod judicarent usum earum aliquid mali exhibere, sed ne contra præceptum Dei agere viderentur, et scandalum præberent Judæis.

2<sup>o</sup> Antiquus tamen mos erat sensibilia objecta, præterita vel absentia, sub figuris exhibere : sic Tertull. l. de Pudicitia, cap. 7 et seq. refert Christianos habuisse Christum in calicibus suis, sub figura boni pastoris ovem super humeros suos reportantis, depictum. Sæpius representabatur Christus sub symbolo agni, quia S. Joannes Baptista de illo dixerat : *Ecce Agnus Dei, ecce qui tollit peccatum mundi*. Spiritus sanctus adumbrabatur sub specie columbæ, et Pater æternus sub signo vocis de cælo loquentis.

3<sup>o</sup> Vetustior imago in ecclesia exhibita fuit crux sine crucifixo, deinde cum crucifixo, ut probat *Grancolas*. Postea, ad ornandas ecclesias et ad fovendam fidelium pietatem, depictæ sunt imagines Christi, B. Mariæ virginis, sanctorum et sæpe aliorum, honoris causa, v. g.

papæ, episcopi, imperatoris. Unde imagines eorum qui in concilio generali sexto damnati fuerant, ex ecclesiis sublatae sunt, ut videre est apud *Fleury*, l. 40, n. 27.

4° S. Greg. Magnus, in septimo sæculo, docet imagines servandas esse, « ut qui litteras nesciunt, saltem in parietibus videndo legant quæ legere in codicibus non valent; » Epist. l. 9, epist. 105; in aliis pluribus locis de imaginibus eodem sensu loquitur. Nihilominus consuetudinem profanas imagines in ecclesiis collocandi adhuc viguisse testis est idem pontifex maximus, qui Phocæ et Leontiae augustorum *iconam reponi jussit in oratorio S. Cæsarii martyris, intra palatium*.

5° Quidam, ex majoris sensu devotionis erga Christum, B. Virginem Mariam aut sanctos, imagines eorum cœperunt honorare, eas deosculando, ante eas genuflectendo, candelas vel lampades accendendo, thus adolendo, orando, etc. Occasione hujusmodi cultus gravis exorta est controversia in octavo sæculo, ut in tractatu de Incarn. exposuimus. Ecclesia, in pluribus conciliis generalibus coadunata, definiit cultum sanctarum imaginum esse licitum, et ex illo tempore picturæ et sculpturæ generatiles factæ sunt in ecclesiis tanquam ornamenta et pietatis incitamenta.

6° Plures inde, diversis temporibus, nati sunt abusus, modo ex inordinato quæstus amore, modo ex ignorantia fidelium. Summi pontifices et concilia, v. g. Rhotomagensis, anno 1445, can. 7, Coloniense, anno 1452, ac præsertim Trid. sess. 25, decreto de Invocatione.... et sacris imaginibus, eos accurate reprimendo jusserunt.

7° Docendum igitur, nullam virtutem in imaginibus residere, unam altera efficacior vel potentior non esse: omnis tollenda est figura, picta vel sculpta, deformis, horrorem vel risum potius quam ædificationem pariens, aliquid inhonestum vel profanum exhibens; et ideo nulla admittenda est insolita, nisi ab episcopo approbata, ut patres Tridentini decernunt, et episcopi solas imagines objecta sancta decenter exhibentes approbare

possunt, quæ omnes prævia benedictione in ritualibus descripta sanctificari debent.

8º « Ad primas vespervas dominicæ de Passione coe-  
 » rientur omnes cruces et imagines Salvatoris per eccle-  
 » siam, et super altare nullæ ponantur imagines san-  
 » ctorum; » Cærem. episc. l. 2, cap. 20. Aliæ pariter  
 imagines quæ in ecclesia reperiuntur simul velis violaceis  
 tegi debent, ut ait Merati, citans decret. S. Congr.  
 Rit. 4 aug. 1663.

9º Feria sexta in Parasceve, postquam Crux adoranda  
 ab officiatore fuit detecta, omnes aliæ cruces similiter  
 deteguntur; non vero imagines sanctorum, nisi in sabbato  
 Sancto post litanias, et forsân melius dum cantantur ul-  
 timæ prophetiæ, ut sint patentes dum invocantur sancti;  
 Merati.

10º Apud nos, sabbato ante primam dominicam Qua-  
 dragesimæ, usque ad sabbatum Sanctum, velantur ima-  
 gines et cruces.

### *Reliquiæ sanctorum.*

1º Legitimum esse cultum reliquiis sanctorum exhibi-  
 tum probavimus ad calcem tractatus de Incarn. Vetus-  
 tissimus est usus eas solemniter transferendi, in ecclesiis  
 et in altaribus collocandi, venerationi fidelium exponendi,  
 lampades ante eas accendendi, eas thurificandi, etc. ut  
 in pluribus locis testantur S. Hieronymus, S. Ambro-  
 sius, S. Aug. S. Chrysost. Rufinus, Sozomenus, Theodo-  
 retus, etc.

2º Primitus sanctorum corpora e tumulis levare et per  
 partes dividere non licebat : S. Greg. Mag. ab impera-  
 trice Constantina rogatus ut caput vel aliam partem cor-  
 poris S. Pauli ei mitteret, respondit, Epist. l. 4, epist. 3,  
 temerarium fore eorum corpora (Petri et Pauli) non  
 solum tangere, sed vel aliquatenus inspicere. Super ea  
 erigebantur altaria, et novas ecclesias absque reliquiis  
 martyrum dedicari VII concilium generale prohibuit,  
 can. 7, sub pœna depositionis in episcopum qui tanquam



traditionum ecclesiasticarum transgressor haberetur.

3<sup>o</sup> Plurima tamen reperiuntur exempla, etiam ante S. Greg. tempora, reliquiarum S. crucis Domini, catenarum SS. Petri et Pauli, S. Mariæ, id est, vestium ejus vel aliarum rerum quæ ad eam pertinuerant, S. Joannis Baptistæ, S. Stephani, etc. Postea quando sancta corpora e tumulis levaricœperunt, in pretiosis capsis includi et in ecclesiis honorifice collocari consueverunt, sæpius sub altaribus, et nunquam desuper. Linteamina aliaque objecta ad ea admota, portiones terræ ex eorum tumulis, vel thecarum in quibus exstiterant, vel olei lampadum coram eis ardentium, etc. inter fideles velut reliquiæ dividebantur. Deinde mos invaluit ut ipsa corpora minutatim divisa, inter multos distribuarentur, atque innumeræ ecclesiæ eorundem sanctorum reliquias habere possent, et eas in thecis decenter inclusas, testimoniis authenticis munitas, ab episcopo diœcesano recognitas, super altaria collocari ac publicæ venerationi exponere liceret. Nullas vero, signis authenticitatis destitutas vel ab episcopo diœcesano non approbatas, cultu publico honorare et venerationi fidelium exponere licet : id in ecreto concilii Trid. supra citato, expresse vetitum est.

4<sup>o</sup> In ecclesiis ubi insignis alicujus sancti asservatur reliquia, v. g. caput, brachium, crus, aut alia pars corporis in qua passus est martyr, modo sit integra, et non parva, et legitime ab ordinario approbata, officium illius sancti debet esse duplex et semper dicitur *Credo*; non item ad missam ejusdem sancti in aliis ecclesiis, nisi solemniter celebretur. Sic S. Congr. Rit. in pluribus decretis a Merati citatis.

Reliquiæ privatim habitæ vel spectatæ ab omnibus licite, modo reverenter, tanguntur : publice vero expositæ vel exponendæ, præsertim reliquiæ S. Crucis aut S. Coronæ spinarum, a solis presbyteris aut diaconis tangi, deferri aut exponi debent, idque cum luminaribus et incenso. Sanctorum etiam reliquiæ super altare expositæ vel exponendæ, cum stola inter acolythos lumina gestientes deferendæ sunt, ut docet Merati.

*Campanæ in ecclesiis.*

1° In primis sæculis, tempore persecutionum, credibile est Christianos secreto monitos esse per diaconum aut per alium virum ab episcopo designatum ut ad ecclesias convenirent; vel forsitan, ubi persecutionis æstus sedabatur, per aliquod sensibile signum, v. g. sono cornu aut tubæ, de quibus fit mentio in regula S. Pachomii, vel strepitu tabellarum lignearum malleo percussarum, quibus nunc adhuc utuntur Græci in Turcia degentes; usum enim campanarum Turci non permittunt Christianis.

2° Si fides adhibeatur Durando, t. 1, cap. 4, n. 1, quædam inventa sunt vasa ænea resonantia in Nola, civitate Campaniæ : unde majora dicta sunt *campanæ*, a regione Campaniæ, et minora appellata sunt *nolæ*, a civitate Nola.

Campanarum institutio communiter tribuitur S. Paulino Nolensi episcopo, circa medium quinti sæculi defuncto : at Card. Bona, l. 1, cap. 22, n. 3; Bened XIV, Inst. 20, et alii merito notant illum S. pontificem, ecclesiam a se exstructam per singulas partes describentem in epist. 12 ad Severum, de campanis et turri campanarum omnino silere; unde concludendum videtur campanas ipsi adhuc fuisse ignotas.

3° Plures alii earum inventionem vel primum usum Sabiniano, in initio septimi sæculi summo Pontifici, attribuunt : sed in Vita S. Columbani, sexto sæculo exarata, legitur eum cæterosque monachos e somno, *pulsante campana*, excitatos, ad templum media nocte se contulisse.

4° Primus tamen qui expressum habuit sermonem de campanis fuit venerabilis Beda, sub initio octavi sæculi : multi itaque usum illarum ad septimum sæculum referendum esse censent, licet earundem aliqua notio prius jam habita fuerit. Primum quædam habebantur instrumenta ferrea vel ænea, quæ manu tenebantur, et

agitata, resonabant *tinnitu*, *tin tin*, et idcirco tintinnabula vocata sunt : eis successerunt campanæ quibus, ut sonus earum longius emitteretur, postea erectæ sunt turres cum cacumine, in cujus summitate plantatur vexillum crucis, ad significandum ædificium Christo esse dicatum, et locatur communiter gallus æneus aut ligneus, non solum ad directiones ventorum indicandas, sed ut fidelibus et pastoribus sit vigilantiae symbolum, eosque e somno peccati sonitu campanæ excitatos, moneat ad ecclesiam properandum esse.

5° Baronius refert, ad ann. 968, t. 16, Joannem XIII campanam benedixisse et consecrasse antequam in turri Lateranensis ecclesiæ collocaretur, et hunc ritum in Ecclesia perseverasse : verum Capitularia Caroli Magni, ducentis annis antiquiora, campanarum benedictionem memorant, et in ritualibus Joanne XIII antiquioribus benedictio campanarum describitur, ut ostendit P. *Ménard*, n. 587, ad Sacram. S. Greg.

6° Quoniam in hac benedictione adhibetur aqua benedicta, campana lavatur, oleo infirmorum et sancto chrismate ungitur, nomen ei imponitur, hæc cæremonia vulgo dicta est baptismus; quod vocabulum Ecclesia nullibi approbavit, sed tolerat in simplicibus, modo caute erudiantur hujusmodi campanarum consecrationem nihil habere sacramenti aut sacramento Baptismatis simile, nisi in quibusdam ritus externi circumstantiis.

7° Campanæ, antequam in campanili collocentur, benedici et consecrari debent ab episcopo diocesano, qui facultatem hanc benedictionem faciendi simplici presbytero delegare non potest, ex decreto S. Congr. Rit. 19 april. 1687; quia unctio quæ debet fieri cum oleis, est ordinis episcopalis: talis igitur delegatio Sedi apostolicæ reservatur, et qui indultum obtinuit, alium subdelegare nequit; Ferraris, v° *Campana*, n. 8. Ex usu tamen in Galliis recepto, solent episcopi simplices sacerdotes ad benedicendas campanas committere, idque formaliter agnoscit *Romsée*, sine restrictione locorum.

8° Privilegio benedicendi campanas gaudent abbates

aliique prælati usum pontificalium habentes, pro solis ecclesiis sibi subditis, ut expresse declaravit S. Congr. Rit. 5 aprilis 1620; Ferraris v<sup>o</sup> *Campana*, n. 13.

9<sup>o</sup> Campanæ ob varios fines pulsari solent, nempe 1<sup>o</sup> ut fideles ad ecclesiam conveniant; 2<sup>o</sup> ad laudandum Deum, v. g. infra consecrationem in missa solemni, ut sanctissimum adoretur Sacramentum, infra processiones, hymnum *Te Deum*, hymnum angelicum in feria V in cœna Domini et sabbato Sancto; 3<sup>o</sup> ad annuntiandam mortem fidelium sono lugubri, ut residui pro illis orent; 4<sup>o</sup> ad excitandam in animis lætitiā: inde major earum fit percussio in magnis festivitātibus; 5<sup>o</sup> ad depellendos morbos, tum corporales, tum spirituales, ad dissipandas turbines et tempestates, quod in earum benedictione sic petit minister: « Ut cum melodia illius auribus insonuerit populorum, procul pellantur omnes insidiæ inimici, » fragor grandinum, procella turbinum, impetus tempestatum, temperentur infesta tonitrua, ventorum flamina fiant salubriter ac moderate suspensa, etc. » Prudentia tamen suadet ut ab earum pulsatione abstinenceatur, dum tonitru terræ vicinum est, quia vibrationes aeris illud attrahere possunt.

10<sup>o</sup> S. Congr. episc. et regul. anno 1581, expresse decrevit campanas consecratas, etiam in profana turri existentes, usui profano inservire non debere, etiamsi ad hunc finem a sæcularibus fabricatæ prætenderentur: attamen in praxi receptum est ut in signum lætitiæ communis, v. g. dum quis insignis ad dignitatem ecclesiasticam aut civilem promovetur, ad nativitatem principis, ad diem natalitiā regis, ad celebrandam victoriā, etc. pulsantur; vel ad congreganda membra communitatis in casu incendii, inundationis, hostium invasionis, etc. quia in his atque similibus casibus aliquod existit motivum spirituale, nempe bonum societatis, opus charitatis, etc. Id vero non liceret si de privatis negotiis ageretur, et lex civilis 8 aprilis 1802 (18 *germinal an X*), art. 43, agnoscit eas ad convocandos fideles esse destinatas, et propter alium finem non pulsandas, nisi ex



politiæ localis consensu ; supponendum et ex consensu parochi, ut ostendit D. *Affre, Traité de l'administration temporelle des paroisses.*

11° Sonus campanarum, ex antiquo usu, feria V in cœna Domini suspenditur, ad significandum discipulos Christum dereliquisse; et, ex Constitutione Leonis X incipienti *Dum intra*, pluribus S. Congr. Rit. decretis ac Bened. XIV, Inst. 20, non pulsandæ sunt sabbato Sancto in ecclesiis tam regularium quam sæcularium, antequam campanæ ecclesiæ cathedralis, vel matricis, vel parochialis defectu cathedralis aut matricis, sonuerint, propter honorem principali ecclesiæ debitum : unde si duæ ecclesiæ in eodem loco pari honore gauderent, alternis vicibus primatum sonitus habere deberent, ut expresse Bened. XIV, loco citato, docet.

*Aqua benedicta ad ecclesiarum januas.*

1° Usus aquæ benedictæ ab apostolica traditione profectum et in Ecclesia semper observatum esse docent Baronius, ad an. 132, n. 3; Bona, l. 1, cap. 20; illius mentionem faciunt Tertull. S. Cypr. S. Epiph. S. Ambr. et auctor Const. Apost. l. 8, cap. 29; formam illam benedicendi describit Micrologus, cap. 46; institutionem ejus tribuit Alexandro I, pontifici maximo anno 119 defuncto.

2° In medio vestibuli ecclesiarum primitus erant aquæ salientes, vel putei, canthari aut conchæ, in quibus Christiani templum ingressuri manus et os lavare solebant, ut sic purificati, loco sancto et divinis rebus digniores essent : hanc exstitisse consuetudinem testantur Eusebius, S. Paulinus, S. Chrysost. etc. Inde natus est usus aquam benedictam ad januas ecclesiæ collocandi, ex illa sumendi, se signandi, etc.

3° Hinc etiam 1° mos antiquus quem Udalricus, in undecimo sæculo vivens, longe describit, apud P. *Martène*, aqua benedicta singulis diebus dominicis, ante missam solemnem, aspergendi altare, clerum et populum (Cluniaci plura aspergebantur altaria). 2° Eodem fine aspergi

solent objecta benedictione sanctificanda, ut ab eis omnes immunditiæ pellantur. 3° Cadavera defunctorum, eorum tumuli et sarcophagi similiter asperguntur, ad expellendos dæmones, ne eis illudant, orationes viventium impedian, et in symbolum desiderii quo illorum animam cœlesti rore aspergi optamus. Sic P. Cavalieri apud Ferraris, v° *Aqua bened.* n. 5. 4° Item in monasteriis aqua benedicta spargitur vespere super fratres et sorores, in eorum dormitorium et lectulos, ut videri potest apud *Martène*. Aliquid simile pii fideles et clerici facere consueverunt, seipsos et lectum aqua benedicta tingendo, ante dormitionem, ut caveantur nocturna phantasmata: similiter et mane surgentes eadem aqua se perfundunt, crucem in fronte signantes, juxta veterem consuetudinem, cujus meminit *Martène*.

4° Nullibi autem reperi morem aliquando exstitisse ut e templo egredientes aqua benedicta se muniant, sicut ingrediendo fecerant, quanquam id contra externas tentationes utiliter fieri possit.

5° Aquæ benedictio quibusque dominicis diebus, exceptis dominicis Paschæ et Pentecostes, facienda est, ut ex missali Romano colligunt Gavantus, Merati, Ferraris. Id jam fieri consuevisse, juxta canones, testatur Micrologus, cap. 46, et idem præscribit rituale nostrum, parte secunda, excipiens tamen dominicas in quibus celebrantur festa solemnia vel sanctissimum exponitur Sacramentum.

6° Hæc benedictio est sacerdotalis; a clerico inferiori fieri non potest, et sacerdos excommunicatus aut suspensus eam faciens, fieret irregularis; Ferraris, v° *Aqua benedicta*, n. 4.

7° Aspersio aquæ benedictæ nunquam omittitur diebus dominicis, ut expresse habent Gavantus et Merati, et missale Romanum evidenter supponit: per ipsum facienda est celebrantem alba et stola cum pluviali coloris diei indutum, etsi in prima dignitate constitutum, non obstante contraria consuetudine, quæ potius corruptela quam consuetudo dici debet, cum sit contra rubricas

missalis et dispositionem cæremonialis episcoporum, l. 2, cap. 30. S. Congr. Rit. 27 nov. 1632 et 16 nov. 1649.

8° Episcopus tamen celebraturus aspersionem non facit, sed ejus loco simplex sacerdos cum superpelliceo et stola; sic, referente Gavanto, statuit Greg. XIII, 30 decembris 1573, et cæremoniale episc. l. 2, cap. 31, dicit, episcopo solemniter celebraturo, aspersionem omittendam esse.

9° Non aspergitur altare in quo sanctissimum expositum est Sacramentum, ut expressis vocibus asserit Gavantus; sed de more osculandum videtur, et aliæ consuetæ fiunt aspersiones.

10° S. Congr. Rit. die 26 nov. 1605, decrevit canonicos singulatim aspergendos esse, incipiendo ab iis qui sunt in cornu dextro, non vero unico ictu in circulum; ipsum præsentatur aspersorium episcopo, manum ejus osculando. Cæteri per ictum circulosum asperguntur.

11° Episcopo ad ecclesiam accedenti præsentandum est aspersorium, non a vicario generali aliave dignitate cum comitante, sed a parochio vel a digniore illius ecclesiæ, vel a capellano, si de capella agatur, et non a parochio in cujus territorio existit capella, ut diserte ostendit Bened. XIV, Inst. 105, § 128.

12° Dicta S. Rit Congr. declaravit, die 7 junii 1704, gubernatori civitatis, et *a fortiori* alteræ dignitati civili, judiciali aut militari eo superiori, ad ecclesiam accedenti præsentandam esse aquam benedictam per aspersorii contactum, non vero per illius traditionem.

13° Ad consequendos effectus aspersionis, non requiritur ut aqua benedicta res aut personas physice tangat; contactum moralem sufficere docent Quarti et Ferraris, si personæ ad quas dirigitur aspersio eam aliquo signo externo, v. g. inclinatione, signo crucis, acceptent; vel, ubi res insensibiles benedicuntur, si aspergens intentionem suam ad omnes dirigat, tunc illæ ad quas aqua sanctificata non pervenit physice, nihilominus sunt benedictæ.

15° Aquam benedictam in usus profanos convertere

ex contemptu, peccatum est mortale; citra contemptum, v. g. ad humectandum atramentarium, juxta quosdam esset duntaxat peccatum veniale, quia ipsomet usu profano hæc aqua benedictionem suam amitteret; juxta alios non rigidiores, peccatum foret mortale, propter gravem indecentiam ac irreverentiam. Eamdem aquam ad usus evidenter superstitiosos scienter adhibere, peccatum procul dubio mortale esset.

## ARTICULUS QUINTUS.

### DE ALTARI ET EJUS ORNAMENTIS.

#### *De altari.*

1° Altare sic vocatur ab *altitudine*, juxta plures auctores, et nomen sortitur ab antiquis ethnicis, qui sacra in ædificiis a terra elevatis faciebant diis superis: juxta alios sic appellatur, quia est *alta res* vel *alta ara*. Sæpe etiam dicitur mensa, quia super illud præparatur victima edenda.

2° Noe primus ædificavit altare Domino, et ab ejus ætate semper exstiterunt altaria. Scimus quid ipse Deus præscripserit per Moysen in veteri Lege circa templum et altare; Apostoli et primi eorum successores usum altaris habuerunt, ut patet his B. Pauli verbis, I Cor. ix, 13: *Qui altari deserviunt, cum altari participant*; et Hebr. xiii, 10: *Habemus altare, de quo edere non habent potestatem, qui tabernaculo deserviunt*. S. Ignatius, S. Irenæus, Orig. Eusebius, Tertullianus, S. Cyprianus, S. Optatus Milevitanus aliique priorum sæculorum Patres aram Dei et altare nominant aut evidenter supponunt, ut Card. Duperron, Bona, Devoti, etc. expressis testimoniis ostendunt adversus Calvinianos qui, præsentiam realem negantes, impudenter asserebant per tria priora sæcula Christianos non habuisse altaria in stricto sensu dicta.

3° Duplicis generis sunt altaria: alia immobilia, quæ



alicui loco sunt fixa, et portari aut moveri non possunt quin destruantur; alia vero sunt mobilia, quæ scilicet uni loco non sunt fixa, sed ad nutum moveri et transferri possunt, ideoque vocantur portatilia vel viatica, quia sacerdotes iter facientes eis uti possunt.

4º Primitus erant lignea, ut plurimum; deinde præscriptum est ut essent lapidea, quia *Petra erat Christus*, I Cor. x, 4. « Altaria si non fuerint lapidea, chrismatis » unctione non consecrentur; » Decreti 3 parte, dist. 1, can. 31. Canon ille ex concilio Epaon. anno 517, can. 26, eductus est; *Labbe*. Sufficit tamen ut sint lapidea in ea parte in qua consecrantur: unde altare ligneum cum ara lapidea permittendum esse censuit S. Congr. Rit. 10 nov. 1612. Aræ illius magnitudo talis esse debet ut pes calicis et hostia in ea commode capi possint: ita communiter tenent doctores, ait Ferraris, vº *Altare*, n. 6; et inter altare fixum ac portatile non distinguunt. Itaque merito inde concluditur necessarium non esse ut ara lapidea sit longa; si immobiliter sit fixa, et in eo statu consecretur, erit altare fixum seu immobile, quamvis ordinarie totam longitudinem altaris teneat.

5º Quidam arbitrati sunt altaria per solam missæ celebrationem consecrari; sed concil. Agathense, anno 506 celebratum can. 14, relato in Decreto, dist. 1, can. 32, habet: « Altaria placuit non solum unctione chrismatis, » sed etiam sacerdotali benedictione sacrari. » Certum est igitur sacrificium eucharisticum peragi non posse nisi in altari, sive fixo, sive portali, ab episcopo consecrato; et si de consecratione illius dubitetur, consecrandum est antequam missæ super illud celebrentur; Decret. dist. 1, can. 18. Qui secus ageret, mortaliter peccaret; « Cum » hæc sit transgressio gravis legis et consuetudinis ecclesiasticæ in qua nec episcopus dispensare potest, » inquit Ferraris, vº *Altare*, n. 41.

6º Expresse prohibitum est presbyteris, Decreti part. 1, dist. 68, can. 4, et part. 2, causa 26, q. 6, can. 3, ne altare præsumant consecrare; nec episcopus ad id sim-

plicem presbyterum delegare potest, quia in jus commune canonicum non habet potestatem. Summus vero Pontifex, cum ab illo jure dispensare possit, facultatem altaria consecrandi, simplicibus conferre potest presbyteris, et reipsa Leo X hanc concessit facultatem fratribus ordinis Minorum ad Indias Orientales proficiscentibus, Paulus III presbyteris societatis Jesu, ut in locis remotissimis infidelium, ubi episcoporum copia non habetur, altaria consecrare possent, et Pius VI eandem dedit potestatem pluribus sacerdotibus Gallicanis tempore persecutionis in fine ultimi sæculi exortæ.

7° Abbates et prælati, usu pontificalium gaudentes, altaria consecrare possunt, sed pro ecclesiis et religiosis sui ordinis tantum, ut Congr. Episc. et Regul. pluries decrevit.

8° Inter theologos et canonistas controvertitur an reliquiæ sanctorum ad essentiam consecrationis altarium sint necessariae : plures negant, dicentes nullibi expressum inveniri præceptum de ponendis reliquiis in altaribus consecrandis, aut præceptum in nonnullis canonibus expressum non fuisse universaliter receptum, vel saltem per contrariam consuetudinem abrogatum fuisse. Pro hac opinione citantur Sotus, Suarez, Vasquez, Layman, etc. Alii vero, nunc saltem communius, ut Sylvius, Azor, Habert, Tournely, Gavantus, Ligorio, Ferraris, etc. contendunt reliquias sanctorum, ab Ecclesia approbatorum, ad consecrationem cujuslibet altaris, sive fixi sive portatilis, omnino necessarias esse; et nituntur 1° canone 26, dist. 1, 3 part. Decreti, ex concilio Africano deprompto, in quo præcipitur ut altaria reliquiis carentia ab episcopis evertantur; 2° concilii Nicæni II, can. 7, ubi dicitur, nullum consecrari templum sine reliquiis sanctorum; 3° consuetudine Ecclesiæ per orationem, *Oramus te per merita sanctorum tuorum, quorum reliquiæ hic sunt*, etc. sufficienter indicata; 4° pluribus S. Congr. Rit. decretis in quibus supponitur legitima non esse altaria sine reliquiis.

9° Non est dubium quin summus Pontifex a conditione

ponendi reliquias in altaribus dispensare possit, et in eo casu, licet plures arbitrentur voces, *quorum reliquiæ hic sunt*, omittendas esse, et dicendum, *Oramus te per merita sanctorum tuorum ut indulgere digneris*, etc. probabilius tamen videtur nihil esse mutandum; quia, cum ex lege communi hic adesse soleant reliquiæ, verba *quorum reliquiæ hic sunt*, verificantur, etiam in casu in quo per accidens desunt, sicut *Dominus vobiscum*, et *Vobis fratres*, *Misereatur vestri*, etc. ubi unus assistit. Ita Merati et plures cum illo.

10° Ubi reliquiæ sanctorum deficiunt, particulam hostiæ consecratæ reponere non licet in altaris sepulcro, reliquiarum loco : esset quippe manifestus Sacramenti abusus. Attamen quando de altari fixo agitur, major fit reliquiarum fovea et in ea includi solent, cum cæremoniis in pontificali descriptis, nomen episcopi consecrantis et sancti in cujus honorem altare consecratur; Ferraris, v° *Altare*, n. 18. Fovea autem in altari fixo ordinarie fit sub ara, etiam in massa. In altari vero portatili parvum faciendum est foramen in una facie, vel melius in uno latere. Solæ ibi reconduntur reliquiæ in modica quantitate, et saltem duorum sanctorum ab Ecclesia approbatorum, et episcopali sigillo cum cera muniuntur : fovea vel foramen ita sigillo munitum vocatur sepulcrum.

11° Altaria non consecrantur sine unctionibus cum sancto chrismate et oleo catechumenorum, quæ unctiones ad essentiam consecrationis pertinent, et solus papa ab illis dispensare posset. Unde Pius VI, ad diversa quæsita a presbyteris Gallicanis sibi proposita, die 26 julii 1794, respondens, facultatem eis concessit missam sub dio vel in quolibet loco, supra altaria portatilia, sine ministro celebrandi, et altaria portatilia consecrandi, *cum oleis tamen ab episcopo benedictis*; conditionem reliquiarum non apposuit : eo ipso ab illa dispensasse censetur. Hinc factum est quod multa existant altaria portatilia in ecclesiis locata in quibus nullum invenitur reliquiarum vestigium. Nunc prorsus irregularia videntur, sed episcoporum est judicare an super illa missas celebrare liceat.

12° Primis temporibus, ut testimoniis S. Ignatii, S. Irenæi, S. Cypriani, Tertull. Eusebii, etc. constat, unicum erat altare in unaquaque ecclesia, ad unitatem Christi, Ecclesiæ et sacerdotii perfectius significandam : Græci huc usque unum tantum habent altare in ecclesiis; sed in circuitu ecclesiæ, exterius, juxta *Grancolas*, plura sunt, et olim apud Latinos plura erant oratoria in quibus privatæ dicebantur missæ. S. Greg. Magnus, Epist. l. 6, epist. 59, agit de decem et tribus altaribus in eadem ecclesia dedicandis, et ex eo tempore valde multiplicata sunt. Non prohibetur ne plura sint altaria fixa in eadem ecclesia : imo in Decretal. l. 3, tit. 40, cap. 5, legitur : « Noveris quod plura in ecclesia una altaria... poteris simul consecrare. » Non ibi agitur de altaribus portatilibus quæ communiter in ecclesia non consecrantur. Ergo.

*De altarium exsecratione.*

Pluribus modis exsecrantur altaria, ita ut nova consecratione indigeant, videlicet :

1° Si tabula altaris fixi, id est, lapis superpositus, cui adhibita fuit episcopalis consecratio, enormiter confracta vel imminuta fuerit, ita ut pars remanens calicem et hostiam cum patena commodo amplius continere nequeat ; Decretal. l. 3, tit. 40, cap. 1 et 3; si vero ille lapis modice tantum confractus aut minutus fuisset, v. g. si cornua solummodo essent confracta, altare non esset exsecratus, nec denuo consecrandus; Decretal. ibid. cap. 6. In dubio autem res committenda est judicio episcopi.

2° Quando prædictus lapis seu mensa superior consecrata movetur a basi cui erat immobiliter affixa, altare denuo consecrandum est, ut expresse habetur in Decretal. l. 3, tit. 40, cap. 1 et 3. At si tabula superior structuræ inferiori immobiliter affixa non esset, sed de loco ad locum una cum sepulcro commodo transferri posset, suam hac translatione non amitteret consecrationem, quia non fixum sed mobile esset altare; Ferraris, n. 24.



3<sup>o</sup> Polluta vel violata ecclesia, eo ipso polluitur altare in ea fixum; quia pollutio totam afficit ecclesiam, ac proinde altare ei immobiliter adhærens: verum execratio ecclesiæ non importat execrationem altaris, et *a fortiori* execratio altaris non facit ut ecclesia sit execrata; Decretal. l. 3, tit. 40, cap. 1. Ratio est, quia consecratio ecclesiæ et consecratio altaris sunt duæ actiones distinctæ, ab invicem separabiles, una in parietibus templi, et altera in mensa altaris impressa.

Altaria portatilia non execrantur, nec polluuntur per execrationem vel pollutionem ecclesiæ, quia ab illa omnino sunt distincta.

4<sup>o</sup> Altare portatile non execratur per motum vel separationem a lignis aut cæmentis quibus circumdatur, cum eo fine consecratum fuerit ut moveatur; neque per modicam fractionem, dum idem moraliter remanet: contra vero execratur si anguli in quibus ponitur chrisma notabiliter minuantur, aut ipsum ita frangatur ut pars remanens calicem et hostiam cum patena commode continere non possit. Ita generaliter theologi et canonistæ; Ferraris, v<sup>o</sup> *Altare*, n. 30.

5<sup>o</sup> Altare, sive mobile sive immobile, ut execratum haberi debet, si fractum fuerit sepulcrum aut amotæ reliquiæ; quia, licet plures contenderint reliquias ad essentiam consecrationis non pertinere, consuetudo Ecclesiæ est altaria sine reliquiis non consecrare, et fracto vel amoto sepulcro, iterum consecrare: ita tenent Sylvius, Pontas, Habert, Layman, Tournely, Ferraris, Ligorio. In confirmationem hujus sententiæ plura citantur decreta Congr. Rit. nempe 5 martii 1603 et 5 martii 1623, in quibus expresse dicitur: « Altare portatile tunc consecrationem amittit, quando frangitur, vel loco movetur » repositorium reliquiarum. Celebrari non potest super » altare a quo furtim, non amota vel facta mensa, sub- » tractæ fuerint reliquiæ a militibus, nisi altare de novo » consecratur; » Ligorio, l. 6, n. 369.

6<sup>o</sup> Plures tamen, ut Sporer et Tournely apud Ligorio qui eis consentire videtur, dicunt quod, urgente

necessitate, in altari reliquiis carente celebrare liceat.

7° Ex decretis S. Congr. Rit. 10 nov. 1599, 2 junii 1629 et 13 junii 1635 : « Si sub altari vel sub ejus gradibus humana sint defunctorum cavadera, non est illic celebranda missa, donec alio transferantur. » Excipitur tamen, apud Ligorio, si cavadera sint profunde inhumata, in aliqua cella sub fornice constructa; quia cavadera videntur sufficienter ab altari separata, ut verba, *quorum reliquiae hic sunt*, in ea non cadant. Vide Ferraris, v° *Altare*, n. 48.

8° Lapides altaris exsecrati, ipsamet mensa quæ fuerat consecrata, licite vendi et ab emptore retineri possunt, dummodo tamen in loco decenti et honesto collocentur; S. Congr. Rit. 9 maii 1606.

9° Altare ab episcopo consecratum, vel in ecclesia consecrata erectum, absque licentia episcopi destrui non potest; non potuit enim absque illius licentia erigi, ex cap. 25, dist. 1, tertiæ partis Decreti: ergo nec destrui potest, quia unum aliud importare videtur. Altaria non consecrata et in ecclesiis non consecratis a simplicibus presbyteris erigi et destrui possunt, ut communiter sentiunt canonistæ et fert praxis.

10° « In altari in quo episcopus missam cantavit, presbyter eodem die missam celebrare non præsumat. » Propria sunt verba can. 97, dist. 2, tertiæ partis Decreti; sicque, ex Glossa, statutum fuit propter reverentiam debitam episcopo, qui igitur licentiam super altari prædicto celebrandi concedere potest. Plurimi volunt hanc juris dispositionem vel nunquam obtinuisse, vel contraria consuetudine desiisse. Verum Bened. XIV, Const. *In postremo*, 10 octob. 1756, § 9, asserit hoc communi sententiæ adversari, et in bene constitutis diœcesibus privilegium episcopale religiose custodiri. Attestatur insuper in « Altaria pontificia intra patriarchales urbis basilicas non posse quemquam celebrare missam, nisi id ipsi fuerit a Romano pontifice per apostolicum Breve indultum; » et idem observandum respectu altarium a summo Pontifice consecratorum, ad certas ecclesias mis-



orum, atque papalium, honoris causa, declaratorum.

*De ornamentis altaris.*

Præcipua ornamenta quæ requiruntur sunt mappæ, crux et lumina.

*Mappæ.* Vetustissimus est usus altare lintheaminibus cooperire. « Quis fidelium nescit, inquit S. Optatus Mi-  
 • levitanus, l. 6, in peragendis mysteriis ipsâ ligna lin-  
 • theamine operiri? Inter ipsa sacramenta velamen potuit  
 • tangi, non lignum; » id est altare, quia tunc in Africa  
 altaria erant lignea. Refertur quemdam Proculum, ab  
 impio Genserico adversus catholicos missum, e lintheis  
 altaris subuculos et femoralia sibi fecisse. In Decreto,  
 tertia parte, dist. 2, cap. 27, statuitur quod, si per negli-  
 gentiam aliquid de sanguine Christi super altare cecide-  
 rit, et usque ad quartum lintheamen pervenerit, cele-  
 brantem viginti diebus pœniteat. Supponitur ergo tria  
 esse lintheamina, præter corporale.

Rubrica missalis Romani præscribit tres esse mappas  
 vel tobaleas mundas, ab episcopo vel ab alio potestatem  
 habente benedictas, superiorem saltem oblongam usque  
 ad terram pertingentem, quod hodie non est in usu, in-  
 quit Ligorio, l. 6, n. 375, et duas alias breviores, vel  
 unam duplicatam quæ mensam altaris his cooperiat, ita  
 ut sub corporali tria sint lintheamina munda, indepen-  
 denter a lintheamine crasso quo nonnunquam petra sacra  
 involvitur. Illud namque involucrum, sæpe squalidum,  
 haberi non potest ut mappa.

Mappæ dicuntur in jure *lintheæ* vel *lintheamina* : hinc  
 recte concluditur eas ex puro lino conficiendas esse. Sed  
 probabilius et communissime tenent auctores eas ex can-  
 nabe confectas sufficere. Non admittitur pannum quan-  
 tumvis album, sive ex lano, sive ex serico, saltem pro  
 corporali, ut patet ex Decreto, 3 part. dist. 1 cap. 46 :  
 • Statuimus ut sacrificium altaris non in serico panno  
 • aut tincto quisquam celebrare præsumat, sed in puro li-  
 • neo ab episcopo consecrato. » Xylinum, *coton*, decreto

S. Congr. Rit. diei 15 maii 1819, die 28 ejusdem mensis et anni, approbato a Pio VII, omnino prohibetur pro linteaminibus ad divinum sacrificium destinatis. Permittit tamen S. Congr. ut amicti, alba et mappa ex xylino confectæ inserviant, sed vetat ne alia conficiantur nisi ex lino aut cannabe.

Ut probabile docetur apud Ligorio, qui huic sententiæ adhæret, uti mappis non benedictis culpam venialem non excedere, et in necessitate etiam non gravi mappa communi, ad usus communes postea reddenda, uti licere.

Celebrare cum una aut duabus tantum mappis, sine necessitate, peccatum esset saltem veniale, quia notabilis foret infractio rubricæ a Clemente VIII præscriptæ; sine ulla mappa et extra necessitatem, peccatum haberetur ut certo mortale: sic autem in gravi necessitate agere, puta, ad dandum viaticum moribundo, vel ne populus die festivo missa careat, communis opinio tenet nullum fore peccatum.

Pars anterior altaris, nisi sit marmorea, vel aliter ornata, paramento vulgo, *devant d'autel*, coloris diei convenientis decorari debet, ut expresse Gavantus et Merati docent.

*Cruæ.* Bened. XIV arbitratur, de Missæ sacrif. l. 1, cap. 3, a traditione Apostolica derivatum esse ut quis sine cruce in altari posita missam non celebraret. Communius tamen tenetur hunc usum in primis sæculis non exstitisse, vel universalem non fuisse, et ideo nunc adhuc in pluribus ecclesiis celebrantem ad altare progredientem, parvam deferre crucem in altari collocandam. Carthusiani et Dominicani ad cornu epistolæ dicunt *Kyrie eleison*, *Gloria in excelsis*, et populum salutant; quia olim, cum in medio altaris crux non existeret, nulla erat ratio cur sacerdos huc ad populum salutandum rediret.

Cum rubrica simpliciter dicat, *Super altare collocetur crux in medio*, Rubr. gen. tit. 20, n. 1, et de imagine Christi in cruce affixi sileat, plures crediderunt nudam crucem illius dispositioni sufficere. Sic Merati. Alii vero longe communius requirunt, saltem sub veniali, crucem



cum imagine crucifixi. Verum Bened. XIV in Const. *Accepimus*, 16 junii 1746, dicit : « Illud permittere nullo latenus possumus, quod missæ sacrificium in his altaribus celebretur quæ careant imagine crucifixi, vel ipsa incommode statuatur ante presbyterum celebrantem, vel ita tenuis et exigua sit ut ipsius sacerdotis et populi assistentis oculos pene effugiat. » Declarat id alienum esse a legibus Ecclesiæ, sacræ antiquitati et ecclesiarum etiam Orientalium consuetudini maxime contrarium. Deinde refert rubricam Missalis, pontificalis Romani, cæremonialis episc. et ritus ecclesiarum Orientalium.

« In altari in quo adest magna statua sanctissimi crucifixi non est necesse ut ponatur alia crux, dum celebratur missa. » Sunt verba S. Congr. Rit. 16 junii 1663, in indice Merati, n. 400. Communius tenent auctores hanc decisionem valere, sive imago Christi crucifixi sit celata, sive picta, modo non sit exigua, et ante celebrantem commodo statuatur.

Ex eodem autem S. Congr. decreto, crux parva, cum imagine crucifixi, posita super tabernaculum in quo asservatur inclusum sanctissimum Sacramentum, non est sufficiens in missa, sed alia ponenda est crux in medio candelabrorum : si vero crux in tabernaculo posita emicans esset, alia non requireretur.

S. Congr. Rit. die 14 maii 1707, definierat crucem cum imagine crucifixi ponendam esse in altari, ubi sanctissimum Sacramentum venerationi fidelium exponitur, ut ibi celebraretur missa. Sed eadem Congregatio, re de novo perpensa, decrevit, die 2 sept. 1740, ut quælibet ecclesia morem quem antea servabat, in posterum retineret; Bened. XIV, in Constitutione citata.

Sacerdos qui, absque necessitate, celebrat sine cruce, a peccato saltem veniali excusari non potest, *ut patet ex dictis*. Verum Suarez, Layman, Bonacina, Tournely, Merati aliique communissime docent peccatum esse duntaxat veniale, et nullum, si rationabilis adsit causa.

Cruces altarium seu processionum non sunt de præ-

cepto benedicendæ ; Congr. Rit. 12 julii 1704, in indice Merati, n. 584 : potest simplex sacerdos eas benedicere privatim, non vero solemniter, ut fert idem decretum.

Similiter et imagines quæ in templis adhibentur, benedici possunt, idque congruum est, non præceptum, inquiunt Merati et Ligorio, Pignatellum citantes. Attamen hujusmodi crucifixi et imaginum benedictio inter benedictiones episcopales in rituali Romano collocatur : item in rituali nostro, præcipienti, ut crucifixus in altari collocandus sit benedictus, et supponenti, 2 part. thecam reliquiarum et imagines sanctorum benedicendas esse a sacerdote recte delegato.

*Lumina.* Usus luminum inter sacra peragenda est antiquissimus : existebat quippe in veteri Lege, ut patet ex descriptione lucernarum accensarum et candelabri aurei pretiosissimi in cap. xxv Exodi facta; a Judæis ad Christianos transiit. Primum sæpe necessariæ erant lucernæ, quia sacra mysteria, ob metum persecutorum, in cryptis celebrari solebant : sed propter alios fines eas fuisse adhibitas testatur S. Hieronymus adversus Vigilantium, 2 part. dicens : Per totas Orientis ecclesias, quando legendum est evangelium, accenduntur luminaria, jam » sole rutilante; non utique ad fugandas tenebras, sed » ad signum lætitiæ demonstrandum. « Multa alia citari possent testimonia ex quibus aperte deducitur cæcutire Protestantes, quando affirmare audent non nisi ob necessitatem adhibita fuisse luminaria, in tribus primis sæculis, ad sanctissima mysteria celebranda.

Hæc autem luminaria primitus in altari non erant posita, sed in variis ecclesiæ partibus, et præsertim ante altare, modo in forma stellæ coruscantis, modo velut circulus zonam firmamenti repræsentans, modo in machina ferrea quæ dicebatur hersia, modo in candelabris, tres, quinque, septem, etc. habentibus calamos et super pavimento locatis. Serius habita sunt candelabra lignea, cuprea, argentea, aurea vel deaurata, saltem duo, vel quatuor aut sex, et sæpe numerosiora, hinc et inde in altari posita, cera vel oleo munita, quæ in majori vel mi-

nori numero accenduntur, juxta gradum solemnitatis. Mos invaluit ut sola admitteretur cera : igitur acolythi luminaria deferentes ceroferarii vocantur.

Rubrica missalis præscribit, parte 1, tit. 20, ut *Candelabra saltem duo cum candelis accensis hinc et inde in utroque ejus latere collocentur* : ab illa recedere non licet.

Omnes fatentur celebrare sine ullo lumine, etiam ad dandum viaticum moribundo, peccatum esse mortale ; quia in Decretal. l. 3, tit. 41, cap. ultimo, graviter inculpatur sacerdos qui *sine igne*, id est sine lumine, sacrificat.

Unde si ante consecrationem deficiat lumen, omnino desistendum est a celebrando : secus si post consecrationem. Ita Ligorio et plures apud ipsum, l. 6, n. 394. Si candelæ intra breve tempus reaccendi possint, exspectandum est donec accendantur, et pergendum erit.

Cum ex mandato S. Pii V evangelium S. Joannis nunc ad integritatem missæ pertineat, illud extinctis luminibus recitare non licet : curandum est igitur ne ministri cereos ante finem hujus evangelii extinguant, et nihilo minus sacerdos turbari non debet si, dum illud evangelium recitat, minister cereos exstinguit.

Rubrica missalis exigit ut, præter duo luminaria omnino requisita, ad *Sanctus* tertium pro elevatione in honorem sanctissimi Sacramenti accendatur ; et in missis solemnibus deferenda sunt intortilia accensa.

Ut probabilius docet Ligorio cum multis aliis, in casu necessitatis, non vero propter solam devotionem, licitum esse cum candelis ex sebo vel ex oleo celebrare : secus, mortale esse peccatum, quia esset derogatio universali Ecclesiæ consuetudini et in re gravi.

Unicum adhibere lumen cereum probabiliter veniale esset peccatum, secluso scandalo ; et nullum si rationalis causa, v. g. circumstantia alicujus festi, id suaderet, et abesset scandalum.

Cardinales, episcopi, et abbates usum pontificalium habentes, jus habent celebrandi cum quatuor candelis : id vero aliis non permittitur, nec etiam vicariis generalibus, nisi solemnitas officii postulet ; Decretum Congr. Rit. 7 augusti 1627.

Candelabra et ipsæ candelæ nulla indigent benedictione, ut expresse advertit Ligorio, l. 6, n. 395, quia requiruntur tantum ad decentiam, et ita fert usus ubique receptus.

*Mundities altarium.* Altaria in quibus divinum celebratur sacrificium, nitida semper esse debent: igitur scopis undequaque reverenter mundanda sunt, et mappæ sat frequenter mutandæ ut nunquam appareant sordidæ. Ut a pulvere, cera aliave qualibet sorde custodiantur mundæ, finitis missis, contegendæ sunt panno viridi, aut aliis strangulis ad mensuram altarium factis.

Si fides auctori Prati spiritualis, in initio septimi sæculi scripti, adhibeatur, singula altaria consecrata Angelum Custodem habent, sicut singulæ ecclesiæ Deo dicatæ: hæc consideratio novum subministrat motivum ea servandi munda, et non permittendi ut aliquid indecens, profanum, ad cultum divinum non attinens, in illis deponatur.

Floribus veris aut fictis, pro temporum varietate, ornari decet altaria; sed vas florum aut quid simile ante ostiolum tabernaculi in quo depicta est imago Domini nostri Jesu Christi non est collocandum, ut declaravit S. Congr. Rit. 22 januarii 1701.

## ARTICULUS SEPTIMUS.

### DE VASIS SACRIS ET OBJECTIS AD EA ATTINENTIBUS.

Vasa sacra sunt calix, patena, ciborium et ostensorium; objecta ad vasa sacra attinentia sunt corporale, palla et purificatorium. De singulis, quantum potuerimus breviter, dicturi sumus.

#### *Calix et patena.*

1º Constat Christum in ultima cœna calicem adhibuisse, et extra omne dubium est illius usum in oblatione divini sacrificii Eucharistiæ semper exstitisse. In primis temporibus calices sæpe fuerunt lignei, vitrei, lapi-



dei, stannei, ut ostendunt *Grancolas*, Bened. XIV, de Missæ sacrif. l. 1, cap. 4, etc. Non raro tamen erant argentei, aurei et etiam gemmis ac picturis ornati, ut patet testimoniis Tertul. lib. de Pudicitia, cap. 7 et 10, S. Chrysost. etc.

2º Sed a multis sæculis obsolevit usus calicum ligneorum, propter porositatem; vitreorum vel ex crystallo, propter fragilitatem; ex cupro, ære vel aurichalco, propter æruginem; et in Decreto, parte 3, dist. 1, can. 45, præcipitur, « ut calix Domini, cum patena, si non ex auro, omnino ex argento fiat. Si quis autem tam pauper est, saltem et stanneum calicem habeat. » Nunc apud nos calices stannei stricte prohibentur, et ab omnibus ecclesiis exigitur ut habeant calicem cujus saltem cuppa sit ex argento interius auro linita. Permittuntur calices ex gemma quæ sæpe pretiosior est quam aurum.

3º Cum olim in multis ecclesiis magna vini quantitas consecranda esset, ut omnes sub ea specie communicare possent, vel plures in altari ponebantur calices, vel unus, sed amplus et ansatus, ut facilius moveri et deferri posset. Anastasius Bibliothecarius, in Vita Leonis III, memorat calicem quinquaginta et octo librarum, et in Vita Gregorii III alterum ponderis triginta et quatuor librarum.

Patena, sic dicta quia quod in ea est patet et non est occlusum sicut vinum in calice, olim tantæ erat amplitudinis ut species pro tota multitudine consecrandas contineret: nunc modicus est discus, saltem argenteus et auro in concava superficie bene linitus. In casu necessitatis episcopus permittere posset usum calicis et patenæ ex stanno.

4º Necessè est ut calix et patena ab episcopo cum sancto chrismate consecrentur, juxta formam in pontificali Romano statutam: ita omnes, universali consuetudine, argumentis ex jure canonico deductis et pluribus S. Congr. Rit. decretis innixi. Hæc autem consecratio ad ordinem episcopalem pertinet: unde quilibet episcopus

hæc vasa semper valide consecrat, etiam quando ea consecrando peccat.

5° Abbates tamen alique prælati usum pontificalium habentes, calices et patenas ex privilegio consecrare possunt pro suis duntaxat ecclesiis : Ferraris, v° *Calix*, n. 5.

6° Cum illa calicum et patenarum consecratio sit tantum institutionis ecclesiasticæ, facultas eam faciendi a summo Pontifice simplicibus presbyteris procul dubio committi potest, et reipsa non semel commissæ est, sicut facultas altaria portatilia consecrandi.

7° Qui missam sine calice apto et consecrato celebraret, mortaliter peccaret, quia praxi Ecclesiæ in materia gravi adversaretur. Plures contenderunt calicem ad sacrificium idoneum solo contactu specierum sacrarum consecrari : unde calix quo sacerdos ex bona vel mala fide ad celebrandam missam usus fuisset, alia consecratione non indigeret. Verum alii longe communius et probabilius negant : falsum quippe est sacras species per solum contactum rem aliquam consecrare, alioquin cadentes in pavimentum, illud consecrarent : aliunde, ut consecratio sit valida, requiritur ut impleantur conditiones ab Ecclesia determinatæ, videlicet preces, unctiones, etc. Ergo.

8° Calix et patena suam amittunt consecrationem per fractionem, si nempe patena ita sit fracta ut hostiam decenter continere nequeat, et si cuppa calicis a pede per fracturam sit separata, ita ut ad usum propter quem fuit consecratus non remaneat idoneus. Quando vero pes a cuppa sine fractione separatur, ut in calice tornatili, consecratio non amittitur. Si in fundo fiat foramen quantumvis exiguum, est exsecratus.

9° Calix et patena suam inaurationem per usum diuturnum amittentes, non ideo consecrationem suam perdunt, quia hæc objecta secundum se fuerunt consecrata, et eadem sunt moraliter. Ita communissime doctores.

10° At cum in nova inauratione addatur aurum non consecratum, corpus et sanguinem Christi immediate tacturum, et quod excellentior est pars calicis aut patenæ,

multi contendunt nova consecratione opus esse : hanc sententiam fortiter tuetur Ferraris cum Suarez, Vasquez, Barbosa et plurimis aliis. Ligorio, l. 6, n. 370, dub. 2, in fine, qui oppositam admiserat opinionem ut probabiliorem, declarat se, re melius perpensa, judicare calicem post inaurationem denuo consecrandum esse, et affert rationem superius expositam. *Romsée* inaurationem calicis dealbationi ecclesiæ comparat, sed immerito, ut mihi videtur; dealbatio enim murorum consecratorum a nemine habetur ut pars excellentior; secus vero inauratio calicis aut patenæ. In rituali nostro nova in hoc casu præscribitur consecratio, et pars ista est saltem tutior.

11° Qui ob solam paupertatem utitur calice non inaurato, ab omni peccato excusatur, seclusa speciali episcopi prohibitione; imo in eo casu licet uti calice stanneo non inaurato, vel æneo aut cupreo bene aurato, ita ut ærugo non timenda sit: at, extra magnam paupertatem, peccatum esset saltem veniale, ut docent de Lugo, Tournely, Ligorio, etc. Uti calice argenteo olim inaurato, sed cujus inauratio omnino aut fere omnino deleta est, non ita facile graviter peccatur ac si calix nunquam fuisset inauratus, quia non tanta est irreverentia.

12° Soli presbyteri et diaconi, in gratia sanctificante constituti, vasa sacra eucharisticas species continentia licite tangere possunt: cæteri vero, ut communiter docent auctores, mortaliter peccarent ea tangendo; Decreti, part. 1, dist. 23, can. 26, 30, 31 et 32. Vide Ferraris, v° *Vasa*, n. 8; Ligorio, l. 6, n. 382. Similiter presbyteri et diaconi peccati mortalis rei qui, absque reconciliatione cum Deo, vasa sacra divinam Eucharistiam continentia tangerent, a novo peccato et probabiliter mortali excusari non possent; gravis enim esset indecentia erga sanctissimum Eucharistiæ sacramentum.

Subdiaconi, vi suæ ordinationis et acolythi ministrantes, ex can. 32, dist. 23, 1 partis Decreti, vasa sacra vacua tangere possunt. Sic Ferraris, Ligorio, Benedict. XIV, Inst. 29, n. 18, cum ea differentia quod subdiaconi ea ubique, etiam in altari functiones sui ordinis

solemniter exercentes, et acolythi solum in sacristia, quando ea quæ ad missam necessaria sunt præparare debent. • Tandem diuturna consuetudine factum est, *inquit Bened. XIV, ibid.* ut ordinati omnes, et qui sola tonsura præditi sunt, si aliqua causa intercedat, sacra vasa dum vacua sunt, extra altaris ministerium contingant. »

13° Laici et feminæ etiam moniales, absque necessitate aut rationabili causa, vasa sacra vacua manu nuda tangentes, secluso contemptu, venialiter tantum peccant: peccant quidem, saltem probabilius, quidquid nonnulli dicant, quia universali Ecclesiæ consuetudini adversantur, sed venialiter tantum, ut volunt Suarez, Layman, La Croix, Ferraris, Ligorio et generaliter alii.

14° Cum autem non solum necessitas, sed rationabilis causa a veniali, ubi de infractione legis positivæ agitur, excuset, communiter infertur calices, patenas, corporalia et purificatoria tangere posse 1° religiosos laicos ad servitium missarum et sacristiæ deputatos; 2° moniales sacristinas; 3° sorores Charitatis in parochiis ruralibus, ad hæc objecta sacra lavanda, mundanda, etc. quando parochus, vicarius aut aliquis in sacris ordinibus constitutus id facere non potest; 4° quemlibet sacristam ad corporale aliudve objectum sacrum accersendum, in casu urgenti, si illud mediante corpore non consecrato afferre nequeat, etc. Convenientius est tamen, ob maiorem reverentiam erga res sacras, licentiam ab episcopo aut vicario ejus generali obtinere, et talis est usus communis.

15° Qui mortali peccato inquinati vasa sacra vacua tangunt, irreverentiæ fiunt rei, et sub hoc respectu, secluso contemptu, venialiter peccant.

16° Vasa sacra ad usus profanos convertere vel adhibere, v. g. calicem ad bibendum in mensa, corporale vel purificatorium ad nares purgandos, etc. mortale est peccatum, quia gravis est irreverentia ac contemptus, ipso jure naturali et pluribus juris ecclesiastici capitibus prohibitus. Imo laicus hoc faciens, excommunicatur, et



ecclesiasticus deponitur; Ferraris, vº *Vasa sacra*, n. 16.

Attamen, urgente necessitate, calices, patenæ, ciboria aliaque vasa sacra vendi possunt: si personis ecclesiasticis vel aurificibus et ad usum ecclesiarum vendantur, tradi possunt integra; si ad usus profanos, prius frangenda sunt, ne sancta ab aliis quam a ministris Ecclesiæ tractentur.

*Ciborium et ostensorium.*

1º Ciborium, sic dictum a spirituali cibo quem continet, dicitur etiam turris, propter formam rotundam, et frequentius pyxis, gallice *boîte*. Propter reverentiam Sacramento debitam debet esse mundum, aureum vel argenteum intus deauratum, proprio operculo parvam crucem in summitate habente coopertum, et insuper pallio pretioso apte elaborato involutum. Sic apud nos præscribitur in rituali et in statutis synodalibus.

2º Nulla tamen lege generali præcipitur ut ciborium ejusdem sit materiæ ac calix et patena, nec ut intus deauretur: attendenda et sequenda sunt igitur statuta uniuscujusque diœcesis. Si vas istud ex inferiori materia conficiatur et intus non deauretur, in illo ponendum est vas lineum corporali simile: sed amylum quo liniendum est illud linteum, quædam generare solet animalia, ut notat Gavantus. Curare ergo debent episcopi alique superiores ecclesiastici ut, quantum fieri potest, ciboria semper sint argentea intus bene deaurata, ad particulas facile dignoscendas.

Venerabilis *Boudon*, archidiaconus Ebroicensis, ciboria cum operculo eis commissura annexo excogitaverat, ut particulæ ex hostiis, dum communio distribuitur, decidentes, in ipsum caderent operculum et non perirent: at experientia constat eas in cælaturas vel commissuras cadere et difficile colligi posse: multo magis expedit ut operculum omnino removeatur, et communio non detur quin adhibeatur patena particulas decidentes susceptura.

3º Præter ciboria ad continendam et asservendam sa-

eram Eucharistiam destinata, aliud parvum habendum est vas ejusdem materiæ, formæ et decentiæ, ut divinum Sacramentum ad ægrotos deferatur.

4° Lunula in qua continetur formula consecrata ut sanctissimum exponatur Sacramentum, debet esse argentea et deaurata, sicut ciboria, et non aliter.

5° Hæc vasa cum oleo sancto non consecrantur, sed ab eo qui habet facultatem ornamenta sacerdotalia benedicendi, benedici possunt. Plurimi graves auctores arbitrantur hanc benedictionem non esse de præcepto; alii vero probabilius docent eam esse præceptam, sed tantum sub veniali. Vide Ligorio, l. 6, n. 385. Lunula ad expositionem Sacramenti destinata benedicitur, sed nullum est præceptum benedicendi ostensorium, quod tamen laudabiliter, inquit *Romsée*, benedici potest ea formula qua benedicitur ciborium.

6° Omnes tangere possunt illa vasa etiam benedicta quamdiu non servierunt; sed postquam servierunt, non magis ea tangere licet quam calices et patenas, excepto ostensorio, quando lunula ab eo separatur; non enim habetur ut vas sacrum.

7° Tabernaculum, de quo supra locuti sumus, specialiter etiam benedicitur, et benedictio ejus inter benedictiones episcopales in rituali Romano inscribitur.

8° In eo collocari non possunt reliquiæ sanctorum aut venerabilis Crucis, nec ostensorium aut ciboria vacua, sed ea duntaxat vasa in quibus sanctissimum actualiter existit Sacramentum. Sic generaliter ritualia, et imprimis Romanum, permittens tamen, si aliter fieri non possit, ut vasculum in quo olea sancta continentur, intra tabernaculum, una cum venerabili Sacramento, ad latus, juxta et non supra corporale reponatur.

9° Mandat præterea ut claves tabernaculi nulli unquam laico credantur, nec in sacristia relinquantur, sed solus parochus vel alius sacerdos de illius licentia curam earum habeat, nec unquam permittat ab ullo, qui non est saltem subdiaconus, claudi et aperiri dictum tabernaculum.

*Corporalia, pallæ et purificatoria.*

1° **Corporale**, ita dictum quia corpus Christi involvit, primitus vocabatur *palla*, *manteau*, quia totam mensam altaris tegebat, ut in Ordine Romano VI, n. 7, expresse narratur, et quando cooperiendus erat calix, super illum plicabatur. Cum enim in primis sæculis magna specierum panis et vini quantitas consecranda erat, oportebat ut amplum esset corporale; decrescente autem hac quantitate, imminutum est corporale, et tandem reductum fuit ad eam quam nunc habet formam.

2° At sic contractum calicem cooperire non poterat: tunc versus decimum tertium sæculum cœpta est haberi *palla* a corporali separato, qua cooperiretur calix. Non tamen censetur quid a corporali distinctum, et eadem benedictionis forma sanctificatur.

3° **Corporale** « ex puro lino contextum esse debet, » inquit Ordo Romanus citatus, quia syndone munda « corpus Christi legitur involutum in sepulcro. » Potest etiam esse ex cannabe, ut asserit Ligorio cum pluribus aliis, non vero ex serico aliove panno, saltem quoad mediam partem, qua hostiam vel calicem tangit, nam in extremitatibus potest esse sericum vel auro elaboratum.

4° Quod dicimus de materia corporalis, dicendum est pariter de *palla*, saltem de parte quæ calicem immediate tangit: nam, juxta multos et usum apud nos receptum, in parte superiori auro vel serico constare potest. Citatur tamen decretum S. Cong. Rit. 22 junuarii 1706, in quo dictum est: « In sacrificio missæ non adhibenda est » *palla* a parte superiori drappo serico cooperta. » Unde in Italia alias non vidi *pallas* nisi ex mundissima tela duplicata, amylo sicut corporale linita, et ope chartæ insertæ solidata. Suarez, Tournely, Ligorio et alii communiter dicunt, celebrare sine corporali et *palla*, aut cum eis non benedictis, mortale esse peccatum, nisi gravis urgeat necessitas celebrandi. Minor tamen requi-

reretur necessitas ad celebrandum sine palla benedicta quam sine corporali, quia palla sacras species immediate non tangit. Unde plures apud Ligorio dicunt quod, si palla desit, aut per quadrantem expectari debeat, loco ejus adhiberi possit aliud corporale, aut purificatorium, aut bursa.

5° Mos olim in pluribus ecclesiis exstitit, a S. Cajetano et Paulo IV, summo pontifice in decimo sexto sæculo invectus, duplicem adhibendi pallam, unam ad cooperiendum calicem, et alteram super qua collocaretur hostia ante et post consecrationem, donec supponeretur patena, juxta rubricas. Hic usus adhuc viget apud Theatinos a Paulo IV institutos, ex privilegio a Clemente VII concessio.

Merati et alii non pauci, contra alios, censent unumquemque sacerdotem posse hanc observantiam sequi, et refertur Card. Baronium id alicui ad praxim suasisse.

6° Studiose et magna vigilantia curandum est ut corporalia sint nitida et munda : a gravi culpa excusari non potest sacerdos qui, ex negligentia, ad divinum sacrificium utitur corporali aut palla sordidis, quæ in mensa communi posita quemdam horrorem excitarent. Item invigilandum est ne corporalia ullum etiam minimum habeant foramen circa medium et partes in quas imponitur hostia.

7° Purificatorium, sic vocatum quia ad tergendum calicem adhibetur, debet esse *ex pura et candida tela*, inquit rituale Romanum : hæc tela potest esse ex lino vel cannabe, vel etiam ex xylino, saltem concedente episcopo.

8° Benedictio purificatorii nullibi præscribitur, nec forma ejus in rituali aut missali reperitur : multi tamen volunt ut illud simul cum mappis ex decencia benedicatur ; et si seorsim benedicatur, assumenda sit forma benedictionis mapparum, mutando verbum *altare* in verbum *calix*. Sed communior praxis est ut non benedicatur.

9° Quamvis benedictum non fuerit, statim ac inservit



non magis illud quam corporale aut pallam tangere licet, donec lotum fuerit. Eo deficiente, loco ejus adhibere liceret strophium mundum, quod postea ad profanos usus non converteretur; Ligorio, l. 6, n. 389.

10° « Antequam corporalia, pallæ et purificatoria  
 • laicis lavanda tradantur, prius ab aliquo in sacris cons-  
 • tituto, in sacristia vel in ecclesia, in eodem vase seu  
 • pelvi qua calices et patenæ abluuntur, aqua calida se-  
 • mel et iterum laventur, et deinde in cumulum torta,  
 • ut aqua bene exprimatur, quæ tota in sacrarium projici-  
 • enda est; laicis, id est monialibus, vel certe aliis ho-  
 • nestis et adultis matronis tandem lavanda offerantur. »  
 Sunt verba ritualis Romani. Idem habetur in pontificali Romano, allocutione ad subdiaconos ordinandos, et ibi præcipitur ut aqua lotionis in baptisterium, id est in piscinam vergatur. Eadem substantialiter reperitur dispositio in Decreto, parte 3, dist. 1, can. 40, et universali observatione confirmatur. Non video igitur qua ratione nonnulli auctores dicant, secundam lotionem a persona non sacra fieri posse absque peccato, cum primam et secundam a viro in ordinibus sacris constituto fieri præcipiatur.

Plures affirmant laicum qui, absque licentia episcopi, primam lotionem faceret, mortaliter peccaturum; alii tamen communius censent peccatum fore solum veniale, secluso contemptu, et nullum si rationabilis adesset causa; quia non majus est peccatum sacra hæc objecta lavare cum debita reverentia, quam tangere: at communiter docetur, ea sine causa excusanti tangere, esse duntaxat peccatum veniale. Ergo. Verum communis praxis est ut hæc a laicis prima et secunda vice non laventur sine licentia episcopi aut vicarii ejus.

Si sacra non existeret piscina, aut insufficiens esset, aqua lotionis in locum decentem projici posset, v. g. in cœmeterium, inter pavimenta ecclesiæ, etc.

*Velum calicis, bursa, manutergium, etc.*

1° Rubrica, parte 2, tit. 1, n. 1, statuit ut sacerdos missam celebraturus, calicem parva palla linea et *velo serico* tegat. Veli hujus mentionem faciunt antiqui auctores, ut ostendit Gavantus. Ordinarie ex eodem panno conficitur ac casula : at si casula non ex serico, sed ex crassiore conficeretur panno, velum nihilominus sericum esse deberet, ex rubrica, ut observat *Romsée*.

2° Super velo ponitur bursa coloris paramentorum, in qua est corporale plicatum : sic præscribit rubrica citata. Cum ad ornamentum calicis pertineat, ex eadem materia ac velum fieri convenit, et ejusdem coloris esse debet ac ornamentum. Convenit insuper ut pars ejus interior panno serico simplicis et uniformis coloris tegatur, propter honorem corporali sacrato debitum.

Utrumque, scilicet velum et bursa, una cum sacerdotalibus ornamentis benedicuntur, et speciales pro ipsis non existunt benedictionis formæ.

Qui celebrant sine velo, et corporale deferunt sine bursa, non bene agunt, inquit Gavantus, attestans S. Pium V dispensavisse cum Hispanis ut corporale extra bursam ferre possent : non tamen probabiliter peccant, quia velum et bursa ob solam decentiam requiri videntur. Vide Ligorio, l. 6, n. 395.

3° Rubrica, parte 1, tit. 20, præscribit insuper, ad præparationem altaris et ornamentorum ejus, ut sint ad cornu epistolæ, « Parva campanula, anpullæ vitreæ vini » et aquæ, cum pelvicula et manutergio mundo in fenestella, seu in parva mensa ad hoc præparata. » Objecta ista non benedicuntur ; sed reverentia erga divinum sacrificium exigit ea esse munda et nitida, ita ut ad mensam vulgarem decenter adhiberi possent.

## ARTICULUS OCTAVUS.

## DE VESTIBUS SACRIS.

Præter vestem talarem consuetam, gallice *soutane*, quæ ad celebrandam missam necessaria est, vestes sacræ proprie dictæ sunt amictus, alba, cingulum, manipulus, stola, casula et biretum : in missa solemnî requiruntur insuper pro ministris et officiariis dalmaticæ et cappæ.

1º Amictus, sic dictus a verbo *amicire*, seu *cooperire*, in octavo sæculo introductus fuit, juxta communem sententiam, ad tegendum collum eorum qui altari serviebant; tunc enim omnes, laici et clerici, collo nudo incedebant, quod indecens visum est ad altare. Ratio mystica fuit ut vox castigata Deo consecraretur, ut dicit pontifex in ordinatione subdiaconi, hanc vestem imponendo.

Paulo post amictus fuit habitus velut quoddam ornamentum ad instar veteris ephod, quia humeros et pectus involvebat. Romæ et in pluribus aliis ecclesiis capiti imponebatur, et ministri eo velut galea contra diabolicos incursus muniti, ad altare procedebant : qui ritus adhuc viget apud quosdam religiosos et in nonnullis ecclesiis tempore hiemis. Idcirco eum sumendo dicimus : *Impone, Domine, capiti meo galeam salutis, ad expugnandos omnes diabolicos incursus*. Nunc, ex missali Romano et ex aliis communiter missalibus, capiti imponitur et mox ad collum declinatur, ut vestium collaria circumtegat : utraque igitur ratio mystica, castigatio vocis et sensuum custodia, memoranda est.

Debet autem fieri ex tela alba, linea vel cannabæa, duas habere chordulas, et in medio crucem depictam, ut supponit rubrica de sacerdote dicens : « Accipiens amictum circa extremitates et chordulas, deosculatur illud in medio ubi est crux, et ponit super caput, etc. » Adverte eos qui amictum sibi imponunt se signare non debere manu et amictu simul, ut quidam immerito faciunt. Ita Gavantus.

2° Alba ita vocatur a suo colore, quasi diceretur vestis alba. Apud Græcos dicitur poderis, a verbo *πεν*, *pes*, et apud Latinos *talaris*, quia ad talos descendit. Personæ honorabiliores inter Romanos hanc deferre solebant vestem, quæ communior facta est clericis sacras functiones suas exercentibus. Unde S. Hieron. Pelagianum arguens, l. 1 adversus Pelag. dicit : « Quæ sunt, rogo, inimicitiae » contra Deum si tunicam habuero mundiorem? Si episcopus, presbyter, diaconus et reliquus ordo ecclesiasticus in administratione sacrificiorum candida veste processerint? »

Imo clerici eam deferebant etiam in usu civili, ut ex variis monumentis probant Vicecomes, Card. Bona et *Romsée*. In concilio Carth. IV, can. 41, prohibetur ne diaconus extra tempus oblationis vel lectionis alba induatur.

Quidam eam, commoditatis causa, resecarunt, et factum est rochetum, quo canonici regulares semper induti erant : alii illud ampliarunt, et largas ei adoptarunt manicas, ut in frigore vestes pelliceas subtus induere possent, et inde venit superpelliceum.

Alba, propter albedinem, habetur ut symbolum innocentiae qua ministrantes altari fulgere debent ; idcirco eam induentes dicere tenentur : *Dealba me, Domine, et munda cor meum, ut in sanguine Agni dealbatus*, etc.

Debet esse linea vel cannabæa, et non ægre permittuntur albæ, a *fortiori* superpellicea et rocheta ex xylino, nunquam vero ex serico vel lana, quia tunc essent ex panno, et non ex tela simpliciter dicta.

3° Cingulum est appendix albæ quam decenter aptare debet, ne diffluet, terram tangat, gressum impediat, etc. semper enim cingulum togas oblongas comitatum est. Unde clerici vestem talarem deferentes, cingulo præcingi debent. Cingulum autem mystice consideratum est signum castitatis. Hinc nos præcingendo dicimus : *Præcinge me, Domine, cingulo puritatis, et exstingue in lumbis meis humorem libidinis, ut maneat in me virtus continentiae et castitatis.*



« Sacerdotes in sacrificio missæ congruentius utuntur cingulo lineo quam serico; » Cong. Rit. 22 jan. 1701. Igitur cingulum sericum non prohibetur, sed lineum magis congruit.

4º Manipulus, ex antiquis monumentis, quoddam erat sudarium, sic dictum a sudore ope illius tergendō, seu mantile per quod sudor et narium sordes extergebantur. Ministri altaris illud primum manu sinistra tenebant, ut dextra liberius servirent : hinc vocatum est manipula et manipulus, nempe a manu in qua tenebatur : postea brachio sinistro affixum est ut manus esset libera, et a dextra facilius ad extersionem vultus et narium adhiberetur.

Contigit ut reverentiæ causa sudarium istud fimbriis pretiosis ornaretur, et versus medium duodecimi sæculi verum fuerit ornamentum, sicut ostendit P. *Lebrun*.

In prima origine, cum ad extergendum sudorem destinaretur, fletum et dolorem naturaliter significabat; unde illud sumendo in sensu spirituali dicimus : *Merear, Domine, portare manipulum fletus et doloris, ut cum exultatione recipiam mercedem laboris*. Episcopus hanc vestem sumit tantum post confessionem, ad *Indulgentiam*, ut in Cæremoniali episc. l. 1, cap. 10, habetur, et Durandus notat, l. 4, cap. 7 n. 4, exceptis missis defunctorum in quibus eum sumit cum aliis paramentis.

5º Stola, juxta vim nominis, idem significat ac longum vestimentum, ut patet pluribus Scripturæ locis. Communis sententia tenet stolam nostram primo fuisse linteum tenue quo circumdabatur collum, extremitatibus ejus ante pectus pendentibus ad abstergendum os et vultum. Dicebatur etiam orarium, ab ora vestium a qua pendeat; et, propter longitudinem, nomen stolæ accepisse videtur.

Usque ad octavum sæculum, propter solam utilitatem adhibita fuisse judicatur; sed versus illud tempus pretiosior facta, velut speciale ornamentum et signum auctoritatis cœpit haberi. Solis episcopis, presbyteris et diaconis fuit reservata, et, ad exprimendam inter eos

distinctionem, mos invaluit ut episcopi eam in missa haberent pendentem, presbyteri in forma crucis super pectus, et diaconi ab humero sinistro ad latus dextrum versantem. Extra missam sacerdotes eam deferunt pendentem, nisi alba induantur. Episcopi vero eam deferentes super albam, extra missam, habent in forma crucis sicut presbyteri.

Quoniam beati in cœlo repræsentantur velut stolis induti, v. g. Apoc. vi, 11, vii, 9, Ecclesia vult ut stolam sumentes dicamus : *Redde mihi stolam immortalitatis*, etc.

6° Casula seu planeta, olim erat magna vestis rotunda totum tegens corpus, et in usu civili laicis et clericis usque ad septimum vel octavum sæculum communis : ab eo tempore fuit ornamentum episcopis et presbyteris missam celebrantibus proprium. Nomen habuit casulæ, quia, ob suam formam et amplitudinem, totum tegebat corpus sicut parva domus ; et planetæ, quia, inmisso capite per solam quam superius habebat aperturam, versatilis erat circa corpus cui non adhærebat.

Casulæ apud Græcos antiquam retinuerunt formam, et quæ destinantur episcopis, multis insigniuntur crucibus ; quæ vero sunt presbyterorum, unicam habent crucem.

Latini, pro majori brachiorum commoditate, partes laterales earum paulatim resecarunt, donec ad formam hodiernam pervenerint : casula igitur nunc apud nos duabus constat partibus quæ antè et postè tegunt corpus a collo ad genua. Tempore quo exquisitus liber de Imitatione Christi scriptus est, scilicet circa initium decimi quinti sæculi, casulæ in Germania crucem ferebant in parte anteriori et posteriori ; in Italia crucem habent tantum in anteriori ; in Gallia autem, nunc in Germania et alibi communiter, crucem habent tantum in parte posteriori.

Cum olim necesse fuerit casulam hinc et inde elevare ad consecrationem, ut celebrans liberiora haberet brachia, mos permansit eam paululum sublevare, in testimonium antiquitatis.

Casula, totum corpus olim tegens, communiter habetur ut symbolum charitatis omnia cooperientis. Unde episcopus eam imponens, dicit : *Accipe vestem sacerdotalem per quam charitas intelligitur*. Et sacerdotes eam sumendo, vocant *jugum Domini suave et onus leve*.

Quantum fieri potest, ex pannis petriosis, nempe aureis, argenteis aut sericis, vel saltem ex panno tenui, et quo plebei uti non solent, conficiendæ sunt casulæ, propter honorem cultui divino debitum; et ex eodem panno ordinarie conficiuntur velum calicis, manipulus et stola. Ad hunc usum converti possunt vestes mulierum pretiosæ, ut fert communis sententia, contra plures, apud Ferraris, vº *Paramenta*, n. 2.

*De necessitate et benedictione vestium sacrarum.*

Quamvis pleræque sacræ vestes olim communes fuerint quoad formam, ut probabilius docet Bened. XIV, de Missæ sacrif. l. 1, cap. 7, cum fere omnium eruditorum consensione, ipsos Apostolos peculiaribus indutos fuisse vestibus a quotidianis distinctis, quando divinam Eucharistiam conficiebant; atque plurimi censent penulam, quam B. Paulus, II Tim. iv, 13, memorat, unam ex his vestibus fuisse. Certum est ab immemoriali tempore seu ab ipsis Apostolis usum fuisse missam absque specialibus illis vestibus non celebrandi. Omnes fatentur hanc legem esse sub gravi, et nullam concedi dispensationem ut missa, quacumque ex causa, sine ullis vestibus sacris celebretur; sic expresse docent Card. de Lugo, Bened. XIV et Ligorio, l. 6, n. 289, etc.

Celebrare sine casula aut sine alba, est, juxta omnes, peccatum mortale; sine stola, aut manipulo, aut cingulo, est probabilius adhuc peccatum mortale; quia, alterutra istarum vestium deficiente, deest cultus divino sacrificio debitus: ita communiter auctores, idem dicentes de his objectis non benedictis. Communiter tamen concedunt licitum esse, in magna necessitate, v g. si populus sit convocatus et dimitti non possit absque scan-

dalo, celebrare sine manipulo, aut sine cingulo, vel uti stola pro cingulo, aut manipulo pro stola. Vide Ferraris, v<sup>o</sup> *Missa*, art. 10, n. 22, et Ligorio, l. 6, n. 377. *A fortiori* sine amictu celebrare liceret. Imo ut probabile multi tradunt, per se veniale tantum esse peccatum celebrare sine amictu, aut manipulo, aut cingulo, vel uti non benedicto, secluso contemptu, quia gravis non videtur irreverentia.

Benedictio sacrarum vestium ad celebrationem missæ requisitarum est episcopalis; attamen prælati privilegiis pontificalibus utentes eas pro ecclesiis sibi subditis benedicere possunt: ita omnes, variis summorum pontificum concessionibus innixi.

Sed inter theologos et canonistas controvertitur an episcopus facultatem sacras vestes benedicendi simplicibus presbyteris delegare possit. Extranei communius negant, et contendunt episcopos hanc facultatem concedere non posse, nisi ex pontificali indulto: sic Benedict. XIV, Inst. 21, n. 9; Ligorio, l. 6, n. 377, dub. 4, etc. At in Gallia, ex veteri consuetudine, omnes episcopi concedere solent, ex propria auctoritate, per se vel per vicarios suos generales, simplicibus presbyteris facultatem vestes sacras et omnem supellectilem ecclesiæ, unctionem S. chrismatis non requirentem, benedicendi. In diœcesi nostra, omnes parochi benedicere possunt, vi n. 2, art. 6, tit. 3 statutorum synod. anni 1788, pro suis ecclesiis et capellis in sua respectiva parochia existentibus, vestes sacerdotales, quælibet paramenta, lintheamina, cruces, vexilla et ciboria. Item superiores regulares pro suis ecclesiis et oratoriis.

Sacerdos qui, absque legitima delegatione, paramenta sacerdotalia benediceret, saltem venialiter peccaret; attamen valeret benedictio, quia ab ordine presbyterali pendet, et tantum jure positivo reservata est episcopos.

« Paramenta altaris, celebrantis et ministrorum debent esse coloris convenientis officio et missæ diei, secundum usum Romanæ ecclesiæ; » Rubric. 1 part. tit. 18, n. 1. Quidam dicunt hanc rubricam esse tantum



directivam, et non obligare sub peccato : alii vero communius et probabilius putant eam obligare sub peccato, quia enuntiatur modo præceptivo, et ita pii sacerdotes sentire videntur ; sed fatentur eam non obligare sub gravi nisi aliquod exoriretur scandalum, v. g. si in die magnæ solemnitatis color violaceus aut niger adhiberetur ; et rationabilem causam ab omni peccato excusare, puta si vestes debiti coloris concursui sacerdotum non sufficerent : unde concludunt ornamentum variis coloribus distinctum pro omni colore, excepto nigro, adhiberi posse in necessitate, ut ait Merati, id est, ubi rationabilis causa id posulat ; secus peccatum esset veniale. Si tamen unus color, v. g. albus, cæteris prævaleat, ornamentum pro eo colore adhiberi potest.

Quarti et Merati docent, colorem flavum omni colori æquivalere, quia omnes ad illum concurrunt, hincque in omni festo et officio vestibus ex panno aureo uti licere, exceptis diebus jejuniorum aliisque afflictionis et officiis defunctorum in quibus color violaceus aut niger præcipitur.

Paramenta sacra benedictionem suam amittunt si ita frangantur aut in tali statu ponantur, ut usui sacro ad quem erant destinata, amplius decenter inservire nequeant ; quia suam identitatem moralem jam non habent. Hinc si formam suam retinentia reficiantur, aut aliquid novi eis in minori quantitate addatur, nova benedictione non indigent, quia accessorium naturam principalis sequi congruit. Secus si aliam induant formam, aut pars addita sit major, v. g. si ex planeta fiat stola, si manica albæ detrahatur etiam per modicum tempus, si cingulum ita frangatur ut nulla pars remanens formam cinguli convenientis habeat, etc.

Fragmenta paramentorum vetustorum semel benedictione consecratorum in usus profanos nunquam convertenda sunt, propter reverentiam eis debitam, ut in regula juris 51 expresse statuitur, sed comburenda et cineres in piscinam vel in locum honestum projiciendi sunt, Ferraris, vº *Param.* n. 8.

*De birreto, seu biretto aut bireto.*

Birreti nomine, intelligitur quidam pileolus nigri coloris et quadratus, tria in summitate habens cornicula. Vulgo apud nos dicitur *bonnet carré*, quamvis sit rotundum, in forma conii elevatum, et habeat summitatem gallice dictam *houpe*.

Olim erat capitis tegumentum clericis proprium, quo a laicis distinguerentur: in concilio Salisburgensi, anni 1386, can. 6, et aliis ejusdem sæculi, prohibetur eis ne sine birreto incedant, cum hoc honestatem clericalem non deceat. Ipsi lapsu temporum pro solis functionibus sacris, usus birreti reservatus est, saltem in Gallia. In quibusdam tamen congregationibus clericorum mos erat ut in domo residentiae omnes birretum semper deferrent, et mos iste usque ad perturbationem rerum publicarum, an. 1791, perseveravit.

Ex Rubrica, part. 2, tit. 2, quilibet sacerdos celebraturus, ad altare accedens vel rediens, birretum in capite habere tenetur: « Optandum foret, inquit *Romsée*, ut » adhuc adverterent multi in præsentis puncto deficientes. » In Italia et præsertim Romæ non permittitur ut ipsi extranei ad altare sine birreto accedant.

Similiter in aliis partibus officii ecclesiastici et in sacramentorum administratione adhibendum est birretum ubi præscribitur. Congr. episc. 13 maii 1616 et Rit. 30 martii 1633, decreverunt canonicos incedere teneri detecto capite in ecclesia, cum birreto in capite extra eam, et birreto, non vero pileolo *calotte*, uti debere in choro. Usum birreti, vel pileoli vulgo *calotte*, in missa, etiam extra canonem, solus papa concedere potest, ut decreverunt Congr. episc. et regul. 2 januarii 1590 et 17 junii 1595, et Congr. concil. Trid. 16 feb. 1619. Nec eo uti potest episcopus sine Sedis apostolicæ licentia, juxta decreta S. Rit. Congr. 25 april. 1626 et 13 aug. 1695. In Gallia tamen episcopi illius usum usque ad secretas permittere consueverunt, ut testatur *Collet*, et eo ipsi

sine licentia summi Pontificis utuntur. Sed Bened. XIV utrumque expressis verbis reprobandum docet in Inst. 96.

Cum apud Sinenses caput discooperire sit irreverentia, Paulus V permisit missionariis in eorum imperio degentibus intra missam uti pileolo a vulgari tamen distincto, referente Bened. XIV, Inst. 96, n. 2. Eo absque dispensatione legitima extra canonem uti, absque scandalo, mortale non judicatur esse peccatum; et si rationabilis causa id suaderet, v. g. subitanea et gravis infirmitas quæ recursum ad episcopum non permetteret, nullum esset peccatum, ut ipse Bened. XIV agnoscit, de Missæ sacrif. l. 1, cap. 9, n. 3.

Idem pontifex, in eadem Inst. 96, de coma fictitia, *perruque*, ex professo disserens, contendit 1º clericos sacris ordinibus initiatos eam in nullo loco deferre posse; 2º nullum sacerdotem cum coma fictitia missam celebrare posse, et 3º in Inst. 34, § 4, episcopos ab ea prohibitione dispensare non posse, et sententiam quæ talem potestatem eis attribuit, a Sede apostolica nunquam fuisse probatam. Attamen in Gallia solent episcopi hanc dispensationem concedere; imo comæ fictitiæ ita communes evaserunt, ut clericis non videantur prohibitæ etiam in celebratione missæ, ut advertit D. *Devie*, episc. Bellicensis, in suo Rituali recenter impresso.

### *De dalmatica et tunica.*

Dalmatica, olim tunica talaris, cum amplis manicis, nomen accepit a Dalmatia, quia in ea regione hujusmodi vestis fuit communis; deinde facta est ornamentum quo reges, imperatores aliique viri in dignitate constituti decorari consueverunt, ut ostendit *Grancolas*. Ad usum ecclesiasticum transiit. Anastasius Bibliothecarius, in nono sæculo scribens, dicit a S. Sylvestro institutum fuisse ut diaconi dalmatica uterentur in ecclesia (intellige Romana); papa Symmachus, in sexto sæculo, usum dalmaticarum concessit diaconis ecclesiæ Arelatensis, et S. Greg. Aregio, episcopo Vapicensi, idem privilegium

sibi et suo archidiacono poposcenti, respondit, Epist. 1. 9, epist. 107 : « Te vel archidiaconum tuum dalmatica de-  
» corandos esse concessimus. » Ille usus omnibus episcopis, presbyteris et diaconis factus est communis per Gallias in octavo vel nono sæculo : episcopi et presbyteri eam subtus casulam deferabant.

Tunica, quæ erat vestis subdiaconis propria, a dalmatica in eo differebat quod strictior esset : nunc ad eandem formam reducta est.

Nullibi simplices presbyteri dalmaticam subtus casulam nunc deferunt : verum episcopi solemmniter celebraturi, tunicam seu tunicellam et dalmaticam, ex Ordine Romano XIV, §48, induendi sunt. Episcopales illæ vestes ex tenui panno serico confici solent, et coloris officio respondentis esse debent.

Quoniam dalmatica est vestimentum lætitiæ, sicut casula, diaconi et subdiaconi, in Quadragesima aliisque diebus pœnitentiæ, in solis ministrant albis, et induunt casulam ante pectus plicatam ad cantandum respective epistolam et evangelium, eamque postea statim deponunt, juxta ritum Romanum. Ita Durandus, Gavantus, Romsée, etc.

Quædam sunt alia paramenta episcopis solemmniter celebraturis ex Ordine et pontificali Romano propria, nempe 1° *compagi et sandalia*, — *des bas et des souliers* : quando statutum fuit ut ministri altaris, reverentiæ causa, speciales haberent vestes ut officiis suis recte fungerentur, mutabant etiam compagos et sandalia, quem usum soli episcopi et prælati pontificalia habentes in nonnullis circumstantiis retinuerunt. 2° *Chirothecæ*, *gants*, sic dictæ a verbo græco *χαιρ*, *manus*, quia manuum sunt ornamenta. Honorius Augustodunensis, in duodecimo sæculo scribens, dicit earum usum ab Apostolis traditum fuisse, quod nullo quidem nititur fundamento; verumtamen sunt antiquæ. 3° *Annulus*, cujus fit mentio apud S. Isidorum Hispalensem, in septimo sæculo, tanquam signi honoris episcopalis, ad exprimendum episcopos eminenter debere esse discretos, et secretorum custodes. 4° *Ba-*



culus, *crosse*, qui est velut sceptrum et virga episcopi, ac proinde signum ejus auctoritatis. Patet ex S. Isidoro, l. 2, cap. 5, illius usum jam fuisse antiquum in septimo sæculo. Summus pontifex hujusmodi non habet baculum, quia in solemnitatibus non ambulat pedibus, sed portatur. Abbates, e contra, eum habent ut symbolum suæ dignitatis. Alius est baculus, signum honoris, quem præcentor defert in choro, et cujus Honorius supra citatus meminit in Gemma animæ, l. 1, cap. 24. 5° Crux pectoralis : primitus episcopi capsulam reliquias continentem e collo pendente deferebant, ut videtur in vita S. Germani Autissiodorensis, et S. Greg. Turon. Deinde cruces ligneas, argenteas vel aureas habuerunt, et ille usus factus est generalis. 6° Mitra : Euseb. Hist. l. 3, cap. 31, refert S. Joannem, ad instar summi sacerdotis Judæorum, laminam in capite gestasse : idem legitur de S. Jacobo Hierosolym. apud S. Clementem Alexandrinum. Hinc, juxta Card. Bona, *Grænicolas*, *Dévoti* et alios, natus est mitræ episcopalis usus : hodierna tamen illius forma ultra decimum sæculum non ascendit, ut ostendunt Gard. Bona, PP. *Ménard*, *Martène*, *Mabillon*, etc. Triplicis generis distinguuntur mitræ, videlicet simplex, aurifrigiata et pretiosa. Inter abbates alii habent annulum et baculum tantum; alii vero habent etiam mitram cum cæteris ornamentis pontificalibus. Inter eos qui privilegio pontificalium gaudent, alii solam mitram simplicem deferunt, alii mitram aurifrigiatam, et nulli pretiosam.

*De cappa seu pluviali, superpelliceo, etc.*

Durandus, l. 3, cap. 1, n. 13, Honorius August. in Gemma animæ, l. 1, cap. 227, cappam describunt ostenduntque eam tunc eandem habuisse quam nunc habet formam. Primitus quoddam erat tugurium contra pluviam, unde vocatur pluviale, et ideo habet caputium quo olim tegebatur caput. Ab usu communi ad conditionem specialis ornamenti transiit, sicut aliæ pleræque vestes sacræ.

Non solum episcopus et presbyter, sed inferiores clerici ipsique laici, officio cantorum fungentes, cappas seu pluvialia deferre possunt.

Pluviali utitur sacerdos, ex Rubrica, in processionibus sanctissimi Sacramenti et in quibusdam aliis, in benedictionibus quæ fiunt ad altare, in officio solemni laudum et vesperarum, quando assistit episcopo solemniter celebranti, post missam defunctorum, ad faciendam absolutionem. Nunquam habendus est manipulus cum pluviali seu cappa.

Gavantus dicit cappas non esse benedicendas, quia omnibus ecclesiasticis sunt communes, et ad sacrificium non ordinantur. Quarti vero et Merati concedunt nullum dari præceptum eas benedicendi, sed volunt melius esse eas benedicere sub forma pro indumentis sacerdotalibus in genere assignata.

Superpelliceum sic dictum est quia super tunicas pelliceas induebatur. Ita Durandus, l. 3, cap. 1, n. 10. S. Hieron. l. 1 Adversus Pelag. supra citatus, meminit candidæ vestis ad usum episcopi, presbyteri, diaconi et reliqui ordinis ecclesiastici: hæc autem vestis erat tunica albæ similis, unde venit rochetum et superpelliceum, *ut jam notavimus*. Item et cotta, in Italia usitata, quæ formam habet tunicellæ rochetto contractionis. Superpelliceum, rochetum et cotta fieri debent ex lino tenui, vel ex cannabe, vel probabiliter ex xylino: ita passim fieri solent, et non video cur mos iste reprehenderetur. Illæ vestes quæ candidæ et mundæ semper esse debent, non benedicuntur, nec ideo reputantur sacræ.

## ARTICULUS OCTAVUS.

### DE RUBRICIS SERVANDIS.

Rubricæ sic dictæ, quia rubro colore olim scribi solebant, quædam sunt regulæ communes, continentes ritus in celebratione missæ, officii divini recitatione et sacramentorum administratione servandos. Aliæ sunt

præceptivæ et aliæ directivæ. Præceptivæ eæ sunt quæ ad servandos ritus illis præscriptos obligant sub peccato ; et directivæ illæ sunt quæ proprie dictam obligationem non imponunt , sed per modum consilii et instructionis statuuntur. Ita generaliter theologi, quamvis accuratam non tradant regulam qua præceptivæ a directivis tuto discernantur.

*Hic dicemus* 1° de obligatione rubricarum missam spectantium ; 2° de modis quibus contra rubricas peccari possit in missa ; quasdam exponemus observationes in cæremonias et ritus missæ privatæ ; 3° item et missæ sollemnis.

§ I. — De obligatione rubricarum missam spectantium.

1° Probabilius nobis videtur omnes rubricas intra missam seu in actu celebrationis servandas, esse præceptivas, ac proinde sub peccato obligare. Nam 1° concilium Trid. sess. 7, can. 13, anathemate percutit eos qui dixerint « approbatos Ecclesiæ ritus in solemnibus sacramentorum administratione adhiberi consuetos, aut sine peccato a ministris omitti pro libitu, aut in alios novos mutari posse. » Confectio autem sacræ Eucharistiæ ad præstantissimi Sacramenti administrationem pertinet, *ut patet.*

2° S. Pius V, bulla in fronte Missalis ejus appõsa, ait : « Mandantes et omnibus districte præcipientes, in virtute sanctæ obedientiæ, ut missam juxta ritum, modum et normam in Missali præscriptam, decantent ac legant... neque in missæ celebratione alias cæremonias vel preces addere vel recitare præsumant. » Certe tenor hujus bullæ strictum exprimit mandatum cæremonias et preces missæ non mutandi nec addendi, et ex se sub gravi obligat, ut indicant verba *districte* et *in virtute sanctæ obedientiæ*. Ergo. Ita Merati, Tournely, Quarti, Collet, Ligorio, etc.

Unde notabilis infractio rubricarum intra missam servandarum semper est materia ad peccatum mortale

sufficiens, et peccatum non fit veniale nisi defectu advertentiæ aut consensus, vel ob levitatem materiæ.

3<sup>o</sup> Decreta S. Rit. Congr. ut rubricarum Missalis supplementum haberi debent, et si in forma rigorosa exprimantur, v. g. in fine habeant, *ab omnibus servetur, servari ab omnibus mandavit*, etc. eodem modo ac ipsæ Missalis rubricæ obligant; congregatio enim vi suæ institutionis habet facultatem sic imperandi, ipsius resolutiones in eo casu ut summi Pontificis oracula haberi debent, et multo magis quando, ut sæpe accidit, a regnante pontifice expresse approbantur.

Si vero dubia circa ritus suborta solummodo per modum declarationis solvat, resolutiones ejus vim legis stricte non habent, sed velut sapientissimorum virorum responsa considerantur: attamen in eo casu opinionibus aliorum doctorum præferri, et ideo requiri ac sedulo nosci debent.

4<sup>o</sup> Cum in multis diœcesibus et in religiosis ordinibus vigeant consuetudines rubricis Romanis oppositæ, quæsitum est an licite observari possent. Respondet *Amort* apud *Ligorio*, l. 6, n. 401, qui eum minime improbat: « S. Congregatio Rituum constanter tolerat consuetudinem, saltem immemoriam, contrariam rubricis. Itaque tuta conscientia licet se conformare consuetudini diœcesanæ, præsertim in rebus levioris momenti, quæ non cedunt in deformitatem cultus publici. » Non rejiciuntur ergo consuetudines, *nisi*, ut addit *Ligorio*, *contineant positivam indecentiam, quæ nequeat decenter tolerari*.

Verum illæ consuetudines diœcesibus propriæ instar rubricarum missalis Romani obligant, et privatus, absque peccato mortali aut veniali, juxta materiam et circumstantias, eis derogare non potest. A fortiori novas consuetudines inducere non potest, nec recentibus aut male inductis se conformare.

5<sup>o</sup> Communiter docent auctores, rubricas extra missam servandas sæpe esse directivas, ac consequenter per se sub peccato non obligare, quales sunt rubricæ signacula in Missali ad ea quæ dicturus est ordinandi, crucem in sa-



cristia salutandi, etc. Frequenter tamen sunt præceptivæ, ut dicit *Collet*, et insuper communis doctorum sententia est, juxta *Ferraris*, vº *Rubricæ*, n. 13, rubricas etiam solum directivas absque rationabili causa negligi non posse quin admittatur culpa saltem venialis, propter inordinationem finis aut motivi; rectus enim finis et rationi conformis ab observatione hujusmodi regularum ecclesiasticarum non retraheret.

§ II. — De modis quibus peccari possit contra rubricas in missa servandas.

Peccari potest maxime per omissionem, additionem, mutationem, defectum pronuntiationis et confusionem.

1º *Per omissionem*. Omittere ritum vel partem missæ essentialem, vel accidentalem notabilem, est peccatum mortale: patet ex dictis, et est sententia communis. Hinc mortaliter peccaret qui voluntarie omitteret oblationem panis aut vini, consecrationem alterutrius speciei, elevationem hostiæ aut calicis, mixtionem aquæ cum vino aut particulæ hostiæ cum sanguine, confessionem et ea quæ sunt in principio missæ, principales collectas, epistolam, evangelium, offertorium, præfationem, canonem vel quamlibet canonis orationem, *Pater noster*, libera nos, *Agnus Dei*, unam ex orationibus communionem præcedentibus, *Domine, non sum dignus*, *Quid retribuam*, patenæ et calicis purificationem, postcommunionem, etc. Item tot modicas partes intra eandem missam omittere, ut integræ epistolæ, vel integro evangelio equivalenceant, vel, secundum nonnullos, minimam partem Canonis, peccatum est mortale, quia censetur materia notabilis. Item adhuc probabiliter qui benedictiones, inclinationes aut genuflexiones, in notabili parte, sine causa sufficienter excusante, omitteret vel truncaret, mortaliter peccaret. Ita *Ferraris*, vº *Rubricæ*, n. 14; *Ligorio*, l. 6, n. 400 et 405.

Contra vero veniale est omittere *Kyrie eleison*, *Gloria in excelsis*, *Credo*, unam collectam vel commemoratio-

nem, unam prophetiam vel epistolam in feriis quatuor temporum, quando plures legendæ sunt, graduale, tractum aut alleluia, prosam, etc. Item aliquas omittere benedictiones, inclinationes, genuflexiones, aut eas usque ad terram non facere, altare non deosculari, aut simulate tantum deosculari, etc. quia hujusmodi omissiones, sigillatim sumptæ, in hominum opinione non reputantur graves: secus si plures notabilem quantitatem constituentes simul omitterentur; tunc enim materia fieret gravis. Sic Ferraris et Ligorio in locis citatis.

*Notandum*, omissiones ex se leves, gravia constituere posse delicta, 1<sup>o</sup> ratione pravi finis, ut si sacerdos nonnullas leves omittat rubricas, animo novum inducendi ritum; 2<sup>o</sup> ratione contemptus, ut si sacerdos aliquam omittat rubricam, contemnendo papam vel episcopum qui eam præcepit; 3<sup>o</sup> ratione scandali, si nempe assistentes tali omissione ad irreverentiam erga sanctissimum Sacramentum notabiliter excitarentur; 4<sup>o</sup> ratione periculi, ut si quis absque Missali celebrare volens, periculo partes notabiles omittendi se exponat.

2<sup>o</sup> *Per additionem*. Aliquid valde notabile, præter ea quæ in rubricis statuuntur, addere missæ, mortale esset peccatum, et quidem gravius quam similem partem præscriptam omittere; quia hoc in præcitata S. Pii V bulla expressius prohiberi videtur, et aliunde peccata commissionis graviora sunt in suo genere quam peccata omissionis, ob majus voluntarium. Hinc 1<sup>o</sup> addere verba quæ sensum formæ consecrationis mutarent, grave esset sacrilegium, cum validitas sacramenti impediretur; 2<sup>o</sup> addere verba ritui sacro opposita, etsi sensum non mutant, v. g. dicere *Hoc est corpus meum de Virgine natum*, peccatum nihilominus esset mortale, quia talis mutatio reputaretur gravis; 3<sup>o</sup> aliquid addere etiam leve, intentione novum inducendi ritum, propter strictam concilii Trid. et S. Pii V prohibitionem; 4<sup>o</sup> aliquid addere in notabili quantitate, etiam sine animo novum inducendi ritum, circa ea quæ publice recitantur, et probabilius, inquit Ferraris, etiam circa ea quæ secreto dicuntur,

quia talis additio est notabilis ritus præscripti mutatio.

E contra, aliquid parvi momenti et sine animo novum ritum introducendi, addere, v. g. quædam verba vel gesta, peccatum non esset mortale : *ita generaliter doctores*. Sic peccatum esset duntaxat veniale, 1<sup>o</sup> dicere, *Adoro te, Jesu Christe*, elevando hostiam, pedem calicis deosculari statim post consecrationem, ob devotionem; 2<sup>o</sup> addere *Gloria in excelsis* vel *Credo*, cum omittendum sit, nisi id fiat cum magna deformitate aut scandalo, v. g. in missa defunctorum; 3<sup>o</sup> addere unam aut alteram collectam, præter solitas, ex sola devotione, non est peccatum. A peccato veniali tamen excusandus non videtur qui hanc facit additionem die festi solemnis vel alia in qua unica dicenda est oratio, vel solæ commemorationes privilegiatæ permittuntur.

3<sup>o</sup> *Per mutationem*. Mutatio in ritu missæ cum gravi deformitate, contemptu aut scandalo, peccatum est mortale; cum levi deformitate, esset peccatum veniale. *Ita omnes*. Unde 1<sup>o</sup> dicere missam votivam aut *de requiem* in festo duplici vel intra octavam privilegiatam, absque rationabili causa in rubricis approbata, est peccatum saltem veniale, et mortale si adsit contemptus vel grave scandalum; 2<sup>o</sup> propria auctoritate mutare preces præscriptas in alias, v. g. unam epistolam in aliam, evangelium in aliud, propriam præfationem vel Communicantes in communem, etc. peccatum est tantum veniale; mortale tamen esset, si hæc mutatio cum magna deformitate fieret, puta si die Nativitatis Domini, Paschæ aut Pentecostes, diceretur epistola vel evangelium missæ defunctorum; item si gravis fieret inversio, v. g. si evangelium diceretur ante epistolam; 3<sup>o</sup> mutare vel omittere aliquod verbum in Canone, si sensum mutet, est peccatum mortale; si sensum non mutet, est peccatum veniale. Concina, cum quibusdam aliis, putat omissionem unius vel alterius sancti esse peccatum mortale; alii tamen, ut Quarti, Tournely et Ligorio, a mortali excusant omissionem trium vel quatuor nominum sanctorum. S. Congr. Rit. declaravit, 12 nov. 1615, regulares qui nomen epi-

scopi omittebant et nomen generalis sui ei substituebant, mortaliter peccare. Advertunt quidem doctores Congregationem supposuisse in regularibus id facientibus aut contemptum episcopi, aut animum introducendi novum ritum; sed indubium est hujusmodi mutationem vel aliam ei similem propria auctoritate factam, esse ad minus peccatum veniale; 4<sup>o</sup> actiones præscriptas, v. g. cruces, inclinationes, genuflexiones, manuum junctiones vel elevationes imperfecte facere, aut preces leviter invertere, puta unam orationem ante aliam dicere, secluso scandalo et contemptu, peccatum est tantum veniale. Ita pro his omnibus Ferraris et passim Ligorio.

4<sup>o</sup> *Per defectum pronuntiationis.* Rubrica enim, 1 parte, tit. 16, plurima describit clara voce in missa privata dicenda, monens sacerdotem « ut ea distincte et apposite » proferat; non admodum festinanter, ut advertere possit quæ legit; nec nimis morose, ne audientes tædio afficiat; neque etiam voce nimis elata, ne perturbet alios qui fortasse in eadem ecclesia tunc temporis celebrant; neque tam submissa, ut a circumstantibus audiri non possit; sed mediocri et gravi quæ et devotionem moveat, et audientibus ita sit accommodata, ut quæ leguntur intelligant. Quæ vero secreta dicenda sunt, ita pronuntiet, ut et ipse se audiat, et a circumstantibus non audiatur. »

Ponderanda sunt hæc verba, et unusquisque debet 1<sup>o</sup> dicere ex rubricis quæ alta, quæ mediocri, quæ submissa vel aliquantulum elevata voce pronuntiari debent; 2<sup>o</sup> quæ secreto dicenda sunt; 3<sup>o</sup> omnia distincte et devote pronuntiare, juxta regulas præscriptas.

Circa initium decimi octavi sæculi, graviter controversum est qua voce celebrans canonem missæ pronuntiare deberet. Quidam fortiter contendebant illum pronuntiandum esse clara voce, et verba rubricæ *submissa voce*, per oppositionem ad cantum intelligenda esse. Anno 1709 *Ledieu*, canonicus, olim secretarius *Bossuet*, qui novæ editioni missalis Meldensis præsidebat, propria auctoritate addidit *amen* ad verba consecrationis, cum littera



rubra *R.* quam aliis ordinarii missæ et canonis, orationibus pariter præfixit, ad indicandum quod, in his locis, populus vel minister, nomine populi, respondere deberet *amen*, ac proinde totum canonem clara voce pronuntiandum esse. Hinc magnus exortus est rumor. D. de Bissy, episcopus Meldensis, hanc innovationem per mandatum 22 januarii 1710 damnavit, et Missale statim reformandum curavit.

Card. Bona, l. 2, cap. 13, n. 1, supposebat Canonem usque ad decimum sæculum alta voce pronuntiatum fuisse: hanc sententiam acriter tuitus est de Vert, in opere inscripto, *Explication des cérémonies de la messe*. Hinc occasio prædictæ innovationis. Sed Vallemont, religiosus Cluniacensis, in erudito opere, *Du secret des mystères*, etc. et P. Lebrun, in longa dissertatione, *Sur l'usage de réciter en silence une partie de la messe dans toutes les églises du monde*, hoc systema diserte confutarunt.

Quidquid sit, constat morem tacite recitandi canonem decimo sæculo longe antiquiorem esse; formaliter enim talis recitatio præcipitur in Ordine Romano II, qui est saltem septimi sæculi, juxta doctissimum Mabillon et Merati; et, multis fatentibus, qui totum Canonem vel magnam ejus partem clara voce recitaret, etiam sine animo novum inducendi ritum, mortaliter peccaret, quia stricto præcepto in materia gravi opponeretur: qui vero passim quædam verba, secreto pronuntianda, altiori voce pronuntiat, ut sæpe accidit, graviter non peccat, sed a veniali difficile excusatur, propter expressum rubricæ præceptum et antiquum Ecclesiæ morem, maxime si in Canone hoc sibi permittat.

Qui ita submisce pronuntiat verba consecrationis ut seipsum non audiat, mortaliter peccat, quia contradicit rubricæ in materia notabili, et sacramentum exponit nullitati: si alia verba secreto dicenda eo modo pronuntiaret, quidam dicunt eum mortaliter peccaturum; sed probabilius venialiter tantum peccaret, modo reipsa distincte articularet. Vide Ligorio, l. 6, n. 414.

Item qui omnia quidem debita voce recitaret, sed ni-

mis festinanter, mortaliter aut leviter peccaret, prout major vel minor esset difformitas, indecentia vel scandalum : semper tamen aliquod existeret peccatum, tum propter irreverentiam, tum propter rubricæ transgressionem. Similiter veniale esset peccatum in pronuntiatione nimis prolixa, et *a fortiori* in repetitionibus indiscretis : imo illæ repetitiones facile fieri possent objectum peccati mortalis, si nempe liturgiam graviter turbarent, præsertim si in forma consecrationis id contingeret.

5° *Per confusionem.* Ob rubricarum dispositionem et sanctissimi sacrificii reverentiam, cæremoniæ et ritus suo ordine distincte et graviter observari debent : v. g. celebrans et minister non debent simul loqui, nec unus incipere prius quam alter finierit, aut versiculos truncare, aut balbutiendo pronuntiare; nec sacerdos dicere *Kyrie eleison* eundo a cornu epistolæ ad medium altaris, nec alias res distincte præscriptas simul jungere; in ea enim agendi ratione esset confusio prohibita, ac proinde peccatum grave aut leve, juxta gradum indecentiæ et difformitatis. Hinc Ligorio, l. 6, n. 400, et multi cum illo, putant sacerdotem qui infra quadrantem absolveret missam, etiam ex brevioribus, ut de B. Maria in sabbato, a peccato mortali probabiliter excusari non posse, quia impossibile est ut in tam brevi spatio missam absolvat sine multis imperfectionibus contra rubricas, irreverentia erga sacramentum et scandalo erga populum. Unde Bened. XIV, Inst. 34, n. 30 et seq. optime docet, missam uec breviorē triente, nec longiorē dimidia hora esse debere; quia in breviori spatio omnia debita reverentia agi non possent, et in prolixiori, tædio afficerentur adstantes.

Episcopi igitur et regularium prælati tenentur sub gravi scandalosam celeritatem, quantum possunt, extirpare, et a mortali excusari non possunt sacerdotes qui, ex negligentia, cæremonias addiscere non curant. Ita Ligorio et plures apud ipsum.

§ III. — Quædam observationes in cæremonias et ritus missæ privatae.

1° Paramenta non debent poni in altari in quo celebranda est missa, nisi pro solis episcopis et cardinalibus, ut S. Congr. Rit. decrevit, die 7 julii 1612 : id permittitur abbatibus sed ubi duntaxat solemniter celebraturi sunt; secus, in sacristia, sicut alii quilibet sacerdotes, paramenta sumere debent. Deficiente sacristia, habenda est mensa ab altari separata; si tandem ornamenta ex necessitate in altari ponenda sint, nunquam in medio, sed in cornu evangelii collocentur.

2° Sacerdos ad missam celebrandam accedens, vestem nigram a collo ad talos demissam induatur; alioquin, in nostra diœcesi, suspensionem ipso facto incurreret : qui ergo aliter indutus ad celebrandum in aliqua ecclesia se præsentaret, prohibendus esset.

3° Habendum est Missale officio conforme, et Tournely, Habert aliique plures dicunt, sacerdotem qui celebraret sine Missali, etiamsi memoria firmiter quæ dicenda sunt teneret, mortaliter peccaturum; quia semper aliquod esset periculum in re tam gravi errandi. Alii tamen multi, ut de Lugo, Layman, Suarez, Vasquez, La Croix, Gobat, Ligorio, etc. docent ut probabile, sacerdotem posse quandoque sine Missali celebrare, si facile habere non posset, et, ob præteritam experientiam, morale periculum errandi abesset.

Hinc inferunt, sacerdotem cæcum aut cæcutientem facultatem obtinere posse celebrandi missam votivam de B. Maria in dominicis et duplicibus, et *de requiem* in aliis diebus. Sed S. concil. Congr. hanc non concedit facultatem, teste Bened. XIV, Inst. 34, n. 5, nisi sub clausula *quod non sit omnino cæcus; et memoriter non recitet*. Refert tamen idem pontifex dictam concilii Congr. hujusmodi concessisse licentiam, 23 aug. 1727, cuidam parochi Florentino adeo pauperi ut pro vita sustentanda solum missæ stipendium superesset, idque *pro gratia, cum assistentia alterius sacerdotis*.

*Collet* putat episcopum, absolute loquendo, hanc concedere posse licentiam presbyteris pietate conspicuis, quamvis plures noverit qui sic dispensare non ausi fuerint, nisi pro tempore requisito ut dispensatio a S. Congr. concilii obtineri posset.

Nos vero scimus episcopos passim in Gallia hanc licentiam pro sua prudentia concedere solitos esse, et eas apponere conditiones quæ sibi videntur necessariæ ut reverentia erga sanctissimum Sacramentum servetur.

Sacerdos in extranea celebrans ecclesia debet 1º petere Missale officio suo respondens, si existat; secus, Missali in ea ecclesia recepto utetur et ritum ejus sequetur, si missam officio suo respondentem in eo non inveniatur. 2º Si in ea ecclesia non sit festum duplex, paramenta ritui suo conformia, si eum sequatur, petere ipsi licebit; si festum sit duplex, colore festi uti tenetur, etsi missam officio suo respondentem dicat. Sic *Romsée*, ex variis S. Congr. Rit. decretis. 3º Confessarii et capellam monialium dicere possunt missas sanctorum de quibus ipsæ recitant officium, utendo missali Romano, in communi, non vero Missali ordini proprio, ut fert decisio S. Congr. Rit. a Clemente XI, 1 decembris 1717 approbata.

Hic forte esset locus aliquid dicendi de Missali in lingua vernacula: certum est Apostolos et proximos eorum successores in linguis tunc vernaculis celebrasse, in græca, in latina, etc. Sed non minus certo constat liturgias cum idiomatibus non mutatas fuisse, et a multis sæculis, tum in Occidente, tum in Oriente, in veteribus linguis jam mortuis exerceri. Lingua Latina a septimo sæculo desiit esse vulgaris, et nihilominus ecclesia Catholica illius usum in sua liturgia constanter retinuit. In nono et in decimo sæculo, serio actum est Romæ de concedenda facultate episcopis et presbyteris apud Moravas degentibus, adhibendi in liturgia linguam Sclavonicam ibi vulgarem: quæ facultas, prius aliquo modo concessa vel tolerata, tandem fuit negata. Versionem missalis Romani in linguam Gallicam, anno 1660, auctore *Voisin*, doctore Sorbonico, editam reprobaverunt, anno sequenti, clerus.



Gallicanus, Facultas theologica Parisiensis et Alexander VII.

Paulus V decrevit, 25 januarii 1615, rogantibus missionariis e societate Jesu, ut apud Sinas missam et divina officia Sinica lingua celebrari liceret. Missale in ea lingua confectum missum est Innocentio XI, anno 1681, et procurator generalis missionum apud Sinas Romam se contulit, ut a Pontifice approbationem et facultatem eo utendi sollicitaret, quam tamen non obtinuit.

« Est autem apostolicæ Sedis, inquit Bened. XIV, de » Missæ sacrificio; l. 2, cap. 2, n. 11, in recenti popu- » lorum conversione ad fidem, pro variis circumstantiis, » vel permittere, vel prohibere vernaculæ linguæ usum » in divinis officiis celebrandis. » Sed monet idem pontifex, « constantem firmamque disciplinam esse, ne missæ » idioma mutetur, etsi mutet lingua vernacula. »

Non liceret ergo, etiam in casu necessitatis, uti Missali in linguam vernaculam converso, absque legitima Sedis apostolicæ dispensatione.

Missale clausum ita ponendum est in altare, ut apertura ejus crucem vel tabernaculum semper respiciat.

4<sup>o</sup> Rubrica præscribit ut celebrans sit calceatus : non posset ergo celebrare nudis pedibus, saltem extra necessitatem. Communis sententia est tamen illum tunc, secluso contemptu, non peccaturum mortaliter. Gavantus laudat eos qui communes crepidas in sacristia deponunt, et alias ibi paratas ad majorem sacri ministerii splendorem induunt. A peccato certe excusari non possent qui cum calceis judicio hominum indecentibus, v. g. fractis, sordidis, ligneis, etc. celebrarent.

5<sup>o</sup> Lavat manus, dicens, *Da, Domine*, etc. ut spiritualiter actus mundet, et propter reverentiam tanti sacramenti : hæc lotio ante missam est saltem sub veniali, et sub gravi, inquit Ligorio, l. 6, n. 409, si manus sint valde immundæ, propter reverentiam sacrificio debitam : ita Quarti, Roncaglia et Tournely. Lotionem vero post missam omittere, nullum est peccatum, juxta La Croix, Quarti et Ligorio, et talis est communis praxis.

6° Sacerdos ad paramenta accedens, quæ non debent esse lacera et scissa, sed integra et munda, induit se, si sit prælatus sæcularis, supra rochetum; si sit prælatus regularis vel alius sacerdos sæcularis, supra superpellicem, si commode haberi possit, alioquin sine eo supra vestes communes, dicens ad singula orationes determinatas, quæ quidem orationes, ex communi sententia, sub veniali recitandæ sunt.

7° Modos in rubricis determinatos pariter servari oportet, v. g. amictum in medio deosculari, illum super caput ponere et innox ad collum declinare, ac vestium collaria circumtegere, manicam albæ dexteram brachio dextro et deinde sinistram sinistro imponere, manipulum et stolam in medio, ubi est Crux, deosculari, partem dextram stolæ super sinistram in formam crucis ante pectus aptare, etc.

8° Juxta rubricam, sacerdos omnibus paramentis indutus et capite cooperto, salutat crucem per inclinationem capitis; sic pariter salutat alium sacerdotem ex altari redeuntem et sibi occurrentem, cui dextram cedere debet, clerum in choro si per illum transeat, episcopum et magnates si ante illos transiturus sit. Si transeat ante altare ubi non est sacramentum, caput cruci inclinat; si resideat ibi sanctissimum Sacramentum, flectit uno genu, capite semper tecto; si venerabile sacramentum sit expositum, flectit duobus genibus, genuflexus deponit birretum, et, posita dextra super bursam, profunda capitis inclinatione adorat Sacramentum; deinde, capite cooperto et manu super bursam posita, surgit et procedit. Eodem modo se gerit si ante sacerdotem Eucharistiam ministrantem transeat, nec expectandum est donec peracta sit communio, ex decreto S. Congr. Rit. 5 junii 1698.

Si vero transeat ante altare in quo celebratur missa, ante consecrationem, eodem modo agit ac si non celebraretur; in momento consecrationis, flectit utroque genu, et deposito birreto, adorat Sacramentum inclinatione capitis; completa consecratione, reponit birretum, surgit et procedit: inter consecrationem et communionem flectit uno tantum genu, capite cooperto, quia cor-

pus Christi est in altari sicut in tabernaculo, ob corpus sacerdotis intermedium.

Si transeat ante reliquiam sanctæ Crucis expositam, unico genu flectet usque ad terram eamque venerabitur. Sic, pro his omnibus, fere de verbo ad verbum *Romsée*.

Sacerdos ad altare procedendo nihil ore recitare debet, juxta eundem auctorem, nec sumere aquam benedictam, ecclesiam ingrediendo (quidam tamen id suadere videntur, si commodè possit), nec permittere ut alter coram se calicem deferat; tenetur vero ipse eum juxta rubricam deferre, nisi, ob senium, infirmitatem aliamve rationabilem causam, prævie paratus fuerit in altari, et tunc ad salutationes se discooperiet.

9° Cum sacerdos ad altare pervenerit, stans ante infimum illius gradum, caput discooperit, birretum dat ministro, profunde se inclinat ante crucem, vel genuflectit, si sacrum Eucharistiæ sacramentum ibi resideat. In omni genuflexione autem genu dextrum in loco pedis ponitur, et corpus debet esset rectum, sine ulla capitis inclinatione; *Romsée*. Si venerandum Sacramentum esset expositum, duo flecterentur genua et corpus profunde inclinaretur.

10° Quotiescumque sacerdos ad medium altaris accedit, vel de medio illius discedit, crucem per capitis inclinationem semper debet salutare, nisi altare deosculari vel corpus inclinare deberet; nam illud osculum vel hæc inclinatio inclinationem capitis rubrica præscriptam necessario includit.

11° Sacerdos e medio altaris ad unum cornu procedens, semper incedere debet naturaliter, ante se, non ex latere, nec recedendo, more cancrorum, et quando se convertit vel descendit, vitare debet ne tergum directe ad crucem vertat.

12° Sacerdos ad altare stans et aliquid legens vel recitans, sedulo vitare tenetur, in toto sacrificii decursu, omnem capitis, pedum et corporis motum vel agitationem, et se tenere debet immobilem, nisi rubricæ quemdam motum corporis vel capitis exigant.

13° Notat *Romsée*, 1° quod sacerdos inclinatus et statim genuflexurus vel ad populum se conversurus, debeat prius se totaliter erigere; 2° quod sub *Dominus vobiscum*, *Orate, fratres*, etc. oculos ad terram figere debeat, ne aspectu curioso astantes offendat; 3° quod manus disjungere et conjungere debeat dum habet faciem ad populum versam, non vero in ipso conversionis actu; 4° quod in elevatione oculorum, ubi est præscripta, caput movere non debeat: unde si effigies crucifixi videri non possit absque indecora capitis erectione, sufficit oculos in altum elevare; 5° quod in inclinatione corporis, pedes ab antependio altaris uno circiter passu removendi sint, et ponendi juxta se invicem, absque extensione unius ultra alium; 6° quod signum crucis perficiendum sit sub verbis † notatis, et vitandum ne abbrevientur lineæ, aut manus ita celeriter moveatur ut celebrans appareat potius pulveres ab oblatis excutere vel muscas abigere, quam crucem formare. 7° Dum dextra manus cruces format, sinistra nunquam manere debet suspensa, sed ponitur in pectus si celebrans seipsum signat, in altare si oblata vel sanctificata signat, in librum si de signando initio evangelii agatur. Item dum celebrans sinistra utitur, v. g. ad volvenda folia libri, dextram statim deponit in altare vel in Missale. 8° In junctione manuum, manus manui totaliter approximatur, ita ut quilibet digitus suum similem tangat, pollex dexter super sinistrum ponatur, et extremitas manuum junctarum neque faciem celebrantis, neque terram respiciat, sed ante pectus teneantur manus junctæ, casulam, quantum fieri potest, non tangentes. 9° In omni manuum extensione palma unius palmam alterius respiciat, digitis simul junctis, et eorum summitas humerorum altitudinem ac distantiam non excedat. 10° Cruces quæ fiunt super oblata non sunt faciendæ manu transversa seu incurvata, sed manu recta, ex S. Congr. Rit. 4 aug. 1663, lineæ uniuscujusque crucis debent esse rectæ et habere longitudinem quæ est ab extremitate parvi digiti ad carpum. Ad faciendam lineam transversam, manus reducenda est recte ad medium.



14° Qui ob infirmitatem celebrare non potest sine baculo, vel nisi utroque brachio in altari innixio, licite celebraret privatim, et etiam publice si adesset necessitas, v. g. ut populus audiret missam. Sic Ligorio, l. 6, n. 102, cum aliis nonnullis. Arbitratur insuper eum qui non potest stare rectus, ab omni peccato excusari si ex devotione celebrare velit. *Suppono* tamen, eum celebrare non posse sedentem, etiam ex necessitate, saltem nisi licentia episcopi accesserit, quia omitterentur genuflexiones aliæque cæremoniæ, et gravis fieret injuria erga divinum sacrificium.

15° Finito evangelio S. Joannis, et non ante, sacerdos manibus junctis accedit ad medium altaris, ubi inclinato cruci capite, accipit calicem manu sinistra, ad gradum infimum descendit, ad altare per suam sinistram se convertit, et salutatur crucem vel facit genuflexionem aut prostrationem, etc. Erectus, accipit a ministro birretum, super caput ponit, incipiens antiphonam *trium puerorum*, et statim canticum *Benedicite*, cui aliæ non substituendæ sunt preces, inquit *Romsée*.

#### § IV. — Observationes missam solemnem spectantes.

1° Si adsint ministri, videlicet diaconi et subdiaconi, rubricas singulorum officia respicientes sedulo discere debent; paramentis suo ordini propriis se induendo, preces assignatas sub veniali recitare tenentur. *Est sententia communis*.

2° Omnia quæ in missa privata secreto dicuntur, eodem modo in missa solemni dicenda sunt.

3° Quæ in choro cantantur, voce quasi submissa seu media recitantur a celebrante, quia omnia observat ut in missa privata. Antiquitus celebrans epistolam et evangelium non legebat, sed illa a ministris cantata audiebat. Difficultas ea audiendi dum in ambone vel in alio loco dissito cantabantur, nonnullos induxit ad illa legenda, et inde nata est rubrica nunc existens; *Romsée*.

4° Celebrans confessionem faciens, in sola missa so-

lemni, ad hæc verba, *et vobis fratres et vos; fratres*, aliquantulum se ad ministros sacros inclinatur, dicendo *vobis* et *vos* ad diaconum, et dicendo *fratres* ad subdiaconum.

5° Si episcopus in propria diœcesi missæ solemni assistat, ipse facit confessionem ab initio, *in nomine Patris*, usque ad *Indulgentiam* inclusive, et celebrans ei respondere debet, non vero simul cum illo dicere, ex decreto S. Cong. Rit. 4 aug. 1663; *Merati*.

6° Celebrans sedere debet cum diacono et subdiacono in banco ad cornu epistolæ posito, dum cantatur *Gloria* et *Credo*, etc. non vero in sedibus sibi paratis et distinctis, gallice *fauteuil*: ille honor reservatur prælatis; S. Congr. Rit. 19 maii 1614, et 12 junii 1627.

Ad missam solemnem pertinent processiones, cantus et thurificatio.

### *Processiones.*

7° Ante missam solemnem diebus dominicis et festivis fit processio in ecclesia vel circa ecclesiam parochialem. Processiones fuerunt in usu etiam apud Judæos, ut patet pluribus exemplis, v. g. translatione archæ de Cariathiarim in domum Obededom, et de domo Obededom in Hebron, dedicatione murorum Jerusalem, post captivitatem Babylonicam ædificatorum, ut in lib. II Esdræ, cap. XII narratur. Gavantus, Merati, Ferraris, putant eas apud Christianos ortum duxisse a turbis, in die Palmarum obviam Christo euntibus.

Certum est eas esse antiquissimas. Tempore Juliani Apostatæ, solemnis facta est processio Antiochiæ, ad translationem reliquiarum S. Babylæ, martyris; item Mediolani sub B. Ambrosio, ad deferenda corpora SS. Gervasii et Protasii. Postea institutæ sunt processiones ordinariæ, aliæ jussæ sunt extraordinariæ; modo in signum lætitiæ, v. g. in honorem B. Mariæ Virginis vel alicujus sancti; modo in signum luctus et pœnitentiæ, ut processiones S. Marci et Rogationum: aliæ denique fieri solebant certis diebus in claustris monasteriorum, ad benedicendas vel purificandas cellas monachorum, ante missam: idem

factum est in parochiis, percurrendo habitationes ecclesiæ proximiores, et in solemnioribus festis alias remotiores : hinc firmata est consuetudo aliquam processionem missæ parochiali permittendi.

*Cantus, musica, organum.*

Certum est apud Judæos magnam exstitisse cantorum et musicorum multitudinem, ad laudes Dei decantandas atque celebrandas. In primordiis Ecclesiæ psalmos et hymnos in conventu fidelium decantatos fuisse constat ex verbis Apostoli Eph. v, 19 : *Loquentes vobismetipsis in psalmis, et hymnis, et canticis spiritualibus, cantantes, et psallentes in cordibus vestris Domino*. Quæ verba de mutuo et alterno cantu intelligenda esse interpretes docent, ait Card. Bona, Rerum liturg. l. 1, cap. 25, n. 19.

« De hymnis et psalmis canendis ipsius Domini et Apostolorum habemus documenta, et exempla, et præcepta, » inquit S. Aug. Epist. 55, cap. 18. S. Ambr. ad consolationem fidelium in ecclesia excubantium, hymnos et psalmos secundum morem ecclesiarum Orientalium cantari præcepit, quem morem ecclesiæ Occidentales ab ecclesia Mediolanensi mutuaverunt, non quod antea non canerent, sed quia modus erat novus : ille cantus dictus est Ambrosianus. S. Gregorius Magnus aliam excogitavit cantandi methodum qua omnes plane et unisono canebant : unde cantus iste appellatus fuit, *planus cantus*, et cantus Gregorianus. Per totam ecclesiam Latinam fuit adoptatus; sed erat difficillimus.

Anno 1022, Guido Aretanus, monachus S. Benedicti, novam cantus et musicæ rationem cum omnium admiratione edocuit; ope enim sex notarum quibus sonos exprimi posse monstravit, sicut sermo scriptura pingitur, puer balbutiens, sine ullo negotio, intra paucos menses, ediscit quod homo grandævus et multo ingenio pollens pluribus annis vix addiscere potuisset.

Musica est scientia sonorum, seu ars commensurandi quantitatem quoad sonos. Duplex est, vocalis et instru-

mentalis; vocalis continet concentum, id est, harmoniam seu melodiam, rhythmum et poesim; instrumentalis vero, complectitur *euchordicam*, quæ fit ope nervorum aliarumve chordarum; *pneumaticam*, quæ fit flatu, v. g. cum buccina, tuba, etc. et *crusticam*, quæ fit pulsando, ut cum tympanis. Musica igitur habet pro objecto audibile, sicut mechanica tangibile et optica visibile.

In Extrav. Commun. l. 3, De vita et honestate cleric. cap. unico, musica qua planus cantus depravatur, mutatur vel derelinquitur, reprehenditur, ac prohibetur a Joanne XXII, qui tamen prohibere non intendit ne diebus festis in solemnibus missis aliisve officiis fiant consonantiæ melodiam sapientes. Episcopus igitur præcipere potest ut musica sit honesta, devota et ecclesiastica, non vero eam omnino prohibere posset in ecclesia, nisi apud moniales, inquit Ferraris, vº *Musica*, n. 2. Unde musica tum vocalis tum instrumentalis, licita est in divinis officiis, modo nihil immodestum aut minus profanum sapiat.

Juxta communio rem sententiam, organa cœperunt adhiberi in ecclesiis tempore Vitaliani papæ, anno 672 defuncti.

Organa et alia quælibet instrumenta musica prohibita fuerunt in missis defunctorum a Bened. XIII, in concilio Romano, tit. 15, cap. 6.

Quædam sunt ecclesiæ antiquæ in quibus nec organa, nec ulla instrumenta musica unquam fuerunt admissa, ut capella summi pontificis, Romæ, basilica S. Joannis Lateranensis, cathedralis Lugdunensis, etc.

### *Thurificatio.*

Thus est species gummi odoriferi ex arbusto Palæstinæ vel Arabiæ fluentis : nomen habet a verbo græco θυσιον, *sacrificare*, quia in sacrificiis adhibetur, et quædam sacrificia ex ipso thure olim diis offerebantur. Latine dicitur incensum, a verbo *incendere*, quia incenditur seu crematur. Semper in usu fuit pro cultu divino apud paganos, Judæos et Christianos, etsi Tertullianus dixerit,



in Apolog. cap. 30, nos puram precem Deo offerre, *non grana thuris*; et Athenagoras, Deum, patrem universorum, sanguine, nidore, floribus et suffimentis fragrantibus non egere: hæc aliaque similia non probant thus in Ecclesiæ primordiis non fuisse usitatum, sed duntaxat Christianos illud non offerre velut sacrificium, aut quasi Deus eo indigeret, more ethnicorum.

Thus non adhibetur in missa privata: in missa solemni, celebrans omnibus paramentis indutus, ante egressum e sacristia, accepto cochleari a diacono, ter injicit thus de navicula super prunas ardentes, in medio thuribuli, dicens, *Ab illo benedicaris*, in latere dextro, subjungens, *in cujus honorem*, et in latere sinistro, addens, *cremaberis*. Reddito cochleari, facit signum crucis nihil proferens. Hæc benedictionis forma semper usurpatur quoties thus benedicendum est, excepta benedictione quæ fit ante thurificationem offertorii. Incensum autem non benedicitur quando immittitur ad incensandum solum sanctissimum Sacramentum, et ante oblata die veneris in parasceve: his casibus exceptis, semper benedicitur, etiam ubi incensandi sunt defuncti, ut probat Merati.

Bis totum incensatur altare in missis solemnibus, ante introitum, et factis oblatis, ante manuum ablutionem: in prima incensatione sacerdos nihil dicit; in secunda utitur forma benedictionis speciali, et incensando pronuntiat orationem cujus verba ita distribuit, ut singulis thuribuli motibus respondeat. In missa solemni defunctorum prior incensatio omittitur; posterior fit more consueto.

Si venerabile Sacramentum in tabernaculo sit occlusum, celebrans illud adorat genuflectendo, juxta rubricam Romanam, sed non thurificat; adoratur enim quod latet, sed id solum incensatur quod manifeste patet. Ita Gavantus, Quarti, Merati, *Romsée* et alii. Consueta igitur thurificatio ad crucem refertur, velut si in altari non adesset tabernaculum.

Ubi sanctissimum Sacramentum est expositum, celebrans, post immissionem et benedictionem thuris, ac-

cepto thuribulo, genuflectit, manu sinistra qua summitatem catenularum tenet, in altare posita, dextra thuribulum inter altare et casulam tenendo, postea in planum descendens, super infimum gradum utroque genuflexus, triplici ductu Sacramentum incensat. Mos est tamen in basilicis alinæ Urbis ut genuflexio hæc fiat super ipso suppedano, referente Merati, dicente hunc morem decenter servari posse in omnibus ecclesiis.

Incensatione altaris completa, diaconus a parte epistolæ stans in plano, facta inclinatione capitis profunda celebranti, eum triplici ductu incensat; deinde, post incensationem offertorii, incensat duplici ductu chorum, dignitates ecclesiasticas et laicas, per ordinem, juxta rubricas et consuetudines, tandem subdiaconum tenentem patenam. Postea, thuriferarius, accepto thuribulo, duplici ductu incensat diaconum; item acolythos et ter populum.

In missis defunctorum solus incensatur celebrans, et episcopus si adsit.

Non probatur usus duorum thuribulorum in incensatione personarum, sed tota thurificatio facienda est unico thuribulo, nisi, ex immemorabili consuetudine, canonici et magistratus simul thurificandi sint. S. Congr. Rit. 15 maii 1608, et 25 julii 1618, apud Merati, in Indice, n. 87, 168 et 73.

Eadem Cong. declaravit, 4 maii 1613, in Indice, n. 136, canonicos et dignitates genuflectere non teneri quando episcopum celebrantem thurificant, nec ad benedictionem ejus suscipiendam; sed tantum caput inclinare.

Modus autem thurificandi personas in ritu Romano præscriptus, apud nos non servatur.

## ARTICULUS NONUS.

### DE DEFECTIBUS IN MISSA OCCURRENTIBUS.

1º Inter defectus qui in celebratione missæ occurrere possunt, alii sunt substantiales qui sacramentum redde-

rent nullum, et in materia, forma aut intentione ministri contingunt; alii vero dicuntur accidentales, quia ad substantiam sacramenti non pertinent, nec ejus validitatem impediunt. Multi esse possunt, nec ad certum numerum reducuntur.

2° Unusquisque sacerdos rubricas, tit. de Defectibus, attente legat, discat, memoria retineat, ut, casu adveniente, statim sciat quid sibi agendum sit. Nonnullas tantum communiores difficultates hic exponemus ac solvemus.

3° Si ante consecrationem advertat sacerdos hostiam esse corruptam, vel non triticeam, ea remota, aliam ponat, et facta oblatione saltem mente concepta, prosequatur ab eo loco ubi desiit. Non igitur necesse est eam ante oculos elevare super patenam, neque facere super ea aut cum ea signum crucis.

4° Si post consecrationem id adverterit, posita alia, faciat oblationem ut supra, et a consecratione incipiat, nempe a verbis, *Qui pridie*, etc. et illam priorem, si non sumpsit, sumat post sumptionem corporis et sanguinis Domini; si sumpserat, nihilominus sumat eam quam consecravit; præceptum enim de perfectione sacrificii majus est quam præceptum de servando jejunio. Eodem modo procedendum est si hostia consecrata casu aliquo dispareat, puta si vento rapiatur, si ab animali comedatur, etc. et reperiri nequeat.

5° Si post sumptionem sanguinis tantum hoc contingat, rubrica præcipit ut novus panis et vinum cum aqua iterum ponantur, saltem in mente offerantur, consecrentur, incipiendo a verbis, *Qui pridie*, et statim sumantur, ne sacrificium maneat imperfectum, et debitus servetur ordo.

6° Celebrans qui ante consecrationem advertit aquam, siceram aliumve liquorem pro vino adhibitum fuisse, aut vinum esse corruptum, hunc liquorem insufficientem deponere debet in vas aliquod, vinum cum aqua statim apponere, et facta oblatione, ut supra, consecrare, incipiendo a verbis, *Simili modo*. Si post consecrationem id

advertat, eodem modo agat; si post sumptionem corporis vel hujusmodi aquæ, novam hostiam et novum vinum cum aqua mixtum offerat, consecret et sumat, vel, ad vitandum scandalum, si plures sint adstantes, vinum tantum cum aqua consecret, sumat et statim prosequatur. Ita expresse rubrica Romana.

Rubrica vero Parisiensis et Cenomanensis addit quod si, post commixtionem particulæ hostiæ cum calice, celebrans advertat, solam appositam fuisse aquam, eam non effundat, sed vinum apponat in majori quantitate, offerat, consecret, ut supra, et prosequatur. Si post sumptionem corporis, similiter faciat. Si in sumptione hujusmodi aquæ, sorbeat quod in ore habet, ab ulteriori sumptione cesset, vinum superimponat in calice, offerat, consecret et sumat ut supra. Si vero ea quantitas vini quæ aquam sufficienter superet haberi non possit, aqua deponenda est in vas mundum, ita tamen ut parum illius aquæ cum particula in calice maneat, pro nova consecratione facienda: sic in Missali nostro statuitur.

7º Si materia apponenda, ratione defectus, haberi non posset, et id celebrans ante consecrationem adverteret, ulterius progredi non deberet; si post alterius speciei consecrationem, missa absolvenda foret, ita tamen ut verba et signa ad speciem deficientem pertinentia omitterentur. Si aliquandiu expectando haberi posset, expectandum esset, ne sacrificium maneret imperfectum.

De aliis defectibus materiæ, formæ et intentionis ministri sufficienter diximus in prima parte hujus Tractatus, agendo de pane, de vino, de aqua, etc.

Quoad alios defectus, præter multa quæ in decursu Tractatus jam præcavimus vel solvimus, videatur rubrica.

## ARTICULUS DECIMUS.

### DE HORA QUA CELEBRARE LICEAT.

1º *Missa ab aurora ad meridiem dici potest*, inquit rubrica, part. 1, tit. 15, n. 1. Non licet ergo, absque legitima causa, celebrare ante auroram, nec post meridiem.



Sed nomine auroræ non intelligendus est ortus solis, bene vero tempus illud quod medium est inter noctem et diem. Initium habet in mense junii, fere duabus horis cum quadrante ante ortum solis; mensibus februarii et septembris, hora cum dimidia; in mense martii, hora cum quadrante; in reliquis mensibus, hora cum tribus circiter quadrantibus. Ita Ligorio, l. 6, n. 341.

2º Communiter docent auctores, ut Card. de Lugo, Suarez, Bonacina, Tournely, Ligorio, etc. quod nulla sit culpa missam terminare in aurora et eam incipere parum ante meridiem, quia tempus auroræ et meridiei non mathematicè, sed moraliter intelligendum est. Imo Benedictus XIII declaravit, referente Bened. XIV, Inst. 12, n. 3 et 4, latitudinem tertiæ partis horæ, tum ante auroram, tum post meridiem, tolerari posse.

3º Graviter peccat, juxta Busembaum, qui sine justa causa citius mane, vel serius post prandium celebrat; Azor tertiam horæ partem, Layman dimidiam horam, Bonacina tres quadrantes, Sylvius horam requirit ut peccatum sit mortale.

4º Nullum autem est peccatum quando adest causa sufficienter excusans: ita omnes. Porro ut causæ sufficienter excusantes habentur, 1º funus principis vel alterius magnatis; 2º si sacerdos propter iter fuit impeditus, integra hora post meridiem missam inchoare potest, juxta Layman et alios; 3º necessitas habendi hostiam consecratam ad dandum viaticum moribundo, quo casu media nocte celebrare liceret, ut communiter docent auctores, teste Ligorio, l. 6, n. 343; 4º mos rationabilis jam existens, missam ante auroram dicendi, ut opifices et famuli summo mane eam audire possint; ita Ligorio et plures cum illo, qui nolunt tamen hanc rationem esse sufficientem ut missa post meridiem celebretur; 5º causa itineris est sufficiens missam una hora ante auroram vel post meridiem dicendi; ita Busembaum, Concina et communissime alii: unde infero, causam studii saltem perutilis, vel ordinem alicujus communitatis, pro tali anticipatione sufficienter excusare; 6º missa sollemnis

licite protrahitur ad horam et amplius post meridiem, ut multi dicunt, propter processionem, solemnitatem festi, concionem, etc. et post hanc missam solemnem permittitur missa privata in gratiarum actionem; 7° privilegia quibus nonnulli regulares potiuntur, missam celebrandi usque ad tertiam horam post meridiem; 8° dispensatio episcopi qui, ob causam rationabilem, permittere potest ut hora missæ anticipetur vel usque ad duas horas protrahatur. Sic multi apud Ligorio, n. 344. Eandem habent facultatem superiores religiosi respectu subditorum suorum.

## ARTICULUS UNDECIMUS.

### DE PRÆPARATIONE ET GRATIARUM ACTIONE CELEBRANTIS.

Ad præparationem sacerdotis celebraturi præcipue referuntur dispositiones tum animæ, tum corporis, de quibus in prima parte egimus : quæ enim præcipiuntur fidelibus ad sacram Eucharistiam digne suscipiendam, requiruntur *a fortiori* in sacerdotibus ut sanctissima mysteria convenienter pertractent.

Rubrica habet insuper ut « sacerdos celebraturus... » saltem matutino cum laudibus absoluto, orationi aliorum quantulum vacet, et orationes inferius positas pro temporis opportunitate dicat. » Unde 1° non necesse est primam ante missam dicere; 2° nec psalmos ac orationes in Missali pro præparatione ad missam positas recitare, cum rubrica his utatur verbis, *pro temporis opportunitate*. 3° Necesse est, e contra, ut matutinum et laudes præmittantur missæ, et quidem sub peccato, quia præceptiva est rubrica. Ita omnes moraliter, paucis scilicet exceptis.

Barbosa viginti numerat auctores qui dicunt hoc præceptum esse tantum sub veniali, et viginti qui contendunt esse sub mortali, inter quos S. Antoninus et S. Raymundus de Pegnafort, quorum sententiæ adhæret Gavantus; nituntur præcipue auctoritate Innoc. IV qui, Epist. 5, n. 11, apud Labbe, ait : « Sacerdotes missam

« celebrare priusquam officium matutinale compleverint » non præsumant ; » et S. Pii V , qui hunc inter graviores defectus collocavit , rub. de Defect. tit. 10, n. 1.

Attamen communior et probabilior sententia est peccatum non esse mortale , quia talis obligatio non exprimitur in rubrica , nec communiter recipitur sub gravi. Sic , inter multos , Bened. XIV , de Missæ sacrif. l. 3, cap. 13 ; Ligorio , l. 6, n. 347 , etc.

Hinc illi auctores concludunt quamlibet rationabilem causam ab omni peccato excusare , v. g. « Si dans eleemo- » synam postulet ut statim celebretur , si expectet popu- » lus aut aliqua persona gravis , si superior præcipiat , si » tempus celebrandi transeat , vel instet commoditas stu- » dii , itineris et similia. » Hæc sunt verba Ligorio , n. 348.

Quoad orationem cui aliquantulum vacandum est , omnes fatentur eam non esse de gravi præcepto , et tamen ab omni culpa non excusari qui sine præparatione saltem domi facta ad sacrificandum accedunt. Pii sacerdotes convenientem præparationem mentalem aut vocalem nunquam omittunt , nisi hora improvise capti fuerint et tempus ipsis deficiat : tunc , ne populus expectet , gementes et fervore animi supplentes , missam statim celebrant , curantes ne alia vice in tali angustia constituentur.

De gratiarum actione supra sufficienter diximus. Qui autem exercitio mentalis orationis immediate ante vel post missam vacant , aliam præparationem vel gratiarum actionem facere non tenentur , et talis est consuetudo piorum sacerdotum.

Canticum trium Puerorum , psalmus cXL et aliæ preces quæ in Missali indicantur ut post missam in gratiarum actionem dicendæ , videntur simpliciter præceptæ sicut orationes singulis paramentis respondentes : communis est usus tamen eas non habendi tanquam de præcepto , modo grates Deo debitæ aliter ipsi convenienter reddantur.

*Petitur* an celebrare missam cum notabili distractione voluntaria , sit peccatum mortale ? *Quidam negant* , etiamsi

distractio esset sub consecratione vel sumptione; quia, inquiunt, attentio interna non præcipitur sub gravi. *Alii vero affirmant* quoad ea quæ sunt in canone, et præsertim quoad consecrationem et communionem; quia voluntarie se distrahens in re tanti momenti, gravem irreverentiam Deo irrogat. Ita Concina, de sacrif. missæ, ad finem; Ligorio, l. 6, n. 410, dub. 5 et plures alii.

## ARTICULUS DUODECIMUS.

### DE INTERRUPTIONE MISSÆ.

1° Nunquam licet missam post consecrationem unius speciei directe abrumpere, etiam ad vitandam mortem, quia ipsius essentia est de jure divino: unde nec episcopus nec ipse papa ab illa integritate dispensare potest.

2° Eam vero abrumpere vel mutilare indirecte, seu præter voluntatem, aliquando licet: v. g. furente incendio, irruente hoste ad necandum, etc. posset sacerdos hostiam jam consecratam sumere, vel secum deferre, calice non consecrato, ea intentione ut sacrificium serius compleat si possit; si non possit, excusatur a peccato. *Est sententia communis.*

3° Missam per aliquod breve tempus interrompere licet, ob rationabilem causam: v. g. 1° ob concionem, post evangelium, vel ob processionem excipiendam; 2° in gratiam alicujus principis supervenientis, aut turbæ peregrinorum in die festo qui alias missam audire non possent: idem fieri posset in adventu episcopi, aut cardinalis, aut processionis populi: ita Ligorio et plures apud ipsum; 3° si gravis urgeret necessitas, vel propria, v. g. morbus; vel proximi, ut si moribundus, in propinquo positus, baptizandus aut absolvendus esset, et vestes sacras exuere opus non foret; secus, celeriter et tamen reverenter absolvenda esset missa, et statim properandum ad periclitantem. Vide Coll. Andeg. et Ligorio, l. 6, n. 354. Sacerdos ad sacrificium revertens, incipiet ubi desierat; si ante consecrationem interrupisset et mora



plus quam unius horæ fuisset, ab initio ordiri deberet; quia, post talem interruptionem, idem non censeretur sacrificium. Ita Ligorio et plures alii. Supponitur quod interruptio non provenerit ex concione vel ex aliqua cæremonia juncta cum ipsa missa, quia tunc unitas moralis servatur.

4° Si celebrans ante consecrationem deficiat, alius sacerdos missam continuare non debet, juxta communem sententiam; si post consecrationem, sive utriusque sive unius speciei, et ante sumptionem utriusque, alius sacerdos etiam non jejunos, et, defectu aliorum, excommunicatus, interdictus, irregularis supplere debet, si absque gravissimo incommodo possit et intra spatium unius horæ accersiri valeat. Post horam non supplendus est celebrans deficiens, quia idem non censeretur sacrificium; Ligorio, l. 6, n. 355.

5° Si excommunicatus denunciatus sacro assistere vellet et expelli non posset, aut si tempore sacrificii ecclesia pollueretur, ante canonem missa statim abrumpenda esset: incepto canone, proseguenda foret usque ad communionem inclusive, populo dimisso soloque ministro remanente cum presbytero, et, communionem facta, omnia asportanda essent in sacristiam vel in alium locum vicinum, ut ibi compleretur liturgia; *Conf. d'Angers, Censures.*



# TRACTATUS

## DE POENITENTIA.

---

Morbus universalis quo omnes humanæ mentes in prima origine inficiuntur, curatur quidem ope remedii Baptismatis, sed non ita radicitus ut quædam non adhuc inhæreant naturæ nostræ vitii reliquiæ ad malum impellentes. Certe, iis non obstantibus, immensum regenerationis beneficium perpetuo servare possemus; verum, prohi dolor! ubi sunt qui illud non lædant, qui vel semel in decursu vitæ non amittant? Si ergo Deus limites misericordiæ suæ imposuisset, et aliud nobis non suppeditasset medium e lapsu assurgendi et ad eum redeundi, quid nobis sperandum foret? Utquid cœlitus vocati, illuminati et gratiæ participes effecti fuissetus, cum nihilo minus, veste nuptiali denudati, in tenebris exterioribus æternaliter flere deberemus? At Deus, cujus bonitatis infinitus est thesaurus et misericordiæ non est numerus, nobis naufragantibus manum porrexit et secundam exhibuit tabulam, qua apprehensa et fortiter tenta, iterum salvaremur. Hæc est Pœnitentia.

Vox ista venit a *pœna* et *tenere*, quasi diceretur, *pœna teneri* aut *pœnam tenere*, quia, juxta vulgarem sensum huic voci annexum, peccator vere pœnitens, non solum de actu præterito resipiscit, sed illum odit, detestatur et pro illo expiando pœnam exsolvit. Eo sensu Christus ait, apud S. Lucam, x, 13 : *Si in Tyro et Sidone factæ fuissent virtutes quæ factæ sunt in vobis, olim in cilicio et cinere sedentes pœniterent.*

Multis testimoniis probat doctissimus P. Morinus, in magno opere de Administratione sacramenti Pœnitentiæ, l. 1, cap. 1 et 2, non solum apud Græcos, sed apud Syros et Chaldæos, imo apud Hebræos et Rabbinos, verbum

voci Latinorum *pœnitentiæ* correspondens, eodem sensu usurpari, nempe quo significetur mutatio consilii et simul odium vitæ antea actæ, et pœna ad eam expiandam exsoluta.

Male igitur Protestantes, necessitatem operum satisfactionis negantes, originem vocis *pœnitentiæ* a duobus verbis *ponere* et *tenere* deducunt, quasi sola displicentia peccati cum proposito non peccandi, ad justificationem sufficeret : frustra ad vocem græcam *μετανοιαν* recurrunt, dicentes illam, juxta etymon, mutationem tantum voluntatis exprimere ; nam in textu S. Lucæ citato, verbum quod interpres Latinus per vocem *pœniterent* vertit, est *μετενοησαν*, et similiter habetur in aliis locis apud Græcos.

Pœnitentia autem considerari potest ut virtus et ut sacramentum : ut virtus, definiri potest : *Intimus animi sensus, quo quis peccatum a se commissum, prout est offensa Dei, detestatur, cum firmo emendationis ac satisfactionis proposito.* De illius necessitate et qualitatibus dicemus ubi de contritione et satisfactione.

Ut sacramentum vero, recte definitur : *Sacramentum novæ Legis, quo peccata post Baptismum commissa, homini contrito, confesso et satisfactionem spondenti, per judicalem sacerdotis sententiam remittuntur.*

Varia in operibus SS. Patrum et auctorum asceticorum sortitur nomina : vocatur a Græcis *Εξομολογησις*, quo nomine non sola confessio, sed omnes actus pœnitentiæ laboriosæ intelliguntur. Appellatur a Latinis *manuum impositio*, quia olim publici pœnitentes per manuum impositionem reconciliabantur, et quia nunc confessarius absolutionem pronuntiando dextram versus pœnitentem tenet extensam. Dicitur adhuc, ab effectibus suis, *sacramentum reconciliationis, Baptismus laboriosus, secunda post naufragium tabula*, etc.

De Pœnitentia, prout est sacramentum, nobis tractandum est, et dicemus 1° de existentia hujus sacramenti ; 2° de illius materia ; 3° de contritione ; 4° de confessione ; 5° de satisfactione ; 6° de forma illius sacramenti, seu de absolutione ; 7° de ejus ministro ; 8° de ejus efficacia seu



effectibus : duo addemus capita , unum de purgatorio et alterum de indulgentiis.

---

## CAPUT PRIMUM.

### DE EXISTENTIA SACRAMENTI POENITENTIE.

A nemine Christiano inficiatur remissionem peccatorum post Baptismum commissorum in vera Ecclesia obtineri posse : at multi , variis in temporibus , circa modum remissionem istam obtinendi errarunt.

1° Montanistæ in secundo sæculo , qui inter peccata alia distinguebant remissibilia et alia irremissibilia , referente Tertulliano , Montanistarum erroribus addicto , lib. de Pudicitia , cap. 2. Remissibilia vocabant venialia , non quod mortalia non essent , sed quia aliis leviora , ab Ecclesia venia donari poterant ; irremissibilia vero ea dicebant , quæ , cum sint « graviora et exitiosa , veniam non » capiunt , ut homicidium , idololatria , fraus , negatio , blasphemia , utique et mœchia , et fornicatio , et si qua alia » violatio templi Dei : » sunt verba Tertulliani , ibid. cap. 12. Non ideo negabant pœnitentiam pro eis agendam , sed contendebant veniam a solo Deo exspectandam esse : igitur potestatem Ecclesiæ non tollebant , sed limitabant.

2° In tertio sæculo Novatus , presbyter Carthaginensis , a S. Cypriano graviter reprehensus , fugit Romam , ibique Novatiano primo antipapæ junctus , docuit cum illo fideles in persecutione lapsos nunquam ab Ecclesia reconciliandos esse : hinc orti sunt Novatiani quorum alii existentiam sacramenti Pœnitentiæ negare videbantur , et alii , sicut Montanistæ , inter peccata distinguebant remissibilia et irremissibilia . Sic se habet S. Pacianus , Epist. 3 ad Sympronianum , doctrinam primorum Novatianorum exhibens : « Quod post Baptismum pœnitere non liceat ;

» quod mortale peccatum Ecclesia donare non possit;  
 » imo quod ipsa pereat recipiendo peccatores. »

3° Massalienses in syriaco, græce *Euchitæ*, id est, orantes, in concilio Antiochensi anno 391 primum damnati, tantam vim tribuebant precibus, ut per eas solas peccata, sive ante, sive post Baptismum commissa, delerentur.

4° Lutherus in principio libri de Captivitate Babylo-nica, ait : « Neganda mihi sunt septem sacramenta, et  
 » tantum tria pro tempore ponenda, Baptismus, Pœni-  
 » tentia et Panis. » In fine autem ejusdem libri sic habet :  
 » Si rigide loqui velimus, tantum duo sunt in Ecclesia  
 » sacramenta, nempe Baptismus et Panis. Nam Pœniten-  
 » tiæ sacramentum quod his duobus accensui, signo sen-  
 » sibili et divinitus instituto caret; et aliud non esse dixi  
 » quam viam ac reditum ad baptismum. »

Attamen Lutherani sacramentum Pœnitentiæ in praxi retinuisse videntur : utuntur quippe parvo catechismo a Luthero composito, in quo reperiuntur verba quæ sic vertit illustris *Bossuet*, *Hist. des Variat.* l. 3 : « *Minister* :  
 » Ne croyez-vous pas que ma rémission est celle de Dieu?  
 » *Pœnitens* : Oui. *Minister* : Et moi, par l'ordre de notre  
 » Seigneur Jésus-Christ, je vous remets vos péchés, au  
 » nom du Père, et du Fils, et du Saint Esprit. »

Anglicani similem retinent formam absolvendi, traduntque confessionem non ut necessariam, sed ut convenientem et utilem.

5° Calvinus negat, lib. 4 Institutionis, cap. 19, § 17, Pœnitentiam esse sacramentum a Baptismo distinctum, contenditque solam Baptismi memoriam fide apprehensam, peccata post illius susceptionem admissa, eodem modo delere ac in ipsomet Baptismate delentur peccata ante illud patrata. Unde inferunt Calvinistæ nullas justificationi superesse pœnas pro peccato exsolvendis.

Si autem sacerdos verba absolutionis quandoque proferat, sententia illius peccata non remittit, sed nudum est ministerium declarantis peccata esse remissa : ita sentiunt Calvinistæ, Lutherani, Anglicani, etc.

Ad confutandos omnes prædictos errores, quatuor sta-

bilenda sunt, videlicet 1° Pœnitentiam verum esse novæ Legis sacramentum; 2° sacramentum istud vim habere omnia etiam graviora remittendi peccata; 3° a Baptismo esse distinctum, et 4° sententiam absolutionis esse actum judicalem peccata remittentem, non vero tantum declarantem ea esse remissa.

## PROPOSITIO PRIMA.

*Pœnitentia est verum novæ Legis sacramentum.*

*Prob.* Illa tenenda est propositio quæ est de fide, probatur Scriptura sacra, SS. Patribus et argumento præscriptionis: atqui, etc.

1° *Est de fide*, utpote definita in concilio Trident. sess. 14, can. 1, his verbis: « Si quis dixerit in catholica ecclesia Pœnitentiam non esse vere et proprie sacramentum, pro fidelibus, quoties post Baptismum in peccata labuntur, ipsi Deo reconciliandis, a Christo Domino nostro institutum: anathema sit. » Idem habetur in concil. Florent. Decreto ad Armenos: *Quartum sacramentum est Pœnitentia.* Ergo.

2° *Probatur ex Scrip. sacra.* Matth. xvi, 19, Christus dicit Petro: *Tibi dabo claves regni cœlorum. Et quodcumque ligaveris super terram, erit ligatum et in cœlis: et quodcumque solveris super terram, erit solutum et in cœlis.* Cap. xviii, 18, ait omnibus Apostolis: *Quæcumque alligaveritis super terram, erunt ligata et in cœlo: et quæcumque solveritis super terram, erunt soluta et in cœlo.* Apud Joan. xx, 22, sic, post resurrectionem, promissionem suam implens, loquitur: *Accipite Spiritum sanctum: quorum remiseritis peccata, remittuntur eis: et quorum retinueritis, retenta sunt.* Unde sic. Pœnitentia est sacramentum novæ Legis, modo in ea reperiantur signum sensibile, institutio Christi modo permanenti et promissio gratiæ: at, ex textibus citatis, tres illæ conditiones reperiuntur in Pœnitentia. 1° Signum sensibile; peccata siquidem sunt remittenda vel retinenda: causa igitur instruenda et sententia pro-

ferenda : porro hæc absque signo sensibili fieri non possunt. 2<sup>o</sup> Institutio Christi modo permanenti; ex evidentia enim contextus et confesso adversariorum constat præfata Christi verba, non solas Apostolorum personas respicere, sed ipsam Ecclesiæ constitutionem : agitur ergo de potestate in Ecclesia jugiter perseveratura. 3<sup>o</sup> Promissio gratiæ, cum peccata sine gratiæ effusione remitti nequeant. Ergo.

3<sup>o</sup> *Ex SS. Patribus.* Tertull. lib. de Pœnit. cap. 12 : « Igitur, cum scias adversus gehennam, post prima illa » intinctionis dominicæ munimenta, esse adhuc in exo- » mologesi secunda subsidia, cur salutem tuam deseris ? » cur cessas aggredi quod scias mederi tibi ? » S. Cypr. lib. de Lapsis : « Confiteantur singuli, quæso vos, fratres » dilectissimi, delictum suum, dum adhuc qui deliquit » in sæculo est, dum admitti confessio ejus potest, dum » satisfactio et remissio facta per sacerdotes apud Domi- » num grata est. » S. Amb. lib. 1 de Pœnit. c. 8 : « Cur » baptizatis, si per hominem peccata dimitti non licet ? » In Baptismo utique remissio omnium peccatorum est ; » neque interest utrum per Pœnitentiam, an per lava- » crum hoc jus sibi datum vindicent (sacerdotes) : idem » in utroque mysterio est. »

S. Aug. l. 2 de Conjugiis adult. c. 28, ubi docet Baptismum conferendum esse catechumenis in adulterio viventibus, *si desperati jacuerint*, id est, si morti sint proximi, addit : « Quæ autem Baptismatis, eadem recon- » ciliationis est causa, si forte pœnitentem finiendæ vitæ » periculum præoccupaverit. Nec ipsos enim ex hac vita » sine arrha suæ pacis exire velle debet mater Ecclesia. »

4<sup>o</sup> *Argumento præscriptionis.* 1<sup>o</sup> Certum est non solum Græcos schismaticos, sed et alias ecclesias Orientales ecclesiæ Romanæ infensissimas, septem habere sacramenta, inter quæ numeratur Pœnitentia : atqui hanc doctrinam ab ecclesia Romana non hauserunt ex quo ab illa separatæ sunt : quædam tamen ex illis separatæ sunt a sexto sæculo : ergo tunc dogma sacramenti Pœnitentiæ in universa ecclesia admittebatur. 2<sup>o</sup> Ubi Novatianorum



et Montanistarum errores prodierunt, undique adversus illos conclamatum est, ex eo quod Ecclesiæ potestatem limitarent: ergo tunc firmiter credebatur inesse Ecclesiæ potestatem remittendi peccata post Baptismum commissa, proindeque Pœnitentiam esse sacramentum novæ Legis: ergo fides sacramenti Pœnitentiæ ad ipsos Apostolos ascendit, juxta axioma: *Quod universa tenet Ecclesia, nec conciliis fuit institutum, sed semper retentum est, nonnisi ab Apostolis traditum rectissime creditur.* Ergo.

*Solvuntur objectiones.*

*Obj. 1º. B. Paulus, Hebr. vi, 4, ait: Impossibile est enim eos qui semel sunt illuminati, gustaverunt etiam donum cæleste... et prolapsi sunt, rursus renovari ad pœnitentiam.* Ergo.

*R. 1º. Si hæc verba ad rigorem sumerentur, probarent nulla peccata mortalia post Baptismum commissa remitti posse: hoc autem Protestantes cæterique hæretici nobiscum negant.* Ergo.

*R. 2º. Nego conseq. In verbis enim Apostoli nobis objectis de pœnitentia sacramentali non agitur, sed de ea quæ ad regenerationem per Baptismum ab adultis exigebatur: id patet ex contextu: Apostolus namque, in fine capitis præcedentis, exprobrat Hebræis quod sint adhuc imbecilles ad audiendum, cum magistri esse deberent propter tempus, et indigeant exordio ut doceantur quæ sint elementa sermonum Dei: affirmat tamen se ea prætermisurum et ad perfectiora transiturum, quia impossibile est eos qui post Baptismum semel prolapsi sunt, rursus renovari ad pœnitentiam, id est, ad pœnitentiam baptismalem, seu de novo per Baptismum renovari. Cum Baptismus novas creaturas nos efficiat per applicationem mortis Christi, dicitur sacramentum regenerationis et renovationis; voces *rursus renovari*, aperte indicant Apostolum de iteratione ejusdem sacramenti, seu ejusdem renovatione agere, quod per hæc altera verba, *rursum crucifigentes sibimetipsis Filium Dei*, confirmat, quasi diceret: Hæc renovatio fieri non potest nisi per mortem*

Christi; Christus autem rursum crucifigi non potest: ergo impossibile est, etc. Ita fere omnes interpretes: Vide Estium in hunc locum.

Quidam tamen concedentes præfata verba de renovatione per sacramentum Pœnitentiæ intelligi posse, contendunt ea veram non exprimere impossibilitatem, sed ad summum magnam difficultatem, quod Protestantes non negant.

*Obj. 2°. Idem Apost. ibid. x, 26, ait: Voluntarie enim peccantibus nobis, post acceptam notitiam veritatis, jam non relinquitur pro peccatis hostia: terribilis autem quædam exspectatio judicii. Ergo.*

*R. 1°. Nota iterum hæc verba stricte sumpta probare nulla peccata post Baptismum remitti posse, quod prorsus negant omnes adversarii. Ergo.*

*R. 2°. Distinguo textum. Voluntarie peccantibus per apostasiam, Christum deserendo, non relinquitur hostia, concedo; secus, nego. Etenim Apostolus hortatur Hebræos ad tenendam spei nostræ confessionem indeclinabilem, non deserentes collectionem nostram, sicut consuetudinis est quibusdam. Quidam igitur fidem Christianam abnegantes et cœtus Christianorum deserentes, ad Judaismum redibant: ut alios a tali apostasia removeat, declarat Apostolus sic peccantibus et in eo statu perseverantibus nullam jam relinquere pro peccatis hostiam: hoc quidem manifestum est: porro nihil inde contra thesim nostram erui potest: ergo.*

Præcipua Protestantium argumenta solvemus, ubi de necessitate confessionis tractabimus.

#### PROPOSITIO SECUNDA.

*Sacramentum Pœnitentiæ habet vim remittendi omnia peccata post Baptismum commissa.*

Propositio est de fide, utpote definita in concilio Tridentino, sess. 14, can. 1.

*Prob. 1° Script. sacra. In textibus Evangelii supra ci-*

tatis, Christus inter peccata non distinguit, sed verbis generalioribus utens, dicit: *Quæcumque alligaveritis, quæcumque solveritis*: ergo nec nos distinguere debemus. Aliunde nullum citatur principium quo talis distinctio nitatur, nec ulla datur regula ad separationem tuto faciendam inter peccata remittenda et peccata non remittenda. Ergo.

2º *Ex SS. Patribus.* S. Ambr. l. 1 de Pœnit. c. 3, n. 10, loquens Novatianis, ait: « Distinctionem peccatorum » facitis, quæ solvenda a vobis putetis, et quæ sine remedio arbitremini; sed Deus distinctionem non facit, » qui... relaxandi licentiam sacerdotibus suis, sine ulla » exceptione, concessit. »

S. Pacianus, Epist. 3 ad Sympronianum: « Dominus » dicendo, *quæcumque solveritis*, omnino nihil excipit; » *quæcumque*, inquit, vel magna, vel modica; » Bibliotheca Patrum.

S. Aug. lib. de Agone Christiano, cap. 31, de Novatianis ait: « Nec eos audiamus qui negant Ecclesiam Dei » omnia peccata posse dimittere. »

Hæc testimonia aliaque non pauca quæ citari possent, simul ostendunt Pœnitentiam esse sacramentum, et vim habere omnia remittendi peccata. Ergo.

3º *Traditione.* Statim atque prodire Montanistæ, undique catholici adversus illos clamaverunt; episcopi eos velut hæreticos damnaverunt. Novatiani eis succedentes, similiter proscripti sunt pluribus in conciliis, et præsertim in concilio Romano, anno 255, in quo sexaginta aderant episcopi sub præsentia summi pontificis Cornelii, qui doctrinam Novati declaravit *inhumanissimam et a fraterna charitate alienam*. Ergo tunc omnes persuasum habebant nulla esse peccata irremissibilia; idem semper creditum fuit. Ergo.

#### *Solvuntur objectiones.*

Cum nulli erroribus Montanistarum et Novatianorum nunc adhærent, non est causa cur in solvendis eorum

argumentis diu immoremur : ea tantum percurreremus, principia solutionis breviter indicantes.

*Obj. 1º.* In I Reg. II, 25, legitur : *Si peccaverit vir in virum, placari ei potest Deus : si autem in Dominum peccaverit vir, quis orabit pro eo?* Ergo peccatum in Dominum remitti non potest, cum non sit orandum pro eo.

*R. 1º.* Verba hic nobis objecta aliaque ex Veteri Testamento desumpta, nihil adversum nos probare possunt; nam propositio nostra libera Christi concessione in Novo Testamento expresse nititur : ergo hujusmodi argumenta proprio pondere ruunt.

*R. 2º. Nego conseq.* Non enim prohibetur oratio pro hujusmodi peccato, ut recte notat S. Ambr. lib. 1 de Pœnit. cap. 9, n. 40; sed asseritur *singularis vitæ* esse debere aliquem ut orare præsumat pro eo qui peccavit directe in Dominum : « Quo enim major est culpa, eo » majora quærenda sunt suffragia, » inquit S. Doctor. Aliunde Novatiani et Montanistæ non tenebant dari peccata apud Deum irremissibilia, pro quibus frustra oraretur : ergo hæc difficultas adversariis solvenda est.

*Obj. 2º.* Christus dicit apud Matth. XII, 31 : *Omne peccatum et blasphemia remittetur hominibus : Spiritus autem blasphemia non remittetur. Et quicumque dixerit verbum contra Filium hominis, remittetur ei : qui autem dixerit contra Spiritum sanctum, non remittetur ei, neque in hoc sæculo, neque in futuro.* Idem habetur apud Marc. III, 28, et Luc. XII, 10 : ergo datur peccatum irremissibile.

*R. 1º.* Hæc verba adhuc probarent dari peccata apud Deum irremissibilia, non vero tantum ex parte Ecclesiæ : ergo in causam adversariorum male allegantur.

*R. 2º.* Si omne peccatum et blasphemia remittatur hominibus, præter blasphemiam in Spiritum sanctum, ut fert textus citatus, eo ipso refelluntur adversarii qui homicidium, idololatriam, fraudem, negationem, blasphemiam in genere, mœchiam, fornicationem, aliaque gravissima peccata excipiunt.

*R. 3º.* Christus non dicit blasphemiam in Spiritum sanctum remitti non posse, sed non remittendam esse :



porro non repugnat Christum annuntiare animo prophético quoddam genus peccati non remittendum esse, quamvis Ecclesia habeat potestatem omnia relaxandi peccata; quia fieri potest ut peccator excæcatus et obduratus, de peccato sufficienter non doleat, ad Ecclesiam non recurrat, vel, Deo summe justò id ex terribili judicio permitte, tempus pœnitentiam agendi non habeat.

*R. 4º. Distinguo consequens.* Datur peccatum irremissibile, id est, quod difficile remittetur, *conc.* quod Ecclesia pœnitenti remittere non potest, *nego consequ.* Etenim blasphemia in Spiritum sanctum, juxta communem Patrum et Scripturæ sacræ interpretum sententiam, ea est animi perversitas quæ contra veritatem evidenter cognitam obduratur, et ipsa Dei opera, v. g. miracula quæ Spiritui sancto appropriantur, tribuit diabolo, sicut faciebant Judæi, dicentes de Christo: *Hic non ejicit dæmones, nisi in Beelzebub principe dæmoniorum.* Porro certum est tale peccatum difficile remitti posse; nam difficile est hominem cum tanta malitia peccantem, sicque obduratum, sincere ad Deum reverti: conversio quippe ad Deum fit per humile obsequium veritati cognitæ: porro qui contra veritatem cognitam sic obdurescit, viam ad Deum redeundi voluntarie sibi præcludit: ergo, etc. Ita S. Chrysost. et plerique recentiores.

Cæterum præfatus Evangelii textus adeo difficilis est, ut S. Augustinus dicere non dubitaverit, Serm. 71 de verbis Evangelii, nullum alium in omnibus Scripturis sacris reperiri difficiliorem: sed ipse sanctus Doctor dixit, *ibid.* se nescire unde hoc procedat, *cum pœnitentiæ quorundam criminum locus in Ecclesia non negetur.* Ergo.

*Obj. 3º.* I Joan. v, 16: *Qui scit fratrem suum peccare peccatum non ad mortem, petat, et dabitur ei vita peccanti non ad mortem. Est peccatum ad mortem: non pro illo dico ut roget quis.* Ergo est peccatum ad mortem seu irremissibile.

*R. 1º.* Multi per illud peccatum ad mortem intelligunt impœnitentiam finalem, quæ quidem est irremissibilis, et vana est oratio pro illa: at nihil inde contra propositionem nostram sequitur, *ut patet.*

R. 2º. *Nego conseq.* Quanquam enim hæc B. Apostoli verba, *est peccatum ad mortem*, sint intellectu difficillima, ut omnes fatentur, non probant dari peccatum irremissibile ad sensum Novatianorum : nulla quippe fit mentio de potestate Ecclesiæ. Nec S. Joannes dicit pro tali peccato non esse orandum : « Non scriptum est, nullus orabit pro eo, sed quis orabit pro eo, hoc est, quis ille sit » qui in tali causa orare possit quæritur, non excluditur, » inquit S. Ambros. l. 1 de Pœnit. cap. 9, n. 40. Unde probabilius est Apostolum hic intelligere per peccatum ad mortem, peccatum mortale cui peccator adhæreret; non prohibet ne fideles pro tali peccato orent, sed non audet illos hortari ad orandum cum ea fiducia de qua locutus est in versibus 4 et 5 ejusdem capituli, dicendo : *Hæc est fiducia quam habemus ad Deum : quodcumque petierimus secundum voluntatem ejus, audit nos.* Et sane cum eadem fiducia orare non possemus pro homine obdurato ac pro eo qui de peccato jam dolet. Ergo.

Plures alii objici solent textus, ut II Machab. ix, 13, ubi de Antiocho legitur : *Orabat Dominum a quo non esset misericordiam consecuturus.* Epist. ad Hebr. xii, 17, ubi dicitur de Esaü : *Non enim invenit pœnitentiæ locum, quanquam cum lacrymis inquisisset eam.* Verum Antiochus Deum ex corde contrito et vere converso non quærebat, ideo misericordiam non consecutus est; Esaü veniam non petebat a Deo, sed precibus et lacrymis frustra quæsivit a patre ut, de benedictione data pœnitens, eam revocaret.

Dicit Deus in Proverb. i, 28 : *Tunc invocabunt me, et non exaudiam eos;* et Christus apud Joan. viii, 21 : *Quæretis me, et in peccato vestro moriemini.* Sed in his locis agitur de peccatoribus qui viventes Deum contempserunt, et morientes illum ex metu quodam modo invocant, et non exaudiuntur, quia sincere et efficaciter non sunt pœnitentes : manifestum est autem unicuique attendenti hos textus aliosque similes a Novatianis inaniter allegari.

*Objicitur adhuc*, sanctos Patres pluries affirmare pœnitentiam semel tantum imponendam esse : verum tunc

de pœnitentia publica et solenni, de qua aliquid infra dicemus, loquuntur, non vero de absolutione sacramentali quæ semper iterari potest.

## PROPOSITIO TERTIA.

*Pœnitentia est sacramentum a Baptismate prorsus distinctum.*

*Prob.* Illa propositio tenenda est quæ est de fide, probatur Scriptura sacra, traditione et rationibus theologicis : atqui nostra propositio est de fide, probatur, etc.

1° *Est de fide.* Definitur enim in concilio Trid. sess. 14, can. 2, his verbis : « Si quis sacramenta confundens, ipsum » baptismum pœnitentiæ sacramentum esse dixerit, quasi » hæc duo sacramenta distincta non sint, atque ideo Pœ- » nitentiam non recte secundam post naufragium tabu- » lam appellari : anathema sit. »

2° *Prob. Scriptura sacra.* Textus enim supra citati, *quæcumque alligaveritis, etc. quorum remiseritis, etc.* significant peccata remittenda aut retinenda esse per modum judicii : atqui peccata non remittuntur in Baptismate per modum judicii, sed per modum regenerationis : ergo prædicta verba designant sacramentum a Baptismate distinctum.

3° *Traditione.* Ubique enim in Ecclesia, tum Occidentali, tum Orientali, et in variis sectis hæreticis et schismaticis in Oriente adhuc existentibus, septem habentur sacramenta, et numeratur Pœnitentia tanquam sacramentum a Baptismate distinctum.

4° *Rationibus theologicis.* 1° Protestantes, quos hic impugnamus, nihil admittere volunt nisi quod in Scriptura continetur : porro Scriptura non docet Pœnitentiam a Baptismate non differre, imo contrarium evidenter supponit ; non enim ad Baptismum aut ad recordationem ejus B. Paulus remittit incestuosum Corinthium, et B. Petrus Simonem Magum, sed ad Pœnitentiæ lamenta. 2° Apostoli eorumque successores acceperunt his verbis,

*quorum retinueritis*, etc. potestatem retinendi peccata : atqui frustra retinerentur peccata, si sola Baptismi recordatio ea delere posset. 3° Vel Baptismus remitteret peccata post ipsum commissa, ex opere operato, vel ex opere operantis : atqui neutrum dici potest. Non prius, cum illud sacramentum iterum non conferatur. Non posterius; nam tunc eo sensu peccata remittere censeretur, quod recordatio ejus per fidem operans, actus pœnitentis excitaret, ut ait Calvinus, *Inst. cap. 17, n. 4* : atqui recordatio Baptismi non aptior est ad hujusmodi actus excitandos quam memoria aliorum sacramentorum, et præsertim passionis ac mortis Christi. 4° Ea sacramenta sunt distincta quorum subditi, ministri, institutio, materia, forma et effectus discrepant : atqui sic respective se habent Baptismus et Pœnitentia : ergo.

*Dices 1°. Christus ait apud S. Marc. xvi, 19 : Qui crediderit, et baptizatus fuerit, salvus erit; et B. Paulus Eph. v, 26, dicit Christum mundare Ecclesiam lavacro aquæ, in verbo vitæ. Ergo sola fides cum Baptismo sufficit ad salutem.*

*R. Nego consequ.* Illi enim textus probant quidem necessitatem fidei et Baptismi ad primam regenerationem, proindeque ad salutem ; non vero probant peccata postea commissa sola Baptismi recordatione delenda esse. Ergo.

*Dices 2°. S. Aug. lib. 1 de Nuptiis et Concup. cap. 33, citans verba B. Pauli ad Eph. dicit : « Non ut Baptisma » quoties peccatur, toties repetatur; sed quia eo ipso » quod semel datur, fit ut non solum antea, verum etiam » postea quorumlibet peccatorum venia fidelibus impetretur. » Unde sic. S. Aug. tribuit Baptismo remissionem peccatorum post illum commissorum : ergo aestimavit Pœnitentiam a Baptismo non differre.*

*R. Dist. ant.* Tribuit Baptismo, etc. tanquam causæ remotæ, *conc.* tanquam causæ proximæ, *nego ant.* Mens sancti Doctoris est ostendere Baptismum adeo necessarium esse, ut sine ipso nulla peccata remitti possint; nam cum illud sacramentum sit janua aliorum sacramentorum ipsa Pœnitentia nullam haberet efficaciam, nisi vel



sequeretur Baptismus, vel præcessisset, quod quidem apud omnes certum est. Ergo.

## PROPOSITIO QUINTA.

*Sententia absolutionis non tantum declarat peccata esse remissa, sed ea vere remittit.*

Nostra propositio est de fide. Fuit enim definita in concil. Trid. sess. 14, can. 9 : « Si quis dixerit absolutionem sacramentalem sacerdotis non esse actum iudicialem, sed nudum ministerium pronuntiandi et declarandi remissa esse peccata confitenti, modo tantum credat se esse absolutum... anathema sit. »

*Prob. 1º Script. sacra.* Joan. xx, 23 : *Quorum remisistis peccata, etc.* Hæc verba accipi debent sensu obvio et naturali : porro sensu obvio et naturali accepta, non significant potestatem declarandi peccata esse remissa, *ut patet.* Insuper, eodem modo, ex textu, peccata remittuntur in cælo quo remittuntur per absolutionem : atqui vere remittuntur in cælo, non vero declarantur remissa. Ergo.

*Prob. 2º ex SS. Patribus.* S. Cyprianus supra citatus : « Confiteantur singuli... dum remissio facta per sacerdotes apud Dominum grata est. » S. Chrysost. de Sacerdotio, l. 3 : « Corporis lepram purgare, imo potius nullatenus purgare, sed purgatam probare tantum Judæorum sacerdotibus licebat ; et tamen nosti quanta tunc esset, pro sacerdotali dignitate, concertatio ! Hi vero non lepram corporis, sed immunditiam animæ, non purgatam probandi, sed prorsus purgandi potestatem acceperunt. » *Neque dici potest, S. Doctorem hæc verba ad remissionem peccatorum per Baptismum referre, cum tunc peccata non secernantur a peccatis, sicut lepra a lepra.* Ergo.

*Prob. 3º ratione.* 1º Sacramenta novæ Legis gratiam sacramentalem producunt ex opere operato ; verum, in hypothesi adversariorum, pœnitentia non produceret gratiam sacramentalem ex opere operato, bene vero ex

opere operantis, siquidem peccata vi dispositionum pœnitentis remitterentur. 2º Si finis absolutionis sit tantum dispositiones pœnitentis excitare, et notum ei facere peccata ejus per fidem esse remissa, inde sequeretur sententiam alta voce et lingua vulgari proferendam esse sub pœna nullitatis; in multitudinem fidelium prolata, v. g. in concione publica, validam, imo sæpe meliorem esse : atqui hæc consecraria admitti nequeunt. Ergo.

Verus igitur sensus absolutionis est : *Ego, nomine Dei, tanquam ipsius minister, et ex potestate ab ipso mihi concessa, remitto peccata tua, seu tibi confero gratiam peccatorum tuorum remissivam.*

*Solvuntur objectiones.*

*Obj. 1º. Luc. v, 21 : Quis potest dimittere peccata nisi solus Deus ?* Ergo ministri sacramenti Pœnitentiæ declarant tantum peccata esse remissa.

*R. Nego conseq.* Etenim solus Deus potest, tanquam causa primaria, peccata dimittere ; at procul dubio ministerio hominis uti potest ad ea dimittenda : porro in sacramento Pœnitentiæ sacerdos dimittit peccata; non ut causa primaria, sed ut minister Dei. Ergo nihilominus solus Deus dimittit peccata. Unde S. Pacianus, Epist. 1 ad Sympronianum, Donatistam : « Solus hoc Deus poterit, verum est ; sed et quod per suos sacerdotes facit, » ipsius potestas est. » Ergo.

*Obj. 2º. SS. Patres pluribus in locis comparant sacerdotem pœnitentes absolventem, sacerdotibus Judaicis quibus leprosi a Christo sanati jussi sunt se ostendere, et Apostolis qui Lazarum e monumento jam egressum a vinculis solverunt : vide S. Hieron. in caput xvi Matth. S. Aug. Serm. 67, de verbis Evang. S. Greg. Mag. Homil. 26 in Matth. At in his casibus nec sacerdotes sanant lepram, nec Apostoli resuscitant Lazarum : ergo similiter, etc.*

*R. Dist. maj. SS. Patres comparant, etc. quoad aliqua, conc. quoad omnia, nego maj.* Etenim 1º S. Hieron. hoc

solum probare sibi proponit, nempe omnes peccatores non indiscriminatim reconciliandos esse, sed probandos, ut discernantur, quod exemplo sacerdotum Judaicorum confirmat, his verbis : « Legimus in Levitico de leprosis, » ubi jubentur ut ostendant se sacerdotibus.... non quo » sacerdotes leprosos faciant et immundos, sed quo ha- » beant notitiam leprosi et non leprosi, et possint discer- » nere qui mundus, quive immundus sit.... sic et hic » alligat vel solvit episcopus et presbyter, non eos qui » insontes sunt vel noxii, sed pro officio suo, cum pecca- » torum audierit varietates, scit qui ligandus sit, quive » solvendus, » id est, qui absolutione dignus, quive indignus. Talis est sensus S. Hieronymi toti traditioni congruens : porro in ea doctrina nihil est quod systemati adversariorum faveat.

2° S. Aug. et S. Greg. exemplum Lazari afferunt, ut ostendant peccatores a sacerdotibus, solvi non posse, nisi prius gratia divina excitati vivere incipiant, videlicet, per displicentiam peccati, propositum non peccandi et sincerum veræ conversionis desiderium : non vero docuerunt eos non esse absolvendos, nisi plene per gratiam sanctificantem viverent; imo contrarium expresse dixerunt. Sic S. Aug. Serm. 2 in Psal. ci : « Remissio peccatorum » solutio est; quid enim prodesset Lazaro, quia processit » de monumento, nisi diceretur, Solvite eum et sinite » abire?.... Fit hoc in corde pœnitentis : cum audis » hominem pœnitere peccatorum suorum, jam revixit; » cum audis hominem confitendo proferre conscientiam, » jam de sepulcro eductus est, sed nondum solutus est. » Quando solvitur? A quibus solvitur? Quæ solveritis, » inquit, in terra, et in cœlo erunt soluta. »

Duplex igitur distinguenda est vita peccatoris : una inchoata per gratiam excitantem, et altera perfecta per gratiam sanctificantem : peccator frustra absolveretur, nisi priori modo jam viveret, et sic dispositus, vitam perfectam per absolutionem obtinet.

Hanc doctrinam duplicis vitæ peccatoris confirmarunt summi pontifices Pius V et Gregorius XIII, damnando

sequentem propositionem Baii, quæ est numero 64 :  
 « Illa distinctio duplicis vivificationis, alterius qua vivi-  
 » ficatur peccator, dum ei pœnitentiæ et vitæ novæ pro-  
 » positum et inchoatio per Dei gratiam inspiratur, alte-  
 » rius qua vivificatur qui vere justificatur et palmes  
 » vivus in vite Christi efficitur, pariter commentita est  
 » et Scripturis minime congruens. »

*Quæritur* 1° an sententia veterum theologorum qui docebant absolutionem sacerdotis esse tantum declaratoriam, sit hæretica ?

*R.* Est temeraria, erronea, principiis concilii Tridentini minime congruens, non tamen formaliter hæretica. Nam 1° multum differt ab errore pseudoreformatorum qui negant Pœnitentiam esse sacramentum et ullam producere gratiam. 2° Directe non fuit damnata; concilium enim Tridentinum anathemate percussit eos qui dicerent, sicut hæretici, absolutionem non esse actum judiciale, sed nudum ministerium : at rigorose dici posset absolutionem esse actum judiciale, licet duntaxat declararet peccata esse remissa; quia, videlicet, sacerdos tanquam minister Christi, prius audita confessione, juridice pronuntiaret peccata esse remissa, sicque ritum sacramentalem, vi cujus peccata a Deo remitterentur, applicaret. Certe hæc explicatio est subtilis et menti concilii Tridentini parum conformis; igitur ab omnibus catholicis nunc rejicitur : attamen sufficit ut sententia theologorum ei adhærentium non sit hæretica. Unde Soto et Salmeron, qui concilio Tridentino adfuerant, hanc sententiam refellentes, non dicunt illam a concilio fuisse damnatam.

*Quæritur* 2° quandonam institutum fuerit Pœnitentiæ sacramentum ?

*R.* Christus illud promiserat dicendo Petro : *Dabo tibi claves*, etc. et omnibus Apostolis : *Quæcumque alligaveritis*, etc. Illud vero instituit post resurrectionem suam, quando insufflans super Apostolos, dixit eis : *Accipite Spiritum sanctum : quorum remiseritis*, etc. Ita propriis verbis docet concil. Trid. sess. 14, cap. 1 : « Dominus



» autem sacramentum Pœnitentiæ tunc præcipue instituit, cum a mortuis excitatus, insufflavìt in discipulos suos, dicens : *Accipite*, » etc.

---

## CAPUT SECUNDUM.

### DE MATERIA SACRAMENTI POENITENTIÆ.

Duplex distinguitur materia sacramenti Pœnitentiæ : una remota circa quam versatur, et altera proxima ex qua componitur sacramentum.

### ARTICULUS PRIMUS.

#### DE MATERIA REMOTA SACRAMENTI POENITENTIÆ.

Nulla in eo puncto est controversia inter theologos, qui omnes fatentur materiam remotam, seu potius removendam, sacramenti Pœnitentiæ, esse peccata post Baptismum commissa. Sunt enim objectum circa quod delendum versatur sacramentum.

Hæc materia potest esse necessaria, vel tantum sufficiens et non necessaria.

#### PROPOSITIO PRIMA.

*Omnia peccata mortalia post Baptismum commissa et nondum directe remissa, sunt materia necessaria sacramenti Pœnitentiæ.*

*Prob.* Omnia peccata mortalia sunt materia sacramenti Pœnitentiæ necessaria, si omnes homines peccati mortalis rei ad illud sacramentum recurrere teneantur : atqui probabimus infra, demonstrando necessitatem confessionis, omnes reos peccati mortalis ad sacramentum Pœnitentiæ recurrere teneri : ergo.

Dixi 1<sup>o</sup> *post Baptismum commissæ*; quia peccatum originale et etiam peccata actualia, ante Baptismum commissæ, clavibus Ecclesiæ subjici non possunt; Ecclesia enim de iis qui foris sunt non judicat, et tamen sacramentum Pœnitentiæ per modum judicii administratur: ergo.

Dixi 2<sup>o</sup> *nondum directe remissa*; probabimus enim infra strictam dari obligationem confitendi peccata remissa, sed indirecte, v. g. vi contritionis perfectæ, ante sacramentum, aut vi absolutionis in ipso sacramento, si bona fide oblivioni data fuissent.

#### PROPOSITIO SECUNDA.

*Peccata venialia sunt materia sacramenti Pœnitentiæ sufficiens, sed non necessaria.*

*Prob. prima pars*, videlicet ea esse materiam sufficientem. Etenim verba Christi, *Quæcumque solveritis*, etc. *quorum remiseritis*, etc. sunt generalia et ad omnia vincula spiritualia extendenda sunt: porro peccatum veniale etiam minimum aliquod est vinculum spirituale: ergo.

*Prob. secunda pars* ex concilio Trid. sess. 14, c. 5: « Venialia quibus a gratia Dei non excludimur, et in » quæ frequentius labimur, quanquam recte et utiliter, » citraque omnem præsumptionem, in confessione di- » cantur, quod piorum hominum usus demonstrat, ta- » ceri tamen citra culpam, multisque alijs remediis ex- » piari possunt. » Ergo.

#### PROPOSITIO TERTIA.

*Peccata jam remissa sunt materia sufficiens sacramenti Pœnitentiæ.*

*Prob. 1<sup>o</sup>* verbis Christi, *Quorum remiseritis*, etc. Christus enim non dicit, *Quorum semel remiseritis*: non vetat igitur condonationem iterare. 2<sup>o</sup> Peccata post Baptismum commissæ sunt materia sacramenti Pœnitentiæ: verum

peccata jam remissa, nihilominus sunt peccata post Baptismum commissa. 3<sup>o</sup> Qui alterum offendit, potest iterum atque iterum culpam confiteri, veniam petendo, et offensus recte dicit iterum, *Veniam concedo, tibi parco* : ergo *a pari*, etc. 4<sup>o</sup> Denique id constat ex praxi Ecclesiæ et usu piorum hominum, quæ ratio sola est validissima et sufficit. Ergo.

*Dices* 1<sup>o</sup> Peccata remissa jam non sunt peccata : ergo non possunt esse, etc.

*R. Dist. ant.* Non sunt peccata actu, *conc.* non possunt revocari in mentem ut peccata præterita, *nego ant.* Quoties autem sic rememorantur, peccator de illis dolere debet, ea confiteri et pro illis de novo satisfacere potest : cur ergo repugnaret absolutionem super iisdem iterari?

*Inst.* 1<sup>o</sup>. Verba absolutionis vera esse debent : atqui non essent vera, siquidem peccata reipsa non remitterentur : ergo.

*R. Nego min.* Sensus enim verborum absolutionis est, *Confero tibi gratiam sanctificantem, peccatorum remissivam* : porro ille sensus verus est, licet peccata jam fuerint dimissa.

*Inst.* 2<sup>o</sup>. Qui super vinctum a corporalibus vinculis jam solutum diceret, *Solvo te*, falsum pronuntiaret : ergo *a pari*, etc.

*R. Nego conseq. et paritatem.* Ratio disparitatis est, quod solutio a vinculis corporalibus effectum positivum sibi annexum non habeat ; e contra Pœnitentiæ sacramentum gratiam sanctificantem secum portat eamque pœnitenti recte disposito confert. Ergo.

*Inst.* 3<sup>o</sup>. Qui verba consecrationis super hostiam jam consecratam pronuntiaret, sacramentum non conficeret : ergo similiter et qui verba absolutionis, etc.

*R. Nego iterum conseq. et paritatem.* Ratio disparitatis est, quod in hostia consecrata non existat panis, materia essentialis Eucharistiæ ; contra vero peccata remissa possunt esse objectum doloris, confessionis et satisfactionis : hi autem actus pœnitentis sunt materia sacramenti Pœnitentiæ : ergo.

## ARTICULUS SECUNDUS.

## DE MATERIA PROXIMA SACRAMENTI POENITENTIÆ.

Lutherani qui hoc sacramentum retinent, assignant pro ejus materia terrores conscientię ex agnito peccato incussos, et fidem ex Evangelio vel absolutione conceptam, *qua credit quis sibi per Christum esse remissa peccata*; Palav. Hist. concil. Trid. l. 12, cap. 10, art. 2.

Error iste damnatus est in eo concil. sess. 14, cap. 3, his verbis : « Sancta synodus eorum sententias damnat » qui pœnitentię partes incussos conscientię terrores et » fidem esse contendunt. » Idem habetur can. 4 ejusdem sess.

Calvinus vero, pœnitentiam habens tantum ut virtutem, duas ipsi partes essentielles assignat, nempe mortificationem et vivificationem, id est, abnegationem sui et interiorem animi renovationem; Institut. de Pœnitent. n. 2.

Inter catholicos varię sunt opiniones quę ab Ecclesia non fuerunt damnatę. 1° Scotus totam sacramenti Pœnitentię essentiam in sola absolutione reponit, contritionem vero, confessionem et satisfactionem tradit ut dispositiones necessarias, et non ut partes sacramenti : plures recentiores huic opinioni subscripserunt, inter quos *Maldonat*. 2° Durandus volebat totam sacramenti Pœnitentię materiam in sola confessione pœnitentis consistere, contritionem vero esse dispositionem, et satisfactionem fructum pœnitentię. 3° Paludanus tres actus pœnitentis, contritionem, confessionem et satisfactionem pariter necessarios esse contendit, cui consentire videtur Petrus Osmensis, dicens absolutionem datam ante satisfaciōnem, esse nullam. 4° Melchior Canus docet contritionem non esse partem essentialem sacramenti, sed integralem duntaxat. 5° Eruditus P. Morinus, l. 8, cap. 8 et 15, probare intendit manus impositionem ad reconciliandum peccatorem etiam private semper fuisse in usu, eamque



necessariam esse; *Witasse* et plures alii volunt eam esse materiam hujus sacramenti. 6° Cæteri vero theologi pro materia sacramenti Pœnitentiæ proxima assignant, post S. Thomam, in tertia q. 84, art. 2, tres actus pœnitentis, scilicet contritionem, confessionem et satisfactionem saltem in voto.

## PROPOSITIO.

*Tres actus pœnitentis, contritio, confessio et satisfactio, sunt materia proxima sacramenti Pœnitentiæ.*

*Prob. 1°* Decreto Eugenii IV ad Armenos : « Quartum sacramentum est Pœnitentiæ, cujus quasi materia sunt actus pœnitentis. »

2° Concil. Trid. sess. 14, cap. 3, et can. 4 : « Si quis negaverit ad integram et perfectam peccatorum remissionem requiri tres actus in pœnitente, quasi materiam sacramenti Pœnitentiæ, videlicet contritionem, confessionem et satisfactionem, quæ tres Pœnitentiæ partes dicuntur... anathema sit. » Unde sic. Quamvis concilium Trid. controversiam inter Scotistas et Thomistas definire noluerit, referente Palavic. l. 12, cap. 12, attamen in sententiam Thomistarum quæ est nostra, multo magis propendere videtur. Etenim 1° loquitur de materia hujus sacramenti, et aliam præter actus pœnitentis non assignat. 2° Dicit hos actus esse *partes Pœnitentiæ* : concurrunt ergo ad conficiendum sacramentum. 3° Eodem modo synodus Trid. loquitur de forma absolutionis ac de actibus pœnitentis, cap. 3 : at forma est pars essentialis sacramenti : ergo et actus pœnitentis : porro si sint partes essentielles, tenent locum materiæ. 4° Catechismus concilii Trid. cap. 17, de Actibus pœnitentis, sic habet : « Neque vero hi actus, quasi materia a sancta synodo appellantur, quia veræ materiæ rationem non habent; sed quia ejus generis materia non sint, quæ extrinsecus adhibeatur, ut aqua in Baptismo et chrisma in Confirmatione. » Ergo.

*Prob. 2° ratione.* Sacramentum Pœnitentiæ per modum

judicii administrari debet, ut patet ex ipsius institutione et ex infra dicendis : in judicio autem cognitio causæ est materia : ergo confessio est materia sacramenti Pœnitentiæ : at cum fieri debeat in ordine ad reconciliationem, oportet eam esse cum dolore et satisfactione saltem in proposito. Ergo.

*Dices 1º.* Concil. Trid. docet, sess. 14, cap. 4, contritionem præparare *ad remissionem peccatorum* : ergo est dispositio ad sacramentum, non vero pars ejus.

*R. Nego consequ. et dico*, contritionem esse simul dispositionem, quatenus ex parte pœnitentis consideratur, et partem sacramenti in quantum a Christo ad hanc dignitatem fuit elevata. Idem de aliis actibus pœnitentis dici potest. Ergo.

*Dices 2º.* In sacramentis minister simul applicat materiam et formam : at supposito actus pœnitentis esse materiam sacramenti Pœnitentiæ, pœnitens unam partem sacramenti applicaret et sacerdos alteram, et sic uterque foret minister. Ergo.

*R. Nego maj.* In pluribus quidem sacramentis minister simul applicat materiam et formam, ut in Baptismo, in Confirmatione, in Ordine, in Extrema-Uctione. At in sacramentis quæ a sola voluntate Christi pendent, argumentum *a pari* est vitiosum. Et revera, quædam sunt sacramenta in quibus minister non simul applicat materiam et formam, sed tantum formam super materiam sibi oblatam pronuntiat, et sacramentum efficitur, scilicet, in Eucharistia et probabilius in matrimonio; cur non in pœnitentia? pœnitens autem non magis est comminister sacramenti quam sacrista qui panem eucharisticum ante missam ponit in altare : ergo.

*Dices 3º.* Materia alicujus sacramenti debet esse sensibilis : atqui contritio non est sensibilis : ergo.

*R. Dist. min.* Non est sensibilis in se, *conc.* in actibus externis eam manifestantibus, *nego min.* Etenim contritio quæ est actus cordis, manifestatur per nonnullos actus quibus judicatur hominem esse contritum. Ergo.

Cum impositio manus in cunctis ritualibus simpliciter

præscribatur, et aliunde graves auctores arbitrentur eam esse necessariam, nunquam omittenda est; et si ob infirmitatem sacerdos manum dexteram extendere non posset, sinistram protendere deberet; imo, et absolutionem sine manus impositione pronuntiatam iterare, quia ubi de validitate sacramentorum agitur, pars tutior semper est eligenda.

---

## CAPUT TERTIUM.

### DE CONTRITIONE.

**Vox contritio**, a verbo conterere veniens, denotat in sensu grammatico actionem aliquid durum in partes minutas disrumpendi, et per metaphoram exprimit actum internum quo duritia cordis frangitur. Definitur a concilio Trid. sess. 13, cap. 4, *Animi dolor ac detestatio de peccato commisso, cum proposito non peccandi de cætero.*

Dicitur 1º *animi dolor*, id est, interna voluntatis tristitia, non vero affectio exterior in parte sensitiva: aliquando hæc affectio ex vehementi dolore interno nascitur et est laudabilis, non autem necessaria, cum ab homine non pendeat.

Dicitur 2º *detestatio de peccato commisso*, id est odium peccati, efficiens ut quis valde exoptaret non peccasse.

Dicitur 3º *cum proposito non peccandi de cætero*: detestatio enim peccati, si sit efficax, omnem voluntatem peccandi excludit: importat igitur firmum propositum amplius non peccandi.

Duplex distinguitur contritio, scilicet, perfecta et imperfecta. Dicemus 1º de contritione in genere; 2º de contritione perfecta, et 3º de contritione imperfecta.

## ARTICULUS PRIMUS.

## DE CONTRITIONE IN GENERE.

Hic expendere licet 1° an contritio in genere, prout eam definivimus, necessaria sit ad justificationem; 2° quas dotes habere debeat: hinc duplex erit paragraphus.

§ I. — De necessitate contritionis in genere ad justificationem.

## PROPOSITIO.

*Omni tempore contritio fuit necessaria ad justificationem.*

*Prob. 1°. Ezech. xviii, 30: Convertimini, et agite pœnitentiam ab omnibus iniquitatibus vestris; Joel. ii, 12: Convertimini ad me in toto corde vestro; Ps. l, 19: Cor contritum et humiliatum, Deus, non despicies; Luc. xiii, 3: Nisi pœnitentiam habueritis, omnes similiter peribitis. Ergo.*

2° Concil. Trid. sess. 14, c. 4: « Fuit autem quovis tempore ad impetrandam veniam peccatorum hic contritionis motus necessarius. »

3° SS. Patribus. S. Aug. lib. de Duabus animabus, cap. 14: « Potest aliquis dicere, non se peccare: non autem sibi esse, si peccaverit, pœnitendum, nulla barbares dicere audebit. »

4° *Ratione.* Nulla obtineri potest justificatio sine sincera conversione cordis: vera autem conversio esse non potest sine dolore de præterito et proposito non peccandi de cætero: ergo.

*Hinc sequitur* contritionem in genere necessariam esse tum jure divino, tum jure naturali.

*Queritur* quandonam præceptum contritionis obliget?

*R.* Certum est 1° illud obligare saltem in articulo et etiam in probabili periculo mortis; quia tunc unusquisque in peccato mortali constitutus, justificationem sibi procurare tenetur. Certum est 2° illud obligare plus quam semel in quinquenniis, cum propositio sequens ab



Innocentio XI fuerit condemnata : *Probabile est ne quidem singulis quinquenniis obligare præceptum charitatis.* Ergo præceptum charitatis obligat saltem singulis quinquenniis : porro præceptum charitatis ab homine reo peccati mortalis impleri non potest sine motu contritionis : ergo. 3° Certum est etiam præceptum contritionis obligare saltem semel in anno, jure ecclesiastico, sin jure divino et naturali, siquidem datur præceptum annuæ confessionis : atqui præceptum illud per sacrilegam confessionem non impletur : ergo. 4° Omnes theologi docent præceptum contritionis diu protrahi non posse sine novo peccato mortali, et communius tenent spatium quatuor aut quinque mensium ad hoc sufficere : at nullam rationem hujus limitationis afferunt. 5° Alii volunt præceptum contritionis saltem omnibus diebus dominicis obligare : nam datur obligatio hos dies sanctificandi : atqui sanctificari non possunt a peccatore de peccato suo minime dolente. 6° Alii denique censent præceptum istud obligare statim post commissum peccatum, vel saltem ubi peccatum memoriæ occurrit ; suamque sententiam his fulciunt momentis.

1. *Script. sacra.* Eccli. i. 5, 8 : *Non tardes converti ad Dominum, et ne differas de die in diem ;* et Marc. xiii, 35 : *Vigilate ergo ; nescitis enim quando Dominus domus veniat, sero, an media nocte, an galli cantu, an mane ; ne cum venerit repente, inveniat vos dormientes.* Porro reus peccati mortalis, qui actum contritionis statim non elicit, hæc divina præcepta non implet.

2° *Ratione.* Namque 1° qui periculo salutem suam amittendi se exponit, peccat : sed qui voluntarie manet in peccato mortali, tali periculo se exponit : ergo. 2° Qui de peccato admissio cogitans, non dolet, eo ipso illud approbat : ergo de novo peccat. 3° Qui voluntarie remanet Deo oppositus, injuriam ipsi facit. Ergo.

Verumtamen communissime docent theologi non dari obligationem, saltem sub gravi, actum contritionis eliciendi statim post admissum peccatum, nec ubi memoriæ occurrit. 1° Quia illud præceptum est affirmativum :

ergo non magis obligat pro semper quam præcepta actus fidei, spei, charitatis, confessionis, etc. 2° Quia peccata multiplicarentur pro numero instantium dilationis, quod praxi confessariorum et communi sensui fidelium adversatur. 3° Quia fieri potest ut quis in peccato memoriæ occurrente non complaceat, nec tamen de illo sincere doleat: tunc autem nihil probat eum tali dispositione mentis novum admittere peccatum. Eadem ratione ostendi potest præceptum contritionis non obligare sub peccato mortali singulis diebus dominicis; quia homo in peccato mortali constitutus, modo affectum actualem ad illud non habeat, religiose et valide sacro interesse potest.

Probabilius mihi videtur dari præceptum, sed tantum sub veniali, actum contritionis statim eliciendi, et peccatum istud fieri mortale per gravem negligentiam. Quanta autem hæc debeat esse negligentia ut peccatum sit mortale solus Deus novit: quapropter sæpe monendi sunt peccatores ut conversionem suam non differant, nec tamen multum sollicitus esse debet confessarius ut numerum peccatorum ex hujusmodi negligentia provenientium cognoscat; ea enim ex dilatione confessionis, ex modo confitendi et ex interrogationibus alias necessariis sufficienter advertere potest.

## § II. — De dotibus seu qualitatibus contritionis.

Quatuor numerantur qualitates contritioni essentielles, nempe debet esse interna, supernaturalis, universalis et summa: has qualitates seorsim expendere oportet.

### SECTIO PRIMA. — An contritio debeat esse interna.

#### PROPOSITIO.

*Necesse est ad justificationem ut contritio sit interna.*

Probatur omnibus momentis quibus necessitatem ejus ostendimus. Etenim est *animi dolor*; conversionem cor-

dis operari et voluntatem peccandi excludere debet: unde propheta Joel. 11, 13, ait: *Scindite corda vestra, et non vestimenta vestra.* Ergo.

Unde 1° non sufficit voluntas peccata confitendi et absolutionem recipiendi, nisi positivus existat actus doloris; 2° nec propositum pœnitendi et desiderium se convertendi; 3° nec sufficit dolor quem quis habet ex eo quod non doleat, quamvis in conscientia timoratis possit esse signum veri doloris de peccatis; 4° nec dolor fictus aut falso, licet bona fide et invincibiliter, existimatus: ignorantia in eo casu excusare potest a novo peccato, non vero a nullitate sacramenti, propter defectum materiæ; 5° nec a fortiori sufficiens esset dolor mere externus, qui scilicet voce, lacrymis, tusionibus pectoris aliisque signis foras prodiret, dum in mente non esset: *patet ex dictis.* Oportet tamen ut in sacramento Pœnitentiæ dolor interior, cum sit materia ejus, aliquo signo exterius manifestetur, v. g. affirmatione, modo confitendi, et præsertim cessatione a peccato, sed non requiritur ut in parte sensitiva appareat, v. g. gemitibus, lacrymis, etc. Quot enim siccis oculis vere dolent de peccato, et flent amare, audiendo patrem aut amicum esse mortuum!

SECTIO SECUNDA. — An contritio debeat esse supernaturalis.

Duplici modo potest esse supernaturalis, scilicet, ratione principii, id est, gratiæ eam producentis, et ratione motivî quo pœnitens innititur dolendo.

#### PROPOSITIO.

*Contritio ad justificationem necessaria debet esse supernaturalis, tum ratione principii, tum ratione motivî.*

*Prob. prima pars.* Homo per contritionem disponitur ad justificationem in sacramento Pœnitentiæ obtinendam: at de fide est illum solis naturæ viribus sufficienter pœnitere non posse, ut patet concil. Trid. sess. 6, can 3: « Si quis dixerit, sine præveniente Spiritus sancti inspi-

» ratione, atque ejus adjutorio, hominem credere, spem rare, aut pœnitere posse sicut oportet, ut ei justificationis gratia conferatur : anathema sit. » Ergo. 2º Idem habetur sess. 14, cap. 4, ubi dicitur attritionem, quæ ad justificationem disponit, *donum Dei esse et Spiritus sancti impulsus*. 3º De fide est, contra Semipelagianos, initium salutis et justificationis a Deo esse, non ab homine. 4º Innocentius XI sequentem damnavit propositionem : *Probabile est sufficere attritionem naturalem, modo honestam*. Clerus Gallicanus notam hæreseos eidem propositioni annexuit, in comitiis generalibus anni 1700. Ergo, etc.

*Prob. secunda pars.* Necesse est, ex modo dictis, ut contritio simpliciter dici possit supernaturalis : atqui contritio solo motivo naturali innixa, simpliciter dici non posset supernaturalis : v. g. fur deprehensus, vehementer dolet de furto, propter pœnas ab ipso luendas ; libidinosus gemit de turpitudinibus suis, ob infamiam, ob detrimentum sanitatis, etc. quis talem contritionem supernaturalem appellabit ? Sia Deo proveniat, est tantummodo donum naturale. Ergo.

*Hinc colligendum est*, peccatorem qui ad justificationem se præparare intendit, contritionem requisitam a Deo expostulare, eamque consideratione alicujus motivi fide cogniti in mente sua excitare teneri.

SECTIO TERTIA. — An contritio debeat esse universalis.

Ea contritio dicitur universalis quæ ad omnia extenditur peccata, sive præterita detestanda, sive futura vitanda.

#### PROPOSITIO.

*Contritio ad justificationem necessaria debet esse universalis quoad peccata mortalia.*

*Prob. 1º.* Concil. Lateran. II, sub Innocent. II, can. 22, ubi dicitur falsam esse pœnitentiam, « Cum, spretis plu-



» ribus, de uno solo poenitentia agitur; aut cum sic agitur de uno, ut non discedatur ab alio. » 2<sup>o</sup> Contritio ad justificationem necessaria, voluntatem peccandi excludere debet, ex concil. Trid. at contritio quæ ad omnia peccata mortalia non extenderetur, talem voluntatem non contineret. 3<sup>o</sup> Præparare debet ad justificationem; sed contritio quæ non esset universalis sensu exposito, ad justificationem non præpararet; nam justificatio cum uno peccato mortali subsistere non potest, et aliunde peccatum mortale sine contritione remitti nequit: ergo.

Hinc, qui de uno peccato, v. g. de homicidio vel de adulterio doleret, propter specialem ejus turpitudinem, non ideo de aliis sufficienter contereretur. Non tamen necesse est ut tot eliciantur actus contritionis vel proposita non peccandi quot sunt peccata commissa vel vitanda; unicus actus ex motivo omnibus peccatis communi, v. g. ex consideratione peccati in genere aut in specie, quatenus est offensa Dei, elicited, ad justificationem sufficit. Imo plures docent non requiri propositum formale non peccandi, sed illud sufficere quod in sincero dolore de præteritis implicite continetur, quia tunc omnis voluntas peccandi reipsa excluditur: verum cum multi contendant propositum formale necessarium esse, sollicitè curare debet confessarius ut illud non desit.

*Dixi quoad peccata mortalia.* Cum enim mortalia sine venialibus remitti possint, non necesse est ut dolor ad venialia extendatur. At si unum peccatum falso putaretur veniale, dum esset mortale et de illo verus non existeret dolor, absolutio foret nulla.

Unum veniale sine aliis remitti potest. Si ergo venialia duntaxat declarentur, non requiritur ut contritio sit universalis, quamvis id valde exoptandum et pro viribus ab iis qui ad perfectionem tendunt procurandum sit.

#### SECTIO QUARTA. — An contritio debeat esse summa.

Triplici modo contritio dici potest summa, scilicet 1<sup>o</sup> *appretiative*, si Deus supra omne bonum æstimetur,

et peccatum supra omne malum odio habeatur ac timeatur; 2° *intensive*, si dolor sit vehementissimus; 3° *extensive*, si diutissime perseveret.

## PROPOSITIO.

*Contritio ad justificationem necessaria, debet esse summa appretiative, non vero intensive, nec extensive.*

*Prob. prima pars.* 1° Matth. x, 37 : *Qui amat patrem aut matrem plus quam me, non est me dignus.* Ergo Deus plus diligi debet quam res aliæ quælibet. 2° Contritio ad justificationem sufficiens debet excludere omnem voluntatem peccandi : necesse est ergo ut sit detestatio peccati super omne detestabile, ita ut quis paratus sit quodvis aliud malum pati potius quam peccare. 3° Peccatum mortale separat a Deo et ad æterna supplicia inducit : ergo præ cæteris malis detestandum est. Ergo.

*Dices.* Qui metu gehennæ detestatur peccatum, justificationem obtinere potest in sacramento Pœnitentiæ, *ut ex infra dicendis patebit* : atqui tamen contritio ejus non est summa, siquidem plus timet gehennam quam peccatum : ergo.

*R. Nego minorem ejusque probationem.* Non enim plus timet gehennam quam peccatum, si vere doleat, sed utrumque simul, primariè gehennam, deinde peccatum tanquam gehennæ causam. Ergo.

Aliunde, nunquam contingere potest ut quis in tali extremitate sit constitutus quod vel peccare, vel æterna gehennæ supplicia subire teneatur : non igitur pœnam æternam, sed quaslibet pœnas temporales in una lance cum peccato ponere licet, ut judicetur an contritio sit appretiative summa.

*Notare juvat cum S. Thom. suppl. quæs. 3, art. 1, ad 4<sup>um</sup>,* infirmos homines non esse tentandos in particulari de malo improbabili, ab illis quærendo, v. g. an mallent crucifigi, excoriari, frustatim comminui, vel etiam mori, quam fornicari, inebriari, mentiri, etc. Pro-

babile est quippe eos in hujusmodi periculo nunquam fore constitutos : cur ergo talis animi præparatio ab illis exigeretur ? Sufficit igitur ut firmum habeant propositum omnia mala in genere potius subeundi quam peccare, et credant Deum non esse passurum eos supra id quod possunt tentari, vel eos a tentatione mediis incognitis liberaturum.

Si de peccatis venialibus agatur, multo minus necesse est tales fingere hypotheses : sufficit quod pœnitens dicat se pœnitere et sibi proponat vitare eadem peccata, quantum vitari possunt, habita ratione fragilitatis nostræ.

*Prob. secunda pars.* 1° Gradus intensitatis nullibi præscribitur in Scriptura, nec in monumentis traditionis, nec in conciliorum definitionibus. 2° S. Chrysost. Epist. 5, ad Theodorum lapsum, ait : « Nunquam spernit pœnitentiam ( Deus ), si ei sincere et simpliciter offeratur.... » Quantulamcumque et quamlibet brevi tempore gestam non respuit.... » 3° Contritio in quolibet gradu simpliciter est contritio : ergo sufficit. 4° In actu credendi et sperandi non requiritur intentio : ergo nec in actu pœnitendi. 5° Ad peccatum mortale gradus intentionis non exigitur : cur ergo ad pœnitendum exigeretur ? 6° Si summus gradus intentionis in contritione necessarius foret ad justificationem, semper anxii essent et confessarius et pœnitens, quia nunquam cognosci posset an gradus requisitus existeret, præsertim cum sæpe intensior sit dolor de re una quam quis minus odit, quam de altera a qua tamen magis abhorret. Sic, v. g. licet quis magis afficiatur dolore dentium quam lenta febris, magis tamen odit febrim lentam quam dolorem dentium. Ergo.

*Dices.* Apud Joelem, II, 12, dicit Deus : *Convertimini ad me in toto corde vestro* : ergo dolor debet esse summus intensive.

*R. Nego consequ.* Hæc verba enim, *in toto corde vestro*, summum voluntatis conatum non significant; saltem nihil ostendit ea talem habere sensum : optime intelliguntur de integritate cordis, ita ut Deus illud exigat totum et non divisum ; sic dicimur aliquid tota manu tan-

gere aut tenere, quamvis non tota intentione nec magno conatu.

Optandum est tamen contritionem pro gravitate criminum augescere in animo, et ad hoc tendere debent rei peccati mortalis. Talis est sensus verborum S. Cypriani, l. de Lapsis : « Quam magna deliquimus, tam granditer » defleamus.... Pœnitentia crimine minor non sit. »

*Prob. tertia pars.* 1° Ezech. xxxiii, 12 : *Et impietas impii non nocebit ei, in quacumque die conversus fuerit ab impietate sua.* 2° Auctoritate S. Chrysost. supra citati : *Quamlibet brevi tempore gestam non respuit.* 3° Exemplis Davidis cui dicenti, *Peccavi*, Propheta extemplo respondit : *Dominus transtulit peccatum tuum*, II Reg. xii, 13; et pii latronis qui, statim ac dixit, *Memento mei, Domine*, confestim veniam et vitæ æternæ promissionem obtinuit. 4° Praxi Ecclesiæ quæ peccatores in extremis positos ad reconciliationem admittit, modo signa contritionis exhibeant. Ergo.

Verum, quamvis contritio uno instanti perfici queat, ordinarie peccatores qui in consuetudine peccati torpescunt, nonnisi, ut plurimum, longiore tempore sufficienter disponuntur ad beneficium absolutionis percipiendum. Hoc expresse docent S. Cyprian. lib. de Lapsis, S. Chrysost. Homil. 2 in Epist. ad Hebr. S. Aug. l. 8 Confess. c. 5. Unde S. Bernardus, Serm. 75 de Diversis : « Si bene memini, in toto canone Scripturarum, unum latronem invenies sic salvatum, » volens his verbis ostendere quam periculosum sit conversionem ad mortem remittere.

Post justificationem autem, qui sincere sunt conversi, quasi continuam habere debent contritionem, ita ut dicere possint cum Psalmista : *Peccatum meum contra me est semper.*

*Plurima ad praxim attinentia hic notanda sunt, scilicet :*

1° Optimum quidem est contritionem ante confessionem elicere, non tamen necessarium; nam contritio post confessionem vel in fine confessionis elicitâ, totum mo-



rale cum confessione efficit; in eam influit eamque dolorosam reddit: ergo tunc adest materia sacramenti Pœnitentiæ cui forma applicatur.

2° Contritio post absolutionem elicitā, evidenter non sufficeret.

3° Cum sacramentum sit totum morale, sufficit contritionem cum absolutione moraliter uniri. *Hinc colliges*, eum qui mane conscientiam examinat, actum veræ contritionis elicit in ordine ad confessionem eadem die faciendam, confitetur vespere et absolvitur, de contritione actualiter non cogitans, valide absolvi, quia contritio mane elicitā adhuc moraliter perseverat, modo non fuerit retractata. *Ita communiter theologi.*

4° Contritio autem sine ullo ordine ad absolutionem elicitā et ante ipsam non renovata, materia sacramenti Pœnitentiæ sufficiens esse non potest: *id clare patet et ita sentiunt theologi.*

5° Qui ante confessionem vere contritus fuit, et post confessionem, sed ante absolutionem, peccatum oblitum declarat, novum actum contritionis elicere non tenetur; quia prior actus moraliter perseverat et ad peccatum istud extenditur.

6° Si vero post absolutionem peccatum oblitum confiteretur, novum actum contritionis elicere debet ut iterum absolveretur, alioquin materia essentialis deesset.

7° Item si quis peccata jam remissa de quibus habitualiter dolet, confiteatur, super his valide absolvi non potest, nisi actualement eliciat contritionem, quia materia sacramenti debet esse actualis saltem moraliter.

## ARTICULUS SECUNDUS.

### DE CONTRITIONE PERFECTA.

Contritio dicitur perfecta quando nititur amore Dei summe boni et propter se dilecti; id est, vocatur perfecta, quia perfecta charitate informatur, et tunc simpliciter dicitur contritio. Omnes fatentur saltem aliquando con-

tingere contritionem charitate perfectam esse, hominemque Deo reconciliare priusquam sacramentum Pœnitentiæ actu suscipiatur. Duo hic expendenda sunt : 1° an contritio perfecta, non tantum aliquando, sed semper Deo per seipsam reconciliet, 2° an necessaria sit ad sacramentum Pœnitentiæ.

§ I. — An contritio perfecta hominem Deo semper reconciliet ante sacramentum.

Plures theologi negarunt, ante concil. Trid. referente Palavicino, l. 12, c. 10, n. 27. Estius, in lib. 4 Sent. dist. 17, s. 2, docet contritionem perfectam in casu necessitatis tantum hominem ante sacramentum Deo reconciliare : alii vero contendunt eam nunquam justificare, nisi sit in gradu intenso.

#### PROPOSITIO.

*Contritio perfecta hominem semper Deo reconciliat, priusquam sacramentum actu suscipiatur, quamvis sit in gradu infimo.*

*Prob.* Scriptura sacra, concil. Trid. auctoritate SS. Pontificum et ratione.

1° *Scriptura sacra.* Ezech. xxxiii, 12 : *Impietas impii non nocebit ei, in quacumque die conversus fuerit.* I Epist. B. Joan. iv, 15 : *Deus charitas est : qui manet in charitate, in Deo manet, et Deus in eo.* Unde sic. Qui habet charitatem perfectam, etiam in gradu infimo, vere est conversus et Deus manet in eo : ergo tunc nullum habet peccatum mortale.

2° *Concil. Trid. sess. 14, cap. 4 :* « Etsi contritionem  
 • hanc aliquando charitate perfectam esse contingat, ho-  
 • minemque Deo reconciliare priusquam hoc sacramen-  
 • tum actu suscipiatur.... » Si verbum *aliquando*, effectum contritionis perfectæ ad aliquos casus non restringat, ut contendit Estius, in mente patrum Tridentinorum, contritio charitate perfecta semper justificat : at verbum istud effectum, etc. non enim dicunt Patres contritionem

charitate perfectam aliquando hominem Deo reconciliare, sed aliquando contingere contritionem charitate esse perfectam eamque tunc hominem Deo reconciliare. Nonne sensus est: modo sit perfecta, quod aliquando contingit, hominem semper Deo reconciliat? Et verò, juxta Palav. loco citato, Patres concilii decretum jam paraverant quo « damnabatur quisquis negaret contritione qua poenitens divina gratia per Christum cooperante dolet de peccatis, propter Deum, cum proposito confitendi et satisfaciendi, remitti peccata; » et ab illo abstinuerunt, ne Adrianum et Cajetanum sententiæ oppositæ adhærentes damnarent. Ergo.

3° *Auctoritate SS. Pontificum*, videlicet Pii V, Gregorii XIII et Urbani VIII, qui diversis bullis damnaverunt sequentem propositionem Baii, n. 68. « Per contritionem etiam cum charitate perfecta et voto suscipiendi sacramentum conjunctam, non remittitur crimen extra casum necessitatis aut martyrii, sine actuali susceptione sacramenti. » His condemnationibus accedit censura facultatis Parisiensis quæ, die 27 januarii, anni 1560, plures propositiones eundem sensum habentes damnavit ut hæreticas. Ergo.

*Notandum* autem, in textu concilii et in censuris citatis nullam fieri mentionem de aliquo gradu intensitatis: ergo species etiam in gradu infimo sufficit.

4° *Ratione*. 1° Aversio a Deo tanquam fine ultimo etiam in infimo gradu, peccatum mortale constituit: ergo, e contra, conversio ad Deum etiam in infimo gradu, modo sit vera, seu charitate perfecta, justificationem operatur. 2° Contritio perfecta remittit peccata in casu necessitatis, v. g. in articulo mortis, aiunt adversarii: at virtutem suam in eo casu non desumit ex necessitate quæ potius eam imminueret, nec ex promissione Dei, ut opinari videtur Estius, siquidem nullus citari potest textus quo talis promissio innitatur: ergo ex natura sua hunc effectum producit, Deo ita ordinante: porro contritio perfecta ejusdem est naturæ in infimo et in summo gradu: ergo.

*Solvuntur objectiones.*

*Obj. 1º.* Mulier peccatrix cujus fit mentio apud Luc. vii, 47, perfecte erat contrita, cum accessit ad Jesum, pedes ejus lacrymis irrigavit et capillis suis extersit : attamen Christus remittit ei peccata. Ergo.

*R. Nego min.* Christus dixit quidem mulieri, *Remittuntur tibi peccata*, sed nihil ostendit eum peccata post contritionem remisisse, potius quam declarasse coram hominibus ea jam remissa esse : imo posteriorem hunc sensum non dubie manifestat : prius quippe dixerat Simoni : *Dico tibi, remittuntur ei peccata multa, quoniam dilexit multum.* Ergo.

*Obj. 2º.* B. Paulus in via Damasci perculsus, veram habuit contritionem, quando dixit, Act. ix, 6 : *Domine, quid me vis facere ?* et tamen Ananias dicit illi, Act. xxii, 16 : *Exsurge, baptizare, et ablue peccata tua.* Ergo.

*R. Nego conseq.* Nam peccata vi contritionis perfectæ non remittuntur ante Baptistum sine voto Baptismi qui est de præcepto divino : non mirum est ergo si Ananias remiserit Paulum ad Baptismum. Dixit autem ei, *Ablue peccata tua*, vel quia Baptismus erat complementum justificationis ejus, siquidem illum sine gravi peccato omittere non potuisset ; vel quia non sciebat peccata ejus vi contritionis perfectæ fuisse remissa. Ergo. Eodem sensu Cornelius centurio, qui vocatur vir justus, et acceperat Spiritum sanctum, debuit baptizari, Act. x, 22, 24 et 48.

*Obj. 3º.* SS. Patres pluribus in locis docent prius absolvi pœnitentes in terris quam in cœlis ; v. g. S. Bernardus Serm. 1 de sanctis Petro et Paulo, dicens de Petro : » Qui claves regni cœlorum tam singulariter accepit, ut præcedat sententia Petri sententiam Cœli. » At si contritio perfecta per se justificaret, pœnitentes non prius absolverentur, etc. Ergo.

*R. Dist. min.* Pœnitentes non prius absolverentur, etc. quando adest contritio perfecta, *transeat* ; non prius absolverentur communiter, *nego min.* Etenim cum raro



habeatur contritio per se justificans, optime SS. Patres dicere potuerunt poenitentes prius absolvi in terris quam in cœlis, et sententiam Petri præcedere sententiam cœli. Ergo.

Eo sensu intelligendus est textus sancti Aug. Tract. 13 in S. Joan. cap. 3 : « Quantumcumque catechumenus » proficiat, adhuc sarcinam suæ iniquitatis portat, nec » illi dimittitur nisi cum venerit ad Baptismum, » supposito eum contritionem perfectam non habere, vel Baptismum negligere.

Dixi *transeat*, quia contritio perfecta non justificat, nisi votum sacramenti includat : ergo sub hoc respectu dici potest eam vi potestatis ecclesiasticæ effectum suum aliquo modo producere, et sic sententiam Petri sententiam Cœli præcedere.

Quod autem effectum suum non producat nisi votum sacramenti includat, patet 1° ex concilio Tridentino hoc expresse dicente, sess. 14, cap 4 : « ipsam nihilominus » reconciliationem ipsi contritioni, sine sacramenti voto, » quod in illa includitur, non esse adscribendam. » 2° Ratione. Perfectus amor Dei necessario includit voluntatem cuncta ipsius mandata observandi : porro Deus præcepit susceptionem sacramenti Poenitiæ ad obtinendam remissionem peccatorum post Baptismum commissorum, *ut ex mox dicendis patebit* : ergo.

Probabilius est autem votum implicitum sufficere, idque insinuare videtur concil. Trid. dicens, *quod in ea* (contritione perfecta) *includitur* ; quod enim includitur in alio, est implicitum.

## § II. — An contritio perfecta sit dispositio necessaria ad sacramentum Poenitiæ.

Magister Sententiarum aliique theologi, sive ante concilium Tridentinum, sive post concilium, sed in minori numero, partem affirmantem tenuerunt : alii vero omnes negant, eorumque sententia nunc communis est et certa.

## PROPOSITIO.

*Contritio perfecta, ex se justificans, non necessaria est ad sacramentum Pœnitentiæ.*

*Prob.* 1º omnibus momentis quibus demonstravimus sententiam absolutionis non tantum declarare peccata esse remissa, sed ea remittere. 2º Concil. Trid. dicitur enim in capite 4, sess. 14, *aliquando* contingere contritionem charitate esse perfectam hominemque Deo reconciliare : ergo non semper nec communiter est perfecta, proindeque non requiritur tanquam dispositio necessaria ad sacramentum quod ordinarie suscipiendum est. 3º Auctoritate cleri Gallicani qui, in comitiis anni 1700, damnavit propositionem in qua asserebatur « requiri ut præ-  
 » viam contritionem illam quæ sit charitate perfecta, et  
 » quæ cum voto sacramenti, antequam actu suscipiatur,  
 » hominem Deo reconciliat. » 4º Ratione. Sacramentum Pœnitentiæ est sacramentum mortuorum : at, in hypothesis adversariorum, non esset sacramentum mortuorum, cum ad illud fructuose recipiendum peccatores jam justificati esse deberent. Ergo.

## ARTICULUS TERTIUS.

## DE CONTRITIONE IMPERFECTA.

Contritio imperfecta est animi dolor et detestatio peccati propter motivum supernaturalem, sed a charitate perfecta diversum, et dicitur attritio; quæ vox cœpit usurpari in decimo tertio sæculo, ut probat P. Morinus, l. 8, cap. 12, n. 14. Apud omnes in confesso est eam per se non justificare : an vero specie vel gradu intensitatis tantum a contritione perfecta differat, disputant inter se theologi ; judicabitur ex dicendis.

Concipi potest vel ex consideratione turpitudinis peccati, vel ex gehennæ et pœnarum timore, vel ex desiderio recuperandæ beatitudinis amissæ. Duas condiciones

necessarias in ipsa postulat concil. Trid. scilicet, *ut voluntatem peccandi excludat, cum spe veniæ.*

Mirum est quot exstiterint opiniones theologorum circa naturam hujusce contritionis; sed his tanquam implicatis, obscuris, ad praxim minime pertinentibus, maxima ex parte sepositis, duo investigabimus, scilicet 1º an attritio ex consideratione pœnarum gehennæ concepta, sit honesta; 2º an sufficiat cum sacramento ad justificationem.

§ I. — An attritio ex consideratione pœnarum gehennæ concepta, sit honesta.

Quadruplex distinguitur timor, scilicet mundanus, servilis, serviliter servilis et filialis. Mundanus ille est quo temporale incommodum magis timetur quam offensa Dei; servilis quo pœna unice timetur, et tamen nullus retinetur affectus ad peccatum; serviliter servilis ille est quo quis ita fugit peccatum, ut illud committere vellet si pœna non esset: filialis vero ille est quo non pœna, sed amicitia Dei jactura metuitur.

*Certum est* 1º metum filialem esse bonum et honestum.

*Certum est* 2º metum mundanum esse vitiosum; non minus vitiosus est metus serviliter servilis. *Ita omnes.*

Circa metum simpliciter servilem varii prodierunt errores. 1º Lutherus affirmavit illum esse malum, et attritionem ex illo ortam facere hominem hypocritam et magis peccatorem: ab ea sententia postea recesserunt Lutherani, dixeruntque timorem pœnæ esse utilem, atque inde pœnitentiam inchoari. 2º Baius, Jansenius et *Quesnel*, tenentes charitatem, non solum habitualement sed et actualement, necessariam esse ad omnem actum ut non sit peccaminosus, docent timorem simpliciter servilem in se bonum esse, quia gehenna vere timenda est, sed malum fieri eo quod non procedat ex charitate saltem initiali; ideoque naturalem esse et voluntatem peccandi includere, quia licet manum cohibeat, non tollit affectum ad peccatum in intimo cordis latitantem.

## PROPOSITIO.

*Attritio ex metu servili gehennæ concepta, honesta est; supernaturalis esse potest, et voluntatem peccandi non includit.*

*Prob. 1º. Honesta est. 1º Enim Christus variis in locis eam commendat, v. g. Matth. III, 10 : Omnis arbor quæ non facit fructum bonum, excidetur, et in ignem mittetur; et ibid. x, 28 : Sed potius timete eum qui potest et corpus et animam perdere in gehennam. 2º S. Aug. Tract. 9 in S. Joan. n. 4 : Timor quasi locum præparat charitati : ergo non est malus in se. 3º Concil. Trid. quod sess. 6, can. 8, anathemate percussit eos qui dicerent, « Gehennæ meum, per quem ad misericordiam Dei de peccatis donando confugimus, vel a peccando abstinemus, peccatum esse, aut peccatores peiores facere. » Ergo.*

*2º Supernaturalis esse potest. Nam a Deo inspirari potest, ut patet 1º ex oratione Psalmistæ, Ps. cxviii, 120 : Confige timore tuo carnes meas; a iudiciis enim tuis timeui. 2º Ex verbis Christi apud Luc. xii, 2 : Ostendam autem vobis quem timeatis; timete eum qui, postquam occiderit, habet potestatem mittere in gehennam. 3º Ex concil. Trid. dicente, sess. 14, c. 4, eam esse donum Dei et Spiritus sancti impulsum. Aliunde motivo fide cognito innitur. Ergo 2º.*

*3º Voluntatem peccandi non includit, ut constat 1º Eccl. i, 27 : Timor Domini expellit peccatum; 2º ex canone concil. Trid. superius citati; 3º S. Aug. Serm. 161 de Verbis Apostoli : « Timor iste quo gehennam times et » ideo mala non facis, continet te, et sic volentem peccare animum interiore non sinit. » 4 Timor gehennæ efficax expellit id omne quod meretur gehennam : ergo et ipsam voluntatem peccandi, quantumvis latitantem in corde. Ergo.*

*Constat igitur attritionem ex metu servili gehennæ esse honestam, supernaturalem esse posse, atque voluntatem peccandi non includere : a fortiori talis est attritio*



ex consideratione turpitudinis peccati vel ex amore spei, seu Dei propter nos quæsitæ concepta, ac proinde nulla est ratio cur in his probandis immoremur.

*Solvuntur objectiones.*

*Obj. 1º. B. Paulus ait, II Tim. 1, 7 : Non enim dedit nobis Deus spiritum timoris, sed virtutis et dilectionis. Ergo in nova Lege timor est malus.*

*R. Nego conseq.* Ibi enim Apostolus monet discipulum ut resuscitet gratiam Dei in se, et officiis episcopi recte fungatur : vult igitur ut sciat se non accepisse a Deo spiritum timoris, id est timiditatis, ut fert textus græcus, sed spiritum seu donum dilectionis et sobrietatis, scilicet, ad opus ministerii sui fortiter sustinendum : hic ergo minime agitur de timore gehennæ.

*Obj. 2º. B. Paulus, Rom. viii, 15 : Non accepistis, inquit, spiritum servitutis iterum in timore, sed accepistis spiritum adoptionis filiorum. Ibi Apostolus timorem charitati opponit : ergo malus est timor.*

*R. Dist. ant.* Opponit timorem charitati, ut minus perfectum perfectiori, *conc.* ut malum bono, *nego ant.* Etenim Apostolus, volens ostendere legem Evangelicam multo præstare veteri Lege, dicit donum timoris datum fuisse Hebræis tanquam servis, et adoptionem seu gratiam sanctificantem Christianis qui facti sunt filii : porro ex verbis B. Pauli sic intellectis non sequitur timorem esse malum, *ut patet* : ergo.

*Inst. I Joan. iv, 18, hæc habet : Timor non est in charitate, sed perfecta charitas foras mittit timorem, quoniam timor pœnam habet.* Unde sic. Timor manere non potest in charitate, et pœnam habet seu meretur : ergo malus est.

*R. Nego conseq.* Ideo quippe timor in perfecta charitate manere non potest, quia non habet objectum ; qui enim ex fide considerat gehennam, eam valde reformidat, præsertim si nondum sit justificatus ; at charitate perfecta accedente, jam non timet damnari, sed fiduciam

habet salutis : sic fides, adveniente visione beatifica, evanescet, et tamen est bona : ergo, licet timor per charitatem foras mittatur, non sequitur illum esse malum. Dicitur autem habere pœnam, vel quia cruciat animum, vel quia mala quæ timentur semper exhibet.

*Obj. 3º.* Qui timet culpam ob pœnam, plus timet pœnam quam culpam : atqui malum est plus timere pœnam quam culpam : ergo.

*R. Nego maj. et dico,* illum simul timere gehennam et culpam, gehennam primarie et culpam tanquam ipsius causam : vult efficaciter vitare gehennam ; propterea omnem deponit affectum ad culpam : igitur comparationem inter utrumque non instituit, nec dicit intra se : Peccarem si gehenna non esset. Ergo.

*Inst. 1º.* Propter quod unumquodque tale, et illud magis, est axioma receptum : ergo si timeat culpam ob gehennam, plus, etc.

*R. Dist. axioma.* Propter quod unumquodque tale exclusive, et illud magis, *conc.* propter quod unumquodque tale simpliciter, et illud magis, *nego axioma.* Et enim qui vult aliquid exclusive ob talem causam, hanc causam magis intendit, *ut patet* : at si quid velit ob eandem causam, sed simpliciter et non exclusive, non sequitur quod illam magis velit. Res illustratur exemplis : aliquis sumit medicinam exclusive ob sanitatem, vel merces projicit in mare unice ad salvandam vitam ; evidens est illum pluris facere sanitatem quam medicinam, et vitam quam merces : sed alter diligit herum simpliciter propter mercedem, vel Deum ob felicitatem quam ab illo exspectat ; non sequitur illum pluris æstimare mercedem quam herum, aut felicitatem quam Deum : porro ita est qui fugit peccatum simpliciter ob metum gehennæ ; non sequitur illum plus timere gehennam quam peccatum. Ergo.

*Inst. 2º.* Timor gehennæ, teste passim S. Aug. cohibet manum, non voluntatem : ergo voluntatem peccandi non excludit, proindeque malus est.

*R. Dist. ant.* Timor serviliter servilis non cohibet vo-

luntatem. *conc.* timor simpliciter servilis, *subdist.* Non cohibet voluntatem habituales, cum sola contritio perfecta per se justificet, *conc.* non cohibet voluntatem actuales peccandi, *nego*; innixus 1<sup>o</sup> *conc.* Trid. sess. 14, cap. 4; 2<sup>o</sup> S. Aug. in Ps. cxxvii : « Cum per timorem continent se a peccato, fit justitiæ consuetudo; » 3<sup>o</sup> ratione; quia timor sincerus gehennæ debet excludere quidquid gehennam meretur, proinde actuales voluntatem peccandi. Voluntas habitualis, quam fatemur timorem non excludere, solum afficit subjectum, non vero actum timoris; nec igitur illum vitiat. Ergo.

§ II. — An attritio ex metu gehennæ concepta, ad justificationem sufficiat cum sacramento Pœnitentiæ.

Multi, maxime post concilium Trid. æstimaverunt attritionem, ex consideratione turpitudinis peccati vel ex metu gehennæ conceptam, modo voluntatem peccandi excludat, ad justificationem in sacramento Pœnitentiæ percipiendam sufficere. Dominicus Soto et Andræas Vega exigebant ut conditionem essentialem, attritionem istam bona fide æstimari contritionem; Melchior Canus vero contendit eam cognitam ut simplicem attritionem, nihilominus sufficere. Qui huic opinioni subscripserunt vocati sunt *Attritionistæ*.

Alii vero multo plures, et nunc communissime, docent attritionem, sive ex consideratione turpitudinis peccati, sive ex metu gehennæ conceptam, sine ullo amore Dei saltem inchoato, insufficientem esse.

Qualis autem amor requiratur, inter se non consentiunt. Præter amorem charitatis seu amicitiae per se justificantem, distinguunt amorem spei et amorem benevolentiae. Amor spei, qui etiam dicitur amor concupiscentiae, ille est quo Deus diligitur respectu ad nos, tanquam creator, beneficus aut remunerator noster. Amor benevolentiae est quoddam initium amoris perfecti, et idcirco dicitur charitas initialis. Hoc est discrimen inter utrumque amorem, scilicet perfectum et benevolum, quod perfectus

vera sit amicitia et unionem affectuum cordis Dei et cordis hominis supponat; benevolus autem sit actus simplex voluntatis quo bonum Dei intendimus, sine re-damnatione ex parte ejus.

Quidam dicunt solum amorem spei sufficere cum attritione ad obtinendam justificationem in sacramento Pœnitentiæ, alii vero requirunt amorem benevolentiae seu initialem quo Deus incipiatur diligere propter se et super omnia.

#### PROPOSITIO.

*Sola attritio, sive ex consideratione turpitudinis peccati, sive ex metu gehennæ concepta, ad justificationem in sacramento Pœnitentiæ obtinendam non sufficit, nisi aliquem contineat amorem Dei, sive spei, sive benevolentiae.*

*Prob. 1º Scriptura sacra. I Joan. III, 14; Qui non diligit, manet in morte; I Cor. XVI, 22 : Si quis non amat Dominum nostrum Jesum Christum, sit anathema. Ergo quisquis Deum non amat, saltem aliquo modo, justificari non potest.*

*Prob. 2º concil. Trid. sess. 6, cap. 6, ubi exponens dispositiones ad obtinendam justificationem in sacramento Baptismatis necessarias, exigit ut peccatores Deum, tanquam omnis justitiæ fontem, diligere incipiant. Porro eædem dispositiones certe requiruntur ad obtinendam justificationem in sacramento Pœnitentiæ : ergo.*

*Prob. 3º SS. Patribus. S. Aug. Exposit. Epist. ad Galatas, n. 1 : « Non aufert peccata nisi gratia fidei, quæ » per dilectionem operatur. » Ergo sine dilectione justificatio obtineri non potest.*

*Prob. 4º auctoritate cleri Gallicani qui, in comitiis anni 1700, sequentem damnavit propositionem : « Attritio ex metu gehennæ sufficit, etiam sine ulla Dei dilectione, sine ullo ad Deum offensum respectu. » « Quæ » propositio, inquit clerus Gallicanus, temeraria est, » scandalosa, perniciosa et in hæresim inducit. » Ergo.*

*Prob. 5º ratione. 1º Justificatio obtineri non potest,*



nisi vera sit conversio ad Deum : at non intelligitur quomodo vera esset conversio ad Deum sine ullo ipsius amore, ne quidem inchoato. 2<sup>o</sup> Sententia quæ tenet attritionem sine amore sufficientem esse cum sacramento, nullo nititur fundamento alicujus ponderis ; præcipuum enim argumentum suum desumunt adversarii ex cap. 4, sess. 14, conc. Trid. ubi dicitur de attritione quæ per se sine sacramento Pœnitentiæ peccatorem non justificat : « Tamen eum ad Dei gratiam in sacramento Pœnitentiæ » impetrandam disponit, » et nulla fit mentio de necessitate dilectionis : sed concilium necessitatem dilectionis pariter non negat ; dicit quidem attritionem ex metu conceptam, ad justificationem in sacramento obtinendam disponere ; non autem affirmat eam sufficere, nec contradicit assertioni cap. 6, sess. 6, ubi docet Deum diligendum esse tanquam fontem omnis justitiæ. Porro in materia tanti momenti pars tutior est eligenda : ergo.

Multa alia fieri solent argumenta ad astruendam propositionem nostram ; sed cum fere omnia intelligi possint de statu gratiæ vel de charitate perfecta, nimis probant : igitur ab illis abstinemus.

Qualis autem amor requiratur, an amor spei sufficiat, an amor initialis sit necessarius, definire non aggredimur : semper hortandi sunt fideles ad sacramentum Pœnitentiæ accedentes, ut Deum propter se diligant vel saltem diligere incipiant : confessarius autem anxius esse non debet circa naturam amoris in pœnitente existentis.

*Solvuntur objectiones.*

*Obj. 1<sup>o</sup>.* Filius prodigus cujus historia legitur apud Luc. v, est figura peccatoris ad Deum revertentis : atqui misericordiam a patre suo obtinuit, licet solo metu mortis et impatentia famis ad eum accesserit : ergo *a pari*, etc.

*R 1<sup>o</sup>.* Hoc argumentum probaret justificationem sine ullo amore Dei obtineri posse, etiam extra sacramentum Pœnitentiæ, quod adversarii negant.

*R. 2º. Nego min.* Non dicitur enim prodigum nullum habuisse amorem erga patrem suum; legitur quidem illum fame et miseria motum fuisse ut ad eum recurreret: at simul eum diligere potuit, et verisimiliter eum saltem aliquo modo diligebat, quando dixit v. 21: *Pater, peccavi in cœlum et coram te; jam non sum dignus vocari filius tuus.*

Aliunde negari posset consequentia, quia parabolæ ultra punctum comparisonis urgeri non debent: exemplum autem prodigi affertur ut ostendatur exsultandum esse quando peccatores ad Deum revertuntur ipsosque a Deo bene suscipiendos fore. Ergo.

*Obj. 2º. B. Paulus, Rom. III, 20 et 23, ait hominem justificari sine operibus Legis, gratis per gratiam: atqui dilectio est opus Legis: ergo.*

*R. 1º.* Iterum sequeretur dilectionem etiam extra sacramentum non requiri.

*R. 2º. Dist. ant. B.* Apostolus dicit hominem justificari sine operibus Legis, id est, sine circumcisione aliisque cæremonis antiquæ Legis, *conc.* sine ulla dilectione, *nego.* Etenim ibi Apostolus, tractans de excellentia legis evangelicæ præ lege Mosaica, docet nunc hominem *gratis* justificari per gratiam Dei, sine operibus in antiqua Lege impositis: non dicit autem nullum amorem esse necessarium. Ergo.

*Obj. 3º.* Amor spei seu concupiscentiæ est vitiosus: ergo non sufficit.

*R. 1º.* Cum definire noluerimus an ille amor sit sufficiens, necne, objectio ista aliæque similes frustra nobis proponuntur; eas solvere non tenemur.

*R. 2º. Nego ant.* Ratio enim dictat benefactores esse diligendos: Deus autem est summe beneficus erga nos: ergo.

*Inst. 1º.* Amore spei Deus ad nos refertur: atqui talis relatio est vitiosa: ergo.

*R. Dist. maj.* Amore spei Deus ad nos refertur tanquam ad subjectum quod sola possessione ejus beari potest, *conc.* tanquam ad finem Dei ultimum, quasi illum

nobis postponeremus, *nego maj.* Eodem sensu distincta minore, *nego conseq.* Nulla enim est inordinatio in eo quod Deus ad nos sic referatur, siquidem hoc ipsi gloriosum est. Ergo.

*Inst.* 2°. Amor spei seu concupiscentiæ est mercenarius : ergo est vitiosus.

*R. Nego conseq.* Quamvis enim aliquo sensu sit mercenarius, perfectiorem amorem non excludit : licet autem servire Deo propter retributionem, ut ait Psalmista, Ps. cxviii, 112. Cur ergo amor ille esset vitiosus?

*Inst.* 3°. Si amor spei ad justificationem sufficeret, inde sequeretur salvari posse hominem qui nec semel in vita magnum præceptum charitatis implevit : atqui hoc repugnat : ergo.

*R.* 1°. *Retorqueo argumentum.* Si amor perfectæ charitatis non requiratur ad obtinendam justificationem in sacramento Pœnitentiæ, sequitur hominem qui præceptum perfectæ charitatis nunquam implevit, nihilominus salvari posse, nempe si in articulo mortis sacramentum Pœnitentiæ cum attritione et amore initiali suscipiat : atqui tamen hoc adversarii non concedent : ergo.

*R.* 2°. *Nego illationem.* Nam 1° qui ope attritionis et sacramenti justificatur, gratiam sanctificantem obtinet, sicque *ex attrito fit contritus*, ut fert axioma, id est, in charitate perfecta habituali constituitur : dici autem non potest eum qui perfectam habet charitatem habitualement, magnum charitatis præceptum non implere. 2° Difficile est eum qui Deum sic habitualiter diligit, actum hujus amoris non elicere. 3° Denique ad summum inde sequeretur eum qui circa hujus præcepti adimpletionem in mora culpabili versaretur, actum amoris perfectum elicere teneri per accidens, vel ante justificationem in sacramento, vel post eam adeptam. Ergo.

## CAPUT QUARTUM.

### DE CONFESSIONE.

Confessio sacramentalis, de qua sola hic agitur, defini-  
 ri potest: *Accusatio legitima priorum peccatorum post  
 Baptisma commissorum, facta sacerdoti competenti, in or-  
 dine ad veniam virtute clavium obtinendam.* Nobis di-  
 cendum est 1° de ejus necessitate, et 2° de ejusdem con-  
 ditionibus.

### ARTICULUS PRIMUS.

#### DE NECESSITATE CONFESSIONIS.

Qui sacramentum Pœnitentiæ negant, eo ipso confes-  
 sionem sacramentalem tollunt. Plures autem sacramen-  
 tum Pœnitentiæ retinentes, circa confessionem errarunt,  
 videlicet :

1° Joannes Wiclefus necessitatem ejus negavit, his ver-  
 bis : « Si homo debite fuerit contritus, omnis confessio  
 » exterior est sibi superflua et inutilis : » septimus est  
 articulus ejus in conc. Const. damnatus.

2° Petrus Osmensis, doctor Salmanticensis, contende-  
 bat non dari præceptum confitendi peccata occulta ; a  
 Sixto IV damnatus fuit, anno 1478.

3° Lutherus prius agnoverat, lib. de Captivitate Baby-  
 lonica, cap. de Pœnitentia, confessionem occultam esse  
 utilem, imo et necessariam ; deinde eam, prout est in usu  
 apud catholicos, vocat *cruentissimam carnificinam*.

4° Calvinus, l. 2 Inst. cap. 4, sect. 7 et 8, fatetur qui-  
 dem usum confessionis antiquissimum esse et abundan-  
 tem fructum ex ea percipi ; sed contendit eam esse libe-  
 ram, arbitrio uniuscujusque permissam, et ante concil.  
 Lateran. IV, anno 1215 celebratum, nulla lege fuisse



præscriptam; eam vocat *tyrannidem*, rem pestilentem, multisque nominibus *Ecclesiæ noxiam*. Calvinistæ illam tormentum innocentianum appellare consueverunt.

*His prænotatis*, ostendemus in duplici propositione confessionem esse necessariam iis qui post Baptisma mortaliter peccaverunt, 1° jure divino, et 2° jure ecclesiastico.

## PROPOSITIO PRIMA.

*Confessio sacramentalis necessaria est jure divino iis qui post Baptisma mortaliter peccaverunt.*

*Prob.* Illa propositio ut certissima tenenda est quæ est de fide, probatur Scriptura sacra, SS. Patribus, argumento præscriptionis et ratione : atqui talis est propositio nostra.

1° *Est de fide.* His verbis quippe fuit definita in concil. Trid. sess. 14, can. 6 : « Si quis negaverit confessionem sacramentalem vel institutam, vel ad salutem necessariam esse jure divino ; aut dixerit modum secrete confitendi soli sacerdoti, quem Ecclesia catholica ab initio semper observavit et observat, alienum esse ab institutione et mandato Christi, et inventum esse humanum : anathema sit. » Eadem veritas definita est aliis verbis canonibus 7 et 8. Ergo 1°.

2° *Prob. Scriptura.* S. Matth. xvi, 18 : *Tu es Petrus*, etc. *Tibi dabo claves regni cælorum*, etc. et xviii, 18 : *Amen dico vobis, quæcumque alligaveritis super terram, erunt ligata et in cælo, et quæcumque solveritis*, etc. apud Joan. xx, 22 : *Quorum remiseritis peccata*, etc. Unde sic argumentari licet. Confessio sacramentalis necessaria est jure divino iis qui post Baptismum mortaliter peccaverunt, si Christus instituerit suos Apostolos eorumque successores judices, sine quorum sententia peccata mortalia non remittuntur, et si hæc sententia sine confessione obtineri nequeat : atqui hæc duo certa sunt.

1° Christus prædictis verbis, apud S. Joannem relatis, promissionem suam implens, instituit suos Apostolos

proindeque eorum successores iudices, sine quorum, etc. 1° Sunt iudices, cum alia peccata dimittere, alia retinere debeant. 2° Peccata mortalia sine eorum sententia remitti non possunt; nam Christus dedit eis claves regni cœlorum; frustra autem claves ipsis dedisset si alius pateret aditus; potestatem retinendi peccata habent, sed vana ac illusoria foret hæc potestas si alia via peccatores justificari possent; vel enim nullus tribunal Pœnitentiæ adiret, vel unusquisque, absolutione sibi denegata, alio medio veniam obtinendi uteretur, sicque confessarios impune sugillaret. Porro hæc admitti nequeunt. Ergo 1°.

2° Sententia Apostolorum eorumque successorum sine confessione obtineri non potest. Necesse est enim ut peccata a peccatis secernantur, siquidem, ex verbis Christi, non debent promiscue remitti, nec promiscue retineri: necesse est igitur ut cognoscantur: cognosci autem non possunt, nisi aperiantur: porro ea aperire, est ea confiteri secundum morem in Ecclesia consuetum: ergo, etc. aliunde, etc. Ergo.

3° *Prob. ex SS. Patribus.* Tertul. l. de Pœnit. cap. 10: « Grande plane emolumentum verecundiæ occultatio » delicti pollicetur; videlicet, si quid humanæ notitiæ » subduxerimus, proinde Deum celabimus. An melius est » damnatum latere quam palam absolvi? » Vel hæc verba intelligenda sunt de confessione auriculari, et evidenter pro nobis militant; vel de confessione publica, ut quidam volunt, et nihilominus thesim nostram probant: nam, *ut infra ostendemus*, confessio publica supponit præceptum divinum confessionis.

Origenes, Homilia 2 in Ps. xxxvii: « Sicut ii qui ha- » bent intus inclusam escam indigestam, aut humoris » vel phlegmatis stomacho graviter et moleste imma- » nentis abundantiam, si vomuerint, relevantur: ita » etiam hi qui peccaverunt, siquidem occultant et reti- » nent intra se peccatum, intrinsecus urgentur et pro- » pemodum suffocantur phlegmate vel humore peccati: » si autem ipse sui accusator fiat, dum accusat semet- » ipsum et confitetur, simul evomit et delictum, atque

• omnem morbi digerit causam. Tantummodo circum-  
 • spice diligentius cui debeas confiteri peccatum tuum ;  
 • proba prius medicum cui debeas causam languoris ex-  
 • ponere, ut ita demum si quid ille dixerit... si quid con-  
 • siliū dederit, facias.... si providerit talem esse languo-  
 • rem tuum qui in conventu totius Ecclesiæ exponi  
 • debeat et curari ; ex quo fortassis et cæteri ædificari po-  
 • terunt, et tu ipse facile sanari ; multa hoc deliberatione  
 • et satis perito medici illius consilio procurandum est. »  
 In eo textu fit quidem mentio confessionis publicæ quæ  
 sine periti medici consilio et magna deliberatione fieri  
 non debebat ; sed confessio secreta prius facienda erat  
 prudenti confessario qui iudicabat an utile foret delicta  
 in conventu ecclesiæ publicare. Ergo, etc.

S. Basilus, in Regulis brevioribus : « Peccata iis con-  
 • fiteri necesse est quibus mysteriorum Dei concredita  
 • dispensatio est. »

S. Chrysost. Homil. de muliere Samaritana, postquam  
 demonstravit occultum fuisse peccatum quod confessa  
 est, addit : « Imitemur et nos mulierem Samaritanam,  
 • et ob propria peccata non erubescamus... Qui enim  
 • homini detegere peccata erubescit... neque confiteri  
 • vult et pœnitentiam agere, in die illa non coram uno  
 • vel duobus, sed universo terrarum orbe spectante tra-  
 • ducetur. »

S. Ambros. l. 2 de Pœnit. cap. 6 : « Si vis justificari,  
 • fatere delictum tuum ; solvit enim criminum nexus ve-  
 • recunda confessio peccatorum. » Ipse sanctus Doctor  
 confessiones secretas audiebat, narrante in Vita ejus Pau-  
 lino. Quotiescumque aliquis, ad percipiendam pœniten-  
 tiam, lapsus suos apud illum confitebatur, ita flebat,  
 « ut illum flere compelleret... Causas autem criminum  
 • quas illi confitebantur, nulli, nisi Domino soli apud  
 • quem intercedebat, loquebatur. » Patet ex illo facto  
 confessionem secretam fuisse in usu et necessariam ad  
 percipiendam pœnitentiam.

S. Leo, Epist. 136 : « Sufficit reatus conscientiarum  
 • solis sacerdotibus indicari confessione secreta : » dam-

nat abusum peccata publice recitandi, quod nonnulli arbitrabantur necessarium.

Innumera alia afferri possent testimonia : in his autem quæ retulimus agitur evidenter de confessione exteriori, explicita et jure divino necessaria, non vero de interna soli Deo facta, de generali et vaga, aut de confessione auctoritate humana præscripta, ut volunt hæretici.

1° De exteriori; siquidem facienda est sacerdoti, peccatum ex anima evomitur, secreta aperienda sunt, etc. 2° De explicita; alioquin non daretur erubescendi locus, nec diceretur peccata sola cogitatione admissa esse declaranda, homines decipi posse, non Deum qui intuetur cor. 3° De confessione jure divino necessaria, etenim SS. Patres, non decreto Ecclesiæ aut alio instituto humano, sed verbis Evangelii hanc obligationem fundatam esse dicunt vel supponunt : ergo, etc. Ergo 3°:

4° *Probatur argumento præscriptionis.* Usus et præceptum confessionis existit tum apud Latinos, tum apud Græcos, tum apud alios Orientales. Quoad Latinos, nulla est difficultas; factum patet. Quoad Græcos, idem constat 1° ex eorum euchologiis; 2° ex censura qua Jeremias patriarcha Constantinopolitanus doctrinam Lutheranorum perstrinxit, et ex synodo Bethleem habita, anno 1672, in qua error iste proscriptus est; 3° ex concil. Florent. anno 1438 celebrato, in quo, post maturum examen, pronuntiata est unio utriusque Ecclesiæ. Quoad alios Orientales, videlicet Armenios, Nestorianos, Eutychianos, Melchitas, Jacobitas, Cophtas, Maronitas, quorum alii sunt catholici, alii hæretici, eadem veritas ex liturgiis eorum constat, ut videre est in opere dicto *Perpétuité de la foi*, etc. Porro talis consensus omnium ecclesiarum Orientalium catholicarum, schismaticarum et hæreticarum cum ecclesia Latina, demonstrat confessionem semper fuisse in usu et ab ipsis Apostolis transmissam; vel enim ab Apostolis fuit transmissa, vel decursu temporis instituta: at posterius dici non potest; si enim decursu temporis fuisset instituta, aliquod vestigium hujus institutionis inveniretur, præsertim cum talis innovatio facile admitti non debuisset:



atqui tamen nullum hujusmodi vestigium inveniri potuit. Præterea, si institutio ista commenta fuisset in ecclesia Romana, ut affirmare non erubescunt Protestantes, quomodo Græci et tot ecclesiæ Orientales, a seipsis divisæ, eam simul ita adoptassent ut sibi persuaderent institutam esse a Christo et necessariam jure divino? Id manifeste repugnat. Ergo.

5° *Prob. ratione.* 1° Fatentur adversarii confessionem publicam, saltem peccatorum publice commissorum, olim fuisse præscriptam : atqui talis praxis supponit omnes persuasum habuisse confessionem sacramentalem a Christo institutam fuisse; supposita quippe institutione divina, facile concipitur fideles jugo tam gravi se subjecisse : at si credidissent præceptum istud in jure divino nullum habere fundamentum, numquid omnes ita paruissent? Hoc incredibile est, attentæ humanæ naturæ repugnantia ad confessionem probrosam.

2° Certum est dari medium obtinendi remissionem peccatorum post Baptismum commissorum : at confessio ipsismet Protestantibus videri debet via tutior hanc remissionem obtinendi, et sedandis anxietatibus conscientiarum multo expeditior. Protestans enim, principiis suis stando, quomodo sciet se sufficienter esse dispositum, se esse justificatum? Quam inveniet consolationem in tribulationibus cordis? Catholicus, e contra, cor suum pandens confessario, illum habebit amicum, patrem, consolatorem, ducem et adiutorem; consilia ejus sequendo, securus manebit : ergo saltem conveniens et rationabilis est confessio, etc. aliunde, etc. Ergo.

*Solvuntur objectiones.*

*Obj.* 1°. Confessio non præcipitur in Scriptura : ergo non necessaria est jure divino.

*R.* 1°. *Dist. ant.* Non præcipitur expresse, *conc.* implicite et æquivalenter, *nego ant.* Probavimus enim obligationem confessionis optime deduci ex verbis Christi, *Quorum remiseritis*, etc. Ergo.

*R. 2º. Nego conseq.* Nam præter Scripturam, traditio altera est regula fidei, et multa sunt revelata a Christo instituta quæ in Scripturis non leguntur. Ergo.

*Obj. 2º.* Nullibi legitur Apostolos confessiones excepisse, vel ipsos ad confessionem recurrisse : ergo incredibile est præceptum confessionis tempore Apostolorum exstitisse.

*R. 1º.* Multi theologi et D. *Fleury* probant usum confessionis tempore Apostolorum exstitisse per hæc Actuum Apostolorum verba, XIX, 18 : *Multi credentium veniebant, confitentes et annuntiantes actus suos.* Ibi agitur de peccatis *credentium*, ac proinde post Baptismum commissis. Alii tamen dicunt verbum *credentium* intelligi posse de nondum baptizatis qui peccata sua aliquo sensu confitebantur ut ad suscipiendum Baptismum se præparent. *Hac igitur responsione prætermitta,*

*R. 2º. Nego conseq. 1º.* Quia inprimis prædicare, docere, baptizare, manus imponere aliaque officia muneris apostolici implere debebant Apostoli, raro autem confessiones fidelium excipere, præsertim cum in his felicissimis temporibus fere nullus gratiam Baptismatis amitteret. 2º Quia multa fecerunt Apostoli quæ non fuerunt scripta : præcepto Domini obtemperantes, docebant servare quæcumque ipsis mandaverat, et parum solliciti erant an actus sui scriberentur. Liber Actuum Apostolorum præcipua tantum gesta Petri et Pauli continet et de aliis fere nihil refert; insulse ergo concluderetur ex silentio ejus Apostolos confessiones non excepisse, vel ipsos confessione non usos esse, quanquam forte illa non indiguerint; nam, juxta probabilem sententiam, erant confirmati in gratia. Ergo.

*Obj. 3º.* Christus dedit Apostolis eorumque successoribus potestatem remittendi peccata venialia : atqui tamen nulla est obligatio ea declarandi : ergo *a pari*, etc.

*R. Nego conseq. et paritatem. Ratio disparitatis est,* quod peccata venialia cælum proprie non claudant : igitur, qui tantum venialia habent, ministerio clavium non indigent ut aliquando cælum ingrediantur. Contra vero

cœlum obseratur iis qui peccato mortali commaculantur : ergo recurrere debent ad janitorem, ut ipsis eis aperiatur.

*Inst.* Apostoli eorumque successorès acceperunt a Christo potestatem remittendi vel retinendi peccata in Baptismo, sacramentum illud concedendo vel negando : attamen confessio non est necessaria ad Baptismum : ergo *a pari*, etc.

*R. Nego conseq. et paritatem.* Disparitas in eo sita est, quod sacramentum Pœnitentiæ, ex institutione sua, per modum iudicii exerceri debeat ; supponit ergo jurisdictionem in subditos judicandos : porro Ecclesia non habet jurisdictionem in eos qui non sunt baptizati : ergo Baptismus administrari non potest per modum iudicii. Unde laici jurisdictionis ecclesiasticæ incapaces ipsæque mulieres valide baptizant. Ergo licet confessio ad Baptismum non requiratur, non sequitur illam, etc.

*Obj. 4º.* Nectarius patriarcha Constantinopolit. versus finem quarti sæculi, abrogavit confessionem : ergo non arbitrabatur illam esse jure divino necessariam.

*R. Dist. ant.* Abrogavit confessionem publicam, *conc. secretam, nego ant.* Ad intelligentiam istius facti quod Protestantes singulariter ventitant, sciendum est episcopos tempore Novatianorum sacerdotem pœnitentiarium præfecisse, ut qui lapsi essent, coram illo delicta confiterentur. Quædam mulier ad pœnitentiarium presbyterum accedens, delicta post Baptismum commissa a se perpetrata confessa est. « Presbyter vero præcepit illi ut » jejuniis et orationibus continuis vacaret, quo scilicet » una cum delictorum confessione opus etiam pœnitentiæ » conveniens ostenderet. Progressu temporis mulier aliud » facinus confessa est, ecclesiæ videlicet diaconum cum » ipsa stupri consuetudinem habuisse. » Sunt verba Socratis, Hist. lib. 5, cap. 19. Magnum inde exortum est scandalum in Ecclesia, et populus viros ecclesiasticos hanc ob causam dictæ appeteret. Tunc quidam presbyter nomine Eudemon suasit Nectario ut presbyterum pœnitentiarium expungeret, et unumquemque, pro

*arbitrio et animi sui conscientia, ad sacramentorum communionem sineret accedere.* Sozomenus factum istud eodem modo refert, lib. 7, cap. 16. Illo igitur admissio ut vero, non sequitur Nectarium confessionem secretam abrogasse. Nam 1° abrogavit quod tempore Novatianorum institutum fuerat; at confessio secreta tempore Novatianorum non fuerat instituta, siquidem antea in usu erat, ut patet testimonio Origenis et S. Cyp. 2° Abrogavit quod fuerat occasio scandali : atqui sola confessio publica mulieris causa fuerat scandali. 3° Confessio secreta semper fuit in usu post Nectarium, ut constat testimonio S. Chrysost. ejus successoris, a nobis superius allato et constanti praxi Græcorum. Ergo.

Cæterum, ex ipsomet facto mulieris et pœnitentiarîi, constat confessionem auricularem tunc in usu fuisse; siquidem dicta mulier prius secrete confessa est *delicta a se perpetrata*.

Dicitur autem Nectarium permisisse *unumquemque, pro arbitrio et animi sui conscientia, ad sacramentorum communionem accedere*; non quod æstimaret confessionem ad remissionem peccatorum necessariam non esse jure divino, sed quia licentiam unicuique dabat illa uti vel non uti, prout agnosceret se esse sontem vel insontem.

*Inst.* S. Chrysost. pluribus in locis, et præsertim Homilia 3 de Pœnit. n. 4, ubi hoc habet : *Deo soli dic peccatum tuum, et dimittetur tibi*, a confessione retrahere videtur : ergo confessio etiam secreta a Nectario fuerat abrogata.

*R. Dist. ant.* A confessione publica retrahere videtur, *conc.* a confessione secreta, *nego ant.* Etenim S. Chrysost. vestigiis antecessoris sui inhærendo, confessionem publicam reprobare debuit : atqui revera solam confessionem publicam reprobavit; ab illa enim sola in textu allato in aliisque similibus retrahebat, non vero a confessione secreta quæ semper in usu fuit Constantinopoli sicut alibi, et cujus necessitatem ipse agnoscit, v. g. in loco a nobis superius citato et in aliis quæ citari possent. Si ergo dicat soli Deo peccata esse declaranda, vel 1° ibi loquitur de



virtute pœnitentiæ, ut quibusdam placet, et tunc confessionem sacramentalem non excludit; vel 2º quia sacerdos locum Dei tenet, et, ratione secreti, peccata ei dicere in confessione, perinde est ac si Deo soli dicerentur; præsertim cum in liturgia græca, referente P. Goar, in suo *Encologio græcorum*, presbyter apud Græcos pœnitentem ad se accedentem sic alloquatur: « Frater, utquid ad Deum et ad me accessisti? Ne verearis; non enim mihi, » sed Deo coram quo stas, peccata tua enuntias. »

Eodem sensu explicari debent alii textus SS. Patrum qui a Protestantibus nobis obijciuntur, id est, de confessione publica, non vero de secreta: sic 1º S. Greg. Nysenus dicit *peccata avaritiæ* a patribus fuisse prætermissa, quia in canonibus publicis pœnitentiariis non fuerant submissa. 2º Venerabilis Beda a iugo confessionis eximit eos qui a religione per idololatriam, hæresim vel schisma non defecerant, id est, a iugo confessionis publicæ: nam ipse necessitatem confessionis secretæ in *Commentario in cap. 5 Epist. S. Jacobi* agnoscit, his verbis: *Neque enim sine confessione peccata queunt dimitti.*

*Obj. 5º.* Gratianus, *Decret. causa 33, quæst. 3, dist. 1, cap. 89, expendit an sola contritione cordis et secreta satisfactione, absque oris confessione, quisquam possit Deo satisfacere.* Postea duplicem refert opinionem tunc exstantem, unam affirmantem et alteram negantem: ergo tunc non credebatur confessionem esse necessariam.

*R. Nego conseq.* Nam Gratianus non movet quæstionem de necessitate confessionis ex institutione Christi ad salutem, sed de efficacia contritionis: si contritio perfecta ad sacramentum semper prærequiratur, confessio oris non erit necessaria in re ad justificationem, sed tantum in voto; secus, necessaria esset in re. Porro nos ipsi diximus duplicem esse theologorum sententiam circa hanc quæstionem. Quod talis sit Gratiani sensus, patet tum ex titulo hujus dist. tum ex ipsius verbis, cap. 37: *Non ergo in confessione remittitur quod jam remissum esse probatur;* tum ex eo quod utriusque partis defensores appellet *sapientes et religiosos*, dum qui necessitatem con-

fessionis eo tempore negarunt, ab aliis scriptoribus vocati sunt *audaces, præsumptuosi, perversi, hæretici, sectarii*. Ergo.

*Objicitur* Seneca glossator Gratiani, qui dubitare videtur an confessio non fuerit instituta quadam universali Ecclesiæ traditione; sed omnes fatentur illum nullam mereri fidem.

S. Thomas, S. Bonaventura et S. Antoninus Gratianum in loco citato de necessitate confessionis interpretantur, et illum excusant, quia nondum definitum erat confessionem esse necessariam jure divino. Verum inde sequeretur ad summum Gratianum clare non fuisse locutum, aut præfatos auctores illum attente non legisse. Quidquid sit, quamvis dogma confessionis hoc tempore nondum fuerit aliquo canone expresse definitum, certum est illud ubique fuisse receptum.

*Obj.* 6°. Concilium Lateranense primo condidit præceptum de confessione facienda: ergo dogma confessionis non erat ubique receptum tanquam jure divino fundatum.

*R.* 1°. *Nego ant.* Pluribus enim factis demonstratur confessionem sacramentalem non solum fuisse in usu, sed et præceptam longe ante concilium Lateranense. 1° Jam memoravimus exemplum S. Amb. confessiones secretas excipientis. 2° S. Eligius, in sexto sæculo, confessionem generalem omnium peccatorum vitæ suæ fecit apud sacerdotem; *Fleury*, l. 37, n. 38. 3° S. Fructuosus, abbas Complutensis, anno 670 defunctus, in regula sua, confessionem generalem præscribit novitiis qui ante ingressum in monasterium gravia commiserant peccata; *ibid.* l. 39, 23. 4° S. Chrodegang, episcopus Metensis, monasterium clericorum regularium instituit versus annum 763, et inter regulas quas eis præscripsit, jussit ut singulis in anno peccata sua confiterentur episcopo, initio Quadragesimæ, et a medio mensis augusti ad primam diem novembris. In aliis temporibus, sive episcopo, sive sacerdoti, pro utilitate sua, confessionem suam facere poterant: ipsis expresse et sub gravibus pœnis vetatur ne

aliquod taceant peccatum ; ibid. l. 43, n. 39. 5° Theodolphus, episcopus Aùrelianensis, in suo Capitulario, anni 785, dicit omnia peccata etiam cogitationum esse confitenda sacerdoti, et jubet sub pœna excommunicationis ut, qui perjurium, falsum testimonium, adulterium fornicationem, homicidium aliaque gravia peccata admisserunt, ea confiteantur et canonicam expleant pœnitentiam ; ibid. l. 44, n. 23. 6° In concilio Cabillonensi, anni 813, redarguuntur qui integre non confitentur, et declaratur eos monendos esse de obligatione confitendi peccata interna sicut et externa ; *Labbe*, t. 7. Multa alia hujus generis facta reperiuntur, tum in historia ecclesiastica, tum in auctoribus qui de necessitate confessionis fusius tractant.

*R. 2° Nego conseq.* Ecclesia enim potest instituere leges ad urgendam præceptorum divinorum observationem, vel ad determinandum tempus quo impleri debeant; ea intentione tulit præceptum de communione Paschali, licet rata fuisset dari præceptum divinum ad sacram synaxim accedendi. Ergo similiter persuasum habens confessionem esse jure divino necessariam, potuit nihilominus eam præcipere, v. g. determinando tempus ultra quod obligatio illius non protraheretur. Porro talem fuisse mentem concilii Lateranensis confessionem annuam præcipientis asserit concil. Trid. sess. 14, cap. 5 :  
 « Neque per Lateranense concilium Ecclesia statuit ut  
 » Christi fideles confiterentur, quod jure divino necessarium et institutum esse intellexerat; sed ut præceptum  
 » confessionis, saltem semel in anno ab omnibus et singulis, cum ad annos discretionis pervenissent, imple-  
 » retur. » Ergo.

*Sequitur ex dictis*, reum peccati mortalis, post Baptismum commissi, justificari non posse sine confessione in re saltem cum attritione, vel in voto cum charitate perfecta : qui autem necessitatem confessionis invincibiliter ignoraret, et de peccatis suis propter amorem Dei conterreretur, nihilominus justificationem obtineret; Deum

enim perfecte amare non potest quin paratus sit omnia ipsius mandata observare : porro in tali dispositione cordis votum confessionis existit : ergo.

*Quæritur* 1° quo tempore præceptum divinum confessionis obliget ?

*R.* 1°. Reus peccati mortalis tenetur habere propositum confitendi, quando tenetur habere contritionem, quia propositum confitendi est annexum contritioni : tenetur autem habere contritionem, saltem sub veniali, ut supra diximus, statim atque peccata memoriæ occurrunt.

*R.* 2°. Ad confessionem tenetur per se in articulo et etiam in periculo mortis; de natura enim est præcepti positivi ut obliget saltem in casu necessitatis : hinc miles ante prælium, navigatores ante periculosam navigationem in qua deerit copia confessarii, mulier gravida ante primum partum, nisi rationabiliter præsumere possit se partum periculosum non experturam, aut quæ jam partus difficiles experta est, et generaliter quicumque verisimiliter putant se amplius non habituros opportunitatem confitendi, tenentur confiteri si sint in peccato mortali.

*R.* 3° eum ad confessionem teneri per accidens, quando ad aliquid tenetur quod non potest sine peccato facere, nisi confessus ; v. g. Eucharistiam percipere, sacramentum administrare, etc.

Extra hos casus autem quanto tempore reus peccati mortalis confessionem differre possit, non constat. Probabilius videtur 1° peccare venialiter, eam notabili tempore differendo, nisi perfecte conteratur, quia sollicitudo propriæ salutis et zelus gloriæ Dei expostulant ut in statu peccati mortalis diu non maneat. 2° Probabilius mortaliter contra jus divinum peccaret, si per annum integrum non confiteretur ; nam Ecclesia confessionem saltem annuam præcipiendo, tempus quo præceptum divinum obligaret determinare voluit. *Ita communius theologi* apud Ligorio, l. 6, n. 663. 3° Nihil inveni ex quo judicari possit eos qui semel in anno tantum confitentur, licet mortalia ha-



beant, mortaliter contra præceptum divinum peccare : igitur, ut ait *Billuart*, hoc relinquendum est iudicio prudentum.

*Quæritur* 2º utrum confessio ex institutione divina debeat esse publica vel secreta?

*R* 1º modum confitendi a Christo non fuisse determinatum. Unde per confessionem secretam præcepto divino satisfit, ut expresse definit concil. Trid. sess. 14, can. 6 : « Si quis dixerit modum secrete confitendi soli » sacerdoti, quem Ecclesia Catholica ab initio semper » observavit et observat, alienum esse ab institutione et » mandato Christi, et inventum esse humanum : anathema sit. »

*R*. 2º. Nunquam exstitit obligatio peccata occulta publice confitendi. Patet 1º ex concil. Trid. sess. 14, cap. 5 : « Non satis consulte humana lege præciperetur ut delicta, præsertim secreta, publica essent confessione aperienda. » Ecclesia autem nihil inconsulte facit. 2º Ex pluribus testimoniis SS. Patrum supra relatis.

*R*. 3º. Certum est peccata publica, quædam etiam occulta, pœnitentiæ publicæ canonibus statutæ olim subiecta fuisse : id patet ex historia ecclesiastica, ex SS. Patribus et conciliis : at non ita constat confessionem publicam etiam peccatorum non occultorum stricte præscriptam fuisse ; videmus quidem morem quædam peccata publice confitendi, sive ex mandato Ecclesiæ, sive ex fervore pœnitentium, sive confessario adhortante, per plura sæcula viguisse : nihil amplius novimus. Ergo.

#### PROPOSITIO SECUNDA.

*Confessio sacramentalis necessaria est jure ecclesiastico.*

*Prob.* Illud necessarium est jure ecclesiastico quod ab Ecclesia fuit præscriptum : atqui confessio sacramentalis ab Ecclesia fuit præscripta, nempe in concilio Lateranensi IV, anno 1215, sub Innocentio III celebrato, can. 21, his verbis : « Omnis utriusque sexus fidelis, postquam » ad annos discretionis pervenerit, omnia sua solus pec-

» cata, saltem semel in anno, confiteatur fideliter proprio  
 » sacerdoti, et injunctam pœnitentiam studeat pro viri-  
 » bus adimplere.... alioquin et vivens ab ingressu eccle-  
 » siæ arceatur, et moriens Christiana careat sepultura. »  
 Ergo.

Concil. Trid. sess. 14, can. 8, anathemate percutit eos  
 qui dicerent ad confessionem « non teneri omnes et sin-  
 » gulos utriusque sexus Christi fideles, juxta magni con-  
 » cili Lateranensis constitutionem, semel in anno. » Ergo.

Ex ipsismet concilii Lateranensis verbis plures nascun-  
 tur difficultates quæ proponendæ et solvendæ sunt.

*Quæritur* 1º an præceptum annuæ confessionis obliget  
 sub gravi?

*R. affirmative*; idque patet tum ex gravitate materiæ,  
 tum ex pœnis in concilio Lateranensi decretis, scilicet ex-  
 communicatione et privatione sepulturæ ecclesiasticæ :  
 illæ pœnæ sunt quidem ferendæ, et non latæ sententiæ :  
 attamen juxta omnes theologos, gravem denotant obliga-  
 tionem. Ergo.

*Quæritur* 2º quoniam præcepto confessionis teneantur?

*R.* Per verba, *omnis utriusque sexus fidelis*, omnes intel-  
 liguntur viri et mulieres qui fuerunt baptizati, et peccati  
 sunt capaces, juvenes et senes, indocti et docti, laici et  
 clerici, etiam parochi, episcopi ipseque papa; nullus  
 Christianus excipitur. *Postquam ad annos discretionis per-*  
*venerit*, id est, cum sufficientem habuerit usum rationis  
 ut peccare possit, proindeque, in regionibus nostris, circa  
 annum septimum. Unde curare debent parochi ut infan-  
 tes sibi commissi hac ætate peccata sua confiteri incipiant,  
 et si quem peccati mortalis jam reum inveniant confes-  
 sarii, eum ad absolutionem sacramentalem quamprimum  
 suscipiendam pro posse suo disponant, ne forte imparatus  
 decedat et æternaliter pereat.

*Quæritur* 3º an qui nullius peccati mortalis conscius  
 est, nihilominus præcepto confessionis teneatur?

*R.* 1º. Certum est illum præcepto divino non teneri :  
*patet ex dictis*, et omnes id fatentur, modo certus sit se  
 venialia tantum habere; nam in dubio, ad confessionem

teneretur. 2° Quoad præceptum ecclesiasticum, omnes pariter fatentur quod, in dubio de mortali aut veniali, confessio sit necessaria. Si vero, omnibus perpensis, certum sit nullum esse peccatum mortale, plurimi dicunt præceptum Lateranense applicationem non habere. Nam, inquiunt, 1° concil. Trid. sess. 14, cap. 5, dicit, « nihil aliud in Ecclesia a pœnitentibus exigere quam ut » quisque ea peccata confiteatur quibus se Dominum et » Deum suum mortaliter offendisse meminerit. » 2° Ex axioma, *odia sunt restringenda*, dici non potest dari obligationem confitendi peccata venialia, nisi lege ecclesiastica clare exprimatur : atqui hæc obligatio clare non exprimitur, ut ex textu canonis patet : ergo. 3° Fatentibus adversariis, qui simul haberet mortalia et venialia, venialia confiteri non teneretur : ergo fidelis non tenetur vi præcepti ecclesiastici venialia confiteri. Ergo. Ita expresse Billuart, Tournely, Ligorio, l. 6, n. 667, multos alios citans.

Alii autem opinantur eos qui peccata venialia solummodo habent, nihilominus ad confessionem annuam teneri. 1° Quia lex ecclesiastica est generalis, et de obligatione confitendi omnia peccata, sine ulla distinctione, loquitur. 2° Quia in dubio an peccatum sit mortale vel veniale, datur, juxta omnes, obligatio illud confitendi : at temerarium foret pronuntiare, quando confessio per totum annum protrahitur, nullum dari peccatum mortale, nequidem dubium. 3° Quia in dubio pars tutior eligenda est : at, in præsentī casu, saltem aliquod est dubium : ergo. Sic S. Thomas, S. Bonaventura, Sylvius, Habert, Collet, Bailly, Theol. Rotomag. alique plures. Prior sententia probabilior mihi videtur : at posterior est tutior ac proinde sola in praxi tenenda.

*Queritur* 4° quandonam illud præceptum obliget?

*R.* Obligat semel in anno ; tempus autem non fuit aliter determinatum : unde qui confessionem ultra annum integrum protraheret, contra præceptum ecclesiasticum mortaliter peccaret. Conc. Trid. sess. 14, cap. 3, sub fine, dicit morem « confitendi, sacro illo et maxime accepta-

» bili tempore Quadragesimæ, esse salutarem, quem  
» sancta synodus maxime probat et amplectitur, tan-  
» quam pium et merito retinendum. » Cum sacra com-  
munio, ex Ecclesiæ præcepto, tempore paschali susci-  
pienda sit, mos invaluit ut confessio annua, tanquam  
illius præparatio, eodem fieret tempore. Unde cuncta ri-  
tualia nostra illam præcipiunt pro tempore paschali, sci-  
licet, a dominica Palmarum ad dominicam in Albis inclu-  
sive. Clerus Gallicanus declaravit, in comitiis generalibus  
annorum 1625, 1635, et 1646, omnes tunc temporis teneri  
proprio sacerdoti, vel alieno, de consensu ejus, confiteri.

Licet tamen, ex usu, confessiones audire et absolutio-  
nem in ordine ad communionem paschalem impertire  
tota die sabbati ante dominicam Palmarum, et non video  
cur nonnullis præcedentibus diebus idem non liceret;  
Clerus enim Gallicanus tempus Paschatis assignavit, ut  
confessio annua esset præparatio ad communionem : si  
autem paucis diebus ante initium Paschatis rite fiat in  
ordine ad communionem paschalem, et status gratiæ non  
amittatur, nonne finis statuti obtinetur?

Confessarius prævidens fore ut pœnitens, certis habiti-  
bus peccandi deditus, tempore paschali absolvi non pos-  
sit, illum ultra conclusionem Paschatis statim remittere  
potest, nec requiritur ut eum hoc tempore audiat : præ-  
ceptum quippe per solam susceptionem sacramenti im-  
pletur : porro sacramentum in eo casu suscipi non potest,  
ut supponitur : ergo.

Qui voluntarie in causa est cur sacramentum sibi dif-  
feratur, contra præceptum Ecclesiæ mortaliter peccavit,  
et, nisi studeat pro viribus ad illud se præparare, iterum  
atque iterum peccabit; nam, transacto tempore pas-  
chali, præceptum annuæ confessionis semper urget, et  
quamprimum impleri debet. Unde qui, legitime impe-  
ditus, confessionem tempore Paschatis omisit, non pec-  
cavit : at, impedimento sublato, tenetur sub peccato  
mortali quamprimum moraliter satisfacere præcepto.  
Verum unica confessione rite facta, pro pluribus an-  
nis præteritis simul satisfacit. Qui prævidet copiam



confessarii sibi defuturam, tempus prævenire debet.

Datur insuper aliud præceptum ecclesiasticum in conc. Trid. sess. 13, c. 7 et can. 11, expressum de confessione sacramentali facienda ab iis qui, peccati mortalis conscii, sacram Eucharistiam suscepturi vel missam celebraturi sunt.

*Quæritur 5º an qui decursu anni confessus est iterum confiteri teneatur tempore paschali?*

*R.* 1º. Si mortaliter peccaverit, procul dubio confiteri tenetur ut ad susceptionem Eucharistiæ se disponat. 2º. Etiam si nullius peccati mortalis esset conscius, saltem confessario se sistere, ut statum animæ suæ ei aperiret, et venialia confiteri deberet, juxta id quod superius diximus.

*Quæritur 6º an præcepto ecclesiastico per confessionem nullam satisfiat?*

*R.* 1º. Quidam probabilistæ affirmare non erubuerunt satisfieri præcepto Ecclesiæ per confessionem voluntarie nullam: verum Alexander VII et clerus Gallicanus hanc damnaverunt assertionem a qua ipsa ratio abhorret. 2º. Nec per confessionem involuntarie nullam vel cui deest absolutio sacramentalis, dicto satisfit præcepto; nam Ecclesia non nudam peccatorum declarationem, sed sacramentum pœnitentiæ completum, cum Deo reconcilians, præcipit. Ergo.

*Quæritur 7º quis intelligendus sit per proprium sacerdotem de quo loquitur conc. Lat.?*

*R.* Is intelligendus est qui habet ordinariam jurisdictionem in pœnitentem, proindeque summus Pontifex respectu omnium Christianorum, episcopus respectu diœcesanorum, parochus respectu parochianorum, et quilibet superior regularis, ut abbas, prior, guardianus, rector, respectu subditorum, proprius est sacerdos. Unde fidelis qui confessionem annuam seu paschalem alieno sacerdoti facere intendit, licentiam obtinere debet a parochio vel ab episcopo. De hoc iterum agemus, ubi de jurisdictione.

## ARTICULUS SECUNDUS.

## DE CONDITIONIBUS CONFESSIONIS.

Sexdecim conditiones confessioni sacramentali plures assignant theologi; alii vero communius aut saltem simplicius eas ad quatuor reducunt, sequenti versu contentas :

Integra sit, simplex, humilis, parere parata.

1° *Integra*. Probavimus enim confessionem jure divino necessariam esse ad obtinendam justificationem post Baptismum : porro, cum unicum peccatum mortale gratiam sanctificantem destruat, si plura admissa fuerint peccata mortalia, omnia clavibus Ecclesiæ subjici debent, ad recuperandam gratiam.

2° *Simplex* ; id est, non verbis fucata nec figuris adornata, sed nuda, clara et brevis peccatorum declaratio.

3° *Humilis*. Cum enim in ordine ad reconciliationem fiat, procedere debet ex intimo sensu indignitatis et sincero dolore cordis ; nec igitur excusationes quærere debet pœnitens, culpas minuendo, eas dæmoni, sociis, naturæ corruptæ, etc. tribuendo.

4° *Parere parata*. Peccator enim humiliter se accusans et gratiam reconciliationis expostulans, voluntatem habere debet parendi mandatis confessarii tanquam judicis sententiam proferentis : cum illo igitur non sit contentiosus, disceptans, consilia, objurgationes ægre ferens.

De integritate paulo fusius dicendum est, et inquiremus 1° an confessio debeat esse integra quoad numerum, species et circumstantias ; 2° quænam causæ ab integritate confessionis excusent ; 3° an declaranda sint peccata dubia ; 4° an peccata jam confessa ; 5° quandonam facienda sit confessio generalis ; 6° an confitendum sit peccatum cum periculo manifestandi complicem ; 7° an confessio per litteras sufficiat.

§ I. — De integritate confessionis quoad numerum, species et circumstantias.

Duplici modo confessio potest esse integra, scilicet, materialiter et moraliter : est integra materialiter, si omnia peccata mortalia declarentur, sine ulla exceptione voluntaria aut involuntaria : est autem moraliter integra, quando pœnitens nullum tacet peccatum mortale omissione graviter culpabili.

Certum est integritatem materiale non semper necessariam esse ; nam sæpe est impossibilis : Deus autem impossibilia non jubet. Sufficit ergo integritas moralis. Id conc. Trid. confirmavit, sess. 14, cap. 5, dicens : « Constat nihil aliud in Ecclesia a pœnitentibus exigi, » quam ut, postquam quisque diligentius se excusserit, » et conscientiae suae sinus omnes et latebras exploraverit, » ea peccata confiteatur quibus se Dominum et Deum » suum mortaliter offendisse meminerit : reliqua autem » peccata quæ diligenter cogitanti non occurrunt, in uni- » versum eadem confessione inclusa esse intelliguntur. » Unde oblivio peccati mortalis non excusatur, nisi serium præmissum fuerit examen. *His notatis*, sit

PROPOSITIO.

*Confessio jure divino debet esse integra quoad numerum, species et circumstantias peccatorum, saltem mutantes speciem, quantum pœnitens moraliter potest.*

*Prob.* 1°. Hæc propositio fundatur concilio Lateranensi IV, can. *Omnis utriusque sexus*, etc. Conc. Florent. in Decreto ad Armenos, et præsertim concilio Tridentino sic se habente, sess. 14, can. 7 : « Si quis dixerit in sacra- » mento pœnitentiæ, ad remissionem peccatorum neces- » sarium non esse jure divino confiteri omnia et singula » peccata mortalia, quorum memoria cum debita et dili- » genti præmeditatione habeatur, etiam occulta et quæ » sunt contra duo ultima Decalogi præcepta, et circum- » stantias quæ speciem peccati mutant.... anathema sit. »

2° Sixtus IV confirmavit, anno 1479, decretum episcopi Toletani, damnantis errores Petri Osmensis, qui negabat dari obligationem jure divino confitendi peccata in specie, sed tantum, aiebat, jure ecclesiastico.

3° Idem constat ex textibus SS. Patrum a nobis superius allatis, ut unusquisque attendendo observare potest. Ergo.

4° Hæc autem integritas fundatur verbis Christi sacramentum Pœnitentiæ instituentis, *Quorum remiseritis etc. et quorum retinueritis, retenta sunt*. Ostendimus nasci ex his verbis obligationem confitendi peccata ut remittantur: quæ ergo culpabiliter tacentur, remitti non possunt: unde vel unum ex verecundia celare peccatum mortale, horrendum est sacrilegium.

*Notandum est*, cuncta peccata mortalia eidem confessorio aperienda esse, nec sufficeret quædam uni sacerdoti et cætera alteri declarare: cum alia sine aliis remitti non possint, confessio dimidiari nequit.

Dixi 1° *quoad numerum*; id est, 1° si pœnitens sciat numerum certum, illum in magna sinceritate dicat, nec augendo, nec minuendo, non tamen ea singulatim contendo; sufficit ut omnia ejusdem speciei simul enuntiet, dicens v. g. Ter pejeravi, quinquies omisi jejunium in Quadragesima, etc. 2° Si numerus certus illi non occurrat, quem a certo minus distare æstimabit assignet, addendo vocem circiter, v. g. Decies circiter nomen Dei blasphemavi, de superiore meo coram decem personis circiter detraxi, hoc vel illud dicendo, etc. 3° Si propter nimiam peccatorum multitudinem, nequidem numerus incertus circiter determinari possit, ut communiter accidit iis qui consuetudinem frequenter peccandi habuerunt, maxime si a multis annis confessionem omiserint, sufficit ut dicat se tot vicibus circiter in talia vel in talia peccata incidisse per dies, per hebdomades, per menses, aut etiam per annos, v. g. A triginta annis circiter novies aut decies inebriatus sum singulis annis. 4° Ubi de peccatis internis agitur, sæpe sufficit ut consuetudinariis dicat se paratum fuisse cogitationi aut desiderio talis vel talis peccati consentire quoties memoria illius sibi



occurrerebat, et frequenter sibi occurrisset. 5° Qui numerum certum declaravit, et postea advertit se plura quam dixit admisisse peccata, quæ supersunt declarare tenetur : *patet ex dictis*; qui vero numerum approximantem declaravit, ea quæ postea advertit confiteri non tenetur, si numerum assignatum notabiliter non excedant. Hinc qui confessus est se duodecies blasphemasse circiter, et advertit hoc sibi quindecies accidisse, ad novam declarationem non tenetur; teneretur vero si adverteret hoc vigesies accidisse.

Dixi 2° *quoad species* : patet ex can. conc. Trid. et alioquin confessarius statum poenitentis sufficienter non agnosceret; aliud quippe est, v. g. Deum blasphemavisse, aliud de proximo detraxisse, aliud hominem vulnerasse, aliud eum occidisse; aliud adulterium, aliud fornicationem commisisse, etc.

Dixi 3° *circumstantias speciem mutant* : constat iterum ex citato canone conc. Trid. et evidenter sequitur ex necessitate declarandi species : hinc aliquis turpia fecit in ecclesia, non solum actus turpes, sed et circumstantiam sacrilegii declarare tenetur. Unde qui peccatum declarando circumstantiam omisit, peccatum iterum declarare tenetur ut circumstantiam aperiat.

Dixi 4° *saltem speciem mutant*, ut a circumstantiis notabiliter aggravantibus abstinere in propositione; non enim ita certum est eas necessario aperiendas esse. Multi theologi, inter quos S. Thomas, S. Bonaventura, S. Antoninus, Sylvester, Navarrus, de Lugo, Lessius, Bonacina, Ligorio, etc. negant, et *Billuart* sententiam illorum æstimat probabilem. Hac præcipue ratione nituntur : cum onus peccata confitendi sit grave, extendi non debet ultra id quod a Christo vel ab Ecclesia fuit præceptum : atqui nec Christus nec Ecclesia declarationem circumstantiarum peccatum intra eandem speciem aggravantium præceperunt. 1° Non Christus, siquidem id non probatur ex Scriptura sacra, neque ex traditione. 2° Non Ecclesia, cum, e contra, sacra synodus Trid. de integritate confessionis agens, circumstantias solummodo aggravantes exceperit.

Cæteri vero theologi docent, non solum ut tutius, quod omnes concedunt, sed ut verum, dari præceptum divinum declarandi in confessione circumstantias notabiliter aggravantes, et sequentibus innituntur rationibus.

1<sup>o</sup> Concilio Tridentino. Quamvis enim concilium definire noluerit dictas circumstantias aperiendas esse, ne in hac sicut in aliis materiis controversis theologos catholicos percuteret; hoc tamen grave fundamentum argumentationis nobis subministrat : decernit cap. 5, circumstantias speciem peccati mutantem accusandas esse, ut confessarii *de gravitate criminum recte censere possint, et poenam quam oportet, pro illis, poenitentibus imponere*. At illa ratio eandem vim habet pro circumstantiis notabiliter aggravantibus ac pro circumstantiis speciem mutantibus : v. g. qui nummum aureum in ecclesia furatus est, præcepto divino confessionis non satisfaceret, dicendo simpliciter se furatum esse. Quis sibi persuadebit illum iisdem verbis satisfacturum, si centum nummos furatus esset? Ergo.

2<sup>o</sup> Ratione. Circumstantia mutans speciem declaranda est, quia novam addit malitiam peccato : sed circumstantia notabiliter aggravans, cum per se ad constituendum peccatum mortale sufficiat, circumstantiæ speciem mutanti æquivalet : ergo.

Quamvis hæc posterior sententia, utpote tutior et fundata, in praxi sit desideranda, non rigore tamen est premenda, quia prior sua probabilitate non caret, et onus confessionis non est aggravandum.

§ II. — De causis ab integritate confessionis excusantibus.

#### PROPOSITIO.

*Impotentia, tum physica, tum moralis, ab integritate confessionis excusat.*

*Prob.* Juxta omnes, confessio non necessaria est ad justificationem, ex institutione Christi, necessitate medii, sed necessitate præcepti : istud autem præceptum sapienter fuit institutum, et contrarium sentire impium

foret; at sapienter non fuisset institutum, si cum impotentia, sive physica, sive morali, obligaret, quia tunc onus intolerabile foret : ergo.

*Hinc* 1° impotentia physica ab integritate confessionis excusantur : 1° qui ex ignorantia inculpabili, aut venialiter tantum culpabili, peccata mortalia obliviscuntur : qui meminit se aliquod grave peccatum admisisse, speciem non recordans, simpliciter dicere potest se mortaliter peccasse. 2° Surdusmutus et linguæ ignarus, si, deficiente idoneo sacerdote, integre confiteri nequeat, satisfaciet ostendendo signis vel nutibus ea quæ poterit sic exprimere peccata : si scribere possit, et periculum revelationis non timeat, integre confiteri tenetur. Id autem facere per interpretem ordinarie non obligatur, quia sola confessio secreta a Christo fuit præscripta : attamen si in periculo mortis constitueretur et aliter confiteri non posset, ministerio interpretis uti deberet ut salutem in tuto collocaret; si tunc aliquis forte inveniretur modus quo interpres peccatum moribundi non intelligeret, certe eligendus esset; v. g. conveniri posset quod interpres pœnitentem interrogaret, dum ille manum sacerdotis sub stragulis positam stringeret ad affirmandum, vel relinqueret ad negandum. 3° Moribundus, si inter confitendum deficiat, in phrenesim incidat, aut aliter confessionem inchoatam perficere non possit, nihilominus absolvendus erit, ut fusius infra dicemus.

*Hinc* 2° impotentia moralis ab integritate confessionis excusat, si grave damnum spirituale aut temporale immineat ipsi pœnitenti, confessario aut alteri tertio. 1° Ipsi pœnitenti, ut si rationabiliter timeat ne ex diuturno examine nascentur motus carnales quibus consentiat, aut si nimis sit scrupulosus in explicandis peccatis, et confessio illi fiat odiosa; tunc confessarius, ubi prudenter judicat id expedire, jubere potest ut interrogationibus suis tantum respondeat. 2° Confessario, v. g. si ob morbum contagiosum periculum sit ne, integram confessionem audiendo, peste inficiatur, tunc, uno vel altero audito peccato, moribundum absolvere potest. Caveat

tamen ne sibi nimis consulens, officio charitatis erga miserum peccatorem in tali extremitate constitutum desit. Item confessionem abrumpere et pœnitentem statim absolvere potest, si hostis illum insequatur, si naufragium aut incendium immineat. 3° Alteri tertio, ut si confessarius peccatum suum declarare non possit quin sigillum confessionis lædat : tunc id unum celare potest quod periculum revelationis constitueret. Unde dicere deberet se mortaliter peccasse, vel contra talem aut talem virtutem deliquisse, si speciem absque periculo declarare possit.

*Notandum est*, peccata ob impotentiam moralem retineri non posse, nisi 1° damnum quod timetur sit grave et certum aut admodum probabile; 2° copia alterius confessarii desit cui integra confessio fieri possit; 3° confessio commode differri nequeat. Peccatum autem justa de causa omissum in sequenti confessione declarandum est, ut satisfiat præcepto integre confitendi, et hæc confessio non multum differenda est, si adsit confessarius cui absque notabili incommodo fieri possit.

Quidam olim arbitrati sunt magnum populi concursum in nonnullis solemnitatibus esse rationem ab integritate confessionis sufficienter excusantem. Verum Innocentius XI hanc proscripsit opinionem, damnando sequentem propositionem : « Licet sacramentaliter absolvere dimidiate tantum confessos, ratione magni concursus pœnitentium, qualis, v. g. potest contingere in die magnæ alicujus festivitatis aut indulgentiæ. »

### § III. — An peccata dubia sint declaranda.

Triplici modo peccata possunt esse dubia, scilicet 1° dubio facti, si nempe dubitetur an peccatum fuerit commissum; 2° dubio juris, si dubitetur an peccatum certo commissum, sit mortale vel veniale; 3° dubio declarationis, videlicet, si quis dubitet an peccatum certo commissum et mortale declaraverit, necne.

In triplici hoc casu peccata dubia declaranda sunt : nam



cum detur obligatio confitendi peccatum mortale, non licet periculo tale peccatum omittendi se exponere: attamen qui peccatum dubium omitteret, tali periculo evidenter se exponeret. Ergo.

Hæc tamen non dicta sint pro scrupulosis qui meras anxietates, omni fundamento destitutas, pro veris dubiis sumere solent, et qui aliunde, ob incommoda inde proventura, ab integritate materiali eximuntur: hortandi sunt ergo ut a dubiis, maxime si de internis agatur, abstineant, et certa duntaxat confiteantur. Si forte quædam gravia inter dubia existant, nihilominus vi absolutionis rite concessæ remittentur.

*Quæritur 1° an absolutio super peccatum dubium concedi possit?*

*R. 1°* Si dubitetur an peccatum, certo commissum, sit mortale, vel an fuerit declaratum, absolutio super illud concedi potest, modo adsit contritio, siquidem peccatum veniale et peccatum jam remissum, est materia sacramenti sufficiens. 2° Si vero dubitetur an peccatum sit commissum, absolutio concedi non potest, nisi aliud declaretur certo commissum, sive veniale, sive jam remissum, cujus habeatur contritio; alioquin materia esset dubia: absolutio autem materiæ dubiæ applicari non potest, extra casum necessitatis: ergo.

*Quæritur 2° an pœnitens, qui confessus est peccatum ut dubium, illud declarare teneatur, si advertat esse certum?*

*R. 1°*. Si confessus est peccatum mortale ut dubium dubio declarationis, dicens se dubitare an illud confessus fuerit, evidens est quod ad novam declarationem non teneatur, etiamsi postea advertat se illud prius non declarasse; illud enim clavibus Ecclesiæ subjecit ut mortale.

*R. 2°*. Si declaraverit peccatum ut dubium an esset mortale vel veniale, nonnulli docent theologi non dari obligationem illud postea declarandi ut certum; quia confessarius de illo judicans, intentionem suam ad solam qualitatem venialis non restrinxit. Ita Dens, t. 6. Tutius est tamen illud iterum declarare: talis est praxis timora-

torum etiam scrupulis non laborantium. Ab ea opinione recedere nollem, et multo minus si ageretur de dubio facti.

*Quæritur* 3<sup>o</sup> ad quid teneatur qui bona fide confessus est peccatum, sive mortale sive veniale, quod non commisit?

*R.* Ad nihil tenetur; non enim peccavit falsam hanc declarationem faciendo, ut supponitur; aliunde peccatum suppositum non est materia sacramenti. Ergo.

*Quæritur* 4<sup>o</sup> quale admittit peccatum qui voluntarie mentitur in confessione?

*R.* 1<sup>o</sup> Qui mentitur, peccatum mortale aut circumstantiam mutantem speciem vel etiam notabiliter aggravantem, et non rite confessum, negando, mortaliter peccat: patet ex dictis de præcepto omnia confitendi peccata. Qui autem negaret peccatum jam rite confessum et remissum, aliquando mortaliter peccaret, si nempe confessarius illum interrogaret ut de consuetudine peccandi, de vocatione, etc. judicaret; aliquando vero, juxta multos, venialiter tantum peccaret, si videlicet confessarius notione hujus peccati opus non haberet, quia tunc claves Ecclesiæ graviter non offenduntur. 2<sup>o</sup> Qui mentitur negando peccatum veniale, probabilius mortaliter non peccat, quia gravis non fit injuria sacramento. Ita de Lugo, Layman, Sylvius, P. Antoine, Billuart, Ligorio, etc. contra plures alios. 3<sup>o</sup> Qui mentitur confitendo peccatum mortale quod non admisit, mortaliter peccat, propter injuriam sacramento illatam. 4<sup>o</sup> Si veniale tantum sibi imponeret, communius dicunt theologi illum solummodo venialiter peccaturum, nisi, ait Sylvius et cæteri post ipsum, falsum hoc peccatum tota esset materia sacramenti: tunc quippe sacramentum voluntarie faceret nullum, quod semper grave est peccatum. 5<sup>o</sup> Mentiri venialiter intra confessionem circa res ad sacramentum non pertinentes, v. g. falsam historiam narrando, est duntaxat peccatum veniale: *ita generaliter theologi*. Suspectæ tamen mihi viderentur confessiones ejus qui deliberate sic mentiretur.

§ IV. — De iteranda confessione peccatorum quæ jam fuerunt declarata.

Confessio potest esse nulla vel ex parte confessarii, vel ex parte pœnitentis.

1° Ex parte confessarii, quod pluribus modis fieri potest, scilicet 1° defectu ordinis, ut si fingat se esse sacerdotem, vel invalide fuerit ordinatus; 2° defectu jurisdictionis, secundum id quod infra dicemus; 3° si absolutionem non concesserit, aut formam essentialiter mutaverit; 4° si intentionem actualem aut saltem virtuales absolvendi non habuerit; 5° si ob surditatem, somnum aut distractionem, nullum peccatum pœnitentis intellexerit, quia tunc humano modo non egisset: secus dicendum foret si, licet plura non intellexisset peccata, saltem unum recte advertisset. *Sic communissime theologi.*

2° Ex parte pœnitentis, quod multis etiam modis contingere potest, videlicet 1° si inter confitendum mortaliter peccaverit, vel peccatum realiter commissum negando, vel mortale supponendo, etc. 2° si dolore requisito caruerit; 3° si in discutienda conscientia mortaliter peccaverit; 4° si firmum non habuerit propositum non peccandi de cætero, id est, saltem omnia mortalia perpetuo vitandi; 5° si explicitam non habuerit fidem mysteriorum ad salutem necessitate medii requisitorum; 6° si ex fine mortaliter malo confessus fuerit, v. g. si ex sola hypocrisi confessarium ignarum, caducum, laxatum, qui peccata non intelligeret, aut convenientem satisfactionem non imponeret, consulto requisierit.

PROPOSITIO.

*Quacumque de causa nulla fuerit confessio, iterum declaranda sunt peccata.*

*Prob.* 1° unanimi consensu omnium theologorum; 2° ratione. Ideo enim jure divino necessaria est confessio, ut remittantur peccata et obtineatur justificatio: at ubi

confessio fuit nulla, sive culpabiliter, sive inculpabiliter, peccata non fuerunt remissa : ergo semper urget præceptum divinum.

Quoad modum confitendi, vel novus aditur confessarius et omnia singulatim declaranda sunt peccata, quasi nullatenus fuissent declarata ; vel apud eundem confessarium iteranda est confessio : in posteriori hoc casu, vel confessarius statum pœnitentis sufficienter recordatur, ut convenientem satisfactionem injungere possit, et tunc sufficit ut peccata jam declarata modo generali iterum declarentur, dicendo, v. g. De omnibus peccatis meis tibi, pater, jam declaratis, iterum me accuso. Si vero confessarius delicta prius declarata nullo modo recordetur, saltem præcipua distincte confitenda sunt, ut status pœnitentis iterum notus fiat : ampliori declaratione opus non est, siquidem prior confessio fuit sacramentalis, et accusatione generali fit actualis.

Si autem præcedens confessio valida fuerit, et quædam mortalia inculpabiliter ommissa sint, sufficit illa sola declarare, sive eidem, sive alteri confessario.

Cæterum, advertendum est fideles ad repetendas confessiones non cogendos esse, nisi moraliter certum sit illas esse nullas, vel saltem id iudicio viri prudentis valde sit probabile ; tale quippe onus, a sacro tribunali per se removens, sine gravi fundamento imponi non debet. Ita Ligorio, l. 6, n. 505, et plurimi apud ipsum, contra P. Antoine, qui solum requirit dubium ad hoc ut confessio iterari debeat.

*Quæritur* 1º quandonam peccata mortalia bona fide in confessione oblita declarari debeant ?

R. Seclusa sacræ Eucharistiæ susceptione, quædam concedenda est latitudo ; etenim cum confessio fuerit valida, præcepto ecclesiastico de annua confessione facienda satisfactum fuit : restat ergo præceptum divinum peccatum istud clavibus Ecclesiæ subjiciendi : sed præceptum istud non statim et sub gravi obligat : ergo.

Quantum autem concedi possit temporis spatium, determinare non audemus : arbitramur tamen eum qui



singulis mensibus vel crebrius confiteri solet, sequentem tuto exspectare posse confessionem absque peccato veniali.

Dixi *seclusa sacræ Eucharistiæ susceptione*; quia ratione legis ecclesiasticæ de confessione sacræ Eucharistiæ præmittenda, quædam nascitur difficultas de qua in tractatu de Eucharistia agitur.

*Quæritur 2º an pœnitens distincte confiteri teneatur, peccata jam alias confessario nota?*

R. Quidam docuerunt tunc sufficere ut pœnitens generali formula se accuset, dicendo, v. g. De peccatis quæ tibi historice narraui, vel quæ alias didicisti, me accuso; alii vero communius accusationem distinctam requirunt, quia alioquin non esset confessio distincta vere sacramentalis, qualis præcipitur. Ita Ligorio, lib. 6, n. 502.

#### § V. — De confessione generali.

Confessio generalis est recensio vel repetitio plurium confessionum: potest esse totius vitæ, id est, omnium peccatorum post Baptismum commissorum; vel alicujus temporis, v. g. unius anni vel plurium annorum; potest adhuc esse necessaria, utilis vel nociva.

Est necessaria, quando præcedentes confessiones fuerunt nullæ, incipiendo a tempore quo prima facta est confessio nulla; *patet ex modo dictis*.

Utilis est in præcipuis vitæ Christianæ epochis, v. g. tempore primæ communionis, electionis status, ut ante matrimonium, ante susceptionem ordinis sacri, ante professionem religiosam, quando quis ab erroribus aut peccandi habitibus sincere reversus, firmum init propositum sancte vivendi. Ita S. Franciscus Salesius, *Introduction à la vie dévote*, 1 part. cap. 6, et communiter theologi ac vitæ asceticæ actores.

Est autem nociva, quando rationabiliter timentur scrupuli et anxietates quæ conscientiam torturæ aut pacem cordis ablaturæ sunt: imo, ubi talia metuenda sunt incommoda, nequidem permittenda est in dubio de vali-

ditate præcedentium confessionum, quia præceptum divinum confessionis ad integritatem materiale cum tanto incommodo non obligat. Caveant igitur confessarii, præsertim juniores et timorati, ne pœnites ad confessionem generalem facilius compellant vel etiam admittant: verum pari sollicitudine timeant ne pigritia aut laxitate eam præcipere negligant.

Quidam theologi, ut molliores nusquam habiti, inter quos continuator Tournely et Dens, docuerunt aliquando non monendum esse pœnitentem de obligatione præteritas confessiones iterandi, si nempe bona fide arbitretur eas esse validas, ut in casu relapsus et maxime in casu ignorantiae mysteriorum quorum fides explicita ad justificationem absolute necessaria est, facile contingere potest, et si aliunde præsumatur eum admonitum confessionum iterationi non consensurum; si enim recte sit dispositus, peccata ejus præterita in actuali confessione indirecte remittentur, proindeque saluti ejus non officient; dum, e contra, monitio intempestiva eum a via salutis retraheret. Ergo. Attamen prudens confessarius satagere debet ut opportunis quæstionibus declarationem præteritorum peccatorum, saltem aliquo sensu, pro posse suo obtineat, et sedulo inducere pœnitentem ut de omnibus peccatis vitæ suæ generaliter se accuset atque sincere conteratur.

*Quæritur 1º* quomodo fieri expediat confessio generalis?

*R.* Plurimi dicunt expedire ut vita in certas dividatur epochas, v. g. ab usu rationis ad primam communionem, a prima communionem ad electionem status: verum experientia constat brevior et faciliorem esse viam si statim fiat declaratio secundum ordinem mandatorum Dei et Ecclesiæ, peccatorum capitalium et obligationum status, dicendo, v. g. Tali ætate sacrum Dei nomen blasphemare incepi, illud decies circiter singulis hebdomadis sic pronuntiare solebam usque ad annum ætatis meæ trigesimum, etc.

In hujusmodi confessionibus, sicut in aliis confessionibus magnorum peccatorum, parum curandum est de

peccatis venialibus quorum declaratio non est necessaria, et quæ aliunde in iudicium confessarii vix influunt.

*Quæritur 2º* quot vicibus ordinarie absolvenda sit confessio generalis totius vitæ?

*R.* Hoc determinari non potest : aliquando una vice, videlicet, si aliqua necessitas urgeat, ut si mors immineat, si administrandum vel suscipiendum sit sacramentum quod differri non potest, si pœnitens, aliunde recte dispositus, redire non possit; communiter tamen bis aut ter audiri debet pœnitens, et certe pluries si ex confessione ejus prudenter timeatur ne adhuc peccata mortalia omiserit, vel rudimenta religionis nondum percaleat, vel sufficientem non habeat dolorem, aut a consuetudine peccandi non adhuc sufficienter recesserit, etc. At increpandi sunt confessarii qui sine gravi motivo pœnitentes diutius protrahunt, eosque periculo deserendi confessionem exponunt.

#### § VI. — De manifestatione complicitis.

Sensus quæstionis est, an pœnitens qui proprium crimen confessario aperire non potest quin complicem ei manifestet, ab integritate confessionis excusetur : v. g. aliquis cum sorore confessario nota concubuit, teneturne incestum hunc declarare? Huic quæstioni altera subjungitur, an videlicet pœnitens culpam declarare teneatur quæ peccatum alterius non complicitis et confessario noti revelaret; v. g. sororem meam, ex facto alterius gravidam, vulneravi, vel de patre meo detraxi, dicens eum adulterium commisisse, teneorne integre confiteri, licet tunc infamiam sororis aut patris confessario aperiā?

Certum est a revelatione peccati, sive complicitis, sive alterius tertii, quantum commode fieri potest, abstinendum esse; quia 1º propria et non aliena peccata sunt obiectum sacramentalis confessionis; 2º detractio facta sine justa causa, pejor est in confessione quam extra confessionem, ratione sacramenti cui fit injuria. Unde graviter increpandi sunt pœnitentes qui inter confitendum peccata

aliorum narrant, detrimento illorum se excusant, vel complices sine ratione sufficienti nominant.

*A fortiori* confessores nomen complicitis a pœnitente exquirere non debent, et multo minus eum ad illius manifestationem sub denegatione absolutionis cogere possunt sub quolibet prætextu, v. g. ut eum moneant, in ipsum invigilent, eumque a peccato retrahant. Ita fuse docet Benedictus XIV, in celebri opere de Synodo diœcesana, l. 6, cap. 11, et tres edidit Constitutiones apostolicas, unam diei 7 julii 1745, archiepiscopis et episcopis regnorum Portugaliz et Algarbiorum directam, alteram diei 2 junii 1746, in confirmationem prioris et graves pœnas in delinquentes decernentem, et tertiam diei 28 septembris ejusdem anni, quæ duæ præcedentes ad universam Ecclesiam extenduntur.

Attamen, 1° qui confessarium cui complex sit ignotus commode adire non potest, et proprium peccatum sine manifestatione complicitis aperire nequit, ab integritate confessionis non excusatur. Nam 1° infamatio non est gravis respectu complicitis, cum revelatio soli fiat confessario qui strictissimo obstringitur secreto, et hac cognitione nullo modo uti potest. 2° Sufficiens datur causa hanc infamationem faciendi, scilicet integritas confessionis : illa quippe infamatio fieri posset ad petendum consilium : ergo et ad satisfaciendum præcepto divino. 3° Complex, peccatum proponendo vel ei consentiendo, tali diffamationi consensisse censetur; præsumere enim debuit, saltem communiter, socium peccatum hoc confessurum eumque confessario manifestaturum esse. Ergo. Ita S. Bernardus, S. Thomas, et post ipsos nunc communissime theologi. Id tamen non liceret ad manifestandum peccatum veniale aut mortale jam rite confessum, quia sufficiens non adesset ratio grave crimen alterius revelandi : sic Ligorio, l. 6, n. 489, et plures apud ipsum.

*Dixi qui confessarium cui ignotus sit complex commode adire non potest*; omnes enim fatentur pœnitentem qui alienum confessarium commode adire posset, non excusari si complicem confessario suo manifestet : *ratio patet*,



et simul omnes docent eum sub gravi incommodo non teneri alienum exquirere confessarium, admittuntque sequentes excusationes, scilicet : 1° periculum mortis vel præceptum urgens annuæ confessionis aut communionis; 2° timor infamiæ nisi celebretur aut sacra communio suscipiatur; 3° desiderium e statu peccati mortalis sub brevi tempore emergendi; 4° notabilis difficultas conscientiam alteri quam confessario ordinario aperiendi; 5° metus ne mutatio confessarii quamdam suspicionem inducat; 6° necessitas vel magna utilitas percipiendi consolationem a pio vel docto confessario, quæ ab alio non speratur, etc.

*Notandum tamen* 1°, graviolem requiri causam pro gravitate criminis alterius manifestandi : sic major necessaria est causa ad manifestandum sororis incestum quam tactus minus impudicos.

*Notandum* 2°, levissimam excusare causam, si complex debeat ipse peccatum eidem confessario aperire.

*Notandum est* 3°, in frequenter contingentibus, v. g. ubi de peccatis inter conjugatos vel inter alias personas vicinas, affines, consanguineas, præsertim sub eodem tecto manentes agitur, pœnitentes solitos esse complices statim indicare, nec arbitror eos a tali consuetudine avertendos aut ad extraneos confessarios remittendos esse, alioquin parochiani alienis sacerdotibus fere semper confiteri tenerentur, quod sane gravissima generaret incommoda et a mente Ecclesiæ prorsus foret alienum.

*Notandum* 4°, confessarium, licet nomen complicitis exquirere prohibeatur, pœnitentem interrogare teneri de circumstantiis peccati, etiam cum periculo noscendi complicem, petendo, v. g. an peccaverit cum affine aut consanguinea, quo in gradu, an habitet sub eodem tecto, etc.

*Notandum* 5°, confessarium revelationem complicitis aliquando præscribere posse vel debere, si nempe bonum id expostulet : v. g. si servus depravatus pueros aut puellas, vel quemquam ex illis, in familia quæ eum suscepit, ad malum inducat, confessarius injungere potest suo pœnitenti ut illud monstrum patrifamiæ denuntiet, etc.

Periculum manifestandi alterum qui non fuit complex, sed objectum peccati, ab integritate confessionis probabilius non excusat. Nam 1° confessio fuit instituta ut per modum iudicii exerceretur : sed in iudiciis humanis peccatum alterius non complicitis licite manifestatur : ergo et in confessione. 2° Non gravis est infamia, et notabilis est causa eam permittendi. Ergo. *Ita valde communiter theologi* contra Suarez. Sed observandum est graviolem exigí causam ut pœnitens a requirendo alieno confessario excusetur, quam si de complice ageretur.

§ VII. — De confessione scripto et per litteras.

Sola attenta sacramenti natura, non requiritur ut confessio sit oralis; nam peccata aliter quam per verba confessario innotescere possunt, scilicet per scriptum, nutus aliave signa : attamen usus et praxis Ecclesiæ confessionem oralem determinavit atque sub gravi præscripsit : qui ergo, extra legitimam causam, ab ea praxi recederet, mortaliter peccaret, et ideo defectu dispositionis requisitæ, valide absolvi non posset.

Si autem justa subsit causa, ut impotentia physica vel moralis, confessio sacramentaliter fieri potest scripto, nutu vel altero signo : sic, qui gravem habet difficultatem loquendi, peccata scribere potest, eaque confessario hac via manifestare.

Nutibus vel scripto confiteri possunt surdimuti recte instituti; nullum est dubium quin præceptum, tum divinum, tum ecclesiasticum, eos obstringat, modo peccata sufficienter exprimere valeant, et probabile non sit periculum revelationis. Constat ex dictis confessionem occultorum essentialiter esse secretam, ac proinde neminem, si casus mortis excipiat, ad confessionem per interpretem aut cum probabili periculo revelationis teneri; an vero teneantur confiteri scripto, si aliter facere non possint, non conveniunt auctores : quidam negant, asserentes quoddam periculum revelationis semper existere : at cæteri, persuasum habentes tale periculum

tolli posse, affirmant, hocque mihi probabilius videtur.

Nunc difficultas est an confessio sacramentalis confessorio absenti per litteras fieri possit. Si sola attendatur scriptura, id repugnare non videtur; etenim quid impediret ne peccata per litteras sufficienter aperirentur, dolor requisitus manifestaretur, et sententia absolutionis impertiretur? Matrimonium inter absentes per procuratores valide initur. Ergo.

Verum traditione constat sacramentum Pœnitentiæ a Christo ita fuisse institutum, ut inter absentes valide administrari non possit; si enim per litteras aut nuntium valide administrari posset, aliquod vestigium hujusmodi administrationis in decursu historiæ ecclesiasticæ reperiatur: atqui nullum istius modi vestigium reperitur; imo contrarium diversis testimoniis astruitur: unde conc. Trid. sess. 14, cap. 2, declarat Christum voluisse omnes aliquo crimine inquinatos, *ante hoc tribunal tanquam reos sisti*, quod præsentiam personalem supponit; et idcirco Clemens VIII, die 20 junii anno 1602, sequentem propositionem proscripsit, ad minus ut falsam, temerariam et scandalosam: « Licet per litteras seu internuntium confessorio absenti peccata sacramentaliter confiteri, et ab eodem absenti absolutionem obtinere. »

Quædam tamen citantur facta absolutionis per litteras concessæ; sed tunc de absolutione censurarum, non vero de absolutione sacramentali agebatur: sic Alexander III S. Thomam Cantuariensem episcopum a præsumptis censuris absolvit, eum pro peccatis ad sacerdotem discretum et providum remittens.

*Quæritur* an qui timet ne peccatum mortale e memoria excidat, illud scribere teneatur?

*R.* 1°. Certum est eum qui scribere nescit aut impeditus est, non teneri ministerio alterius uti ad scribendum peccatum, quia tunc fieret revelatio ad quam obligari non potest. 2° Nec illud propria manu scribere tenetur, juxta probabiliorem sententiam, propter periculum ne scriptum alienis oculis subjiciatur, et quia nemo tantam diligentiam ad procurandam integritatem materiale

adhibere tenetur. Ita *Billuart* et plurimi apud ipsum, contra *Vasquez*.

---

## CAPUT QUINTUM.

### DE SATISFACTIONE.

*Satisfactio* generatim est solutio debiti; prout hic specialiter sumitur, est solutio debiti ex peccato erga Deum contracti. Alia est divina qua, scilicet Christus, Deus et homo, pro nobis effusione sanguinis satisfecit; alia vero est humana cujus valor ex satisfactione Christi derivatur, juxta hæc concilii Trid. verba, sess. 14, cap. 8: « In quo vivimus, in quo meremur, in quo satisfacimus, facientes fructus dignos pœnitentiæ. »

De satisfactione Christi hic directe non agitur, bene vero de sola satisfactione humana quæ definiri potest: *Voluntaria pœnæ toleratio, ad compensandam injuriam Deo per peccatum illatam*. Si a confessario in ordine ad sacramentum injungatur et voluntarie acceptetur, dicitur sacramentalis, et tunc vel sacramentum antecedit et ad illud disponit, ac solum de congruo est meritoria; vel sacramentum sequitur, et gratiam sacramentalem supponens, meritoria est de condigno.

Necessitatem satisfactionis humanæ prorsus negant Lutherani ac Calvinistæ et generatim Protestantes, rati eam satisfactioni Christi derogare et injuriosam esse, contenduntque, remissa culpa, nullam superesse pœnam in hac aut in altera vita luendam: unde tollunt purgatorium, indulgentias et suffragia pro mortuis, et laboriosa pœnitentiæ opera non admittunt nisi ad exemplum, ad reparandum scandalum et ad comprobandos mores. Nobis igitur agendum est 1º de necessitate satisfactionis quæ vulgo dicitur *pœnitentia*; 2º de ejus quantitate et qualitate; 3º de obligatione illam acceptandi et adimplendi, et 4º de illius commutatione.



## ARTICULUS PRIMUS.

## DE NECESSITATE SATISFACTIONIS SEU POENITENTIÆ.

1° Statuendum est, remissa culpa, non semper omnem remitti pœnam; 2° pœnam remisso peccato superstitem, pœnitentiæ operibus deleri posse; 3° hominem pro illa pœna satisfacere teneri, et 4° pœnitentiam sacramentalem a confessario injungendam esse: quod per sequentes propositiones ostensuri sumus.

## PROPOSITIO PRIMA.

*Remissa culpa, non semper remittitur, sed ordinariè remanet pœna temporalis luenda.*

*Prob.* Hæc propositio est de fide, probatur Scriptura sacra, sanctorum Patrum testimoniis et rationibus theologicis.

1° Est de fide, utpote definita in conc. Trid. sess. 14, can. 12: « Si quis dixerit totam pœnam simul cum culpa » remitti semper a Deo, satisfactionemque pœnitentium » non esse aliam quam fidem, qua apprehendunt Chris- » tum pro eis satisfecisse: anathema sit. »

2° *Probatur Scriptura sacra.* 1° Adamus peccati sui remissionem obtinuit, ex libro Sapientiæ x, 2: attamen, juxta comminationem Dei, in vindictam delicti sui mortuus est. 2° Cum populus Israeliticus adversus Moysen et Aaron murmurasset in Deserto, iratus Dominus declarat se gravissima ei inflicturum mala: Moyses suppliciter orat, et ait Dominus, Num. xiv, 20: *Dimisi juxta verbum tuum*, et tamen pronuntiat omnes in ultionem delicti, exceptis Caleb et Josue, morituros esse in Deserto. 3° Moyses et Aaron Deum quadam diffidentia offenderunt ad petram contradictionis, his silicem percutiendo: igitur honore populum sanctum in terram Chanaan introducendi privati sunt, Num. xx, 12. 4° David duplex et enorme admiserat peccatum, adulterium sci-

licet et homicidium : dolore tactus dixit : *Peccavi Domino*. Respondit ei Propheta, II Reg. xii, 13 : *Dominus quoque transtulit peccatum tuum*. Sed addidit : *Verumtamen quoniam blasphemare fecisti inimicos Domini, propter verbum hoc, filius qui natus est tibi morte morietur*. Non autem ad incitamentum virtutis aut ad monitionem delicti in posterum vitandi hæc aliæque pœnæ supra relatæ infliguntur, ut delirans ait Calvinus, cum expresse dicatur eas in ultionem præteritorum delictorum inferri, Ergo.

3<sup>o</sup> *SS. Patrum testimoniis* S. Aug. in Psal. L : « Im-  
 » punita peccata, etiam eorum quibus ignoscis, non reli-  
 » quisti... ignoscis confitenti, sed seipsum punienti. »  
 S. Greg. Magnus, lib. 2 Moralium, cap. 34 : « Delin-  
 » quenti Dominus nequaquam parcat, quia delictum sine  
 » ultione non deserit : aut enim hoc homo in se pœni-  
 » tens punit, aut hoc Deus cum homine vindicans, eru-  
 » dit.... Sic David post confessionem audire meruit, *Do-*  
*minus transtulit peccatum tuum*; et tamen multis post  
 » cruciatibus afflictus ac fugiens, reatum culpæ quam  
 » perpetraverat exsolvit. » Fere omnes sancti Patres eo-  
 dem sensu locuti sunt, ut ipse agnoscit Calvinus, dicens,  
 Inst. l. 3, cap. 4, n. 38 : « Omnes fere quorum libri  
 » exstant, aut in hac parte lapsos esse, aut nimis aspere  
 » et dure locutos. » Ergo.

4<sup>o</sup> *Rationibus theologicis*. 1<sup>o</sup> Semper in Ecclesia Dei persuasum fuit existere purgatorium, *ut infra monstra-*  
*bimus*, et pro mortuis orandum esse : at utrumque dogma  
 evidenter supponit pœnam temporalem culpæ remissæ  
 ordinarie superesse. 2<sup>o</sup> Constat historia ecclesiastica et  
 plurimis conciliorum canonibus, ut Nicæni I, can. 12,  
 Carthag. IV, can. 78, Arausicani I, can. 4, pœnas satis-  
 factorias pœnitentibus semper impositas fuisse post abso-  
 lutionem faciendas aut continuandas. Ergo.

Dicimus autem pœnam temporalem *ordinarie* super-  
 esse ; quia non negamus contritionem charitate perfectam  
 adeo nonnunquam posse vehementem esse, ut cum reatu  
 culpæ omnem deleat pœnam.

*Solvuntur objectiones.*

*Obj.* 1°. Deus testatur in Scripturis se iniquitatem inpii ad justitiam conversi non recordaturum, Jerem. XVIII, 22; dicit Propheta illum peccata post tergum projecturum, etc. At si, dimissa culpa, adhuc remaneret pœna temporalis luenda, Deus iniquitatum recordaretur, peccata post tergum non projiceret: ergo.

*R. Distinguo ant.* Deus testatur, etc. vel quando plena est justificatio etiam quoad pœnam temporalem, per contritionem charitate perfectam et vehementem, vel quia, remissa pœna æterna cum culpa, pro nihilo reputanda est pœna temporalis, *concedo*; secus, *nego ant.* Etenim quandoque accidit, *ut notavimus*, omnem pœnam simul cum culpa remitti, et tunc nulla est recordatio iniquitatis apud Deum, et aliunde adeo levis est pœna temporalis respectu æternæ, ut recte dici queat Deum iniquitatis non recordari. Ergo.

*Inst.* 1°. Deus gratis nos justificat, Rom. III, 24: atqui nos gratis non justificaret si pœnam a nobis exigeret: ergo.

*R. Nego min.* Ille enim gratis nos justificat, qui per gratiam suam, et sine ullo ex parte nostra merito, pœnam æternam cum culpa remittit, et insuper gratis nobis donat unde pro pœna temporali satisfacere valeamus: atqui ita se gerit Christus erga nos: ergo.

*Inst.* 2°. Deus non dimidiate, sed perfecte condonat: ergo post condonationem, nullam pœnam exigere potest.

*R. Nego conseq.* Deus quippe non dimidiate condonat quoad pœnæ æternæ remissionem et gratiæ sanctificantis restitutionem; peccator enim ex inimico ejus, fit amicus: at non sequitur nullam ordinarie remanere pœnam in hac vel in altera vita luendam. Deus quidem statuere potuisset ut in Pœnitentia sicut in Baptismate omnis pœna simul cum culpa semper remitteretur: sed non ita fecit, quia ratio divinæ justitiæ exigere videbatur ut, qui ante Baptismum per ignorantiam peccaverant, et qui post Baptismum *templum Dei violare et Spiritum sanctum*

*contristare non formidaverint*, concil. Trid. sess. 14, cap. 8, non eodem modo in gratiam reciperentur. Ergo.

*Inst. 3º.* Peccata comparantur debitis : atqui debita non perfecte condonarentur, si quid adhuc a debitore exigetur : ergo.

*R. Dist. min.* Debita non perfecte condonarentur, si quid proportionatum debitis vel aliqua pars debiti exigeretur, *concedo*; si vero quod exigitur nullam habeat proportionem cum debito, et respectu illius nullius sit valoris, *nego min.* Porro pœna temporalis quæ a peccatore exigitur, nullius est valoris respectu pœnæ æternæ : ergo.

*Inst. 4º.* Quotidie dicimus in Oratione Dominica : *Dimitte nobis debita nostra, sicut et nos dimittimus debitoribus nostris* : at nihil exigere debemus ab iis qui offenderunt nos : ergo *a pari*, etc.

*R. Nego min.* Ibi namque de offensis agitur, non de justitiæ commutativæ debitis : atqui certe non repugnat offensos nolle remittere offensam, nisi sub conditione aliqujus compensationis : ergo.

*R. 2º. Nego conseq.* Inde enim sequeretur ad summum nos plenam remissionem pœnæ a Deo precari posse : ipse vero jubere posset ut debitoribus nostris perfecte condonaremus, et simul pœnam temporalem a nobis exigere ; etenim vices ejus et vices nostræ non æquiparari debent. Ergo.

*Obj. 2º.* Christus superabunde pro peccatis nostris etiam quoad pœnam satisfecit : ergo nihil relinquitur a nobis solvendum.

*R. Dist ant.* Christus superabunde satisfecit quoad pretium, *conc.* quoad applicationem, *nego ant.* Etenim nulum est dubium quin Christus ultra modum satisfecerit quoad pretium, *pro peccatis nostris et pro totius mundi* ; verum in sua sapientia statuit ut ipsius satisfactiones sub aliquibus tantum conditionibus applicarentur : inter autem illas condiciones voluit ut, etiam dimissa culpa, quædam ordinarie exsolveretur pœna : unde B. Paulus, licet de superabundantia satisfactionum Christiratus, aiebat : *Adim-*



*pleo ea quæ desunt passionum Christi, in carne mea, Coloss. 1, 24.*

## PROPOSITIO SECUNDA.

*Homo pœnam temporalem peccato remisso debitam operibus satisfactoriis redimere potest.*

*Prob.* Hæc propositio admittenda est quæ est de fide, et insuper probatur ex Scriptura sacra et ex SS. Patribus : atqui talis est præsens nostra propositio.

1<sup>o</sup> *Est de fide* ; sic enim definita fuit in conc. Trid. sess. 14, can. 13 : « Si quis dixerit pro peccatis quoad  
» pœnam temporalem, minime Deo per Christi merita sa-  
» tisfieri pœnis ab eo inflictis et patienter toleratis, vel a  
» sacerdote injunctis, sed nec sponte susceptis, ut jeju-  
» niis, orationibus, eleemosynis, vel aliis etiam pietatis  
» operibus.... anathema sit. »

2<sup>o</sup> *Probatur ex Scriptura sacra.* Jer. XVIII, 7 : « Repente loquar adversum gentem, et adversum regnum, ut eradicem, et destruam et disperdam illud. Si pœnitentiam gerit gens illa a malo suo quod locutus sum adversus eam : agam et ego pœnitentiam super malo quod cogitavi ut facerem ei. Sic Propheta alloquitur Nabuchodonosor, Dan. IV, 24 : Quamobrem, rex, consilium meum placeat tibi, et peccata tua eleemosynis redime, et iniquitates tuas misericordiis pauperum. Unde sic. Malum a Deo intentum pœnitentia averti potest, et iniquitates operibus misericordiæ redimi possunt : porro talis compensatio talisque redemptio vera est satisfactio. Si autem de peccatis nondum remissis hic agatur, a fortiori pœna temporalis remisso peccato debita redimi vel compensari potest. Ergo.

3<sup>o</sup> *Ex SS. Patribus.* Tert. lib. de Pœnitentia, cap. 6 : « Quam porro ineptum, quam iniquum pœnitentiam non  
» adimplere, et veniam delictorum sustinere ! hoc est  
» pretium non exhibere, ad mercedem manum emit-  
» tere. »

S. Cyprian. lib. de Lapsis : « Confiteantur singuli...  
» dum satisfactio apud Dominum grata est. »

S. Ambrosius, in B. Lucam, l. 4, cap. 12 : « Sicut qui

» pecuniam solvunt, debitum reddunt.... sic compensa-  
 » tione charitatis actuumque reliquorum, vel satisfactio-  
 » ne quacumque, peccatis pœna dissolvitur. » Porro hæc  
 testimonia de satisfactione evidenter intelliguntur. Ergo.

*Quæritur an homo pro pœna temporali de condigno satisfacere possit?*

R. Certum est hominem in statu peccati mortalis constitutum, de condigno satisfacere non posse, nullius quippe meriti proprie dicti capax est coram Deo. Sed homo justificatus satisfacere potest de condigno : enimvero concilia et sancti Patres eodem modo loquuntur de satisfactione pro pœna temporali ac de merito vitæ æternæ : atqui homo justificatus vitam æternam de condigno mereri potest : ergo et remissionem pœnæ. Unde summi pontifices Pius V et Gregorius XIII, sequentem propositionem Baii condemnarunt : « Satisfactiones laboriosæ justifica-  
 » torum non valent expiare de condigno pœnam tempo-  
 » ralem restantem post culpam condonatam. »

#### PROPOSITIO TERTIA.

*Homo pro pœna temporali satisfacere tenetur.*

*Prob. 1<sup>o</sup> Scriptura sacra. Joel. II, 12 : Convertimini ad me in toto corde vestro, in jejunio, et in fletu, et in planctu. Matth. III, 8 et Luc. III, 8 : Facite ergo fructus dignos pœnitentiæ. Act. XXVI, 20 : Et gentibus annuntiabam ut pœnitentiam agerent, et converterentur ad Deum, digna pœnitentiæ opera facientes. Luc. XIII, 5 : Si pœnitentiam non egeritis, omnes similiter peribitis, ait Christus : fructus autem pœnitentiæ, opera pœnitentiæ et pœnitentia simpliciter, in consueto loquendi modo Scripturæ, sunt opera satisfactoria. Ergo.*

*Prob. 2<sup>o</sup> ex SS. Patribus, videlicet ex textibus jam a nobis allatis, et insuper S. Cyp. de Lapsis : « Quam magna  
 » deliquimus, tam granditer desseamus : alto vulnere di-  
 » ligens et longa medicina non desit : pœnitentia crimine  
 » minor non sit.... Orare oportet impensius et rogare,  
 » diem luctu transigere, vigiliis noctes ac fletibus du-*

» cere, tempus omne lacrymosis lamentationibus occu-  
 » pare, stratos solo adhærere, in cinere et cilicio et sor-  
 » dibus volutari... »

S. Aug. Sermone 351 : « Non sufficit mores in melius  
 » commutare et a factis malis recedere, nisi etiam de his  
 » quæ facta sunt satisfiat Deo per pœnitentiæ dolorem,  
 » per humilitatis gemitum, per contriti cordis sacrifi-  
 » cium, cooperantibus eleemosynis. » Nihil clarius desi-  
 derari potest. Ergo.

*Prob. 3º usu et praxi Ecclesiæ.* Semper et ubique usus  
 fuit in Ecclesia ut peccatores a vinculo delictorum non  
 absolverentur, nisi præcessisset aut saltem subsecutura  
 esset congrua satisfactio : factum istud astruunt Canones  
 pœnitentiales, libri rituales et tota historia ecclesiastica.  
 Ergo.

Hæc autem, cum generalia sint, et de peccatis in ge-  
 nere pronuntiata, ad pœnam pro reparando scandalo  
 peccatorum publicorum injunctam vel injungendam re-  
 stringi non debent.

Emolumenta satisfactionis sic describit conc. Trid.  
 sess. 14, cap. 8 : « Procul dubio enim magnopere a pec-  
 » cato revocant, et quasi freno quodam coercent hæ  
 » satisfactoriæ pœnæ, cautioresque et vigilantiores in  
 » futurum pœnites efficiunt; medentur quoque pec-  
 » catorum reliquiis, et vitiosos habitus, male vivendo  
 » comparatos, contrariis virtutum actionibus tollunt.  
 » Neque vero securior ulla via in Ecclesia Dei unquam  
 » æstimata fuit ad amovendam imminentem a Domino  
 » pœnam, quam ut hæc pœnitentiæ opera homines cum  
 » vero animi dolore frequentent. Accedit ad hæc quod,  
 » dum satisfaciendo patimur pro peccatis, Christo Jesu  
 » qui pro peccatis nostris satisfecit, ex quo omnis suffi-  
 » cientia nostra est, conformes efficimur, certissimam  
 » quoque inde arrham habentes, quod si compatimur,  
 » et conglorificabimur. Neque vero ita nostra est satis-  
 » factio hæc quam pro peccatis nostris exsolvimus, ut  
 » non sit per Christum Jesum; nam qui ex nobis, tan-  
 » quam ex nobis, nihil possumus, eo cooperante qui nos

» confortat, omnia possumus. Ita non habet homo unde  
» gloriatur, sed omnis gloriatio nostra in Christo est. »

#### PROPOSITIO QUARTA.

*Confessarius satisfactionem seu pœnitentiam peccatis  
proportionatam regulariter imponere tenetur.*

*Prob. 1º Scriptura sacra.* Confessarius est iudex in causa Dei et peccatoris, et vices utriusque simul gerere debet : cum sciat Deum pœnam temporalem simul cum culpa remitti nolle, peccatorem sub hoc respectu ligare tenetur : ergo illum absolvendo, satisfactionem convenientem erga Deum præscribere debet. Supponatur homo a rege delegatus ut injurias majestati regiæ illatas, sub aliqua compensatione remittat ; numquid ab illis simpliciter absolvere posset, compensationem seu satisfactionem non injungendo ? ergo *a pari* nec confessarius.

*Prob. 2º praxi Ecclesiæ* quæ semper jussit ut peccatores sine convenienti pœnitentia ipsis injuncta non reconciliarentur. Innumera citari possent testimonia et Patrum et conciliorum. Ergo.

*Prob. 3º conc. Trid. sess. 14, cap. 8 :* « Debent ergo » sacerdotes Domini, quantum spiritus et prudentia suggesterit, pro qualitate criminum et pœnitentium facultate, salutare et convenientes satisfactiones injungere, » ne si forte peccatis conniveant, et indulgentius cum » pœnitentibus agant, levissima quædam opera pro gravissimis delictis injungendo, alienorum peccatorum » participes efficiantur. » Ergo.

*Prob. 4º ratione theologica.* Satisfactio est pars sacramenti integralis, ut idem conc. Trid. docet, cap. 3 ejusdem sessionis : at confessarius tenetur sub gravi procurare ut sacramentum non sit mutilum : ergo.

Quoniam, ex dictis, satisfactio non est de essentia sacramenti, sed tantum ad illius integritatem pertinet, inde sequitur illam esse necessariam duntaxat necessitate præcepti, a quo igitur gravis causa eximere potest. Propterea diximus in propositione, *regulariter tenetur*;



fieri ergo potest ut levissima vel nulla injungenda sit poenitentia, v. g. moribundo cui sufficit præscribere aliquos actus fidei, spei, charitatis, contritionis, breves quasdam orationes, prolationem SS. nominum Jesu et Mariæ, etc. Si mors statim non immineat, aliquid gravius, secundum prudentiam, injungi potest ægroto per ipsum aut per alium faciendum, ut eleemosyna; et si detur spes recuperandæ sanitatis, conveniens injungenda est poenitentia conditionata, post morbum implenda.

*Quæritur* an confessarius teneatur sub gravi injungere poenitentiam pro venialibus aut gravibus jam remissis, supposito quod absolutionem concedat?

*R.* Quidam, cum Cardinali de Lugo, docent nullam injungere poenitentiam in his casibus esse duntaxat peccatum veniale: 1º quia levis est injuria sacramenti; 2º quia non major est obligatio satisfactionem imponendi quam eam implendi: at ubi levis est poenitentia, levis est obligatio eam implendi: ergo et eam injungendi. Verum alii communius tenent sacerdotem mortaliter peccare, nisi ex inadvertentia excusetur; nam mutilatio voluntaria sacramenti, grave est objectum: unde dicunt poenitentem teneri sub gravi habere propositum, dum absolvitur, poenitentiam sibi injunctam vel injungendam adimplendi, sicque ruit fundamentum Cardinalis de Lugo. Ita *Suarez, Collet, Antoine, Billuart, de Pœnit. etc.*

## ARTICULUS SECUNDUS.

### DE QUANTITATE ET QUALITATE POENITENTIÆ A CONFESSARIO INJUNGENDÆ.

*Notandum est* 1º, poenam singulis peccatis remissis debitam a Deo taxari, et instanti justificationis determinatam esse; in decretis enim Dei fundatur, et dispositionibus poenitentis proportionata est: Deus autem hæc omnia noscit: ergo.

*Notandum est* 2º, nos ignorare quam proportionem satisfactiones humanæ habeant cum poena temporali luen-

da, ac proinde nescire quid opera laboriosa in satisfactionem oblata de illa pœna coram Deo deleant : hoc soli Deo notum est.

*Notandum est* 3°, Ecclesiam olim per Canones pœnitentiales determinasse, saltem quoad tempus, quid pro singulis delictis injungendum esset; nec tamen ideo definiisse quantitatem pœnæ peccato debitæ quæ his satisfactionibus deleretur.

Varii diversis temporibus conditi sunt Canones pœnas injungendas decernentes, quorum alii sunt severiores et alii mitiores. Legi possunt in fine Decreti Gratiani, apud *Natalem Alexandrum, Antoine, Collet, Billuart, de Pœnit. etc.*

*His notatis*, 1° præcipuos referemus Canones pœnitentiales; 2° qualis pœnitentia nunc injungenda sit assignabimus; 3° de qualitate operum injungendorum aliquid subjungemus.

§ I. — Præcipui Canones pœnitentiales per ordinem præceptorum Decalogi.

1° Qui fidem catholicam deseruerit, pœnitentiam aget decem annis.

2° Qui diabolicas incantationes fecerit, pœnitens erit annos septem.

3° Qui magos consuluerit, in pœnitentia erit annos quinque.

4° Si quis clericus vel monachus, postquam Deo voverit, ad sæculum redierit, pœnitentiam aget annos decem, quorum tres in pane et aqua.

5° Quicumque sciens pejeraverit, quadraginta dies in pane et aqua, et septem sequentes annos pœniteat, et nunquam sit sine pœnitentia.

6° Si quis per capillum Dei aut per caput ejus jurerit, si semel nesciens fecerit, pœnitens aqua et pane septem dies victitet; si secundo ac tertio monitus idem fecerit, dies quindecim.

7° Si quis Deum, vel B. Mariam, vel aliquem sanctorum publice blasphemaverit, præ foribus Ecclesiæ diebus

dominicus septem in manifesto, dum missarum solemniam aguntur, stet, ultimoque ex illis die sine pallio et calceamentis, ligatus corrigia circa collum, septemque præcedentibus feriis sextis in pane et aqua jejundet, ecclesiam nullo modo tunc ingressurus.

8° Qui votum simplex violaverit, poeniteat tribus annis.

9° Qui opus aliquod servile die dominico festivo fecerit, poenitentiam agat tres dies in pane et aqua.

10° Si quis ante ecclesias, vel die festo, saltationes fecerit, emendationem pollicitus, poenitentiam agat tribus annis.

11° Si quis pransus missæ interfuerit, poenitens erit dies tres in pane et aqua.

12° Si quis in ecclesia confabuletur, cum divina fiunt, poenitens erit dies decem in pane et aqua.

13° Si quis jejunia a sancta Ecclesia indicta violaverit, poenitentiam agat dies viginti in pane et aqua.

14° Qui parentibus maledixerit, quadraginta dies poenitens sit in pane et aqua; qui injuria affecerit, tres annos; qui percusserit, annos septem.

15° Si qua mulier sponte abortum fecerit, poenitentiam agat tres annos; si nolens, quadragesimas tres.

16° Si quis sponte hominem occiderit, ad januam ecclesiæ semper erit, et in obitu communionem recipiet. Si casu necaverit, poenitentiam agat annos septem.

17° Si quis aliquem vulneraverit, vel ei aliquod membrum præciderit, poenitentiam agat uno anno per legitimas ferias.

18° Si quis ictum proximo dederit, nec nocuerit, tridui poenitentiam agat in pane et aqua; clericus, unius anni et mensium sex.

19° Si laicus solutus cum fœmina soluta concubuerit, poenitens erit annos tres.

20° Vir solutus, si cum alterius uxore adulterium commiserit, poenitentiam agat annos septem, mulier quinque. Mulier soluta cum alterius marito adulterium patrans, poenitentia afficietur decennali.

21° Qui cum duabus sororibus fornicatus fuerit, aut filiam spirituales violaverit, perpetuam pœnitentiam eget.

22° Qui incestum fecerit (*non ita enorme*), pœnitens erit duodecim annis.

Alii canones septem, alii decem, alii quindecim annorum pœnitentiam constituunt.

23° Qui monialem violaverit, pœnitens sit annis decem.

24° Si mulier cerussa aliove pigmento se oblinat ut aliis viris placeat, pœnitentia afficietur trium annorum.

Aliis peccatis contra castitatem diversæ assignabuntur pœnitentiæ, pro qualitate criminis.

25° Qui furatus est aliquid de suppellectili vel thesauro ecclesiæ, tres quadragesimas cum septem sequentibus annis pœnitebit.

26° Si furtum de re minori fecerit, re restituta, pœnitentiam aget unum annum.

27° Si quis usuras acceperit vel rapinam fecerit, pœnitebit tribus annis, uno in pane et aqua.

28° Qui affirmaverit verum esse quod falsum est, pœnitentiam aget ut adulter, ut homicida.

29° Qui falso testimonio consenserit, pœnitens erit annos quinque.

30° Falsarius, in pane et aqua pœnitentiam aget quamdiu vivet.

31° Qui de proximo detraxerit, pœnitens erit dies septem in pane et aqua.

32° Rem alienam nefarie concupiscens, pœnitens erit annis tribus.

33° Si quis concupiscit fornicari, si episcopus, pœnitens erit annos septem; si presbyter, quinque; si diaconus vel monachus, tres; si clericus aut laicus, annos duos.

Multi alii erant Canones pœnitentiales, quorum pluri mi perierunt. Quando novum occurrebat peccatum, sive ratione peculiaris malitiæ, sive ratione alicujus circumstantiæ, conveniebant episcopi, ut testatur S. Cyprianus, ad deliberandum quo genere pœnitentiæ expiaretur. Pœnitentia ab eis statuta in libro pœnitentiali inserebatur,



ut deinceps regula esset a qua inferiores sacerdotes non recederent. Omnes episcopi diligenter investigabant, tum in sua synodo, tum in visitatione diœcesis, an quilibet presbyter suum haberet librum pœnitentialem diœcesi proprium, et an regulas in eo pro injungendis pœnitentiis statutas fidelissime sequeretur.

Libri pœnitentiales iidem non erant in omnibus provinciis ecclesiasticis, et inde varietas quæ inter canones nunc exstantes conspicitur.

Certum est hos canones a multis sæculis jam obsoletos esse, et pœnitentias juxta eorum rigorem non esse injungendas: eos tamen penitus ignorare non licet, quia si disciplina Ecclesiæ decursu temporum mutata est, spiritus ejus idem semper est.

## § II. De pœnitentia nunc injungenda.

Constat ex concilio Tridentino supra citato pœnitentiam injungendam nunc relictam esse prudentiæ confessorii, qui, *pro qualitate criminum et facultate pœnitentium, salutare et convenientes satisfactiones injungere debet*. Hæc propositio ulteriori probatione non indiget, sed tantum explicatione.

Dicitur 1º *pro qualitate criminum*; id est, habita ratione specierum, numeri et circumstantiarum peccati, ita ut pœnitentia « non sit tantum ad novæ vitæ custodiam et infirmitatis medicamentum, sed etiam ad præteritorum peccatorum vindictam et castigationem. » Sunt verba sacri concilii, *ibid.*

2º *Pro pœnitentium facultate*; idem habet rituale Romanum. Debet ergo confessorius attendere facultatem, tum spiritualem, tum temporalem pœnitentium, ætatem, sexum, convictum, infirmitatem, etc. quia non omnes eadem possunt.

*Hinc* 1º non injungenda sunt jejunia infirmis, pueris, opificibus continuo labore defatigatis; 2º non peregrinationes, longæ preces vel eleemosynæ mulieribus sub potestate viri constitutis, filiis familias aut pauperibus nihil

habentibus; 3<sup>o</sup> non præscribenda sunt opera quæ confessionem pœnitentis revelarent, vel eum ludibrio aliorum exponerent; 4<sup>o</sup> minor injungi potest satisfactio iis qui singularem exhibent contritionem vel piis operibus vacare solent, quia hæc defectum pœnitentiæ suppleant. Non tamen excusaretur confessarius, etiam a gravi culpa, si nullam vel levissimam pro magnis peccatis injungeret pœnitentiam, quia pœnitens ipsi videtur vehementissime contritus, aut indulgentias lucraturus: *ita saltem communius theologi*, contra Cajetanum, Navar. Suarez, etc. 5<sup>o</sup> Minuenda est pœnitentia si prudenter timeatur ne pœnitens vere conversus, sed adhuc debilis, a vita christiana deterreatur, et in dubio magis sectanda est misericordia quam seyeritas, quia sacramentum pœnitentiæ potius est forum indulgentiæ quam *iræ et pœnarum*, ut ait concil. Trid. cap. 8. Unde in Decreto, causa 26, quæst. 7, cap. *Alligant*, legitur: « Si erramus, modicam » pœnitentiam imponentes, nonne melius est propter » misericordiam rationem reddere quam propter crudelitatem? Ubi enim paterfamilias largus est, dispensator non debet esse tenax. Si Deus benignus, utquid » sacerdos ejus austerus? Vis apparere sanctus? circa » vitam tuam esto austerus, circa alienam benignus. »

« Si sacerdos, inquit S. Antoninus, tertia part. tit. 17, » cap. 20, non possit gaudere de omnimoda purgatione » sui pœnitentis, saltem gaudeat quod liberatum a gehenna, transmittat ad purgatorium. »

« Certum est hominem qui pluribus annis in mortalibus peccatis sæpe repetitis provolutus est, nunquam nimiam præstare posse satisfactionem; expedit ergo ut confessarius, » talem ei imponat pœnitentiam qualem ab eo » præstari posse judicet: proinde aliquando, si ita expedire viderit, illum interroget an possit, anve dubitet » pœnitentiam sibi injunctam peragere; alioquin eam » mutabit aut minuet. » Sunt verba S. Caroli, Act. concil. Mediol. part. 4.

Unde si hujusmodi peccator libenter acceptet pœnitentiam singulis hebdomadis implendam, v. g. jejunium,

aut recitationem psalmorum Pœnitentialium, per duos aut tres annos, confessarius illam imponere potest, admonens eam esse pœna temporali luenda longe inferior: at sæpe minorem injungere tenetur, propter rationes modo expositas, et tunc « Demonstrabit, inquit » S. Carolus, *ibid.* his qui gravius peccaverint (quo magis scelerum suorum magnitudinem agnoscant) quanta » ipsis pœnitentia ex canonum regulis imponenda esset; » nec vero putant peccata sua levia esse, quia parva illis » pœnitentia data est, sed hoc factum esse, ne eam quæ » pro culparum ratione injungenda erat, deserant cum » periculo salutis suæ. Proinde pœnitentes hortandi erunt » ut præter pœnitentiæ imposita opera, plura etiam alia » præstare conentur. »

3<sup>o</sup> *Salutares*, id est, medicinales simul et pœnales, juxta concilii Tridentini mandatum. Igitur optimum erit pœnitentias contrarias peccatis imponere, v. g. eleemosynas avaris, jejunia libidinis, humilitatis officia superbis, devotionis studia desidiosis: raro autem vel serius confitentibus, vel in peccata facile recidentibus, consultum erit injungere ut festis solemnibus, vel semel in mense, vel etiam frequentius confiteantur. Item amatoribus mundi ejusque pompas, choreas aliaque Satanæ opera sectantibus injungendum suadet S. Carolus, ut mane surgentes, revocent in memoriam sponsiones in Baptismo factas, quod idem vespere præstare poterunt. Alia hujusmodi remedia pio ac freventi confessario, meditationibus lectionibusque sanctis assueto, facile occurrent.

4<sup>o</sup> *Convenientes*. Non solum enim requiritur ut satisfactiones sint in se salutares, debent insuper esse proportionatæ et convenientes, tum personæ, tum peccatis pro quibus imponuntur, juxta prudentiæ regulas. Hinc 1<sup>o</sup> publica pro delictis occultis imponi non debet pœnitentia, idque in Rituali nostro prohibetur; pro delictis autem publicis et scandalosis, solus episcopus aut ab eo delegatus pœnitentiam solemnem vel extraordinariam imponere potest. At quilibet confessarius eam injungere tenetur satisfactionem quam prudenter æstimat necessa-

riam ad reparandum scandalum, v. g. postulationem veniæ, manifestationem pœnitentiæ, retractationem doctrinæ, verborum, scriptorum contra fidem aut mores, etc. 2° Caveat confessarius ne pœnitentias diversi generis operibus implicatas rudibus vel personis obliviosis imponat, aut aliquid singulis diebus per multum tempus faciendum injungat; necesse est ut simpliciter loquatur, præceptum a concilio clare distinguat, et aliquid semel, bis aut ter singulis hebdomadis faciendum præscribat, ut si pœnitens una die oblitus fuerit, omissionem altera die reparare possit. 3° Iis qui sæpe in eadem relabuntur peccata, quamdam pœnitentiam imponere juvat pro unoquoque relapsu, v. g. jejunia pro incontinentiis, eleemosynas pro blasphemiiis, etc.

### § III. — De operibus injungendis.

Suppono velut certum opera satisfactoria debere esse pœnalia, quia sic perpetuo exhibentur in Scriptura ac in tota traditione. Et revera, quis risum cohibere posset, audiendo opus sub omni respectu jucundum, v. g. ludum, ciborum delicatiorum esum, vini generosi potum, in expiationem peccati impositum fuisse? Opus autem duplicem habere potest difficultatem: unam objectivam, seu ex natura ejus proveniente, et alteram subjectivam, id est ex parte hominis illud exsequentis. Sic oratio pœnalis est in se, sed aliis magis, aliis minus operosa, ratione dispositionum, tum animi, tum corporis.

Omnis actus virtutis est pœnalis, et ideo in satisfactionem imponi potest; quia eo ipso quod mentem ad cœlestia erigat, homini carnali plus minusve adversatur.

Concilium Trid. sess. 6, cap. 14, triplex distinguit genus pœnalia operum ad quæ cætera revocari possunt, scilicet, jejunia, eleemosynas et orationes.

1° Jejunia, ad quæ revocantur omnes carnis afflictationes, ut 1° ipsum jejunium, et etiam aliquando in pane et aqua; 2° abstinencia a carnibus, vino alioque liquore fermentato, aut illius aqua multa temperati usus; 3° flagel-



lationes et cilicia; 4° sanctæ peregrinationes, præsertim pedibus factæ, quamvis *qui multum peregrinantur, raro sanctificentur*, ait auctor libri de Imitatione Christi; 5° vigiliæ, humi vel in lecto duro cubationes; 6° genuflexiones, brachiorum extensiones, aut alii pœnales situs corporis; 7° abstinencia a deliciis, conviviis, ludo, venatione, equitatione, vestibis exquisitis, etc.

2° Per eleemosynas, intelligi debent omnia misericordiæ opera, sive corporalia, sive spiritualia, v. g. eruditio ignarorum, visitatio infirmorum, consolatio afflictorum. Si confessarius pœnitentias pecuniarias imponat, caveat ne eas suscipiat erogandas, ne in aliquam suspicionem avaritiæ aut fraudis deveniat, etc.

3° Orationis nomine comprehenduntur 1° recitatio officii divini, Psalmorum, Rosarii, etc. 2° meditatio et oratio mentalis, lectio librorum spiritualium, sive privata, sive coram familia; 3° examen conscientiæ, sero et mane, renovatio propositi vitæ emendandæ et actus contritionis; 4° certus numerus actuum fidei, spei, charitatis, humilitatis, contritionis, etc. 5° visitatio ecclesiarum, adoratio sanctissimi Sacramenti, quædam exercitia religionis; 6° frequens sacramentorum Pœnitentiæ et Eucharistiæ susceptio, auditio missæ, assistentia concionibus sacris vel catechismis, ingressus in confraternitatem, actus vel exercitia pietatis sive erga Dominum nostrum Jesum Christum, sive erga B. Virginem, sive erga sanctos aut aliquem sanctorum.

Cum, ex dictis, omnis actus virtutis sit opus satisfactorium, inde sequitur opera alias debita esse satisfactoria, quia non desinunt esse actus virtutis, et tunc duplici titulo obstringunt: ea igitur in pœnitentiam injungi possunt, et tunc dignitati sacramenti participant. Hinc confessarius præscribere potest, v. g. fugam alicujus personæ scandalosæ, recessum a cauponibus, abstinenciam a choreis vel comœdiis, jejunium in Quadragesima, auditionem sacri in die dominica, etc. Alia tamen, saltem ordinarie, addenda sunt opera indebita.

Item imponi potest patientia in flagellis et tribulationibus hujus vitæ tolerandis, v. g. rusticis, servis, opifici-

bus pia elevatio mentis ad Deum inter labores et defatigationes.

Sæpe etiam juvat imponere huiusmodi pœnitentibus ut, per tempus determinatum, mane ante laborem, vespere ante cubitum, die dominica ante vel post missam genuflectentes, aliquandiu de morte, iudicio Dei et inferno cogitent, peccata præterita detestentur, et innovent consilium potius moriendi quam iterum peccandi.

*Quæritur* an bona opera pœnitentis, etiam non imposita, per verba confessarii, *quidquid boni feceris et mali sustinueris*, ad effectum pœnitentiæ sacramentalis eleventur?

R. Plures negant, quia virtus clavium opera pœnitentis non elevat, nisi in quantum ligat; prædicta autem verba confessarii nullam imponunt obligationem: ergo.

Alii vero multo plures, cum S. Thoma, affirmant, et hac sola ratione nituntur, scilicet, quod Ecclesia frustra non jusserit ut dicta verba proferrentur: ergo in ipsius mente bona opera etiam libere a pœnitente suscepta, ad rationem satisfactionis sacramentalis elevantur, saltem si talis sit intentio confessarii et pœnitentis bona opera facientis.

## ARTICULUS TERTIUS.

DE OBLIGATIONE ACCEPTANDI ET ADIMPLENDI PŒNITENTIAM  
A CONFESSARIO IMPOSITAM.

### PROPOSITIO.

*Pœnitens tenetur sub peccato ex genere suo mortali, acceptare et adimplere pœnitentiam rationabilem et peccatis proportionatam, a confessario sibi impositam.*

*Prob. 1º concil. Lateran. IV, can. 21, ubi dicitur de fidei utriusque sexus, ut injunctam sibi pœnitentiam pro viribus studeat adimplere.*

2º *Ratione.* Confessarius non solum potest, sed tenetur sub peccato de genere suo mortali, pœnitentiam sacramentalem imponere: at repugnat illum teneri pœnitentiam imponere, si pœnitens non teneatur illam acceptare aut acceptam implere. Præterea pœnitentia est pars inte-

gra sacramenti : porro non magis licet pœnitenti quam confessario sacramentum reddere mutilum : ergo.

Dixi 1<sup>o</sup> *sub peccato de genere suo mortali*; quia res gravis est momenti, vel in se, ubi magna imponitur pœnitentia pro magnis peccatis; vel respectu sacramenti, si levis pœnitentia pro levibus delictis, aut pro gravibus jam remissis imponatur : secus esset si, pœnitentia pro majori parte impleta, pars levis omitteretur. Multi etiam dicunt omissionem pœnitentiæ levis, pro levibus aut jam remissis impositæ, esse duntaxat peccatum veniale : ita Ligorio, lib. 6, n. 517, et celebriores theologi apud ipsum.

Dixi 2<sup>o</sup> *rationabilem*; quia si pœnitentia videatur evidenter injusta, impossibilis aut nimis onerosa, et confessarius humiliter rogatus, eam minuere vel in aliam faciliorem commutare nolit, tunc pœnitens sine gravi et forte sine ulla culpa recedere potest non absolutus, et alium confessarium adire. Sic Concina, Suarez, Layman, Ligorio, etc. At qui mortalia confessus est peccata, et levem tantum, sine rationabili causa, vellet pœnitentiam, mortaliter peccaret, sicut confessarius qui in eo casu levem tantum, sine justa causa, injungeret.

Si pœnitentia libere acceptata facta fuerit impossibilis, tunc non obligat; nemo quippe ad impossibile tenetur. Unde qui pœnitentiam oblitus est, eam a confessario requirere debet, si possit; si vero non possit, aut si confessarius illius non recordetur, ad illam non tenetur, quia facta est impossibilis. Nec peccata iterum confiteri tenetur ut novam accipiat pœnitentiam, quia novum tunc esset sacramentum, et prius non ideo fieret integrum. Verumtamen id convenientius foret ad remittendam aut minuendam pœnam temporalem peccatis debitam.

Si oblivio fuerit culpabilis, v. g. propter negligentiam in adimplenda pœnitentia, sufficit etiam hoc peccatum in sequenti confessione declarare, tutius tamen reus petet a confessario ut major sibi imponatur pœnitentia. Ita expresse Billuart, de Pœnit.

Circumstantia pœnitentiæ impositæ, ut, v. g. recitare rosarium flexis genibus, potest esse sub gravi vel sub levi;

id pendet a molestia ei annexa, et a voluntate confessarii eam determinantis ac præscribentis.

*Quæritur* 1° an confessarius possit imponere pœnitentiam gravem sub levi pro peccatis mortalibus?

*R.* Quidam negant, dicentes illum esse ministrum Dei, et naturam materiæ per se sub mortali obligantis mutare non posse : alii vero multo communius affirmant, quia confessarius vere est iudex, et sententiam ferendo, conditiones absolutionis pro arbitrio determinat. Verum, ut recte notat Ligorio, l. 6, n. 518, excepto casu rarissimo ægritudinis aut vehementis contritionis, saltem aliqua satisfactio sub gravi injungenda est. Ergo.

*Quæritur* 2° quo tempore implenda sit pœnitentia?

*R.* 1°. Non necesse est ut ante absolutionem impleatur, idque constat 1° ex praxi hodierna totius Ecclesiæ ; 2° ex condemnatione propositionis sequentis a Sixto IV, anno 1478, quæ est Petri Osmensis : « Non sunt absolvendi » pœnitentes, nisi peracta prius pœnitentia iis injuncta ; » 3° ratione ; satisfactio enim non est pars essentialis, sed tantum integralis sacramenti : ergo confessarius exigere non debet a pœnitente sufficienter disposito ut pœnitentiam ante absolutionem impleat. Si autem prudenter judicet pœnitentem non esse sufficienter dispositum, pœnitentiam simul medicinalem et pœnalem ei injungat, eumque pro aliquo tempore remittat, ut melius disponatur : pœnitentia quam interea implebit, effectum non habebit ex opere operato, sicut et confessio, nisi eo instanti quo, accedente absolutione, perficietur sacramentum. Ita Dens.

*R.* 2°. Si tempus a confessario fuerit determinatum, eo tempore implenda est pœnitentia ; et illo effluxo, non liberatur pœnitens, quia non ad finiendam obligationem adjicitur tempus. Si vero tempus non fuerit determinatum, quamprimum moraliter implenda est pœnitentia, et mortale esset peccatum eam diu differre. Ratio quam afferunt auctores est integritas sacramenti, mutili remanentis, donec impleatur satisfactio a confessario injuncta.



Quanta autem requiratur dilatio ut peccatum sit mortale, non conveniunt inter se doctores : communius dicunt dilationem intra octiduum vel etiam usque ad quindenam non reputandam esse gravem, seclusa ratione medicinæ, quæ prius urgere potest : at probabilius est dilationem ad mensem, sine ratione excusante, peccatum esse mortale. Vide Ligorio, l. 6, n. 521. Si pars tantum pœnitentiæ differatur, peccatum erit veniale aut mortale, juxta quantitatem dilatam et gradum negligentiae.

*Quæritur 3º an pœnitens, post absolutionem in peccatum mortale relapsus, satisfacere possit pœnitentiæ sibi injunctæ?*

*R.* 1º. Si actualem haberet affectionem ad peccatum, certe non satisfaceret, cum ipsius opus vitaretur. 2º Peccat saltem venialiter, pœnitentiam in statu peccati mortalis implens, siquidem integram sacramenti partem indigne suscipit, et obicem fini ejus voluntarie ponit. 3º Probabilius est tamen et communissime docent theologi, eum substantialiter satisfacere, quia solum opus præscribitur, non vero finis ejus. Ita P. *Antoine*, *Collet*, *Billuart*, *Dens* alique rigidiores. Imo, juxta multos, sicut pœnitentiæ ante absolutionem jussu confessarii implendæ reatum pœnæ temporalis tollunt, cum peccatum postea per absolutionem remissum fuerit; ita pœnæ post absolutionem agendæ, etiamsi in peccato postea superveniente impletæ fuerint, tamen sublato per justificationem obice, suum effectum assequuntur. Ita P. *Antoine*.

## ARTICULUS QUARTUS.

DE COMMUTATIONE POENITENTIÆ A CONFESSARIO INJUNCTÆ.

*Certum est* 1º ipsum pœnitentem eam mutare non posse etiam in opus longe melius : nam pœnitentia a confessario imposita, auctoritate clavium Ecclesiæ ad rationem sacramenti elevatur, et habet vim pœnam temporalem ex opere operato remittendi : pœnitens autem non potest auctoritate sua vim hujusmodi conferre operi a se determinato quantumvis bono. Ergo.

*Certum est* 2° confessarium pœnitentiam a se impositam, in ipso tribunali sacro, vel etiam, juxta multos, Ligorio, l. 6, n. 529, extra tribunal, mutare posse, eodem sacramento moraliter durante, v. g. antequam pœnitens discedat, vel si statim redeat, quia hæc mutatio ad idem judicium pertinet : quidam hoc tempus extendunt ad plures dies, vel etiam ad hebdomadam, Ligorio, l. 6, n. 518. Eodem judicio amplius non durante, idem confessarius pœnitentiam mutare non potest, nisi, iterata confessione saltem in genere, absolutio concedatur, alioquin nova pœnitentia non esset sacramentalis. Sufficit in eo casu ut pœnitens, si confessarius statum ejus saltem confuse recordetur, dicat : Accuso me de omnibus peccatis quæ jam tibi, pater, confessus sum.

3° Quivis sacerdos legitime approbatus mutare potest, ob justam causam, pœnitentiam ab alio impositam : nam sacramentum Pœnitentiæ in bonum animarum a Christo fuit institutum : si ergo satisfactiones injunctæ factæ fuerint irrationales, impossibiles, nimis difficiles, inconvenientes, etc. necesse est ut mutari possint ; at, priore sacramento non durante, in altero judicio tantum mutari possunt : porro quilibet sacerdos legitime approbatus in novo judicio sententiam ferre potest : ergo. Ita fere omnes theologi, contra Soto et Vasquez.

In eo autem casu iterandum est sacramentum cum cunctis partibus ejus, scilicet contritione, confessione et absolutione ; alioquin, *ut jam dixi*, nova pœnitentia non esset sacramentalis. Attamen, cum peccata clavibus directe subjecta et vi prioris absolutionis remissa fuerint, sufficit præcipua in secunda confessione declarare, ita ut confessarius statum pœnitentis modo generali noscat, nisi forte pœnitentia mutanda medicinalis fuisset ; tunc namque distincte aperienda esset causa.

Monet P. *Antoine*, aliquid ex priori pœnitentia relinquendum esse, ne prius sacramentum integritate sua careat : subintelligendum est, si nulla pars ante mutationem fuerit impleta.

*Dixi legitime approbatus*, id est, habens jurisdictionem

in peccato pro quibus pœnitentia fuerat imposita : unde qui non est approbatus pro reservatis, juxta tutiorem et communiorem sententiam, mutare non posset pœnitentiam pro reservatis impositam.

Non extra dubium mihi videtur quod dicit *Billuart*, de Pœnitent. scilicet pœnitentem, post mutationem pœnitentiæ, ad priorem propria auctoritate redire posse, quia mutatio in ipsius gratiam facta est; posterior enim pœnitentia est sacramentalis : quomodo ergo sine judicio sacramentali omitti posset?

*Quæritur an unus pro altero satisfacere possit?*

*R. 1º.* Si agatur de satisfactione in genere, vel spectatur ut solutio debiti, vel ut medicinalis : in priori casu, unus pro altero satisfacere potest saltem per modum suffragii, id est, satisfactiones suas Deo pro minuenda pœna temporali fratris sui vivi aut defuncti offerre. Ita omnes catholici contra hæreticos. In posteriori vero casu, unus pro altero non magis satisfacere potest, quam sumere medicinam ad curandum alterius morbum.

*R. 2º.* Ubi de satisfactione sacramentali agitur, repugnat unum pro altero satisfacere? nam ista satisfactio, quatenus sacramentalis, est actus pœnitentis, ex conciliis Florentino et Tridentino supra citatis : ergo a solo pœnitente impleri potest. Unde Alexander VII sequentem damnavit propositionem : « Pœnitens propria auctoritate » substituere alium sibi potest, qui loco ipsius pœnitentiam adimpleat. »

Excipiendus est casus in quo confessarius non imposuisset actum personalem et afflictivum : tunc nihil obstarat quominus pœnitens satisfactionem sibi injunctam per alium impleat, v. g. eleemosynam pauperibus erogandam alteri committeret, nisi ex intentione confessarii ipse pauperes visitare deberet.

*Nota.* Si modus satisfaciendi non fuerit a confessario determinatus, arbitrio pœnitentis relinquitur : hinc si recitatio rosarii, v. g. simpliciter injuncta fuerit, pœnitens satisfaciet illud recitando genuflectens, stans, deambulans, sedens, aut alternatim cum alio : si pia lectio

fuerit præscripta, sufficiet legere oculis et mente sine vocibus articulatis, etc.

## CAPUT SEXTUM.

### DE FORMA SACRAMENTI POENITENTIÆ.

In præcedentibus capitibus de materia hujus sacramenti tractavimus : nunc per ordinem de forma ejus agendum est, et tria examinanda forent, videlicet 1° quæ sit forma hujus sacramenti, 2° quis ejus sensus, et 3° an forma deprecatoria sit valida. Jam probavimus adversus novatores sensum formæ seu absolutionis esse actum judiciale. Restat igitur ut duo alia examini subjiciamus.

### ARTICULUS PRIMUS.

#### QUÆ SIT FORMA SACRAMENTI POENITENTIÆ.

Concilium Florentinum, in Decreto ad Armenos, hæc habet : « Forma hujus sacramenti sunt verba absolutionis, » quæ sacerdos profert, cum dicit : *Ego te absolvo*, » etc. et conc. Trid. sess. 14, cap. 3 : « Docet præterea sancta synodus sacramenti Pœnitentiæ formam, in qua præcipue ipsius vis sita est, in illis ministri verbis positam esse : *Ego te absolvo*, etc. quibus quidem de Ecclesiæ sanctæ more preces quædam laudabiliter adjunguntur : » ad ipsius tamen formæ essentiam nequaquam spectant, » neque ad ipsius sacramenti administrationem sunt necessaria. »

Unde rituale Romanum hæc statuit :

Sacerdos cum pœnitentem absolvere voluerit, injuncta ei prius et ab eo accepta pœnitentia salutari, primo dicat :

*Misereatur tui omnipotens Deus, et dimissis peccatis tuis, perducatur te ad vitam æternam. Amen.*



Deinde, extensa versus poenitentem dextera, dicit : *Indulgentiam, absolutionem et remissionem peccatorum tuorum tribuat tibi omnipotens et misericors Dominus. Amen.*

*Dominus noster Jesus Christus te absolvat, et ego auctoritate ipsius te absolvo ab omni vinculo excommunicationis, suspensionis et interdicti, in quantum possum et tu indiges : deinde ego te absolvo a peccatis tuis, in nomine Patris, et Filii, et Spiritus sancti. Amen.*

*Passio Domini nostri Jesu Christi, merita beatæ Mariæ Virginis, omnium sanctorum, et quidquid boni feceris et mali sustinueris, sit tibi in remissionem peccatorum, augmentum gratiæ et præmium vitæ æternæ. Amen.*

Admonet postea idem Rituale omittendam esse vocem *suspensionis*, si poenitens sit laicus; omittenda est pariter si sit clericus in sacris non constitutus : et addit, in confessionibus frequentioribus et brevibus omitti posse orationes, *Misereatur et Indulgentiam*, satisque esse si dicatur : *Dominus noster, usque ad Passio Domini*; urgente vero gravi necessitate, breviter dici posse : *Ego te absolvo ab omnibus censuris et peccatis, in nomine Patris, et Filii, et Spiritus sancti. Amen.*

Rituale Cenomanense dicit faciendum esse signum crucis super poenitentem, dicendo, *Indulgentiam*, etc. extendendam dextram versus eum, dum dicitur, *Dominus noster*, etc. (cui orationi quædam adduntur verba), et ambas jungendas esse manus, dicendo, *Passio Domini*, etc.

Circa modum administrandi sacramenta, unusquisque accurate ediscere tenetur Rituale propriæ suæ diœcesis, et a regulis in eo contentis recedere non debet.

Rituale nostrum permittit quidem brevem formam, *Ego te absolvo ab omnibus censuris et peccatis*, etc. pronuntiari in extrema necessitate, si nempe poenitens ita sit morti proximus, ut integra forma pronuntiari nequeat; nihil vero dicit de licentia omittendi preces ante et post absolutionem, in confessionibus frequentioribus et brevibus : unde concludimus eas in mente ejus non esse omittendas.

Attamen illarum omissio, citra contemptum, lineam peccati venialis excedere non videtur; et probabilius nullum esset peccatum si notabilis existeret causa sic agendi, quia, si talis omissio expresse non permittatur apud nos, dici etiam potest illam positive non prohiberi.

*Quæritur 1º quænam verba sint essentialia?*

*R.* Certum est totam essentiam absolutionis intra verba orationis, *Dominus noster*, contineri: at pariter certum est omnia verba illam constituentia, ad validitatem sacramenti non requiri, quia plurima tolli possunt sine mutatione in sensu.

Sic 1º verba *Dominus noster*, usque ad *ego te absolvo*, ad essentiam formæ non pertinent: patet ex conciliis Florentino et Tridentino.

2º Nec pronomen *ego*, quod sufficienter exprimitur per verbum *absolvo*.

3º Nec illa verba, *in nomine Patris, et Filii, et Spiritus sancti*, quia invocatio Sanctissimæ Trinitatis in administratione hujus sacramenti non præscribitur in Scriptura, nec in traditione, nec in usu Ecclesiæ, tanquam essentialis: *ita communiter docent theologi*.

4º Dubitatur an verba *a peccatis tuis*, sint essentialia. Multi negant, dicentes sensum verborum *absolvo te*, præsentia pœnitentis qui peccata confessus est, sufficienter determinari; alii vero non pauci contendunt ea absolute requiri; nam, inquiunt, Christus sacramentum Pœnitentiæ instituendo, dixit, *Quorum remiseritis peccata*: sicut propter verbum *quorum*, exprimenda est persona absolvenda, sic pariter exprimenda sunt peccata. Prior sententia probabilior mihi videtur; sed omnes fatentur ea omittere verba, mortale esse peccatum, et in casu omissionis iterandam esse absolutionem propter dubium.

Ergo hæc verba, *Absolvo te a peccatis tuis*, reputanda sunt essentialia, et saltem, etiam in casu necessitatis, sic pronuntianda est absolutio: *Ego absolvo te ab omnibus censuris et peccatis tuis, in nomine Patris*, etc. Communius tamen docetur censuras, solo verbo *a peccatis*, tolli cum ipsis peccatis.

*Quæritur* 2° an absolutio sub forma æquivalenti prolata, v. g. *Con dono, Remitto tibi peccata tua*, etc. sit valida?

*R.* Graviter est illicita, utpote insolita, praxi Ecclesiæ contraria et poenitentium offensiva : sed valida est, quia idem substantialiter remanet sensus. Notat Cajetanus, apud *Billuart*, illicitam quidem, sed validam fore absolutionem datam in plurali numero, honoris causa.

*Quæritur* 3° an forma absolutionis ita essentialiter consistat in verbis ore prolati, ut scriptura vel nutus non sufficiant?

*R. affirmative.* 1° Quia talis fuit voluntas Christi, unanimi Ecclesiæ consensu probata. Quia forma sacramentorum in verbis consistit, excepto matrimonio in quo sufficiunt nutus. 3° Quia concilia Flor. et Trid. ita requirunt.

Non obstat quod in foro contentioso sententia scripta proferri possit, nisi legislator aliter statuerit : nam iudicium sacramentale et iudicium forense non sub omni respectu æquiparari debent, et in præsentī casu discrimen in eo consistit, quod iudicium forense de absente proferri possit, non item sacramentale.

*Hinc* 1° absolutio valide dari non potest per litteras neque per nuntium, ex dictis.

*Hinc* 2° necesse est ut persona absolvenda sit moraliter præsens, id est, intra distantiam qua homines commune altiori voce loqui solent, quod nonnulli ad viginti passus circiter extendunt. Attamen in casu necessitatis, poenitens longius distans, v. g. cadens e tecto, sub conditione absolvendus esset.

Non requiritur ut poenitens verba absolutionis audiat vel audire possit, et multo minus ut ea intelligat.

*Quæritur* 4° an forma sub conditione prolata, sit valida?

*R.* 1°. Certum est absolutionem datam sub conditione de futuro, v. g. *Absolve te, si restituas, si in peccatum non labaris*, esse nullam. Vel enim effectum suum haberet hic et nunc, vel tempore quo adimpletur conditio : at

neutrum dici potest; non prius, cum sacerdos intentionem absolvendi non habeat; non posterius, quia gratia sacramenti non potest sic manere suspensa.

*R. 2º.* Absolutio data sub conditione de præterito vel de præsentī, v. g. si restitueris, si non es absolutus, valida est modo conditio existat; nihil enim effectum ejus suspendit. At graviter illicita est, nisi necessitas excuset, quia hic modus absolvendi est insolitus et reverentiæ sacramento debitæ adversus.

Similiter non licet exprimere conditionem quæ necessario supponenda est, v. g. Absolvo te, si vere es contritus, si habeas votum restituendi, satisfaciendi, etc. confessarius enim est judex: debet ergo adhibere curam sufficientem ut de statu pœnitentis prudenter judicet et absolutam ferat sententiam; quid enim sentiretur de judice qui sententiam suam sic proferret: Decerno objectum litis Petro, v. g. reddendum esse, si melior sit ratio ejus? tam in se ridicula foret absolutio conditionata extra casum necessitatis.

*Videbimus infra* quibus neganda vel concedenda est absolutio, recensendo quandonam absolutio sub conditione dari possit. Hic autem volumus conditionem, quando legitime apponitur, vocibus non exprimendam esse: talis quippe est usus Ecclesiæ, ea fundatus ratione, scilicet, quod sacramentum Pœnitentiæ per modum judicii administretur, et in judicio sententia absoluta esse debeat.

Multi tamen dicunt quod, si dubitetur an pœnitens adhuc vivat, vel fuerit absolutus, absolutio dari possit sub conditione expressa, si tu es capax, si non es absolutus, ut fit in Baptismo. Ita *P. Antoine*. Certe nec eum qui eo casu conditionem exprimit, nec qui non exprimit damnare vellem.

## ARTICULUS SECUNDUS.

AN FORMA DEPRECATORIA SIT VALIDA.

Triplici modo enuntiari potest absolutio, videlicet 1º indicative, v. g. *Absolvo te a peccatis tuis*, ut fit apud nos;



2<sup>o</sup> deprecative, v. g. *Absolve, quæsumus, Domine, hunc famulum tuum a peccatis ejus*, ut fit apud Græcos; vel 3<sup>o</sup> imperative, v. g. *Esto a peccatis tuis absolutus*.

Nulla proferuntur exempla quibus ostendatur formam imperativam olim fuisse usurpatam : eam igitur prætermittimus.

Certum est a forma indicativa apud nos usitata recedere graviter illicitum fore, quia violaretur lex ecclesiastica in materia gravi.

Quæstio est igitur an ex hypothesi quod forma deprecatoria adhiberetur, sacramentum esset validum. Affirmat P. Morinus, l. 8, cap. 8, et plurimi post ipsum, inter quos *Juenin, Witasse, Tournely*, etc. qui contendunt hanc formam duodecim prioribus sæculis adhibitam fuisse in ipsa Ecclesia Latina.

Multi vero alii demonstrare nituntur formam indicativam absolute necessariam esse, et proferunt monumenta quibus ostendere volunt formam indicativam, si non in verbis, saltem quoad sensum, semper in usu fuisse, tum apud Græcos, tum apud Latinos.

## PROPOSITIO.

*Probabilius est formam pure deprecatoriam ad validitatem sacramenti non sufficere.*

*Prob. 1<sup>o</sup> Scriptura sacra.* Christus enim, instituendo hoc sacramentum, non dixit, *Quæcumque petieritis peccata esse solvenda*, erunt soluta, sed, *Quæcumque solveritis* : porro illa verba indicant actionem sacerdotis non tantum deprecantis, sed pronuntiantis tanquam auctoritatem habentis : ergo.

2<sup>o</sup> *Auctoritate concil. Florent. et Trid.* quæ definierunt formam sacramenti Poenitentiae sitam esse in his verbis, *Ego te absolvo a peccatis tuis*, et preces quæ illis laudabiliter adjungi solent, ad essentiam formæ non pertinere. Nonne eo ipso definierunt formam essentialem esse indicativam?

3<sup>o</sup> *Plures sancti Patres* comparant ministerium sacerdotum novæ Legis pœnitentes absolventium ministerio levitarum leprosos probantium, et inter hos et illos hoc admittunt discrimen, scilicet, quod in nova Lege sacerdotes lepram peccati non tantum probent mundatam, sed mudent, dum levitæ lepram carnis solummodo declararent mundatam : atqui tale non admitteretur discrimen, si forma simpliciter deprecatoria sufficeret.

4<sup>o</sup> *Ratione theologica.* Sacramentum Pœnitentiæ per modum judicii fuit institutum : sacerdos igitur debet proferre sententiam ut judex : porro sententiam non proferret ut judex, si tantum deprecaretur : ergo.

*Insuper probavimus supra* absolutionem sacerdotis non esse nudum ministerium declarantis peccata esse remissa, sed actum judiciale : ergo denique, etc.

Verum forma deprecatoria in sono, sed indicativa in sensu, valida est ; constat enim propria verba formæ hujus sacramenti a Christo non fuisse determinata : sufficit ergo ut actio ministri absolventis exprimatur et verificentur verba Christi, *Quorum remiseritis*, etc. Porro actio ministri absolventis per formam deprecatoriam in sono et indicativam in sensu exprimitur. Supponatur, v. g. hæc forma Græcorum, apud Goar, *Domine Jesu Christe, Fili Dei vivi, pastor et agnus qui tollis peccatum mundi... relaxa, remitte, condona peccata... a servis tuis istis commissa.* Cum sacerdos prius audierit pœnitentem eique satisfactionem injunxerit tanquam judex, nonne sensus hujusmodi verborum est : Remitte, Domine, peccata cui ea remitto, seu, in cujus gratiam ministerium meum exerceo, juxta verba tua, *Quorum remiseritis*, etc.? Ergo.

Unde 1<sup>o</sup> licet forma deprecatoria olim adhibita fuerit apud Latinos, *hocque supposito, non concessa*, nihilominus sacramentum erat validum. 2<sup>o</sup> Etiam si sola forma deprecatoria in sono adhiberetur apud Græcos, validitas sacramenti non periclitaretur ; et idcirco Latini talem formam eis nunquam exprobraverunt, nec dubitaverunt illos sacramentum Pœnitentiæ retinere.

Cæterum, falsum est solam formam deprecatoriam in

usu esse apud Græcos; Goar enim plures describit formas indicativas apud Calabros, Apulos et Siculos usurpari solitas, quas nonnulli Orientales acceptarunt. Arcudius, ipse Græcus, probat, *Concordia Ecclesiæ Orientalis et Occidentalis in sacramentorum administratione*, l. 4, cap. 3, eas formas quæ primo aspectu deprecatoriæ videntur, vere esse absolutas quoad sensum, et initio capitis sapienter observat, « nullam unquam fuisse controversiam » de hac re inter Græcos et Latinos, ac proinde non esse » verisimile antiquam formam hujus sacramenti ex odio » alicujus vel malitia mutatam aliquando fuisse, et in- » credibile dictu videri Græcorum ecclesiam nunquam » habuisse veram formam hujus sacramenti. »

---

## CAPUT SEPTIMUM.

### DE MINISTRO SACRAMENTI POENITENTIÆ.

Tres hujus capitis erunt articuli, quorum primus erit de characterē in ministro sacramenti Poenitiæ requisito; secundus, de jurisdictione ipsi necessaria, et tertius, de ejus officiis seu obligationibus.

## ARTICULUS PRIMUS.

### DE CHARACTERE IN MINISTRO SACRAMENTI POENITENTIÆ REQUISITO.

Valdenses existimabant bonum laicum, non vero malum sacerdotem, habere facultatem absolvendi. Inter articulos Wiclefi in concilio Constantiensi damnatos, iste reperitur, *laicum, si vir frugi fuerit, clavium potestatem a Christo accepisse*. Novatores in concilio Tridentino damnati, docebant, referente Palavicino lib. 12, cap. 10, « sacerdotes non habere potestatem ligandi et solvendi, » nisi Spiritus sancti gratia et charitate sint præditi; et

» non eos solos esse ministros absolutionis, sed omnibus  
 » et singulis Christianis esse dictum : *Quodcumque solve-*  
*ritis,* » etc. Soli tamen ministri apud ipsos sententiam  
 reconciliationis pronuntiant.

P. Morinus arbitratur atque contendit, lib. 8, cap. 3,  
 diaconis concessum fuisse apud Latinos confessiones au-  
 dire et a peccatis absolvere in casu necessitatis, id est, in  
 mortis periculo et deficiente sacerdote.

#### PROPOSITIO.

*Solus sacerdos minister est sacramenti Pœnitentiæ.*

*Prob.* Illa propositio est de fide, constat Scriptura  
 sacra et traditione.

1º *Est de fide*, utpote definita a conc. Trid. sess. 14,  
 can. 10, his verbis : « Si quis dixerit sacerdotes qui in  
 » peccato mortali sunt, potestatem ligandi et solvendi  
 » non habere; aut non solos sacerdotes esse ministros  
 » absolutionis, sed omnibus Christi fidelibus esse dictum :  
 » *Quodcumque ligaveritis...* anathema sit. » Idem jam tra-  
 diderant concilium Florentinum, in Decreto ad Armenos,  
 conc. Const. adversus Wiclefum, et conc. Later. IV, præ-  
 cipiendo ut omnes fideles semel in anno peccata sua  
 proprio sacerdoti confiterentur. Hæc verba, *proprio sa-*  
*cerdoti*, supponunt confessionem soli sacerdoti fieri posse.  
 Ergo 1º.

2º *Constat Scriptura sacra.* Hi soli habent potestatem  
 remittendi peccata quibus Christus, instituendo sacra-  
 mentum Pœnitentiæ, dixit : *Quorum remiseritis...* Atqui  
 Christus hæc verba, non ad laicos, sed ad solos Apostolos  
 proindeque ad eorum successores direxit. Porro soli sa-  
 cerdotes Apostolis successerunt. Ergo 2º.

3º *Constat traditione* quæ semper tenuit solis sacerdo-  
 tibus competere potestatem ligandi et solvendi, juxta  
 prædicta verba Christi, et omnes sancti Patres quos plu-  
 ries citavimus, vel expresse dixerunt, vel supposuerunt  
 solos sacerdotes sacramenti Pœnitentiæ esse ministros :



v. g. S. Cyprianus, *dum remissio facta per sacerdotes*; S. Ambrosius, *qui relaxandi licentiam sacerdotibus suis concessit*: S. Chrysostomus, *qui dignitatem sacerdotum, ex potestate remittendi peccata vi verborum Christi, re-  
evrat*: ergo 3<sup>o</sup>; aliunde, etc. insuper... Ergo.

*De fide est ergo* 1<sup>o</sup> sacerdotes etiam malos sacramen-  
Pœnitentiæ esse ministros; 2<sup>o</sup> nunquam laicos, quantum-  
vis bonos, et in quacunque necessitate, sacramentum  
istud administrare posse. Verum opinio P. Morini defi-  
nitioni conc. Trid. non directe adversatur, ac proinde  
sub anathemate non percutitur, licet manifeste sit falsa  
et hæresi proxima; cum traditione enim et cum his conc.  
Trid. verbis, *aut non solos sacerdotes esse ministros abso-  
lutionis*, conciliari nequit.

*Solvuntur objectiones.*

*Obj.* 1<sup>o</sup>. Hæc verba, *Euntes... baptizantes eos in nomine  
Patris...* ad solos Apostolos directa sunt: atqui non soli  
Apostolorum successores, sed laici ipsæque mulieres va-  
lide baptizare possunt: ergo *a pari*, etc.

*R. Nego conseq. et paritatem.* 1<sup>o</sup> Quia ipsa Scriptura  
subministrat exempla Baptismi a diacono, scilicet a Phi-  
lippo collati, Act. Apost. viii, 12 et 38. 2<sup>o</sup> Quia Ecclesia  
semper credidit et docuit Baptismum a laicis et etiam a  
mulieribus collatum, esse validum; nihil vero tale pro-  
fertur ubi de Pœnitentia agitur: insuper conveniens erat  
ut Baptismus ad salutem necessarius necessitate medii,  
non a solis sacerdotibus administrari posset; non ita ne-  
cessaria est Pœnitentia. Ergo.

*Inst.* S. Jacob. v, 16: *Confitemini alterutrum peccata  
vestra, et orate pro invicem ut salvemini*: ergo ipsi laici  
confessionem excipere possunt.

*R. Dist. conseq.* Si hæc verba de confessione non sacra-  
mentali intelligantur, *conc.* si de confessione sacramen-  
tali intelligenda sint, *neg. conseq.* Etenim quidam dicunt  
B. Jacobum per verba *confitemini alterutrum peccata  
vestra*, solam intelligere confessionem quæ fit humilitatis

causa, vel ad petenda consilia : tunc certum est ipsos laicos hujusmodi confessionem aliquando excipere posse. Si vero, ut alii volunt, de confessione sacramentali ibi Apostolus loquatur, per verbum *alterutrum*, non quilibet intelligendi sunt homines, sed soli sacerdotes, siquidem invictis argumentis constat solos sacerdotes hujus sacramenti esse ministros. Ergo.

*Obj. 2º.* S. Cyprianus dicit, Ep. 12, loquens de homine in periculo mortis constituto : « Si presbyter repertus » non fuerit, et urgere exitus cœperit, apud diaconum » quoque exomologesim facere delicti sui possunt, ut » manu ejus in Pœnitentiam imposita, veniant ad Dominum cum pace. » Ergo saltem et diaconi sunt ministri hujus sacramenti ad sensum P. Morini.

*R. Nego consequ.* Nam, juxta doctorum interpretationem quæ perpetua traditione innititur, de sacramentali reconciliatione ibi non agitur, sed de absolutione ab excommunicatione in lapsos pronuntiata, vel probabilius a pœnitentiis canonicis quibus lapsi subiciebantur : atqui non repugnat diaconos olim fuisse deputatos ad tollendas hujusmodi pœnās ecclesiasticas, præsertim in casu necessitatis, ut exprimit S. Cyprianus. Si autem Ecclesia persuasum habuisset eos in casu necessitatis a peccatis sacramentaliter absolvere posse, cur ministerium istud decursu temporum ipsis non credidisset et etiam nunc non crederet, sed potius crudeliter sineret peccatores, deficiente sacerdote, in præsentia diaconi sine reconciliationis sacramento decedere? Nonne talis consuetudo demonstrat non magis diaconos quam laicos sacramenti Pœnitentiæ esse ministros? Ergo.

*Inferendum est, ex dictis in præsentí articulo,* absolutiones a confessario non valide ordinato, sive sit impostor, sive bona fide se credat sacerdotem, prorsus esse nullas : sola igitur contritione perfecta peccator in eo casu justificari potest.

## ARTICULUS SECUNDUS.

DE JURISDICTIONE MINISTRO SACRAMENTI POENITENTIÆ  
NECESSARIA.

Jurisdictio in genere est potestas quam quis habet in alterum tanquam in subditum. Potest esse vel civilis vel ecclesiastica, pro foro externo vel pro foro interno. Hic de sola jurisdictione pro foro interno in ordine ad absolutionem sacramentalem quæstio moveri potest. Jurisdictio sic spectata recte definitur: *Auctoritas quam habet sacerdos alterum in foro conscientie absolvendi tanquam subditum.*

Duplex distinguitur, ordinaria scilicet et delegata. Jurisdictio ordinaria ea est quam quis habet ratione sui officii cui annexa est cura animarum, ut papa, episcopus, parochus: delegata vero illa dicitur quam habet sacerdos ex alterius commissione: tales sunt apud nos vicarii, presbyteri habituati, missionarii, etc.

*Notandum est*, jurisdictionem, sive delegatam, sive ordinariam, a potestate ordinis multum differre. 1° Potestas ordinis cunctis sacerdotibus cum caractere æqualiter confertur; non item potestas jurisdictionis, non omnibus nec æqualiter datur. 2° Potestas ordinis est irrevocabilis, jurisdictio vero revocari potest.

Hic sex nobis inquirenda sunt, videlicet 1° an jurisdictio sit necessaria ad validitatem absolutionis; 2° quinam habeant jurisdictionem ordinariam; 3° quinam habeant delegatam; 4° an qui ex errore communi pro ordinariis vel delegatis habentur, valide absolvere possint; 5° quid sit approbatio et an necessaria; 6° quinam a peccatis reservatis absolvere possint.

§ I. — An jurisdictio sit necessaria ad sacramentum Pœnitentiæ valide administrandum.

PROPOSITIO.

*Præter ordinis potestatem, necessaria est jurisdictio in sacerdote ut valide absolvat.*

*Prob. 1º auctoritate conciliorum.* Conc. Lat. IV, can. 21, hæc habet : « Si quis autem alieno sacerdoti voluerit »  
 » justa de causa confiteri, licentiam prius postulet a »  
 » proprio sacerdote, cum alter ille non possit solvere vel »  
 » ligare. »

Conc. Flor. in Decreto ad Armenos, de ministro hujus sacramenti sic loquitur : « Minister hujus sacramenti est »  
 » sacerdos, habens auctoritatem ordinariam, vel ex com- »  
 » missione. »

Conc. Trid. sess. 14, cap. 7, dicit : « Quoniam natura »  
 » et ratio judicii illud exposcit, ut sententia in subditos »  
 » duntaxat feratur, persuasum semper in Ecclesia Dei »  
 » fuit, et verissimum esse synodus hæc confirmat, nul- »  
 » lius momenti absolutionem eam esse debere quam sa- »  
 » cerdos in eum profert, in quem ordinariam aut subde- »  
 » legatam non habet jurisdictionem. » Sancta synodus exponit cur jurisdictio sit necessaria, videlicet, quia sententia sacerdotis est actus judicialis : ut judicium autem sit validum, requiritur auctoritas in eo qui judicat et subjectio in eo qui judicatur : ergo non tantum jure ecclesiastico, sed institutione divina necessaria est jurisdictio.

*Prob. 2º constanti traditione et praxi Ecclesiæ.* In primis enim sæculis, videmus episcopos Pœnitentiam per seipsos imponere, pœnitentes reconciliare, vel sacerdotes ad eos reconciliandos committere, parochos instituere, eisque parochianos subjicere atque exigere ut eis solis peccata confiteantur. Ergo.

*Dices.* Omnis sacerdos accipit in ordinatione sua potestatem remittendi peccata his verbis : *Accipe Spiritum sanc-*



*tum ; quorum remiseris peccata, remittentur eis.* Ergo vel jurisdictio non est necessaria, vel simul cum potestate ordinis confertur.

*R. Nego conseq.* Nam, ut ait concil. Trid. de natura est iudicii ut sententia in subditos duntaxat feratur : ergo præter potestatem iudicandi, assignandi sunt subditi in quos hæc potestas exerceri possit. Res illustrari potest exemplo ex ordine civili petito : supponatur quod rex aliquem constituat iudicem eique titulum nominationis regiæ conferat, sed tribunal ei non assignet ; certe homo ille veram habebit potestatem iudicandi, et tamen defectu subditorum, illam exercere non poterit : talis est sacerdos valide ordinatus : Christus illum constituit iudicem ad remittenda aut retinenda peccata, sed necesse est ut Ecclesia assignet ei subditos. Certe hoc sensu intelligenda sunt verba ordinationis, *Accipe Spiritum sanctum ; quorum remiseris peccata*, etc. vel dicendum est quemlibet sacerdotem parem habere auctoritatem vi suæ ordinationis ac episcopos et ipsum papam, proindeque concilia generalia prius citata errasse, traditionem esse deserendam et Ecclesiæ consuetudinem reformandam. Ergo.

Non requiritur autem jurisdictio pro validitate aliorum sacramentorum, v. g. Baptismi, Eucharistiæ, Extremæ Unctionis, quia per modum iudicii non administrantur.

## § II.—Quinam habeant jurisdictionem ordinariam.

Certum est omnes pastores legitime constitutos ordinariam habere jurisdictionem : nomine pastorum ii omnes intelliguntur qui ratione sui officii vel tituli curam habent animarum : in triplici ordine vulgo ponuntur, scilicet :

1° Summus Pontifex pro universo orbe, respectu omnium christianorum. Ad hunc ordinem revocandi sunt Major Pœnitentiarius et Legatus a latere, qui ratione sui officii ordinariam habent jurisdictionem, prior in tota Ecclesia, et posterior in sua legatione.

2º Episcopus pro tota sua diœcesi et respectu omnium diœcesanorum : sub ejusdem nomine comprehenditur vicarius generalis, qui non solum in causis civilibus, ut quidam volunt, sed in spiritualibus eadem est persona moralis cum episcopo, et ideo eandem exercet jurisdictionem. At, moriente episcopo, amittit officium proindeque jurisdictionem. Ad hunc ordinem pertinent archiepiscopi in diœcesibus suffraganeis, sed tempore visitationis duntaxat, vicarii capitulares, sede vacante, pœnitentiarius, si quis sit legitime institutus, abbates exempti, si qui sint, in proprio territorio, generales ordinum et provinciales respectu religiosorum sibi subditorum.

3º Parochus in sua parochia et respectu parochianorum. Ad hunc ordinem olim revocabantur vicarii perpetui, et nunc revocandi sunt non solum parochi *amovibiles*, dicti deservientes, sed et ii qui ecclesiæ sub nomine capellæ *vicarialis* cognitæ præficiuntur; item prælati et superiores immediati monasteriorum : hi enim ratione officii sui habent curam animarum.

*Notandum est* 1º, domicilium in ordine ad suscipienda sacramenta, si matrimonium excipiat, ratione contractus, solo facto habitationis cum animo manendi obtineri : unde episcopus jurisdictionem acquirit ordinariam in hominem ipso die quo incipit habitare in diœcesi sua cum animo manendi; item parochus in parochianum, etc. Qui duplex habent domicilium, v. g. domum hiemis et domum æstatis in parochiis diversis, duplicem habent parochum et ab alterutro absolvi possunt, scilicet, ab eo in cujus territorio tunc degunt.

Iter facientes, peregrinantes et vagi, nullum domicilium fixum habentes, ei subjiuntur episcopo vel parochi in cujus territorio tunc existunt : sic ordinariorum consensus et Ecclesiæ praxis determinavit.

*Notandum est* 2º, jurisdictionem ordinariam directe personas afficere easque ubique sequi, et mediate tantum in territorio circumscribi. Unde episcopus valide absolvere potest suos diœcesanos, parochus suos parochianos in qualibet orbis parte; imo et licite hoc faciet, habita-

vel rationabiliter præsumpta ordinarii loci, sive episcopi, sive parochi, licentia. Ita P. *Antoine, Bailly*, Theologia Lugd.

Cessat jurisdictio ordinaria per amissionem officii cui annexa est, *ut patet*; item per suspensionem vel per excommunicationem publice et nominatim denuntiata: ita fert jus canonicum et unanimitèr theologi docent. Non vero amittitur nec suspenditur per censuras quantumvis publicas, nec per irregularitatem, si denuntiatio publice et nominatim facta non fuerit. Sic adhuc omnes nunc theologi, post bullam *Ad vitanda scandala*. Hinc parochi legitime instituti qui juramentum constitutione civili anno 1790 præscriptum emiserunt, non ideo jurisdictione sua exuti sunt.

§ III.—Quinam habeant jurisdictionem delegatam.

De natura est jurisdictionis ordinariæ ut per alium exerceri possit, nisi ordinarius agnoscat superiorem qui delegationem prohibuerit. Unde legitur in Sexto Decretalium, lib. 1, tit. 17, c. 7: « Cum episcopus in sua tota » diœcesi jurisdictionem ordinariam noscatur habere, du- » bium non existit quin in quolibet loco ipsius diœcesis » non exempto, per se vel per alium possit pro tribunali » sedere. »

Delegatio autem duplici modo fieri potest, directe et indirecte. Fit directe, quando sacerdos audiendis confessionibus in uno loco committitur. Fit vero indirecte, si ordinarius concedat pœnitenti facultatem sibi eligendi confessarium et ab eo absolutionem suscipiendi, quod tempore jubilæi concedere solet Pontifex maximus. In posteriori hoc casu, jurisdictio non creditur laico, ut eam confessario tradat, sed occasione electionis a laico factæ, sacerdoti confertur.

Ut legitima sit delegatio, plures requiruntur conditiones, videlicet 1<sup>o</sup> ut delegans legitimus sit ordinarius et limites suæ jurisdictionis non excedat: unde absolutiones ab episcopis, vi constitutionis civilis cleri Gallicani institutis, et a sacerdotibus ab eis delegatis concessæ,

erant nullæ; 2º ut delegare non prohibeatur, quales sunt degradati et excommunicati vitandi; 3º ut consensus ejus sit formalis, actualis et expressus, nec sufficeret consensus futurus rationabiliter præsumptus, nec rati-  
habilitio de præterito, si nempe ordinarius dicat, Approbo quod factum est; quia nec jurisdictio præsumpta, nec approbatio præteriti in actum judiciale influunt; 4º ut delegatus sit capax, id est, rite ordinatus, nec excommunicatus publice denunciatus aut degradatus.

Delegatio fieri potest scripto, verbo, vel alio quolibet signo voluntatem delegantis sufficienter manifestante: sedulo autem pensandi sunt termini concessionis, quia tantum valent quantum sonant.

Hujusmodi delegatio facta sacerdoti, prout fit ordinariæ, territorium immediate afficit et mediate tantum personas: non potest ergo ultra territorium assignatum valide exerceri.

Unde 1º vicarii qui apud nos delegatam habent jurisdictionem pro omnibus ecclesiis quæ sunt sub districtu ejusdem pastoratus primarii ac ecclesia in qua munia vicarii exercent, et in aliis ecclesiis ab ista plusquam duabus leucis non distantibus, ultra hos limites valide absolvere non possunt, nequidem habitantes parochiam in qua sunt vicarii. Soli excipiuntur ægroti qui, ad ecclesiam in territorio assignato stantem pertinentes, domi retinentur ibique audiendi sunt.

2º Capellani xenodochiorum aliarumque communitatum sive mulierum sive virorum, sacerdotes sacrum ministerium in seminariis et in collegiis exercentes, et presbyteri habituati, similem habent jurisdictionem ordinariæ circumscriptam, quam excedere non debent.

3º Parochi in nostra diœcesi, præter jurisdictionem ordinariam in parochianos suos, habent delegatam pro tota diœcesi. Non solum igitur extraneos in propria ecclesia audire et absolvere possunt, saltem extra tempus paschale, sed et in cunctis aliis ecclesiis, de consensu parochi, nisi hæc jurisdictio in aliquo casu fuerit limitata, quod duplici modo fieri potest, scilicet quoad territo-



rium, ut, v. g. si parochus extra propriam ecclesiam confessiones excipere prohibeatur; vel quoad personas, v. g. si parochus ad solos parochianos restringatur.

4° Parochi et etiam sacerdotes delegati unius diœcesis communius delegatam habent jurisdictionem pro parochiis adjacentibus alterius vicinæ diœcesis, secundum morem diœceseon vel episcoporum concessionem. Sic, ex more recepto, cuncti sacerdotes in diœcesibus nos circumstantibus legitime approbati, eadem possunt in nostra diœcesi ad distantiam duarum leucarum ac vicarii.

5° Ex tacita concessione ordinariorum omnium locorum, quilibet sacerdotes ordinariam vel delegatam jurisdictionem habentes, audire possunt, extra tempus paschale, quosvis pœnitentes undique ad ipsos accedentes: legitime sedent pro tribunali in loco sibi assignato; et cum de jurisdictione voluntaria agatur, quascumque causas sibi oblatas terminare possunt, seclusa speciali prohibitione ex parte ordinariorum pœnitentium vel confessoriorum.

Dixi, *extra tempus paschale*; quia confessio annualis, tempori paschali nunc affixa, alieno sacerdoti fieri non potest, sine proprii licentia, ex canone *Omnis utriusque sexus*, conc. Lat. Parochus autem est proprius sacerdos respectu parochianorum et episcopus respectu diœcesanorum: ad confessionem igitur paschalem specialis requiritur licentia parochi vel episcopi. An vero licentia ista sub pœna nullitatis requiratur, non omnes ejusdem sunt sententiæ. Certum est requiri licentiam parochi vel episcopi, et quidem sub pœna nullitatis, cum concilium dicat alium sacerdotem sine licentia proprii absolvere non posse: sed quæstio est an delegatio generalis episcopi sufficiat, an vero expressa pro tempore paschali requiratur, sive parochi, sive episcopi. Hoc a voluntate episcoporum pendet, saltem juxta sententiam nunc communem quæ certa nobis videtur. Disciplina igitur diœceseon examinanda est et sequenda: in hacce diœcesi licentia parochi requirenda est, sed ad validitatem sacramenti non exigitur. Reverendissimus episcopus noster,

sicut antecessor ejus, vult omnes parochos in danda hujusmodi licentia faciliores se præbere camque parochianis suis publice concedere, ne ullus repugnantia confitendi proprio parocho, aut difficultate licentiam ab eo obtinendi, a confessione deterreatur.

*Quæritur* 1° an quidam habeant a jure facultatem confessarium sibi eligendi?

R. Gregorius IX, Decret. l. 5, tit. 38, c. 16, hæc habet: « Ne pro dilatione pœnitentiæ periculum immineat » animarum, permittimus episcopis et aliis superioribus, » necnon minoribus prælatis exemptis, ut etiam præter » superioris sui licentiam, providum et discretum sibi » eligere possint confessarium. » Hæc concessio non fuit revocata.

Igitur 1° episcopi, etiam nondum consecrati, modo sint confirmati, sive sint titulares, sive *in partibus*, sive *demissionarii*, quemlibet voluerint sibi eligere possunt sacerdotem in confessarium, non tantum in propria diœcesi, quod a nemine negatur, sive subditum, sive extraneum sacerdotem eligant, sed etiam in aliena diœcesi; tuncque vel subditum secum iter facientem aut ibi reperiunt, vel extraneum eligere possunt. Plures tamen theologi contendunt illos eligere non posse, extra territorium suæ diœcesis, sacerdotem a proprio episcopo non approbatum. Ita *Fagnan*, *Collet*, etc.

2° Generales ordinum, provinciales, abbates a jurisdictione episcoporum exempti, cardinales, prælati locales exempti, ut priores, guardiani, rectores, omnes qui sub nomine superiorum intelliguntur, confessarium pariter sibi eligere possunt, sive inter regulares, sive inter sæculares, sed probabilius inter eos tantum qui ab ordinario sunt approbati. Sic *Billuart*.

Quidam extendere voluerunt privilegium episcopis et superioribus a constitutione Gregoriana concessum, ad parochos; sed communius hæc facultas ipsis adimitur: in tali controversia pars tutior est eligenda.

*Quæritur* 2° quamdiu duret jurisdictio delegata?

R. Vel concessa est ad tempus determinatum, v. g. ad

annum, et, adveniente termino præfixo, expirat, sine positiva revocatione; vel data est sine limitatione temporis, et tunc perseverat donec revocata fuerit, quia juxta regulam 16 juris, in Sexto, *Decet concessum a principe beneficium esse mansurum*; et aliunde jurisdictionis delegatio apud omnes habetur ut gratia. Ergo.

Non cessat ergo per mortem delegantis: ita statuitur in Sexto, l. 3; tit. 4, cap. 36, nec pariter per demissionem, suspensionem, interdictum aut depositionem ejus.

Insuper requiritur ut revocatio sufficienter delegato manifestata fuerit: hinc absolutiones inter revocationem et manifestationem ejus concessæ, validæ sunt.

Verum, cum delegatio a sola voluntate delegantis pendeat, semper revocari potest a delegante vel a successore aut superiore ejus, etiam sine causa et illicite. De facto revocatur per suspensionem ab homine, per excommunicationem denuntiata et interdictum.

Tempore perturbationis Gallicanæ, episcopi exsilium petendo, censebantur jurisdictionem vicariis aliisque simplicibus presbyteris schismati adhærentibus delegatam revocare. Aliunde hujusmodi sacerdotes schismati adhærentes, jurisdictioni sibi delegatæ renuntiabant.

*Quæritur 3º an delegatus alium subdelegare possit?*

R. Delegatus ad universale, v. g. ad officium episcopi vel parochi absentis, potest delegare ad particulare, ut generaliter docetur, Ligorio, l. 6, n. 566; sed delegatus ad particulare, v. g. ad audiendas confessiones, subdelegare non potest, nisi hanc facultatem a delegante obtinuerit. Ratio est, quia vi delegationis habet tantum potestatem exercendi jurisdictionem quoad personas, non vero eam alteri committendi. *Ita omnes theologi et canonistæ.*

§ IV. — An qui ex errore communi pro pastoribus ordinariis vel pro delegatis habentur, valide absolvere possint.

Omnes generaliter docent eos qui ex errore communi pro pastoribus ordinariis vel pro delegatis habentur, va-

lide absolvere posse; imo et licite, si error ab ipsorum voluntate non pendeat: nam Ecclesia in eo casu, pro bono spirituali fidelium ad tollendas anxietates et vitanda scandala, supplet jurisdictionem; hocque constat tum 1<sup>o</sup> ex jure civili, lege *Barbarius*, de officio prætorum; tum 2<sup>o</sup> ex jure canonico, decreto *Causa tertia*, quæst. 7, cap. *Infamis*; tum 3<sup>o</sup> ratione; Ecclesia est enim optima mater: atqui talis non esset, si in hujusmodi circumstantia jurisdictionem in gratiam filiorum suorum non suppleret; tum 4<sup>o</sup> ex communi sensu omnium doctorum, qui in hac materia gravissimi sunt ponderis. Ergo.

Ut autem valeat jurisdictio sic delegata, tres requiruntur conditiones, scilicet 1<sup>o</sup> ex parte confessarii, titulus coloratus; 2<sup>o</sup> ex parte populi, error communis; 3<sup>o</sup> ex parte Ecclesiæ, ut jurisdictionem supplere possit.

1<sup>o</sup> Titulus coloratus, id est, titulus a superiore legitimo acceptus, sed ob defectum occultum, v. g. ob excommunicationem, simoniam aut irregularitatem, nullus, aut valide concessus, sed occulte revocatus. Necessitas hujus tituli fundatur in dispositione juris canonici; ita saltem indicant canonistæ, ut videre est apud *Fagnan, Dens*, et inde concludunt actus intrusi semper esse nullos.

Hinc invalida est absolutio ab eo collata qui falsas litteras approbationis confixit, vel delegationem sub falso nomine obtinuit, vel etiam qui delegationem pro tempore fixo, v. g. ad triennium, obtinuit, et elapso hoc tempore confessiones pergit audire: nam, quidquid nonnulli dicant, titulus coloratus ipsi deest. Ita Layman, Sanchez, congreg. Card. anni 1683, Bened. XIV, Inst. 84, § 16, Ligorio, l. 6, n. 572, contra *Billuart*.

2<sup>o</sup> Requiritur error communis, talis scilicet quod vitium tituli vel revocatio ejus communiter ignoretur apud populum, in loco ubi suscipitur confessio; alioquin non metuendum esset damnum publicum: attamen Ecclesia non supplet jurisdictionem nisi ad vitandum malum publicum. Ergo. Unde error unius aut alterius etiam invincibilis, jurisdictionem sacerdoti non conferret. Si



rumor serperet inter populum circa validitatem tituli parochi, aut circa illius officii revocationem, qui peccata ei confiteri vellet, teneretur antea veritatem rumoris inquirere, *ut patet* : si autem, adhibita diligenti inquisitione, dubium maneat, valide ille sacerdos absolvere potest, quia injustum esset illum, in dubio, possessione certa privare.

3° Requiritur ut Ecclesia defectum supplere possit, secus error communis et titulus coloratus frustra invocarentur. Hinc si impostor non sacerdos, exhibitis falsis testimoniis, officium parochi aut vicarii obtineat, omnes ejus actus sunt nulli, quia potestatem ordinis Ecclesia supplere non potest, nec alios defectus juris naturalis aut divini, sed solos defectus juris ecclesiastici.

*Quæritur* 1° an ex solo errore communi, sine titulo, Ecclesia suppleat jurisdictionem?

*R.* Plures affirmant, inter quos Card. de Lugo, Sanchez, Bonacina, Billuart, etc. quia, inquiunt, posito errore communi, eadem in detrimentum animarum sequuntur incommoda ac si titulus coloratus existeret : Ecclesia autem jurisdictionem supplere potest : ergo eam supplet. Alii vero non pauci negant, præcipue quia talis jurisdictio potius præsumitur quam judicatur existere ; est igitur dubia : porro jurisdictione dubia uti non licet. Attamen, propter rationem alterius sententiæ, optandum esset, inquit *Collet*, cont. *Tournely*, pastores, id est, episcopos jurisdictionem in eo casu supplere.

*Quæritur* 2° an liceat uti jurisdictione probabili in personas vel in peccata?

*R.* Concina, P. Antoine, et alii absolute negant, quia ubi de valore sacramentorum agitur, opinionem etiam probabilissimam, relicta tutiori, amplecti non licet. Billuart et multi alii affirmant, contendentes Ecclesiam in eo casu jurisdictionem supplere, ex hypothesi quod reipsa non existat, quia alioquin confessarii sæpe forent anxii circa veritatem suæ jurisdictionis et poenitentes circa validitatem absolutionis : ad aliorum argumentum respondetur, non licere quidem uti opinione probabi-

lissima sed minus tuta, relictæ tutiori, ubi agitur de materia sacramentorum necessaria quam Ecclesia supplere non potest : at ibi agitur de jurisdictione quæ potestatem Ecclesiæ non excedit.

Quidquid sit, illicitum est uti tali jurisdictione extra casum necessitatis, ut v. g. si sacerdos in peccato mortali constitutus celebraturus esset, et copiam non haberet confessarii jurisdictionem certam possidentis. Ita ipse *Billuart, Ligorio et communiter theologi*.

§ V. — Quid sit approbatio et an sit necessaria.

Approbatio est judicium authenticum superioris de idoneitate sacerdotis ad confessiones excipiendas, cum consensu ut jurisdictionem obtineat, vel habita utatur. Ratio hujus definitionis ex verbis concilii Tridentini mox referendis desumitur.

*Notandum est*, ante concilium Tridentinum, omnes pastores ordinarios, sive episcopos, sive parochos, sive vicarios perpetuos, jurisdictionem in animas sibi commissas quibusvis sacerdotibus delegare posse : sed frequenter contingebat sacerdotes audiendis confessionibus minime idoneos advocari, idque in ingens animarum detrimentum; quod malum sancta synodus Tridentina præcavere volens, statuit ut deinceps nullus sacerdos delegari posset, nisi prius ab episcopo idoneus judicatus esset, et approbationem obtinuisset : sic se habet sancta synodus sess. 23, cap. 15, de Refor.

« Quamvis presbyteri in sua ordinatione a peccatis ab-  
 » solvendi potestatem accipiant, decernit tamen sancta  
 » Synodus, nullum, etiam regularem, posse confessiones  
 » sæcularium, etiam sacerdotum, audire, nec ad id ido-  
 » neum reputari, nisi aut parochiale beneficium, aut  
 » ab episcopis per examen, si illis videbitur esse necessa-  
 » rium, aut alias idoneus judicetur, et approbationem,  
 » quæ gratis detur, obtineat : privilegiis et consuetudine  
 » quacunque, etiam immemorabili, non obstantibus. »  
 Circa hoc decretum plurima sunt observanda, scilicet :

1<sup>o</sup> Approbationem necessariam esse ad validitatem sacramenti : nam qui non est idoneus ad audiendas confessiones , valide absolvere non potest : talis est sensus obvius, et ita omnes verba concilii intelligunt.

2<sup>o</sup> Approbationem cunctis necessariam esse sacerdotibus beneficium parochiale non habentibus, etiam doctoribus, sive sæcularibus, sive regularibus.

3<sup>o</sup> Illam necessariam non esse parochis ad absolvendos parochianos, sive in proprio territorio, sive extra parochiam aut diœcesim inventos vel secum ductos. Attamen petenda est licentia parochi vel ordinarii loci, ut vitetur scandalum.

4<sup>o</sup> Sed parochi indigent approbatione ad audiendas confessiones fidelium alterius parochiæ, sive apud se, sive alibi. Caveant igitur ne limites suæ approbationis excedant : qui autem pro tota diœcesi sua approbantur ut apud nos, non ideo pro alia diœcesi approbati sunt.

5<sup>o</sup> Necessaria est approbatio pro confessionibus omnium sæcularium etiam sacerdotum, non vero pro confessionibus regularium qui, secundum jus antiquum cui concilium Tridentinum non derogavit, sacerdotibus regularibus, vel etiam sæcularibus, cum sola delegatione superioris, sine approbatione episcopi confiteri possunt.

6<sup>o</sup> Non tantum pro mortalibus nondum confessis, sed pro venialibus et mortalibus jam remissis requiritur approbatio, ut docet Bened. XIV, Inst. 86, § 8.

7<sup>o</sup> Cum approbatio a sola voluntate libera episcopi vel vicarii ejus generalis pendeat, limitari potest quoad locum, tempus, personas et peccata : hinc qui pro solis viris approbatur, mulieres audire non potest et invalide eas absolveret. Propter eandem rationem, approbatio injuste denegata vel sine causa revocata, nihilominus est nulla, et invalida foret absolutio.

8<sup>o</sup> Quamvis approbatio a delegatione jurisdictionis separari possit, sicut diploma capacitatis ab institutione magistri pro scholis primariis nunc distinguitur, mos tamen invaluit, saltem apud nos, a conc. Tridentino, ut episcopi jurisdictionem simul cum approbatione confer-

rent. Unde nunc parochi jurisdictionem delegare non possunt, siquidem eligere tenentur inter approbatos qui omnes jurisdictione jam donati sunt.

*Quæritur* 1° an pro audiendis confessionibus monialium specialis requiratur approbatio episcopi?

*R. affirmative*, etiam pro monialibus a jurisdictione episcopi exemptis. Patet 1° ex constitutione Gregorii XV *Inscrutabili*, a Benedicto XIII, anno 1726 confirmata. 2° Ex auctoritate cleri Gallicani, propositionem sequentem anno 1700 condemnantis: « Religiosæ exemptæ possunt » absolvi a sacerdote non approbato ab episcopo, sive » sacerdos ille sit sæcularis, sive regularis. » 3° Ex praxi communi Ecclesiæ. 4° Ex decretis S. Congr. conc. resolventis: 1° monialium confessiones auditas sine speciali approbatione esse nullas; 2° approbatum pro excipiendis confessionibus mulierum, non ideo censi approbatum pro monialibus; 3° approbatum pro uno monasterio, non censi pro alio monasterio approbatum. Hæc autem omnia confirmavit Clemens X, anno 1670, bulla *Superna magni patrisfamilias*. Ergo.

Nomine monialium, hic solæ intelliguntur mulieres in claustro viventes; non vero illæ quæ clausuram servare non tenentur, ut quæ vulgo dicuntur *sœurs de Charité*. Certum est tamen episcopos statuere posse ut, pro illis audiendis, specialis obtinenda sit approbatio.

Confessarii igitur monialium ab ipsis eligi non possunt, sed ab episcopo loci eligi et approbari debent. Ex prohibitione sacræ Congregationis episcoporum et regularium, diei 4 martii 1591, confessarii monialium ad triennium duntaxat approbari debent, quo elapso, non possunt amplius audire confessiones in eodem monasterio, sine licentia sacræ Congregationis. Sed illa dispositio in Gallia non fuit admissa, et approbatio pro audiendis monialibus indefinite concessa non cessat, nisi per revocationem.

« Præter ordinarium autem confessorem, alius extra- » ordinarius ab episcopo et aliis superioribus, bis aut ter » in anno offeratur, qui omnium confessiones audire de-



• beat. • Sunt verba conc. Trid. sess. 25, de Regularibus et Monialibus, cap. 10.

Concilium non prohibet ne plures præficiantur confessori extraordinarii, neque ultra duas aut tres vices in anno offerantur: sensus est unum ad minus, saltem bis aut ter in anno, committendum esse, et ita decisum fuisse refert Ferraris, vº *Moniales*, art. 5, n. 33.

Quamvis hæc institutio facta fuerit in favorem monialium quæ extraordinario confiteri stricte non tenentur, tamen exigendum est ut omnes coram illo successive se præsentent, ne forte aliqua ministerio ejus indigens, ad illum sola accedere vereatur. Sic expresse statuit sacra Congr. episc. die 19 oct. 1621.

Quinimo, episcopus invigilare debet ut regulares confessorium extraordinarium debite approbatum, saltem bis aut ter in anno, offerant monialibus sibi subjectis, quales sunt apud nos Trappistinæ respectu Trappistarum, et ipse quandoque etiam sæcularem committere potest. Ferraris, art. 5, n. 3.

*Quæritur* 2º an capellani militum seu missionarii castrenses approbatione episcoporum indigeant?

*R.* Certum est illos absolvere non posse milites absque legitima approbatione; sed quæstio est an approbatio majoris capellani regii (*du grand-aumônier du roi*) eis sufficiat, an vero requiratur approbatio episcopi loci.

Cum majores capellani regii sola auctoritate civili fuerint instituti, nullam habent jurisdictionem ecclesiasticam ratione sui tituli, nec proinde eam delegare possunt, nisi facultatem id faciendi a sede Apostolica obtinuerint.

Clemens XII, brevi diei 4 februarii anni 1736, precibus Philippi V, Hispaniarum regis, inclinatus, concessit majori capellano ab ipso pro tempore deputato, facultatem per se vel per alios sacerdotes probos et idoneos in examine a se repertos et subdelegandos, sacramentaliter absolvendi milites a quibusvis peccatis et censuris, necnon alias utriusque sexus personas ad exercitus regios (comprehensis etiam copiis auxiliaribus) spectantes. Eamdem facultatem Bened. XIV concessit, die 28 maii 1746,

majori capellano Caroli-Emmanuelis III, regis Sardiniae.

In Gallia autem majores capellani contendunt similia privilegia sibi concessa fuisse; episcopi vero negant: idcirco pars tutior eligenda est, et capellani militum vel navium approbationem episcoporum requirere et obtinere debent, donec summus Pontifex suam voluntatem clare manifestaverit.

Sed petitur cujus episcopi approbatio ipsis necessaria sit, cum de diœcesi in diœcesim sæpe transeant. Collator Andeg. respondet approbationem episcopi loci in quo formatur regimen, vel portus unde proficiscitur navis, capellanos constituere parochos et regiminis et navis, eisque jurisdictionem ordinariam conferre quam ubique valide exercere possunt, licet pro bono ordine coram episcopis locorum in quibus diu manere debent se sistere teneantur. Quoniam plerique non instituuntur capellani in locis ubi regimina formantur, hæc decisio non est praxis universalis; itaque mos est omnes approbationem episcopi in cujus territorio aliquandiu mansuri sunt obtinere, et interea approbatione prius sibi concessa uti.

*A fortiori* capellani scholarum militarium approbatione episcopi indigent.

#### § VI.—Quinam a peccatis reservatis absolvere possint.

Casus reservati quædam sunt delicta ratione sui vel scandali atrociora, circa quæ jurisdictio in inferioribus presbyteris limitatur. Reservatio igitur non est censura, cum non sit proprie pœna, sed limitatio jurisdictionis: unde ignorantia non tollitur. Finis illius est ut populus enormitatem peccati quod difficilius remittitur, apprehendat, et graviores causæ peritioribus committantur.

Ut peccatum censeatur reservatum, plures requiruntur conditiones, quæ sequentibus exprimuntur versibus:

Completum, externum, certum, mortale, favores  
Auge, odium stringe, a potiori illatio non est,  
Mas annos habeat bis septem, femina bis sex,  
Solve mandantes, quando non jura reservant.

Itaque 1° *peccatum debet esse mortale*. Cum enim peccata venialia non sint materia necessaria sacramenti Pœnitentiæ, repugnat ea reservari : unde si peccatum ex natura sua mortale, ex ignorantia vel inadvertentia fiat veniale, jam non est reservatum.

2° *Debet esse externum*. Peccata interna sæpe sunt dubia, et mortalia a venialibus non facile distinguuntur : illorum igitur reservatio prudens non esset.

3° *Debet esse completum* et in ea specie quæ reservatur consummatum ; quia juxta regulam juris 15, in Sexto, *Odia restringi convenit* : igitur qui hominem graviter vulnerat ex intentione illum occidendi, reservationem cui subjacet homicidium non incurrit.

4° *Requiritur ut a pubere fuerit commissum*. Quamvis enim nulla lex generalis reperiatur in jure qua impuberes a reservatione excipiantur, est tamen sententia communis eos tali restrictioni non subjacere, nisi superior ecclesiasticus expresse declaraverit. Ætas autem pubertatis determinata est quatuordecim annorum pro masculis, duodecim pro feminis.

5° *Debet esse certum*, id est, certo commissum : ita communiter theologi, et tuto hoc tenendum est, nisi episcopus aliud expresse statuerit. In dubio vero juris quo scilicet ambigitur an existat lex peccatum certo commissum reservans, pars tutior est eligenda, et ideo pro reservatione stare oportet.

6° Reservatio extendi non debet ultra propriam verborum significationem, quia *odia restringi et favoris convenit ampliari*. Unde, reservato homicidio, solus homicida reservationi subjacet, non vero mandantes, licet magis rei esse possint ; ideo conclusio a fortiori non valet. *His notatis*, sit

#### PROPOSITIO PRIMA.

*Summus Pontifex et episcopi jus habent quosdam sibi reservandi casus.*

*Prob. 1° concil. Trid. sess. 14, cap. 7 : « Magnopere ad Christiani populi disciplinam pertinere sanctissimis*

» patribus nostris visum est , ut atrociora quædam et graviora crimina, non a quibusvis, sed a summis sacerdotibus duntaxat absolverentur : unde merito Pontifices maximi, pro suprema potestate sibi in Ecclesia universa tradita, causas aliquas criminum graviores suo potuerunt peculiari iudicio reservare. »

« Neque dubitandum est.... quin hoc idem episcopis omnibus in sua cuique diœcesi, in ædificationem tamen, non in destructionem, liceat, pro illis in subditos tradita supra reliquos inferiores sacerdotes auctoritate, præsertim quoad illa quibus excommunicationis censura annexa est. » Et canone 11 : « Si quis dixerit episcopos non habere jus reservandi sibi casus, nisi quoad externam politiam.... anathema sit. »

*Prob. 2º constanti usu et praxi Ecclesiæ.*

*Prob. 3º ratione.* Jurisdictio pendet a voluntate ordinariorum : ergo limitari potest saltem in delegatis. Major est difficultas pro inferioribus ordinariis : attamen, cum superiores veram habeant jurisdictionem in eos, v. g. summus Pontifex in episcopos et episcopi in parochos, non repugnat quod illorum jurisdictionem intra certos limites coerceant, ad sensum conc. Trid. Ergo.

*Colliges,* reservationem factam sine causa et injuste, graviter quidem illicitam esse ex parte superioris, et tamen validam, quia jurisdictio pendet a voluntate ordinarii.

#### CASUS SUMMO PONTIFICI RESERVATI.

*Qui omnes annexam habent censuram.*

1º Exustio templorum necnon domorum profanarum, voluntarie procurata, cum incendiarius est publice denunciatus.

2º Effractio cum spoliatione sacrarum ædium et monasteriorum, post effractorum et spoliatorum publicam denuntiationem.

3º Simonia realis in ordinibus et beneficiis, et confidentia, dummodo sit publica.



4° Occisio, mutilatio, vel atrox percussio, sive clerici in sacris ordinibus constituti et clericali habitu induti, sive religiosi religionis habitu similiter induti.

5° Percussio etiam non atrox episcopi seu alterius prælati, id est, superioris vel pastoris.

6° Falsificatio bullarum vel litterarum apostolicarum.

*Nota 1°*, prædictos casus, si sint occulti, episcopo cum censura sua esse reservatos : ii autem reputantur occulti qui in iudicio non fuerunt probati et aliqua tergiversatione celari possunt in vicinia, ut si paucis, v. g. tribus aut quatuor personis discretis innotescerent, aut si factum appareret dubium.

*Nota 2°*, episcopum ab iisdem casibus etiam non occultis absolvere posse regulares, moniales, feminas, pauperes, senes, valetudinarios, et denique eos omnes qui, salva vita, libertate aut rebus suis, Romam adire nequeunt.

*Nota 3°*, percussione[m] clerici non atrocem, vel clerici ordinibus sacris non initiati, episcopo tantum reservari.

*Nota 4°*. Præter hos casus summo Pontifici reservatos, alii sunt in iure communi expressi, sed in his regionibus rarissime eveniunt : alii vero multo frequentius occurrentes reperiuntur in bulla *In cœna Domini* : verum cum hæc bulla in Gallia nunquam fuerit recepta, de illis parum nobis curandum est.

Casus autem episcopis reservati pro diœcesibus variantur. Legendi sunt in Ritualibus, et, apud nos, in libello cui titulus, *Enchiridion confessoriorum*.

#### PROPOSITIO SECUNDA.

*Extra mortis articulum vel probabile ejus periculum, solus superior cui casus reservantur, vel ipsius delegati, ab eis valide absolvere possunt.*

*Prob. ex conc. Trid. sess. 14, cap. 7, in fine.* « Extra quem articulum, sacerdotes, cum nihil possint in casibus reservatis, id unum pœnitentibus persuadere nitun-

- » tur, ut ad superiores et legitimos iudices pro beneficio  
» absolutionis accedant. »

*Idem constat ratione.* Absolutio sine jurisdictione nulla est : reservatio autem est limitatio jurisdictionis : ergo.

*Hinc 1° in articulo mortis, nulla est reservatio, ut infra dicemus.*

2° Absolutio ab inferiori sacerdote, specialiter non delegato, extra periculum mortis concessa, quantumvis ex ignorantia, inadvertentia aut necessitate id fiat, est nulla : attamen statuitur in nostra diœcesi, ex indulgentia charitatis, ut pœnitens qui bona fide casus reservatos confitetur confessario approbato quidem, sed non pro reservatis, valide absolvatur ; et confessarius, si ex contemptu legis vel ex ignorantia graviter culpabili sic egerit, suspensionem ipso facto incurrat.

3° Qui a sancta Sede pro casibus pontificiis delegaretur, non ideo pro casibus episcopo reservatis approbatus esset, quia unum in altero non comprehenditur.

4° Confessarius pro reservatis non approbatus, a non reservatis eundem pœnitentem absolvere nequit, *ut patet* ; nec idcirco pergere debet in audienda confessione si advertat existere casum reservatum, nisi præsumat se licentiam a superiore obtenturum, et pœnitens in dilationem absolutionis consentiat.

5° Si absolutio, ex debita auctoritate ordinaria vel delegata concessa, ob indispositionem pœnitentis sit nulla, non tollitur reservatio, nisi superior hoc expresse voluerit, quod sane præsumi non potest.

6° Qui in una diœcesi simpliciter est approbatus, absolvere potest pœnitentes alterius diœcesis ad se bona fide accedentes, a casibus in ea diœcesi, non in sua reservatis ; quia reservatio, cum sit limitatio jurisdictionis, confessarium et non pœnitentem afficit. Aliunde causa delicti finienda est secundum jura loci in quo iudicium exercetur.

7° Si quis bona fide peccatum reservatum oblitus, a confessario pro reservatis approbato rite absolvatur, tollitur reservatio, ac proinde peccatum istud cuilibet confessario simpliciter approbato confiteri potest.

Permultæ sunt aliæ difficultates in intricatissima hac materia, ut videre est apud Collatorem Andeg. Ligorio aliosque theologos. Eas nec solvere, nec exponere intendimus : in nostra diœcesi et in multis aliis, ut mihi videtur, facultas a reservatis et censuris eis annexis absolventi, omnibus confessariis ipsisque vicariis et presbyteris habituatis nunc conceditur, ne in miseris nostris temporibus reservatio in destructionem potius quam in ædificationem vergat. Semper tamen excipitur peccatum contra castitatem exterius commissum, a quo sacerdos complicein extra mortis articulum, nunquam absolvere potest, ut in Supplemento ad tractatum de Matrimonio ostendimus.

§ VII. — Quinam habeant jurisdictionem in articulo mortis.

Certum est nullam esse reservationem in articulo mortis, ut expresse declarat concilium Tridentinum, sess. 14, cap. 7, his verbis : « Verumtamen pie admodum, ne hac » occasione aliquis pereat, in Ecclesia Dei custoditum » semper fuit ut nulla sit reservatio in articulo mortis ; » atque ideo omnes sacerdotes quoslibet pœnitentes a » quibusvis peccatis et censuris absolvere possunt. »

At, cum ibi de reservatione tantum agatur, dubium movetur inter doctores an soli presbyteri simpliciter approbati, a reservatis in articulo mortis absolvere possint, an vero omnes sacerdotes, etsi minime approbati, ipsique schismatici, hæretici, excommunicati, irregulares, degradati et apostatæ, a quibusvis peccatis et censuris, Ecclesia in hoc casu jurisdictionem ipsis supplente, absolvere possint.

Fere omnes concedunt de sacerdotibus non approbatis, sed in communionem Ecclesiæ viventibus ; verum multi negant de iis qui ab unitate Ecclesiæ sunt præcisi, et nituntur 1<sup>o</sup> auctoritate S. Thomæ, qui in 3 part. q. 82, art. 7, ad secundum, asserit hujusmodi sacerdotes, præter baptismum, in nullo casu alia sacramenta conferre posse ; 2<sup>o</sup> veteri disciplina ante concilium Tridentinum ubique recepta, cui concilium derogare noluit ;

3<sup>o</sup> declaratione Congr. concil. pronuntiantis decretum capitis 7, sess. 14, de sacerdotibus in unitate Ecclesiæ viventibus intelligendum esse; Concina, t. 20 : hæc decisio multis non videtur authentica. Alii vero communissime affirmant prædictos sacerdotes a communione Ecclesiæ præcisos, in articulo mortis valide absolvere, defectu alterius sacerdotis in unitate catholica viventis. 1<sup>o</sup> Quia talis esse videtur sensus verborum concilii Tridentini, *ne aliquis pereat, omnes sacerdotes, quoslibet pœnitentes, a quibusvis peccatis*. 2<sup>o</sup> Quia præsumendum est Ecclesiam in tali extremitate jurisdictionem supplere. 3<sup>o</sup> Quia ita multi sentiunt doctores, inter quos Navarrus, Sanchez, Suarez, de Lugo, Soto, Sylvius, Tournely, Billuart, Dens, Ferraris, etc. 4<sup>o</sup> Quia hæc opinio saltem est probabilis : in necessitate autem opinione probabili uti licet. Ergo. Unde Pius VI, hac de re consultus, respondit, die 1 aprilis 1794, « non esse improbandam rationem quam » inierunt nonnulli Gallicani præsules, qui in articulo » vel periculo mortis, pœnitentiæ sacramentum, quod » est secunda post naufragium tabula, a sacerdotibus ju- » ratis, ac etiam a parochis intrusis, recipi posse permise- » runt, deficiente quovis alio catholico sacerdote. » *Recueil des Brefs*, t. 3.

Sub nomine articuli mortis, comprehenditur etiam probabile ejus periculum, quamvis inter utrumque physicum existat discrimen : ita fere omnes theologi, ut videre est apud Concina, Ferraris, v<sup>o</sup> *Jurisdictio*, n. 27, Ligorio, l. 6, n. 561. Tale autem periculum censetur adesse in prælio, in longa navigatione si confessarius non adfuturus sit, in partu difficili, etc.

*Queritur* an simplex sacerdos, præsentē approbato, moribundum in articulo mortis absolvere possit?

*R.* Plures affirmant, dicentes concilium Tridentinum jurisdictionem in articulo mortis omnibus sacerdotibus indistincte conferre, et ampliandos esse favores, odia vero restringenda. Sed communissima est sententia negans, hoc innixa fundamento, scilicet, jurisdictionem ab Ecclesia in sacerdotibus non approbatis suppleri propter ne-



cessitatem : porro dici non potest adesse necessitatem si sacerdos approbatus non deficiat, nisi confessionem excipere et absolutionem impertire nolit; vel forte, nisi ægrotus tanta corripiatur repugnantia erga approbatum ut conscientiam suam ei aperire nequeat, vel si confessio simplici sacerdoti jam incœpta sit quando supervenit approbatus, Ita *Collet*, *Ligorio* et plures alii.

## ARTICULUS TERTIUS.

### DE OBLIGATIONIBUS CONFESSARII.

Inter obligationes confessarii, aliæ spectant confessionem, aliæ absolutionem, et aliæ sigillum.

§ I. — De obligationibus confessarii quæ spectant confessionem.

Necesse est 1° ut confessarius habeat probitatem, 2° scientiam, 3° prudentiam; 4° ut confessionibus audiendis paratum se præbeat; 5° ut pœnitentes prudenter interroget; 6° ut ignorantes moneat, et 7° ut contritionem in frigidis et obduratis excitare conetur.

SECTIO PRIMA. — De probitate in confessario necessaria.

Nomine probitatis requisitæ in ministro sacramenti Pœnitentiæ, quam alii vocant bonitatem, duo intelliguntur, videlicet: 1° status gratiæ justificantis, vel habitualiter existentis, vel recuperatæ per ipsum Pœnitentiæ sacramentum, aut saltem per contritionem perfectam; 2° eminentia in virtutibus ad munus confessarii rite obeundum necessariis, v. g. in pietate erga Deum, in charitate, compassione et misericordia erga proximum, in sollicitudine erga propriam salutem, etc.

*Certum est* 1° statum gratiæ in ministro Pœnitentiæ non necessarium esse ad validitatem sacramenti: hoc fuit definitum in concil. Trid sess. 7, can. 12, de Sacramentis in genere; docetque sancta Synodus, sess. 14, cap. 6, » sacerdotes qui peccato mortali tenentur, per virtutem » Spiritus sancti in ordinatione collatam, tanquam Christi

» ministros, functionem remittendi peccata exercere,  
 » eosque prave sentire, qui in malis sacerdotibus hanc  
 » potestatem non esse contendunt. » Ratio est, quia sacerdos non proprio nomine, sed nomine Christi agit: ergo non repugnat gratiam sanctificantem quam ipse non habet, per ministerium ejus alteri conferri.

*Certum est* 2<sup>o</sup> sacerdotem Pœnitentiæ sacramentum licite administrare non posse, nisi sit in statu gratiæ: id constat ex tractatu de Sacramentis in genere, in quo probatur eum qui sacramentum aliquod in statu peccati mortalis scienter ministrat, mortaliter peccare: sacerdos igitur confessionibus audiendis deputatus et peccato mortali inquinatus, tot admittit peccata mortalia quot dat absolutiones, quia tot sunt sacramenta ex parte ipsius profanata, ac proinde tot sacrilegia numero distincta. Ita communissime theologi contra paucos qui volunt unicam esse in Deum irreverentiam, si confessiones successive et sine interruptione fuerint auditæ; quia, inquiunt, eadem est actio moralis, sicut actio plura vasa sacra simul furandi. Imo probabilius est eum qui in statu peccati mortalis confessionem audit, et absolutionem ob justam rationem differt, vel antequam eam concedat perfecte conteritur, mortaliter peccare; quia magnam ministerii sui partem indigne exercet, et manifesto se exponit periculo aut pœnitentem injuste remittendi, aut sacrilege eum absolvendi.

Si quis tamen improvise ad moribundum vocatus, tempus se recolligendi non habeat, aut bona fide falso credat se perfecte conteri, non peccat absolvendo: Ligorio, l. 6, n. 617.

*Certum est* 3<sup>o</sup> ministrum sacramenti Pœnitentiæ multis virtutibus pollere teneri ut munere suo digne fungatur, tum ad gloriam Dei promovendam, tum ad proximum recte ducendum, tum ad seipsum inter innumera pericula custodiendum atque salvandum: impossibile est quippe confessarium, de colendis virtutibus Christianis parum sollicitum, eas pœnitentibus efficaciter persuadere, et multa non admittere peccata.

SECTIO SECUNDA. — De scientia in ministro sacramenti  
Pœnitentiæ requisita.

Certum est aliquam scientiam requiri in confessario saltem ut munere suo licite fungatur : nam officium judicis, medici et ministri sacramenti exercet : at sub triplici hoc respectu aliquam scientiam habere tenetur.

1° *Ut judex.* Tunc scire debet quæ sit ipsius potestas, pro quo tempore, ad quas personas et ad quæ peccata se extendat; quæ dispositiones in pœnitentibus requirantur, quis dolor, quod propositum non peccandi de cætero; quid sit peccatum, quid non; quæ peccata ex genere suo sint mortalia, quæ venialia; quæ species peccati, quæ circumstantiæ in confessione explicandæ; quandonam peccata multiplicentur numero; quænam obligationem restituendi, aut famam reparandi, vel parti læsæ satisfaciendi inducant; quænam sint reservata et censuram aliquam sibi annexam habentia, etc., etc. Porro hæc omnia scientiam aliquam requirunt. Ergo 1°.

2° *Ut medicus.* Eo titulo scire tenetur ea quæ pertinent ad iterationem confessionum, si invalidæ fuerint; ad amovendas occasiones peccatorum, ad tollendos eorum habitus et radices, ad injungenda opportuna remedia, ad desperantes erigendos, pusillanimes confortandos, afflictos consolandos, duros emolliendos et ad compunctionem excitandos.

3° *Ut minister* validitatem et honorem sacramenti procurare debet. Necesse est igitur ut sciat quidquid ad debitam administrationem ejus pertinet, scilicet materiam, formam, conditiones in pœnitente requisitas, et denique regulas in Scriptura, traditione et canonibus Ecclesiæ fundatas. Ergo.

Horum autem scientiam comparabit continua Scripturæ sacræ meditatione, juris canonici et theologiæ moralis studio, librorum spiritualium lectione, virtutum Christianarum exercitatione et assidua orationis mentalis praxi.

Dixi 1<sup>o</sup> *aliquam in eo requiri scientiam*; non enim summa necessaria est scientia, sed mediocris sufficit, ea scilicet qua confessarius intelligat quæ frequentius accidunt, et in difficilioribus prudenter dubitet ac pœnitentem ad doctiorem virum remittat; vel ipse doctiores aut libros consulat, suspensa interim absolutione, vel etiam aliquando concessa, si pœnitens promittat se facturum quod fuerit determinatum.

Major autem vel minor requiritur scientia pro diversitate locorum et personarum: sic major necessaria est eis qui audituri sunt confessiones in civitatibus vel in aulis principum, quam eis qui ministerium suum in pagis vel in collegiis tantum exercituri sunt; major pro audienda confessione presbyterorum quam monialium, etc.

Dixi 2<sup>o</sup> *saltem ut munere suo licite fungatur*: vix enim contingere potest ut absolutio sit nulla defectu scientiæ in confessario; quia, supposita materia legitima et forma integra, sufficit, ex communi doctorum sententia, ut minister peccata sub generali notione offensæ Dei cognoscat: porro fere impossibile est sacerdotem rationis compotem adeo ignarum esse ut peccata saltem sub hac ratione generali non apprehendat: ergo.

Attamen confessio fieri potest nulla per accidens, defectu scientiæ confessario, in duplici casu: nempe 1<sup>o</sup> si pœnitens mala fide quærat confessarium qui peccata ipsius non intelligat et conscientiam prudenter judicare nequeat, quia sufficientes non habet dispositiones ut valide absolvatur; 2<sup>o</sup> si inter confitendum advertat confessarium quædam peccata non intelligere et apertius ea non dicat, quia præcepto divino confessionis non satisfacit.

Confessarii autem qui absque scientia sufficienti tanto muneri se ingerunt, eo ipso mortaliter peccant, et insuper omnes falsæ decisiones quas daturi sunt, in eorum perniciem vertentur totque erunt ipsis peccata mortalia.

Similiter gravissime peccant superiores qui facultatem confessiones excipiendi hujusmodi ignaris concedunt, vel concessam non revocant, cum possunt, quia infinita inde



oriuntur mala. Ita Layman, Bonacina, de Lugo, Ligorio, etc.

Excusatur tamen sacerdos ignarus qui ob solam necessitatem confessiones audit, v. g. in periculo mortis, alio capaciore deficiente, vel si episcopus, urgente confessariorum penuria, munus confessiones excipiendi ei cujus ignorantiam cognoscit, virtute obedientiae imponat, et in hoc corrigendus mihi videtur P. Antoine; quia longe melius est ut sint confessarii minus docti, sed pii et moribus integri, quam nulli: si bona fide faciant quod in se est, materialiter tantum in falsis decisionibus peccabunt, sacramentum poenitentibus vere contritis valide administrabunt, sicque salutem eorum absque proprio detrimento efficaciter adjuvabunt. Ergo.

Propter eandem rationem, a peccato immunes sunt episcopi et vicarii generales qui, deficientibus magis idoneis, tales approbant sacerdotes. Eos tamen moneant de stricta obligatione quantum possunt ediscendi.

*Queritur an confessarius distinctam habere debeat singulorum peccatorum notitiam?*

R. Necesse est ut singula peccata, dum accusantur, intelligat, alioquin præceptum de integra confessione facienda non impleretur: unde confessarius qui ex notabili negligentia vel ignorantia peccatum mortale non intelligeret, graviter peccaret; secus si ex inadvertentia, distractione, ob somnum gravantem, cantum, strepitum, linguam impeditam confitentis, etc. aliquod ipsi excidat peccatum; quia præceptum positivum de integritate confessionis non obligat ad ea quæ sunt moraliter impossibilia. Si tamen poenitens advertat peccatum mortale a confessario non fuisse intellectum in sua gravitate, illud iterum confiteri tenetur: *sequitur ex dictis, ubi de præcepto divino confessionis.*

At non requiritur confessarium habere notitiam distinctam omnium peccatorum, ut satisfactionem imponat et licite absolvat: sufficit ut statum poenitentis moraliter cognoscat.

## SECTIO TERTIA. — De prudentia in confessario requisita.

Prudentia est virtus hominem in quocumque statu spectatum recta via deducens, ut nec deficiat, nec excedat, ideoque aliarum virtutum oculus merito dicitur.

Certe dubitari non potest quin talis virtus confessario maxime sit necessaria, quod in concilio Lateranensi IV, can. *Omnis utriusque sexus*, sic exprimitur : « Sacerdos » autem cautus et discretus sit, ut more periti medici su- » perinfundat vinum et oleum vulneribus sauciati, di- » ligenter inquirens et peccatoris circumstantias et pec- » cati, per quas prudenter intelligat quale illi consilium » dare debeat, et cujusmodi remedium adhibere, diversis » experimentis utendo ad sanandum ægrotum. »

Necessaria est ergo prudentia, tum in suscipiendo et interrogando pœnitente, tum in dignoscenda et excitanda ejus contritione, tum in satisfactionibus ei injungendis, tum in absolutione danda, neganda aut differenda, tum in servando inviolabiliter confessionis sigillo : habenda est ratio ætatis, conditionis, status, sexus ac diversarum pœnitentis dispositionum ; alioquin scientia vana esset, ipseque zelus plus noceret quam prodesset ; unde recte et pro temporibus nostris sic se habet S. Bernardus, Serm. 49, in Cantica Canticorum : « Sequitur : *Ordinavit* » *in me charitatem* ; omnino necessarie. Importabilis si- » quidem absque scientia est zelus. Ubi ergo vehemens » æmulatio, ibi maxime discretio est necessaria, quæ est » ordinatio charitatis. Semper quidem zelus absque scien- » tia minus efficax minusque utilis invenitur ; plerum- » que autem et perniciosus valde sentitur. »

## SECTIO QUARTA. — De obligatione audiendi confessiones.

1º In articulo vel in periculo mortis, quilibet sacerdos, etiam non approbatus, deficiente approbato, tenetur sub gravi confessionem moribundi audire eumque sufficienter

dispositum absolvere : nam in gravi necessitate tenemur ex charitate proximo succurrere.

2° Parochus et omnis sacerdos habens officium cui annexa est cura animarum, tenetur sub peccato mortali confessiones fidelium sibi commissorum excipere tempore necessitatis et in Paschate ; fideles enim ad confessionem in his casibus sub peccato mortali obligantur : porro grave præceptum confitendi pro fidelibus supponit in pastoribus gravem obligationem confessionem excipiendi. Eadem obligatione tenentur vicarii, saltem defectu parochorum, cum ad illos supplendos mittantur.

3° Tenentur insuper audire parochianos quoties hi rationabiliter sacramentum petunt ; v. g. ad lucrandum jubilæum, ad honorandum festum, ad proficiendum in pietate, etc. Si tamen nimis frequenter aut intempestive fieret petitio, excusaretur denegatio, quia ipsimet parochi ad id solum quod rationabile est obligantur. *A fortiori* excusarentur si personas devotas quandoque remitterent ut peccatores audirent, imo graviter peccare possunt secus agendo, si omnes audire nequeant ; bonus pastor nonaginta novem relinquit oves in deserto, *et vadit quærere eam quæ erravit*, Matth. xviii, 12. Caveant tamen ne, pigritia, impatientia, tædio aliisque motivis veræ pietati parum congruis, animas simplices perfectionem christianam excolere cupientes repellant ; tunc enim facile mortaliter peccarent.

4° Reliqui sacerdotes approbati confessiones audire non tenentur, aliis non deficientibus, nisi confessiones audire incœperint ; quo in casu eas perficere debent, saltem ex charitate, ne pœnitentes illas iterare cogantur : aliis vero deficientibus, tenentur ex charitate necessitatibus imo et utilitatibus fidelium subvenire.

*Quæritur* an in penuria confessoriorum simplices sacerdotes possint tuta conscientia munus confessarii repellere, cum illud exercere queunt ?

*R.* Testatur Ligorio, l. 6, n. 623, se apud nullum auctorem de re morali tractantem hoc dubium invenisse discussum : citat tamen libellum auctoris doctrina et pie-

tate commendati, qui expresse docet sacerdotem, ad audiendas confessiones idoneum, sacramentum Pœnitentiæ administrare teneri, quando videt alios deesse confessarios, et ad id se præparare si nondum idoneus sit : refert insuper testimonium P. *Pavone*, e societate Jesu, viri admodum pii et docti, idem docentis; et ipse eidem sententiæ subscribit, dicens sacerdotes a Christo institutos fuisse ut saluti animarum incumberent, docendo, et sacramenta præsertim Pœnitentiæ et Eucharistiæ administrando, et ideo in ordinatione sua potestatem remittendi peccata accipere : ergo, saltem in gravi necessitate, potestatem sic divinitus acceptam exercere, et ad hoc se habiles reddere tenentur, ne dicatur quod in vacuum gratiam Dei receperint. Unde Cornelius a Lapide, in Math. xxv, 18, ubi agitur de eo qui talentum tenuerat absconditum, ait : « Notent hoc qui ingenio, doctrina » aliisque dotibus sibi a Deo datis non utuntur ad suam » aliorumque salutem, ob desidiam vel metum peccandi; » ab his enim rationem reposcet Christus in die judicii. »

Nec excusarentur hi sacerdotes dicendo se alio modo saluti animarum incumbere, v. g. precibus, adhortationibus, exemplis, etc. nam in eo genere subveniendum est proximo in quo laborat : non sufficeret dare vestes pauperi fame morienti : ergo nec sufficit docere et exhortari peccatorem sacramento reconciliationis indigentem.

#### SECTIO QUINTA. — De obligatione interrogandi pœnitentes;

Sæpe accidit ut pœnitentes integre non confiteantur, alii ex timiditate, alii verecundia, alii ex mala fide, alii quia sunt rudes, ignari et in rebus ad salutem spectantibus parum diligentes.

Certum est confessarium in his casibus integritatem confessionis aptis interrogationibus procurare teneri, et, si ex ignorantia culpabili vel gravi negligentia id omittat, mortaliter peccare : nam officium judicis, medici et ministri sacramenti gerit : atqui hoc triplici titulo pœnitentem in casibus supra dictis interrogare tenetur.



1<sup>o</sup> *Ut judex.* Prudentem enim sententiam ferre non potest, nisi causam integre cognoscat; debet ergo, in quantum opus erit, veritatem aptis interrogationibus exquirere.

2<sup>o</sup> *Ut medicus.* Numquid ut prudens haberetur medicus qui, audita declaratione ægroti sibi suspecta et incompleta, sine ulla interrogatione remedia statim præscriberet? Ergo *a pari* confessarius imprudenter ageret, si pœnitentem aliquod necessarium tacentem non interrogaret.

3<sup>o</sup> *Ut minister sacramenti.* Eo enim titulo tenetur efficere, quantum in se est, ut sacramentum rite, juxta ipsius institutionem, administretur: curare igitur debet ut pœnitens integre confiteatur, vere conteratur, satisfacere sit paratus, tum Deo, tum hominibus: porro hæc communiter sine interrogationibus obtinere non potest: ergo. Hæc assertio nostra confirmatur auctoritate concilii Lateranensis IV, can. 21, superius citati.

Quædam interrogationes faciendæ sunt ante confessionem, sed paucæ, ne pœnitens offendatur; v. g. quærendum est ab ipso a quo tempore ultimo confessus fuerit, an sincere et cum vero dolore cordis; an pœnitentiam sibi injunctam impleverit et a mandatis confessarii non recesserit.

Cæteræ quæstiones circa ætatem, conditionem, statum, ignorantiam, etc. convenientius fient intra confessionem, data occasione, sicque omnis suspicio levitatis aut curiositatis vitabitur, quod maxime necessarium est. Patienter audiendus est pœnitens, sine interlocutione, increpatione, suspirio aut execratione, sine ullo tædii, horroris admirationisve signo; sed benigne intermittendæ sunt quæstiones necessariæ ad detegendum numerum, circumstantias et consuetudines peccatorum, necnon obligationes eis annexas, v. g. restituendi, famam reparandi, cum inimicis se reconciliandi, etc.

Aliquando vero faciendæ sunt interrogationes post absolutam confessionem, si nempe judicetur aliquod essentialiale fuisse omissum, aut si dispositiones pœnitentis sufficienter non cognoscantur. Caveatur tamen ne pœnitens

bene institutus et sincere se accusans, indiscretis quæstionibus absque necessitate fatigetur; non enim summa, sed mediocri et capacitati suæ proportionata diligentia se examinare tenetur: sufficit ergo ut confessarius mediocri sollicitudine eum interroget; nec attendere debet ad integritatem materiale, sed ad eam cujus ille est moraliter capax, et vitare oportet quod sacramentum redderet pœnitentibus nimis onerosum et odiosum.

At si pœnitens sit rudis et a longo tempore non fuerit confessus, interrogandus est ab initio ad finem, percurrendo Decalogum, præcepta Ecclesiæ, peccata capitalia, officia proprii status; ea tantum quærendo peccata quæ hujusmodi hominibus sunt communia, sive contra Deum, id est, contra fidem, spem, charitatem et religionem; sive contra proximum, scilicet contra charitatem et justitiam; sive contra seipsum, videlicet contra sobrietatem, abstinentiam et castitatem, etc.

*Quæritur* 1º qua methodo interrogandi sint pœnitentes?

*R.* 1º Eos interrogare oportet de iis tantum quæ personæ ejusdem conditionis committere solent, nisi ex speciali declaratione aut responsione videatur aliter faciendum, ne inutilibus quæsitis confessio ipsis fiat odiosa.

2º Cum experientia constet pueros et simplices peccata sua non fateri, si negativis quæstionibus interrogentur, sæpe juvat statim dicere, ubi de peccatis apud eos consuetis agitur, v. g. *Quoties jurasti?* Si hæsitent in responsione, subjungendum est, majorem numerum indicando, v. g. *Centies jurasti, blasphemasti?* etc. Tunc facilius respondent, se excusando, et dicendo: *Oh! non toties.* — *Quoties ergo?* addit confessarius. Pœnitens numerum certum vel præsumptum indicat, et sic confessarius veritatem cognoscit.

3º Quoad peccata contra castitatem, cautissime procedendum est, ne juniores ea doceantur quæ feliciter ignorant: incipiat ergo confessarius a levioribus, quærendo, v. g. quot turpes cogitationes habuerint, quomodo his restiterint; deinde quoties turpia desideria conceperint, quoties verba obscena protulerint, quoties oscula vel

tactus leves passi sint aut fecerint : in quibus si reperiantur innocentes, ultra progrediendum non erit. Si autem rei inveniantur circa cogitationes et desideria, paulatim examinandi erunt circa oscula, aspectus et tactus; in quibus si iterum rei sint, interrogandi erunt de opere consummato. At si negent cogitationes turpes et peccata cordis, dum actus externos fatentur, signum est eos non satis intelligere quid sit peccatum internum, et adjuvanda est eorum ignorantia aut verecundia. Et ideo quandoque, cum rudibus, incipiendum est ab actibus externis ut ad internos tutius deveniatur.

Præterea, ut disponantur ad detegenda graviora crimina, præsertim contra castitatem, juvat eos interrogare an socii eos ad turpia sollicitaverint, quoties consenserint. Item a junioribus personis alterius sexus quæ turpia confiteri verentur, quærendum est an turpes cogitationes in mentem venerint, quoties eis consenserint, an se ab aliquo tangi passæ sint, etc. Quoad interrogationes faciendas personis conjugatis, remittimus ad calcem Supplementi nostri ad tractatum de Matrimonio.

Jamvero, ne confessarius sibi vel pœnitenti causa existat turpis tentationis vel scandali, cum dispositionibus sequentibus sollicite curet interrogare : 1<sup>o</sup> pie, mentem ad Deum elevando; 2<sup>o</sup> pudice, verbis intelligibilibus quibusdam, sed omnino honestis et castitatem redolentibus utendo; 3<sup>o</sup> prudenter, ita ut circumstantias omnino necessarias inquirat, modos autem et circumstantias minus essentielles non scrutetur; præstat enim statum pœnitentis non omnino intelligere quam sibi vel illi scandalum creare; et qui secus faciunt, recte dicuntur contaminatores confessionis potius quam confessores; 4<sup>o</sup> circa alia peccata quæ non sunt contra castitatem, debet interrogare, prout prudentia suggesserit, non solum de opere externo, sed etiam de cogitatione morosa, de desiderio, de scandalo, de omissione, de consilio, etc. Quærendum est a pœnitente an periculo peccandi se exposuerit, an officio suo defuerit; pauci enim ad obligationes status sui attendunt, pauciores de peccatis circa eas admissis

se accusant et multo minus se emendant. Denique optimum est quærere a pœnitente sub fine an insuper aliquid conscientiam ejus gravet.

Ut autem magis prosint interrogationes istæ et similes, si quos invenerit confessarius timidos, pusillanimes, aut peccata confiteri erubescences, excitabit eos, proposita ipsis divina clementia, paterna misericordia, humana fragilitate ipsis nota, utilitate sinceræ confessionis, inviolabilis sigilli obligatione, auxilio eis promisso. E contra, si protervos inveniatur et impudentes, suaviter quidem, sed graviter moneat, ipsos non ante hominem, sed ante Deum et Christum Dominum, cujus locum tenet confessarius, sisti, tanquam reos læsæ majestatis divinæ; Deum non irideri, æternam eorum salutem periclitari, pœnas inferni impœnitentibus, et multo magis sacramento Pœnitentiæ abutentibus esse paratas, etc.

Has interrogandi formulas e Theologia Pictaviensi fere de verbo ad verbum extraximus, quia prudentiæ regulis fundatæ esse videntur.

*Quæritur* 2º quid agere debeat confessarius qui novit peccatum quod pœnitens non accusat?

*R.* Vel peccatum istud cognoscit per alterius confessionem, vel per viam naturalem.

1º Si cognoscit illud per alterius confessionem, ea notitia uti non potest ad pœnitentem de illo specialiter interrogandum, nisi expressam ab altero obtinuerit licentiam: *hoc patebit ex infra dicendis, ubi de sigillo.* Debebit ergo sistere in interrogationibus generalibus, nisi peccatum sit commune personis conditionis pœnitentis; tunc eum specialiter interrogare poterit de illo peccato, cavendo tamen ne aliquam suspicionem de confessione alterius præbeat.

Confessarius qui audit pœnitentem aliquod peccatum cum altero commissum declarantem, si complicem nondum in confessione audierit, sed auditurus sit, prudenter ageret petendo licentiam illum circa tale peccatum, prout opus erit, interrogandi: tunc in eo casu difficultatem ex negatione peccati sequentem præcaveret. Si vero



complicem jam audierit, sinceritatem ejus in suspicionem adduceret, licentiam eum interrogandi petendo, sicque inviolabilitatem sigilli læderet.

2° Si autem peccatum per viam naturalem cognoscat, v. g. quia transgressionem vidit, aut ex fama publica audivit, de illo specialiter interrogare potest.

SECTIO SEXTA. -- De obligatione monendi et erudiendi ignorantes.

Sæpe occurrunt pœnitentes multa scitu necessaria ignorantes; juvat ergo statuere quomodo erga illos agere debeant confessarii. Ignorantia autem versari potest circa ea quæ necessaria sunt ad salutem necessitate medii, ut sunt mysteria sanctissimæ Trinitatis, Incarnationis et Redemptionis; vel circa ea quæ necessaria sunt tantum necessitate præcepti. Rursus ignorantia potest esse vincibilis, vel invincibilis.

*Certum est* 1° confessarium teneri interrogare et monere pœnitentem quem versari videt aut præsumit in ignorantia vincibili aut invincibili mysteriorum quorum fides explicita necessaria est necessitate medii: nam qui tali laborat ignorantia, incapax est absolutionis, ut constat ex damnatione sequentis propositionis ab Innocentio XI: « Absolutionis capax est homo, quantumvis » laboret ignorantia mysteriorum fidei, et etiamsi per negligentiam etiam culpabilem nesciat mysterium sanctissimæ Trinitatis et Incarnationis Domini nostri Jesu Christi. » Hæc altera fuit pariter ab eodem Pontifice damnata: *Sufficit illa mysteria semel credidisse*. Sive ergo pœnitens monitioni confessarii cedere prævideatur, sive non, monendus est, cum in tali ignorantia absolvi nequeat. Unde Benedictus XIV, const. *Etsi minime*, Bullarii t. 1, § 12:

« Sacerdos excipiens confessiones; fixum illud immotumque animo semper habeat, invalidam esse absolutionem sacramentalem quam quis ignoranti res necessarias necessitate medii impertitur, nec posse homines

» Deo per hujusmodi sacramentum reconciliari, nisi  
 » prius, excussa hujus ignorantiae caligine, ad agnitio-  
 » nem fidei adducantur. »

*Certum est* 2<sup>o</sup> monendum esse pœnitentem qui versatur in ignorantia mortaliter culpabili mysteriorum quorum fides explicita necessaria est necessitate præcepti; quia tali ignorantia laborans, absolutione indignus est. Idem dicendum est, si aliquid mortaliter malum ex ignorantia vincibili agat, aut in ignorantia officiorum proprii status versetur, quia non excusatur a peccato.

*Notandum est*, in hoc et in præcedenti casu, confessiones cum tali ignorantia factas, nullas esse atque iterandas a tempore quo existit ignorantia. Sedulo igitur et prudenter interrogandi sunt pœnitentes, quoties datur locus suspicandi eos aliquid scitu necessarium ignorare. Si veritates creditu necessarias substantialiter intelligant, non inquietandi sunt circa confessiones præteritas, etsi aliquas forte in ignorantia olim fecerint.

3<sup>o</sup> Si autem ignorantia pœnitentis sit invincibilis, vel tantum venialiter culpabilis, et circa mysteria necessaria necessitate medii aut circa officia proprii status non versetur, petitur quid agere debeat confessarius.

*R.* Vel adest spes emendationis, vel non : si nulla spes emendationis affulgeat, communiter non monendus est pœnitens : prudentia quippe suadet non facere monitionem quæ pœnitenti obfutura est, efficiens ut deinceps formaliter peccet, dum antea materialiter tantum peccaret, et nullo modo prodesse debet, ut supponitur. Dixi *communiter*; nam si de bono publico ageretur, aut de peccatis quorum malitia diu ignorari non potest, facienda est monitio.

Si vero spes emendationis in pœnitente affulgeat, vel aliquod prævidetur secuturum incommodum, vel non : in posteriori casu, facienda est monitio, *ut patet*; in priori vero, conferendum est incommodum quod timetur cum deformitate in peccato materiali existente, et pars quam prudentia suggererit eligenda est.

Hinc vir nullitatem matrimonii sui ignorat, et prævi-

detur quod monitus, illud non convalidaturus sit, non monendus est; prævidetur e contra quod illud convalidare paratus esset, sed uxor obstinate recusabit et nihilo minus ambo rem secum habebunt, iterum non monendus est, et tamen absolvendus, quia minus malum est illum in peccato materiali relinquere quam utrumque evidenti periculo formaliter peccandi exponere.

*Dices.* Qui non paratus est Deum omnibus anteferre, indignus est absolutione : at ille quem confessarius prævidet monitioni non cessurum, non paratus est Deum omnibus anteferre : ergo indignus est absolutione. Ita auctor operis aliunde commendandi, cui titulus, *la Conduite des confesseurs.*

*R. Nego min.* Qui enim paratus est omnia generatim sufferre potius quam Deo displicere, Deum omnibus anteponit : atqui prævisio confessarii non impedit quin pœnitens hic et nunc paratus sit omnia generatim sufferre potius quam Deo displicere ; non enim judicandus est ex possibilibus, nec ex probabilibus, habita ratione circumstantiarum in quibus supponeretur constitutus, sed ex dispositionibus ejus realiter existentibus : et confessarius qui fingeret hypotheses difficiles easque pœnitenti proponeret, stulte ageret atque imprudenter eum tentaret, ait S. Thomas, Quodlib. 1, art. 9. Quot enim homines qui leviter tentati facile vincunt, et in gravioribus periculis miserabiliter ruerent ! Numquid hæc prævisio eos reddit absolutione indignos ? Certe hoc admitti non potest, alioquin dicendum foret hominem puniendum esse pro peccatis possibilibus quæ nunquam admittet : porro hæc sequela ab omnibus rejicitur : ergo.

Cæterum, animadvertite confessarium teneri pœnitentem ignarum pro viribus instruere, mysteria fidei lucide exponendo, motiva credibilitatis explanando, regulas morum nitide pieque proponendo, etc.

*Quæritur* 1<sup>o</sup> an confessarius absolvere possit pœnitentem quem videt sequi opinionem minus tutam et minus probabilem ?

*R.* Si pœnitens ipse judicet opinionem quam sequitur

esse minus probabilem vel tantum æque probabilem, conscientiam non habet actionem suam esse bonam, sed in dubio constituitur : ergo absolvi non potest, nisi, juxta non paucos, conscientiam per principia reflexa sibi efformet, talem agendi rationem esse licitam; de hoc alibi. Si vero opinio sit in materia controversa, et uni probabilior, alteri minus probabilis videatur, confessarius exigere non potest ut pœnitens, præsertim doctus, sententiam mutet; non enim opinionum est judex, nec ipsius est officium cunctas controversias auctoritate sua dirimere. Ita, contra Concina, P. *Antoine* aliosque paucos communiter theologi, ut videre est apud Ligorio, lib. 6, n. 604.

*Quæritur* 2º quid agendum sit erga senes, hebetes et rudes, qui mysteria necessitate mediæ necessaria discere aut retinere non possunt?

*R.* Si ex negligentia eorum id accidere videatur, instruendi sunt et remittendi donec didicerint quæ creditu sunt necessaria, juxta capacitatem suam. Si vero ex memoriæ imbecillitate id proveniat, et assidui conatus frustra adhibiti fuerint ad illos edocendos, tunc confessarius mysteria ipsis proponat, actum fidei actualis præformet et eis suggerat, sicque efficiet ut ipsi hujusmodi actum eliciant, et absolutionem impertiet. Simili methodo actus spei, charitatis et contritionis ab eis obtinebit, et curare debet ut ad se vel ad aliquem familiarem frequenter accedant, atque eadem via prædictos actus formaliter renouent : Dens, t. 6; *la Conduite des âmes*.

Solliciti esse debent pastores erga infelices hujusmodi homines, ne sacramentis Ecclesiæ maneant privati, et nihil non moliri ut eos per se vel per alios erudiant. Eandem habere debent sollicitudinem erga surdos-mutos, quos tenentur edocere, atque peccata eorum summatim intelligere, ut eos absolvere et ad Eucharistiam saltem in Paschate admittere possint.



SECTIO SEPTIMA. — De obligatione quam habet confessarius dignoscendi et procurandi contritionem in pœnitente.

Contritio est pars essentialis sacramenti Pœnitentiæ : confessarius ergo absolutionem, extra casum necessitatis, dare non potest, nisi prudenter judicet adesse in pœnitente contritionem sufficientem. Præcipua autem signa quibus eam dignoscet, sunt : 1° si pœnitens satis instructus, cordate asseveret se de peccatis propter Deum summe dilectum dolere, et firmum habere propositum non peccandi de cætero; 2° si ante confessionem maturum examen adhibuerit, oraverit, desiderium veræ contritionis habuerit, eamque pia consideratione excitare tentaverit; 3° si omnia peccata sua, etiam majora et turpia, candide et humiliter declaret, sine ulla tergiversatione aut vana excusatione; 4° si ex pio aliquo motivo ad confessionem libere accesserit, non vero ex aliquo respectu humano; 5° si ex desiderio conversionis a peccato jam cessaverit, occasiones, v. g. tabernas, talem aut talem personam, deseruerit; 6° si pœnitentiam sibi injunctam et peccatis proportionatam libenter acceptet aut majorem postulet.

Hæc contritionis signa aliaque similia ordinarie sufficiunt. Dico *ordinarie*, quia fieri potest ut specialis aliqua circumstantia suadeat majora requirenda esse conversionis indicia.

Dubitari autem non potest quin confessarius teneatur, ratione officii sui, contritionem excitare in pœnitente, quem prudenter judicare non potest sufficienter contritum; alioquin periculo absolvendi indignum se exponeret, et animam sibi commissam in discrimen salutis conjiceret. Paratas igitur habeat rationes urgentes e libris spiritualibus, et præsertim ex meditationibus sanctis haustas, quas pro diversa pœnitentis qualitate breviter, clare et pie studebit proponere, ut eum ad detestationem vitæ præteritæ et emendationem futuræ excitet. Interdum quæret ab eo an pœniteat, an firmum habeat pro-

positum non peccandi; et quandoque juvabit eum differre, vel aliquam moram ei concedere, ut gratiam veræ contritionis a Deo postulet, motiva proposita perpendat, peccata detestetur atque ea deinceps vitare firmiter sibi proponat, et postea ad suscipiendam absolutionem redeat.

Motiva quæ metum incutiunt, aptiora sunt rudibus peccato assuetis: proponenda sunt ipsis æterna damnatorum supplicia, dæmonum cruciatus, ira Dei omnipotentis in cujus manus horrendum est incidere: enumerari possunt bona peccato amissa, ut gratia Dei, filiatio, hæreditas ejus, dona supernaturalia, immensæ divitiæ quibus nudata est eorum anima, cum peccato mortua, facta est dæmonum hospitium. Narrabit etiam confessarius punitionem Angelorum, vel Core et ejus asseclarum, qui, terra dehiscente, sepulti sunt viventes in inferno. Addere poterit: Vos eodem supplicio jam torqueremini, nisi benignitas Dei, qui non irridetur, pœnitentiam vestram exspectasset.

Motiva amoris proponi debent iis qui facilius emolliri possunt, v. g. summa Dei bonitas, suprema ipsius majestas, immensa Christi charitas, passionis ejus tormenta, sputa, opprobria, mors ignominiosa et simul dolorosa; ingratitude peccatorum qui reddunt Deo odium pro dilectione, injurias pro beneficiis; insania peccatorum qui totum vitæ tempus in obsequium diaboli, mundi et carnis impendunt, etc.

Si quis in malo obduratus, his aliisve similibus motivis non emolliatur, nec contritus appareat, dimittendus est non absolutus, nequidem pœnitentia illi injuncta, si nihil promittere velit: si vero conversionem suam desiderare judicetur, bonum erit ipsi injungere ut singulis diebus multoties contritionem petat, fidem in se excitet, novissima hominis magis ac magis consideret, et, post aliquot dies, ad confessarium redeat.

## § II. — De obligationibus confessarii quæ spectant absolutionem.

Nobis dicendum est 1º de ipsius obligatione generali

dandi aut differendi absolutionem ; 2º de ejusdem agendi ratione erga eos qui tenentur ad restitutionem , reparationem injuriæ , aut ad reconciliationem ; 3º erga eos qui in proxima occasione peccati versantur ; 4º erga consuetudinarios et recidivos ; 5º erga eos qui peccata sua negant ; 6º erga moribundos sensibus destitutos ; 7º erga scrupulosos ; 8º erga personas devotas ; 9º erga eos quos male absolvit.

SECTIO PRIMA. — De generali obligatione confessarii in danda aut differenda absolutione.

Præter dilationem absolutionis, fere omnes theologi dicunt illam quandoque negandam esse : potest equidem aliquod discrimen inter dilationem et negationem assignari, quasi absolutio differatur indispositis, donec melius disponantur, et absolute negetur indignis. Attamen, cum omnes se disponere possint, et nullus rejiciendus sit ut desperandus, rectius est dicere absolutionem stricte non negandam, sed differendam esse donec requisitæ dispositiones existant.

*Certum est* 1º confessarium teneri ex justitia regulariter absolvere pœnitentem rite confessum et legitime dispositum : nam ipso confessionis facto quidam initus est contractus sacer, vi cujus pœnitens rite confessus et legitime dispositus, habet jus ad sacramentum. Ergo.

Dixi *regulariter* ; quia si confessarius aliquo indigeat tempore ad consulendos libros aut viros doctos super peccata sibi declarata, absolutionem differre potest ; item si prudenter judicet dilationem pœnitenti fore utilem ad præcavendos relapsus, quia non tantum est judex, sed et medicus.

*Certum est* 2º indispositum non absolvendum esse, et confessarium in eo casu, nisi errore inculpabili aut venialiter tantum culpabili excusetur, mortaliter peccare licet sacramentum sit nullum ; nam ritus sacramentalis qui profanatur, ex omnium confesso, est objectum peccati mortalis.

Obligatio autem dandi aut differendi absolutionem, juxta dispositiones pœnitentis, verbis institutionis sacramenti, *Quorum remiseritis.... quorum retinueritis*, etc. fundatur : confessarius igitur sedula investigatione dignos ab indignis discernere debet, quia non minus ipsi periculum est in injusta denegatione quam in indigna absolutione; imo, ut sapienter observat Dens, post Steyaert, regula est absolvere, cum sacramentum ad reconciliationem institutum fuerit, et exceptio absolutionem differre, nempe eis qui nondum parati sunt. Caute igitur graditur confessarius inter duo extrema, pari sollicitudine devitans et laxitatem quæ peccatores in vitiis sopitos ad inferos deducit, et rigiditatem quæ eos desperans, a sacramento proindeque a via salutis retrahit. Omnes affectu paterno suscipiat et præsertim quos remittere cogitur, ut dilatio ipsis tolerabilior fiat.

Quidam theologi dicunt pœnitentem absolvendum non esse, nisi confessarius moraliter certus sit de præsentia legitimarum ipsius dispositionum.

Alii vero multo rectius dicunt sufficere ut prudenter judicet pœnitentem esse dispositum, id est, innitatur motivo, non certo et infallibili, sed gravi et comparative probabiliori quo vir prudens in assensum determinetur. Quando materia sacramentorum est physica, ut in Baptismo et Eucharistia, requiritur certitudo physica ad licitam eorum administrationem; sed ubi materia est moralis, ut in Pœnitentia, sufficit confessarium habere prudentem probabilitatem de dispositione pœnitentis, licet aliqua suspicio indispositionis subsistat; alias vix ullus absolvi posset, cum quælibet signa pœnitentium probabilitatem tantum subministrant.

Confessarii igitur qui peccatorem absolvere nolunt, nisi evidenter judicent illum esse recte dispositum, graviter errant, et clavibus Ecclesiæ sibi commissis, non ad aperiendum, sed ad claudendum regnum cœlorum utuntur : dum alii, omnes indiscriminatim absolventes, æternaliter cum eis pereunt.



SECTIO SECUNDA. — De agendi ratione confessarii erga eos qui ad restitutionem, reparationem injuriæ aut reconciliationem tenentur.

Certum est pœnitentem qui, ex principiis alibi expositis vel exponendis, ad restitutionem, reparationem injuriæ aut reconciliationem cum inimicis tenetur, et huic obligationi satisfacere recusat, absolvi non posse : actua-lem enim et perseverantem habet voluntatem peccandi si autem promittat se quamprimum satisfacturum, et videatur sincerus, una et altera vice sub hac promissione absolvi poterit, præsertim si aliqua ratio prudentiæ id faciendum suadeat. At, ubi semel aut iterum promissum or- defuit, neganda est regulariter absolutio donec satis ece-rit, quia confessarius jam prudenter judicare non potest ipsius propositum esse sincerum.

Dixi *regulariter*; nam tales occurrere possunt circum-stantiæ extraordinariæ, ut prudenter judicari possit pœ- nitentem non futurum infidelem, sicut antea fuit : tunc absolvi potest, imo et debet, si jus ad sacramentum ha- beat.

In articulo mortis absolvendus foret, etiamsi proposi- tum non magis videretur sincerum, *ut ex infra dicendis patebit.*

Eodem modo ratiocinandum est de iis qui res creditu- necessarias necessitate præcepti ignorant : vel eas ediscere promittunt, et tunc semel aut iterum absolvi possunt ; si autem promissioni non steterint, differenda est absolutio, extra casum necessitatis, donec eas sufficienter didicerint. *Ita omnes theologi.* Si vero erudiri nolint, certe absolvi nequeunt.

SECTIO TERTIA. — De agendi ratione confessarii erga eos qui versantur in occasione peccandi.

Quælibet res externa ad peccatum inducens, dicitur oc- casio peccati : alia est remota et alia proxima ; alia volun- taria et alia necessaria. Occasio remota ea est quæ proba-

biliter de facto non ducet ad peccatum : proxima vero est illa in qua homo verisimiliter peccaturus est. Unde alia est absolute proxima quæ nota est omnes in peccatum inducere, ut turpes aspectus vel tactus, præsertim in personas alterius sexus ; alia vero respectiva quæ respectu unius est proxima, dum respectu alterius esset remota, quales esse possunt saltationes et choreæ.

Occasio igitur non est remota vel proxima, prout raro vel frequentius in peccatum inducit : potest esse proxima respectu unius personæ quæ nondum peccavit, v. g. si junior puella adhuc innocens sola cohabitatura sit cum viro moribus perduto, quia verisimile est eam peccaturam esse.

Occasio est voluntaria, si pœnitens eam tollere possit, ut si ebriosus adeat cauponem, vel si herus retineat ancillam quæ sibi est causa ruinæ : est vero involuntaria, quando pœnitens eam auferre nequit, ut v. g. si filia familias a servo patris, vel a fratre suo sollicitetur in crimen. Impossibilitas eam tollendi potest esse physica, ut si quis cum concubina incarceretur ; vel moralis, si nempe occasio deserui non possit sine peccato, ut esset uxor respectu mariti, vel sine gravi detrimento, ut officium confessarii, chirurgi, mercatoris, etc.

*His notatis, certum est* 1<sup>o</sup> quæstionem non moveri de occasione remota ; si enim stricta daretur obligatio fugiendi omnes occasiones remotas peccati, exeundum esset de mundo, cum fere nihil sit in terra quod plus minusve remote inducere non possit ad peccandum.

*Certum est* 2<sup>o</sup> quæstionem pariter non esse de occasione sive remota sive proxima peccandi venialiter ; cum enim peccatum veniale non sit materia necessaria sacramenti, nec occasio proxime ad illud inducens, secluso periculo ulterius progrediendi.

Sola igitur difficultas nunc examinanda respicit eos qui in occasione proxima, sive voluntaria sive involuntaria, mortaliter peccandi versantur.

*Certum est* 3<sup>o</sup> confessarium absolutionem denegare non posse ei qui versatur in occasione proxima peccandi mor-

taliter, quam physice tollere non potest, præcise ob istam occasionem, siquidem nemo ad impossibile tenetur : debet ergo præscribere illi remedia quibus occasio ex proxima fiat remota; quod si pœnitens his remediis uti nolit, aut si emendatio ejus sit nulla, certe absolvi non debet, extra periculum mortis, quia prudenter judicari non potest illum esse dispositum. Si vero remediis propositis sincere utatur, et ipsius relapsus notabiliter minuantur, identidem absolvendus est, ut gratia sacramenti adjutus, tentationes facilius superet et omnino emendetur; tunc enim, licet prævideatur ex fragilitate relapsurus, potest esse hic et nunc legitime dispositus. Sic Billuart, Ligorio, l. 6, n. 455, Dens, etc.

4<sup>o</sup> Communius theologi dicunt, contra paucos, pœnitentes non teneri occasionem proximam peccandi mortaliter cum gravi detrimento famæ, honoris aut fortunæ deserere, modo utantur mediis sibi indicatis, et firmum habeant propositum amplius non peccandi : nam occasio peccandi per se non est peccatum, nec in necessitate peccandi constituit. Si ergo moraliter auferri non possit, excusatur pœnitens eam non deserens, et eodem sensu ac in numero præcedenti absolvi potest.

Prudens autem confessarius efficaciora quærere debet remedia juxta conditionem pœnitentis et naturam periculi, ut illorum adjutorio occasio ex proxima fiat remota, v. g. ut puella quæ in domo paterna a servo sollicitatur ad turpia, consortium ejus fugiat, nunquam sola cum illo solo loquatur, blanditiis ejus non respondeat, severe et tantum ex necessitate illum alloquatur, pignora amicitiae accepta reddat vel destruat; orationes, jejunia, pias lectiones, frequentem confessionem adhibeat : si hæc non sufficiant, matrem vel patrem de periculo in quo versatur moneat; et tandem si novi semper eveniant relapsus, sine spe emendationis, cum qualicumque detrimento deserenda est occasio, sive puella domo paterna sub aliquo prætextu egrediatur, sive obtineat ut servus ejiciatur.

Similiter, qui in exercitio professionis vel artis suæ proximam invenit occasionem mortaliter peccandi, v. g.

confessarius, chirurgus, caupo, mercator, non tenetur eam statim deserere. Si opportunis remediis sincere quærat periculum minuere et occasionem e proxima remotam facere, secundum jam dicta absolvi poterit. Si vero, omnibus remediis frustra tentatis, spes emendationis non affulgeat, valedicendum est sive arti sive professioni, etiam cum gravissimo detrimento; secus, ordinarie neganda est absolutio.

Dico *ordinarie*, quia in articulo mortis non negaretur.

5° Qui versatur in occasione proxima perseverante, quam sine gravi detrimento famæ, honoris aut fortunæ deserere potest, v. g. retinet apud se puellam quæ sibi est graviter periculosa, regulariter absolvi non potest nisi eam deseruerit; nam in ea occasione remanens, periculo peccandi voluntarie se exponit: sed scriptum est, Eccli. III, 27: *Qui amat periculum, in illo peribit*. Unde Innocentius XI sequentes damnavit propositiones quæ erant numeris 61: « Potest aliquando absolvi qui in » proxima occasione peccandi versatur, quam potest et » non vult omittere, quinimo directe et ex proposito » quærit, aut ei se ingerit. 62: Proxima occasio peccandi » non est fugienda, quando causa aliqua utilis aut honesta non fugiendi occurrit. 63: Licitum est quærere » directe occasionem proximam peccandi pro bono spirituali vel temporali nostro vel proximi. »

Dixi *regulariter*; quia nonnulli sunt casus in quibus conferenda est absolutio sub promissione occasionem dimittendi, v. g. 1° si mors imminet et tempus necessarium non suppetat; 2° si pœnitens ab occasione longe distet eamque hic et nunc dimittere non possit, et sincere dispositus appareat; 3° si huc usque obligationem dimittendi occasionem non intellexerit, et fidenter promittat se eam dimissurum.

6° Si occasio proxima non sit perseverans, sed interrupta, ut, v. g. si quis fornicari soleat cum muliere absente quam aliquoties per annum visitat, se inebriare quando apud cauponem bibit, blasphemare quando in ludo perdit, etc. prima, secunda aut etiam quandoque



tertia vice absolvi potest, sub expressa promissione talem occasionem devitandi, quia sufficiens datur ratio prudenter judicandi illum esse recte dispositum. At si bis aut ter promissioni defuerit, absolutio ordinarie differenda est, donec opere probaverit se melius esse dispositum.

SECTIO QUARTA. — De agendi ratione confessarii erga consuetudinarios et recidivos.

Consuetudinarius ille est qui ex actibus sæpe repetitis in uno genere, v. g. fornicandi, blasphemandi, etc. facilitatem contraxit idem peccatum iterandi : recidivus autem ille est qui, post absolutionem, in idem peccatum relabitur : unde quis potest esse consuetudinarius et non recidivus, nempe si a peccatis quibus assuefactus est nondum fuit absolutus ; vel recidivus et non consuetudinarius, ut si a peccato semel aut iterum commissio absolutus, in idem relapsus fuerit.

1<sup>o</sup> Consuetudinarius qui prima vice ad sacrum Pœnitentiæ tribunal accedit, et signa contritionis extraordinaria præbet, absolvi potest ; non datur enim in illo casu ratio sufficiens bonam fidem ejus suspicandi. *Ita communiter theologi.* Si tamen nulla circumstantia concessionem absolutionis urgeat, prudentius est eam differre, maxime si pœnitens dilationem non ægre ferat : tunc a peccato abstinens ad absolutionem cum majori fructu suscipiendam se præparabit et tutiora conversionis signa exhibebit : talis est praxis optimorum confessoriorum, et aliunde experientia docet consuetudinarios non ita facile habitum peccandi retrahere. Aliunde consuetudinarii rarissime signa contritionis extraordinaria prima vice exhibent.

2<sup>o</sup> Præcipua difficultas in hac materia est circa recidivos, an, scilicet, et quando absolvi debeant. Plures extranei contendunt eos toties absolvendos esse quoties confitentur : nam, inquiunt, qui libere confitetur et dicit se pœnitere, credendus et judicandus est dispositus, nisi aliqua particularis circumstantia denotet illum indispositum esse. Alii, e contra, inter quos Merbesius,

*Juenin, Habert et Concina*, dicunt consuetudinarium absolvi non posse, nisi conversionem suam per longam perseverantiam probaverit, præsertim si pluries jam absolutus, semper relapsus fuerit : nam, inquiunt, per solam perseverantiam in proposito prudenter judicari potest conversus. Utraque opinio falsa est, una nimia laxitate et altera nimia rigiditate peccat. Tertia igitur quæ ab omnibus communiter admittitur, sic se habet.

## PROPOSITIO.

*Peccator pluries absolutus et cum eodem habitu pravo rediens, absolvi non potest extra necessitatem, nisi extraordinaria det signa conversionis.*

*Prob. 1º auctoritate Innocentis XI*, qui sequentem damnavit propositionem : « Pœnitenti habenti consuetudinem peccandi contra legem Dei, naturæ aut Ecclesiæ, » etsi emendationis spes nulla appareat, nec est neganda, » nec differenda absolutio, dummodo ore proferat se dolere et proponere emendationem. »

*Prob. 2º praxi et documentis sanctorum atque piorum hominum.* S. Aug. Serm. 117, in Appendice, ait : « Ista » est vera pœnitentia, quando sic convertitur quis ut non » revertatur ; quando sic pœnitet, ut non repetat. » S. Isidorus Hispalensis, de Ecclesiasticis officiis, lib. 2, cap. 16, de Pœnitentibus, ait : « Ille autem vere pœnitentiam » agit, qui nec pœnitere præterita negligit, nec adhuc » pœnitendo committit : qui vero lacrymas indesinenter » effundit, et tamen peccare non desinit, hic lamentum » habet, sed mundationem non habet. »

Idem dictis et exemplis docuerunt S. Franciscus Xaverius, ut patet ex ejus epistolis, S. Franciscus Salesius, omnium mitissimus, et S. Carolus, Instruct. ad confes. Act. ecclesiæ Mediol. t. 2, qui sic se habet : « Proroganda » adhuc absolutio, donec hi emendentur qui, licet se » peccatum dimissuros polliceantur, ab illo tamen non » separandos confessor suspicatur, ut sunt... et præser-

» tim juvenes otiosi qui solent majori temporis parte aleis,  
 » crapulis, amoribus, peccatis carnalibus, blasphemis,  
 » inhonestis conversationibus, diſſenſionibus, odiis et  
 » detractationibus vacare, aut qui Quadragesimæ diebus  
 » tantum ultimis peccata deposituri accedunt, aut qui a  
 » multis annis in iisdem peccatis perseveraverunt, nec ut  
 » emendarentur laborarunt. »

*Prob. 3º ratione.* Absolutio enim concedi non potest, nisi confessarius prudenter judicet pœnitentem esse recte dispositum : at, ubi videt eum, post admonitiones iteratas, cum eodem habitu pravo redeuntem, prudenter judicare non potest eum recte esse dispositum ; qui enim rem sibi possibilem firmiter proponit, non tam facile propositi sui obliviscitur ; saltem conatus adhibet, per aliquod tempus perseverat, difficilius aut rarius cadit. Aliunde, ex prudenti dilatione absolutionis, plures optimi sequuntur effectus. 1º Profanatio saltem valde probabilis sacramentorum Pœnitentiæ et Eucharistiæ vitatur. 2º Pœnitentes gravitatem peccati melius agnoscunt, juxta hæc verba Jer. II, 19 : *Scito et vide quia malum et amarum est reliquisse te Dominum Deum tuum.* 3º Vigilantiores et cautiores in vitandis peccatis redduntur, et in proposito suo efficacius confirmantur. Ergo.

Dixi in propositione *extra necessitatem*, id est, extra mortis periculum de quo infra dicturi sumus.

Objici solet quod, si hæc principia admittantur, 1º multis deneganda sit absolutio ; 2º quod salus æterna peccatorum sic dimissorum periclitatura sit, quia repentina morte corripi possunt ; 3º quod potius misericordia quam severitate peccandum sit.

Sed 1º verum est quidem multis, non præcise negandam, sed differendam esse absolutionem, quia imparati accedunt : confessarius zelo animarum flagrans, nihil omittet ut istiusmodi peccatores ad veram conversionem deducat, eosque ad suscipiendam absolutionem cum fructu disponat, indignos vero non absolvet. 2º Non inficiamur salutem æternam peccatorum sic dimissorum graviter periclitari, sed periculum quod subeunt, non ex

dilatione absolutionis quam indigne susciperent oritur, bene vero ex perseverantia ipsorum in peccato. 3<sup>o</sup> Nimia facilitas in absolvendis recidivis non est misericordia, sed horrenda crudelitas quæ, sub larva indulgentiæ, animas necat et in profundum abyssi demergit.

Objicitur adhuc sequens Catechismi conc. Trid. textus, de Pœnit. n. 60, et in versione D. *Doney*, t. 2 : « Si, audita confessione, judicaverit neque in enumerandis » peccatis diligentiam, neque in detestandis dolorem pœnitenti omnino defuisse, absolvi poterit. » Porro sæpe dici potest neque diligentiam, neque dolorem recidivis omnino deesse. Ergo.

Verum sensus verbi *omnino*, non est minimam diligentiam minimumque dolorem sufficere, alioquin Catechismus citatus concilio Tridentino, accuratam diligentiam in enumerandis peccatis et animi dolorem ac detestationem requirenti, evidenter contradiceret : Sensus ergo est, absolutionem impertiendam esse, si confessarius prudenter judicet diligentiam et dolorem *omnino* non defuisse, id est, minime defuisse. Ergo.

Dixi in propositione 1<sup>o</sup> *cum eodem habitu pravo rediens* ; nam si notabiliter sit emendatus, licet pluries adhuc ceciderit, aut si difficilius et post majorem resistantiam lapsus fuerit, adeo ut prudenter judicetur illum sincerum habere propositum se emendandi, sed ex fragilitate et pondere habitus aliquando vinci, absolvi debet ; gratia enim sacramenti adjutus, novas tentationes facilius superabit, et, paulatim veterem habitum imminuens, illum penitus destruet : si, e contra, semper remitteretur donec omnino emendatus esset, repulsibus continuis fatigatus, confessionem desereret, in vitiis sine habenis se volutaret, obduresceret, et fere nulla spes eum ad meliorem frugem redire videndi affulgeret, ut quotidiana experientia constat. Hinc qui sexies singulis diebus circiter blasphemabat, vel turpia proferebat, et, adhibitis conatibus, semel aut iterum relabatur, et firmum habere videtur propositum se emendandi, absolvi potest.

Errant igitur qui dicunt confessarium absolvere non



posse pœnitentem quem prævidet relapsurum : sufficit ut rite confessus, verum nunc habeat dolorem de præterito, et firmum propositum non peccandi de futuro : at illæ dispositiones in eo existere possunt qui prævidetur relapsurus, videlicet, ex fragilitate vel ex mutatione propositi. Ita Suarez, Sanchez, Card. de Lugo, Billuart, Dens, Ligorio, etc.

At si imminutio culparum non ex proposito emendationis, sed ex alia causa, v. g. ex defectu occasionis contigerit, non erit signum contritionis, *ut patet*.

Dixi 2<sup>o</sup> *nisi extraordinaria det signa conversionis*. Quamvis enim pœnitens pluries monitus, eodem modo semper relapsus fuerit, potest ex aliqua circumstantia, adjuvante gratia Dei, extraordinarie commoveri et spem fundatam emendationis præbere : tunc absolvi potest, quia prudenter judicatur dispositus; imo absolvendus est, si aliqua ratio id suadeat, v. g. si confessarius sit extraneus et redire non debeat, si pœnitens longe distans habeat domicilium, si matrimonio jungendus sit; si quamdam timeat infamiam, nisi ad sacram synaxim accedat, etc.

*Quæritur* 1<sup>o</sup> quanto tempore probandus sit consuetudinarius recidivus, ut tuto absolvi possit?

R. Si relapsus fiant ex causa intrinseca, ut accidit in peccatis incontinentiæ secretæ, odii, blasphemiæ et similia, prudentia suggerit hujusmodi pœnitentes frequenter audire, eos saltem per unum mensem differendo, ut præparentur ad suscipiendam absolutionem cum abundantiori gratia et efficaciori perseverantia : imo dilatio unius mensis communius non sufficit, ut consuetudo eradicetur. Attamen si ratio valida tantam non patiatur dilationem, v. g. si pœnitens in quadam sit necessitate absolutionem suscipiendi, si timeatur ne desperatus non redeat, etc. citius absolvendus erit, et forsitan post quindecim vel octo dies, ut plures theologi aiunt, si relapsus antea frequentes omnino cessaverint vel notabiliter imminuti sint, atque firmum existat emendationis propositum.

Tempus autem probationis longius esse debet, si recidivus raro habeat occasionem peccandi : v. g. qui singulis diebus dominicis solebat inebriari, non tam probatur in-

tra mensem quam prædictus blasphematorius intra octo dies. Cæterum, confessarius ad multas circumstantias attendere debet ut prudens ferat iudicium, et quod utilius erit pœnitenti eligat.

*Quæritur* 2º quid sentiendum sit de iis hominibus qui in Quadragesima tantum confiteri volunt, et quotannis eadem referunt peccata mortalia?

*R.* Ex modo dictis hi homines judicandi sunt : vel cum eodem pravo habitu sine ulla emendatione redeunt, et tunc, post aliqua tentamina, differri debent donec signis extraordinariis ostendant se melius esse dispositos; vel in eis apparent emendationis signa, quibus prudenter iudicatur eosdem vere esse contritos, v. g. minus frequenter relapsi sunt, diutius post absolutionem perseveraverunt, majores conatus adhibuerunt, extraordinariis tentationibus objecti sunt, etc. et absolvi debent, modo sincere affirmant firmum habere propositum amplius non peccandi. Conandum est tamen ut ad sacrum tribunal sæpius accedant; frequens enim confessio efficacius est medium quo hujusmodi peccatores corrigantur. Verumtamen absolutio ipsis denegari non posset, præcise quia semel tantum in anno confiteri volunt.

*Quæritur* 3º quandonam confessiones recidivorum iterandæ sint?

*R.* Confessiones recidivorum judicandæ sunt validæ vel nullæ ex modo quo relapsus contigerunt : si nulli aut fere nulli adhibiti sunt conatus, reputari debent nullæ atque iterandæ sunt. Validæ, e contra, judicantur si peccatores saltem aliquandiu perseveraverint, et, adhibitis mediis sibi indicatis, ex fragilitate vel ex mutatione propositi relapsi sint, quod ex adjunctis prudenter æstimatur. Iteratio autem confessionum non leviter præscribenda est, ne sacramentum reddatur nimis onerosum.

SECTIO QUINTA. — De agendi ratione confessarii erga eos qui peccata sua negant.

Vel confessarius cognoscit peccata a pœnitente negata per alterius confessionem, vel per viam naturalem.

In priori casu, Ligorio dicit, l. 6, n. 631, cum quibusdam aliis, absolutionem non esse concedendam, sed voce submissa aliquid orandum ad negationem ejus occultandam, et sic dimittendum esse pœnitentem : alii vero contendunt absolutionem negari non posse, quia confessarius notitia per confessionem alterius obtenta nullo modo uti potest. Ita *Billuart* et alii non pauci, quibus assentio.

In posteriori casu, id est, si confessarius peccata sui pœnitentis via naturali certo cognoscat, v. g. quia illum vidit furantem, turpia facientem, audivit blasphemantem, etc. eum diligenter interrogatum et hæc peccata semper negantem absolvere non debet, utpote certo indispositum, nisi forte prudens adsit dubium an alteri confessus fuerit, aut justam habeat rationem ea retinendi peccata. Ita *Layman*, *Suarez*, *Card. de Lugo*, *Concina*, *Billuart*, *Ligorio* et generaliter alii. Si vero ex suspitione tantum vel ex aliorum relatione confessarius id sciat, communiter docent theologi pœnitentem, post diligentem interrogationem, absolvendum esse, quia præsumi potest illum tale peccatum fuisse oblitum, vel alteri confessum, vel habere justam rationem illud tacendi, vel relatores fuisse deceptos; regula enim generalis est, ut docet *S. Th. Quodlib. 1, art. 12*, credendum esse pœnitenti contra se et pro se dicenti : unde confessarius, post diligentem causæ instructionem, judicare tenetur secundum allegata. Si a pœnitente decipiatur, non peccabit eum absolvendo; graviter e contra peccaret si, ob præsumptionem malæ fidei, absolutionem injuste ei denegaret.

Attamen si, omnibus perpensis, ex aliorum relationibus certo judicaret pœnitentem peccata quæ obstinate negat vere commisisse et alteri non fuisse confessum, eum absolvere non deberet, quia illum videret certo indispositum.

SECTIO SEXTA. — De agendi ratione confessarii erga moribundos.

Nullum est dubium quin sacerdos ad moribundum vocatus, vel ad eum ex officio accedens, ut pastor et vices ejus gerens, vehementi zelo curare debeat illum ad

tremenda Dei judicia præparare et Christo lucrificare.

Inter moribundos, alii sunt recte dispositi, alii dubii, alii sunt ignari, alii scandalosi et alii sensibus destituti.

1° Qui recte sunt dispositi, semper absolvi debent, *ut patet*: recte autem reputantur dispositi qui male quidem vixerunt, sed peccata sua agnoscunt et confitentur, de illis dolentes ac promittentes se talia nunquam admissuros.

2° Qui dubias tantum habent dispositiones et etiam improbables, modo non sint evidenter nullæ, absolvi debent: quia sacramenta sunt propter homines, non vero homines propter sacramenta: in extremitate igitur melius est sacramentum profanationi exponere, quam permittere salutem hominis periclitari. *Ita omnes*. Verum qui peccato suo obstinate adhærent, vel obligationibus certis, v. g. restituendi, se reconciliandi, concubinam ejiciendi, etc. satisfacere nolunt, absolvi non possunt.

3° Qui necessaria necessitate medii ignorant, statim erudiendi sunt, vel saltem, mysteriis dilucide eis propositis, curandum est ut actum fidei eliciant, et aptis interrogationibus obtinendum ut præteritas confessiones quantum possunt iterent.

4° Si agatur de peccatore scandaloso, v. g. bona aliena retinente, in concubinato vel in matrimonio tantum civili vivente, ad enormes usuras commodante, etc. communiter audiri non debet, nisi prius emendationem et debitam satisfactionem promiserit: nam timendum est ne præscriptis confessarii obtemperare nolit, ut frequentius contingit: si semel in confessione auditus fuerit, confessarius sigillo obstrictus sufficienti libertate non pollebit, et ultima sacramenta indigno ministrare cogetur. Hoc autem incommodum vitabit, moribundo de hujusmodi peccatis exterius loquendo. Ergo.

5° Major difficultas est quoad eos qui sensibus destituuntur: in quatuor autem classes dividi possunt; alii signa contritionis dederunt antequam sensibus orbarentur et sacramentum petierunt: alii nulla signa contritionis dederunt, sed christiane vivebant; alii in peccato certe



vivebant et nullis indiciis ostenderunt se dolere de præteritis, et alii in actu peccati usum rationis amiserunt.

*Certum est* 1° eos qui sacramentum petierunt vel signa contritionis exhibuerunt absolvendos esse, licet peccata sua nullo modo confiteri possint, idque constat concil. Arausicano I, Carthag. IV, auctoritate S. Leonis papæ, ritualis Romani et fere omnium theologorum. Ita expresse Bened. XIV, de Synodo diœc. l. 7, c. 15, n. 8.

2° Communis olim sententia theologorum fuit absolutionem negandam esse iis qui repentino casu oppressi, cognitionem amittunt, etiamsi christiane vixissent, si nulla dent signa contritionis, propter defectum materiæ sensibilis sacramenti, scilicet contritionis et confessionis. Ita, inter alios, Card. de Lugo, Suarez, Layman, Natalis Alexander, Pontas, etc. Contra hanc opinionem fortiter insurrexit P. Morinus, lib. 10, cap. 10, contenditque absolutionem in eo casu impertiendam esse. Multo communius theologi eandem sententiam nunc tuentur, et sequentibus innituntur rationibus. 1° Auctoritate S. Aug. qui lib. 1 de Adult. conjug. c. 28, docet Baptismum conferendum esse catechumenis sensibus destitutis, deinde addit : « Quæ autem Baptismatis, eadem reconciliationis » est causa, si forte pœnitentem finiendæ vitæ periculum » præoccupaverit. Nec ipsos enim ex hac vita sine arrha » suæ pacis exire velle debet mater Ecclesia. » 2° *Ratione*. Defectus materiæ sensibilis est solum fundamentum quo nituntur adversarii; sed dici potest vitam christianam anteactam, quamdam esse speciem confessionis vel saltem petitionis sacramenti in extremis. Aliunde, fieri potest ut ægrotus nonnullis signis a confessario non perceptis, v. g. suspiriis, motibus alicujus partis corporis, etc. conetur manifestare se absolutionem desiderare; et insuper non omniino certum est actus pœnitentis esse materiam sacramenti Pœnitentiæ; datur ergo locus dubitandi an existat materia sufficiens: porro tale dubium, etiam tenue, sufficit ut in extremis absolutio conferatur: ergo. Ita, cum multis aliis, *Juenin, Tournely, P. Antoine, Collet, Billuart, Dens, Ligorio*, etc. Bened. XIV eandem senten-

tiam longius refert eamque approbare videtur, de Synodo Dioec. lib. 7, cap. 15, n. 11.

Hinc pariter absolvendus est vir ignotus apud quem indicia catholicitatis inveniuntur, ut liber orationis, corona precatoria, etc. Imo, in regione catholica, eum absolverem qui nulla hujusmodi haberet signa, quia probabile est eum esse catholicum : secus agerem in regione omnino hæretica vel infideli, propter rationem oppositam ; dici namque non potest hæreticum aut infidelem habitualiter dispositum esse ad cupiendam absolutionem, et fortasse aliquo signo eam postulare. Ergo.

3º Qui certo male vivebant, sed fidem catholicam adhuc tenebant, similiter absolvendi sunt ; tum quia fides quam profitebantur signum erat eos esse dispositos ad petendum sacramentum in casu necessitatis ; tum quia præsumi potest eos aliquo signo conari desiderium suum actuale manifestare ; tum denique quia S. Aug. dicit, loco citato, baptizandos esse catechumenos, *qui viventium conjugii copulati, retinent adulterina consortia*, addens : « Quis enim novit, utrum fortassis adulterinæ carnis illecebra usque ad Baptismum statuerat detineri ? » Ita expresse *Billuart*, *Dens*, etc.

Qui vero fidem catholicam non profitebantur, ut hæretici, schismatici, apostatæ et increduli manifesti, absolvi non possunt, nisi aliquod exhibuerint signum conversionis : nulla quippe est ratio præsumendi eos absolutionem desiderare.

4º Deneganda est absolutio iis qui in ipsomet actu peccati, v. g. in ebrietate voluntaria, in duello, etc. sensibus destituuntur, donec aliquo signo dent locum suspicandi ipsos dolere, quia huc usque judicantur indigni. Plures tamen arbitrantur eos absolvendos esse, modo constet fuisse catholicos, quia præsumi potest illos periculum advertentes dolere et dolorem exterius manifestare conari. Ita *Ligorio*, l. 6, n. 483, plures alios citans, contra *Genet*, *Habert*, *Juenin* et *Concina*. *Dens* autem hanc decisionem limitare videtur ad eos qui uno die aut altero obmutescentes supervivunt. In tali extremitate neque

absolventes neque absolutionem negantes condemnare auderem.

In cunctis his casibus, cum dispositiones pœnitentis sint dubiæ, absolutio danda est sub conditione tacita.

SECTIO SEPTIMA. — De agendi ratione confessarii erga scrupulosos.

Scrupuli considerandi sunt ut morbus animi gravis, periculosus et ad infelices exitus sæpe deducens: conscientiam anxietatibus torquent, facultates morales obtundunt, indolem mutant, in desperationem conjiciunt, impelluntque ad mortem sibi inferendam, ut pluries accidit, vel ad laxandum habenas cunctis vitiis, quod frequenti experientia constat. Sapiens igitur confessarius totus esse debet ut scrupulos nascentes præcaveat, vel natos quamprimum compescat et eradiceat.

Unica autem est via eos sedandi atque tollendi, nempe obedientia cæca, constans et universalis. Ita omnes doctores et vitæ spiritualis magistri, inter quos S. Bernardus, S. Antoninus, S. Franciscus Salesius, S. Philippus Nereius, S. Theresia, S. Joannes a Cruce, S. Ignatius de Loyola, illustris Gerson et omnes theologi. Unde scrupulosus vel ad scrupulos tendens nullo timore angere debet nisi timore non plene obediendi, propter periculum cui se exponeret. S. Philippus Nereius affirmabat eum qui paret confessario, securum esse de non reddenda ratione actionum suarum; S. Joannes a Cruce dicebat, e contra, dictis confessarii non obtemperare, superbiam esse et fidei inobservantiam.

Confessarius igitur conetur pœnitenti suo persuadere 1º plenam habendam esse fiduciam in merita Christi et in patrocinium sanctissimæ Matris ejus; 2º consilia Dei ipsiusque judicia non esse scrutanda; 3º eum viscera patris tenerrimi erga nos habere, atque salutem nostram velle; nos idcirco filios obsequentissimos erga ipsum esse oportere; 4º plenam non quærendam esse certitudinem de bonitate actionum nostrarum in se, sed moralem,

quæ ex judicio prudentis confessarii noscitur sufficere; 5° etiamsi confessarius erraret in præcipiendo, pœnitentem non erraturum in obediendo; 6° consortium scrupulorum esse fugiendum; 7° diversos doctores aut confessarios non esse passim consulendos; 8° a lectione librorum nimiae severitati faventium ipsis abstinendum.

Præcipua scrupulorum objecta sunt dubia circa fidem, malæ cogitationes contra castitatem aut adversus charitatem, integritas confessionis, validitas confessionum præteritarum et timor ne in omnibus peccetur.

1° Expendere debet confessarius an pœnitens de veritate religionis in genere, aut de veritate alicujus dogmatis in particulari reipsa dubitet, an vere anxietatibus exagitetur, sine ulla ratione positiva: in priori casu, solutis per ordinem objectis, lucide proponenda est veritas cum argumentis ad producendam convictionem magis idoneis; in posteriori autem casu, præscribendum est pœnitenti ut dubia de quibus quæritur, contemnat, rationes convictionis non exquirat, officia proprii status christiane impleat, et securus maneat.

2° Qui cogitationibus adversus castitatem aut charitatem vexantur, interrogandi sunt an malum sibi interius repræsentatum, data occasione, facere vellent: si incunctanter respondeant quod nollent, et revera caste vivant aut nihil contra charitatem admittant, judicandi sunt in hoc puncto scrupulosi; tunc exigendum est ab eis ut tales cogitationes tanquam mera imaginationis deliria habeant, circa illas conscientiam non examinent, nec de illis se accusent.

3° Iis qui semper timent ne peccata sufficienter non aperiant, ostendendum est confessiones nunquam esse nullas defectu integritatis, quando pœnitens nihil vult occultare; sola peccata mortalia et circumstantias mortales esse materiam sacramenti necessariam, a cujus declaratione ignorantia, bona fides et præceptum confessarii excusare possunt. Ab hujusmodi personis quandoque exigendum est ut seipas non accusent, sed quæsitis confessarii duntaxat breviter respondeant.



4° Iis autem qui circa validitatem præteritarum confessionum anxii sunt, vel quia omnia peccata et circumstantias eorum non satis explicuerunt, vel quia dolore requisito caruerunt, post interrogationes necessarias ad eos recte cognoscendos, prohibendum est, maxime si unam aut plures confessiones generales jam fecerint, ne ullum de præteritis confessionibus dicant verbum, nisi tam certo judicent se peccatum mortale admisisse et non declarasse, ut hoc utrumque cum juramento affirmare possint. Sciant quod si forte aliquod peccatum mortale non declaraverint, aut si quædam vel omnes confessiones eorum præteritæ sint nullæ defectu doloris, nihilominus in præsentī confessione justificandi sint, modo vere doleant : quid igitur eos perturbare posset?

5° Suadendum est iis qui pavent peccare in omni re quam faciunt, ut libere agant sicut cæteri solent agere, et peccatum non formident quoties evidenter non advertunt rem esse malam.

Benigne tractandi sunt scrupulosi, modo pareant :  
 « Sed circa obedientiam magnus rigor cum ipsis est adhibendus ; si enim hanc obedientiæ anchoram amittunt,  
 » certum incurrunt naufragium ; nam aut amentes evadent, aut habenas in vitia relaxabunt, » inquit Ligorio, Praxis confess. n. 58.

Quidam sunt scrupulosi sub aliquo respectu qui sub aliis respectibus graviter delinquant : fortiter increpandi sunt, et a sacramentis removendi, donec resipiscant et emendationem sincere promittant. Qui vero timoratæ sunt conscientiæ et præ metu sacram Eucharistiam accipere non audent, aliquando jubendi sunt virtute obedientiæ ad illam accedere, vel post absolutionem, vel etiam sine absolutione.

SECTIO OCTAVA. — De agendi ratione confessarii erga personas devotas.

Caveat confessarius ne personas ad devotionem vocatas verbis minus discretis, negligentia, impatientia aut fri-

gigitate a proposito avertat, vel retardet : facile graviter peccaret. Eas, e contra, honoret, adjuvet et velut pretiosorem gregis Christi portionem habeat : attamen quamlibet familiaritatem externam cum illis sedulo fugiat ; et si advertat aliquam sibi naturaliter adhærere, eam ad alium confessarium statim remittat.

Curare debet ut quæ ad sacram synaxim frequenter accedere dignæ sunt, singulis hebdomadis aut saltem quindenis confiteantur et absolutionem ordinarie suscipiant.

Dico *ordinarie* ; quia non necesse est ut singulis vicibus absolvantur : pii enim confessarii benedictionem tantum eis impertiunt easque ad communionem nihilominus admittunt, quando vident illas potius naturales defectus quam peccata venialia declarare : alii vero non minus pii, gratiam sacramentalem illis procurare volentes, eas semper absolvunt, modo peccata vitæ anteactæ certa saltem in genere confiteantur, dicendo, v. g. De omnibus peccatis totius vitæ meæ, et præsertim de iis quæ contra talem aut talem virtutem commisi, accuso me, de illis veniam a Deo postulo, et a te, pater, pœnitentiam et absolutionem.

Juvat ista methodo frequentibus confessionibus semper uti, etiam quando peccata certo venialia declarantur, ut materia sacramenti assecuratur ; timendum est enim ne peccata quæ declarantur sint dubia, aut ne insufficiens de illis habeatur contritio : contra vero si gravia peccata jam remissa declarentur et actualis eliciatur contritio circa illa, certa est materia, et gratia sacramentalis confertur. Ergo.

Si quis de venialibus quotidianis, v. g. de impatientiis, intemperantiis, distractionibus aliisque similibus confiteatur, spectandum est an aliquando vim sibi intulerit ut passionem superaret, an vero sine resistantia relapsus fuerit : in priori casu, potius ex humana fragilitate quam ex defectu propositi peccare judicatur, et absolvi potest ; in posteriori vero casu, proposito caret et sufficientem contritionem non habet : igitur absolvi non potest, nisi alia declaret peccata de quibus vere doleat.

Cavere debet confessarius ne pœnitentibus suis, præsertim feminis, prohibeat ad alium confessarium accedere; et si resciverit accessisse, ostendat id sibi gratum fuisse, nisi ageretur de scrupulosis qui periculose ad alios accederent propter varietatem decisionum. Non facile autem ipse suscipiat eos qui confessarium mutare volunt: nam talis mutatio, aliquando necessaria, frequenter ex levitate aut curiositate, vel etiam ex prava intentione procedit, ut pluries, me sciente, accidit.

Summa etiam utatur prudentia ne a falsis devotis decipiatur; superbas, morosas, de aliis detrahentes, curam familiæ negligentes, etc. cum aliorum scandalo ad mensam sacram frequenter non admittat. Vera enim devotio frenum cunctis vitiis imponit, et omnia proprii status officia fideliter adimpleri procurat.

SECTIO NONA. — De agendi ratione confessarii erga eos quos male absolvit.

Triplex contingere potest defectus in absolutione, scilicet essentialis, accidentalis proximo non nocens, et alter proximo nocens.

1° Si ob defectum essentialem absolutio fuerit nulla, confessarius tenetur pro posse hunc defectum corrigere, quia pœnitens alioquin in re gravi deciperetur. Vel autem prævidet pœnitentem ad se mox reversurum, et tunc eum expectabit ut moneat; vel talem non habet prævisionem, et eum extra confessionem monere debet, prius petita et obtenta licentia illi de re ad confessionem pertinente loquendi. Si autem judicet se hujusmodi licentiam prudenter petere non posse, rem misericordiæ Dei committat et de culpa, si quam admiserit, doleat, ad nihil ultra tenetur.

Si vero adverteret se male absolvisse pœnitentem adhuc moraliter præsentem, v. g. in ecclesia non longe orantem, et rite dispositum, illum secreto absolvere posset et deberet.

2° Si contigerit defectus non essentialis nec cum damno

proximi conjunctus, v. g. si confessarius omiserit interrogare de numero et circumstantiis peccatorum, regulariter ad nihil tenetur, nisi ad agendam pœnitentiam de peccato. Si pœnitens redeat, defectum in alia confessione corrigere poterit: si non redeat, eum extra confessionem, petita licentia, admonere non tenetur, nisi positive eum deceperit, dicendo, v. g. non declarandas esse circumstantias speciem peccati mutantes, non tollendam esse occasionem proximam, vel ita tacuerit ut pœnitens intellexerit se tollere occasionem, vel restituere, etc. non teneri.

3° Si defectus tertię personæ noceat, v. g. si confessarius omiserit restitutionem injungere, pœnitentem modo superius exposito admonere tenetur, et si positive ex malitia, vel ex ignorantia culpabili aut negligentia gravi affirmaverit non esse restituendum, ipse restituere tenebitur, nisi pœnitentem efficaciter admonuerit.

### § III. — De obligationibus confessarii quæ spectant sigillum.

Nomine sigilli, intelligitur obligatio celandi ea quæ ex sacramentali confessione accepta sunt, sumpta metaphora a sigillo quo ea obsignamus quæ volumus esse secreta. Dicemus 1° de obligatione servandi sigillum; 2° de iis quæ cadunt sub sigillo, et 3° de iis qui tenentur ad sigillum.

#### SECTIO PRIMA. — De obligatione servandi sigillum.

##### PROPOSITIO.

*Strictissima est obligatio inviolabiliter servandi sigillum confessionis.*

*Prob.* Quod jure naturali, divino et ecclesiastico præcipitur, strictissimæ est obligationis: atqui tale est sigillum confessionis.

1° *Jure naturali præcipitur.* Jus enim naturale prohibet ne diffametur proximus, violetur religio secreti, sacramentum ludibrio et odio exponatur: hæc tamen om-



nia faceret sacerdos sigillum confessionis violando : ergo.

2° *Jure divino*. Qui enim præcipit finem , præcipit media ad illum assequendum necessaria : porro Christus præcipit confessionem ; confessio autem impossibilis est nisi altissimum servetur secretum circa ea quæ declarantur : ergo.

3° *Jure ecclesiastico*. Nam in Decreto, causa 33, quæst. 3, dist. 6, de Pœnit. cap. 2, sic habetur : « Sacerdos ante omnia caveat ne de his quæ ei confitentur peccata, alicui recitet, non propinquis, non extraneis, neque, quod absit, pro aliquo scandalo. Nam si hoc fecerit, deponatur, et omnibus diebus vitæ suæ ignominiosus peregrinando pergat. »

Concil. Lateran. IV, can. 21, pœnam depositionis in violatores sigilli renovavit, sed perpetuam peregrinationem in perpetuam pœnitentiam in arctiori monasterio agendam commutavit; Innocentius III non dubitavit dicere sacerdotem peccatum apud se depositum revelantem, gravius peccare quam hominem illud committentem. Ergo.

Dixi 1° *strictissima obligatio*; 1° quia triplici fundatur præcepto, et violatio ejus triplicem complecteretur malitiam, unam contra famam proximi, secundam contra fidelitatem in pacto tacito promissam, et tertiam contra reverentiam sacramento debitam; 2° quia nulla dispensatione, nec summi pontificis, nec concilii generalis tolli potest; 3° quia in nullo prorsus casu, et propter nullum finem, quantumvis bonum, honestum, utilem aut necessarium, violari potest, nec pro tuenda confessarii vita, nec pro bono temporali aut spirituali ipsius pœnitentis, nec pro servanda republica, fide aut Ecclesia : nam existentia sacramenti Pœnitentiæ, ac consequenter religionis, ab inviolabilitate sigilli pendet; hoc autem bonum tantum est ut nullo alteri comparari possit.

Omnes fatentur transgressionem hujusce obligationis levitate in materiæ non admittere : revelatio igitur minimæ cu pæ peccatum esset mortale.

Dixi 2° *inviolabiliter servandi*, id est 1° nec verbo, nec

facto, nec signo, nec scripto, nec ullo alio modo significandi ea quæ audita sunt in confessione; 2° neque ante mortem, neque post mortem pœnitentis, neque ipsi, extra tribunal, neque aliis, quamvis ab ipso, vel alia via culpam in confessione declaratam rescivissent, revelandi; 3° neque directe et expresse, neque indirecte, aliquid faciendo aut omittendo unde detegatur vel in suspicionem veniat confessio pœnitentis, vel unde ipse judicare vel suspicari possit confessarium iis in confessione acceptis uti, etc.

*Hinc* 1° qui duos audivit fratres, dicere non potest unum habere tantum venialia, quia indirecte revelaret alterum habere mortalia.

*Hinc* 2° contra inviolabilitatem sigilli peccaret qui diceret, v. g. Prima persona quam audivi, tale declaravit peccatum, quia periculo eam manifestandi per aliorum conjecturas se exponeret. Item non licet dicere peccata extraordinaria, sive genere, sive numero, sive circumstantiis, in tali communitate, vel in tali parochia esse consueta; nam inde aliqua infamia communitati aut parochiæ nascitur.

*Hinc* 3° duo confessarii qui eandem audierunt personam idem peccatum declarantem, de illo inter se colloqui non possunt, nam peccatum istud sciunt tantum sacramentaliter.

*Hinc* 4° qui interrogatur de auditis in confessione, affirmare et jurare potest, etiam coram justitia, se ea nescire; nescit quippe ut homo, cum ea didicerit tantum ut vices Christi gerens: si vero interrogaretur an talis persona hoc vel illud peccatum confessa fuerit, neque affirmare, neque negare potest, sed generaliter dicere se nescire, vel hanc quæstionem esse impiam et ad illam nihil respondendum esse.

*Quæritur* ex qua confessione oriatur obligatio sigilli?

*R.* Ex omni et sola confessione sacramentali, siquidem ipsius est proprietas. Illa autem confessio est sacramentalis quæ fit in ordine ad sacramentum, sive absolutio impertiatur, sive non.

Unde 1<sup>o</sup> confessio quæ scienter fit laico vel sacerdoti jurisdictione carenti, non inducit obligationem sigilli, sed tantum secreti naturalis : secus dicendum si sacerdos credatur approbatus, quia confessio ex parte pœnitentis vere est sacramentalis. 2<sup>o</sup> Si quis ad confessarium accedat animo eum decipiendi, irridendi, in peccatum protrahendi, aliquid ab eo extorquendi, etc. in ordine ad sacramentum se non accusat : igitur confessio ejus obligationem sigilli non imponit. Vix tamen confessarius ea revelare posset quæ sic agnovisset, propter periculum ne haberetur ut violator sigilli. 3<sup>o</sup> E contra, qui conscientiam confessario aperit, sine voluntate absolutionem suscipiendi, sed ut consilium obtineat, ut præcepto Ecclesiæ vel mandato superioris aliquo modo satisfaciatur, confessionem obligationem sigilli inducentem facit. Ita Sylvius et Billuart. Hinc schedula confessionis hujusmodi pœnitentibus negari non potest; solum enim factum confessionis exprimere debet confessarius, sive absolutio concessa fuerit, sive non, his circiter verbis : *Ego infra scriptus, testor N. peccata sua apud me deposuisse, die, etc.* 4<sup>o</sup> Quod sub sigillo confessionis, extra confessionem, acceptum est, sub sigillo reipsa non cadit, siquidem non fit confessio sacramentalis : est igitur duntaxat sub secreto naturali.

SECTIO SECUNDA. — De iis quæ sub sigillo cadunt.

Sub sigillo inviolabiliter concluduntur directe vel indirecte peccata mortalia et venialia, eorum objecta et circumstantiæ, pœnitentia imposita, defectus naturales, et generatim quidquid ex sola confessione cognitum, pœnitenti aliquo sensu molestum esset; nisi enim hæc omnia inviolabiliter custodirentur secreta, sacramentum redderetur odiosum.

1<sup>o</sup> Omnia peccata mortalia tam in genere quam in specie : unde qui diceret aliquem in censuram incidisse, casum reservatum habuisse, aliquid grave declarasse, sigillum frangeret. Item si, audito gravi peccato in tri-

bunali, exclamaret vel ingemisceret, aliis audientibus.

2° Peccata venialia, tum in genere, tum in specie; nam obligatio sigilli levitatem materiæ non patitur, *ut diximus*. Quidam tamen docent revelationem non esse, si confessarius solummodo dicat de pœnitente: Venialia tantum confessus est; quia eo ipso quod confiteatur, saltem habet peccatum veniale; sed hoc periculosum est et caute vitandum.

3° Objecta peccatorum; unde si pœnitens declaret se male locutum esse de tali puella gravida, confessarius hanc circumstantiam manifestando, etiamsi aliis publice nota esset, contra sigillum ageret: quamdiu per solam confessionem illam cognoscit, tacere tenetur. Hinc eos *Billuart* affirmat increpandos esse qui, orto scandalo publico, dicunt, ut frequens est, aures suas in confessionali continuo vexari allocutionibus contra istud peccatum.

4° Complices juste vel injuste in confessione detecti, et circumstantiæ etiam non necessariae, sed quas pœnitens errore putavit esse declarandas. Alia vero in tribunali narrata, sed ad confessionem non pertinentia, sub sigillo non cadunt.

5° Pœnitentia injuncta; si enim gravis sit, qualis pro mortali peccato solet imponi, revelatio illius pœnitentem infamaret et sacramentum odiosum redderet. Similiter nec pœnitentis indispositionem, nec absolutionis denegationem revelare licet.

6° Defectus naturales, ut illegitimitas natalium, negotiorum domesticorum implicatio et quidquid pœnitenti molestum est, vel tale ab ipso reputatur et ex sola confessione cognoscitur, sub sigillo obsignatur: unde qui ex confessione novit famulam furare pecuniam, arcam obscurare non potest; qui didicit mortem sibi strui, nihil facere aut omittere potest quod secus nec faceret, nec omitteret, nisi licentia a pœnitente sibi concessa fuerit.

Cum sigillum in favorem pœnitentis institutum fuerit, narrare quæ ipsi molesta esse nequeunt, fractio sigilli non est; ea ratione excusantur magni viri confessarii qui testati sunt se nihil grave in tota vita alicujus sancti inve-



nisse, quemadmodum fecit Bellarminus relative ad sanctum Aloysium a Gonzaga. Nec tamen, extra necessitatem, sic loquendum est, propter periculum revelationis indirectæ respectu aliorum, de quibus tale testimonium reddi non posset, et ne aliqua inde suboriatur suspicio quod sigillum aliquando violari possit.

Idcirco caveant confessarii ne passim inter se loquantur, absque necessitate, de rebus ad confessionem pertinentibus, et nunquam id faciant coram laicis, qui in hac materia facile scandalizantur.

### SECTIO TERTIA. — De iis qui ad sigillum obligantur.

Hac obligatione obstringuntur primario confessarius, et secundario ii omnes qui confessionis sacramentalis fiunt participes : hoc quippe ex institutione sacramenti sequitur. Hinc ad servandum illud secretum tenentur :

1° Non solum verus confessarius, sed et fictus, ut laicus fingens se esse sacerdotem, et confessionem excipiens ; nam confessio ex parte pœnitentis fit in ordine ad sacramentum.

2° Interpres cum pœnitente et confessario in ipsamet confessione communicans, et qui peccata rudis ea dictantis in ordine ad confessionem scribunt, si pœnitens id faciat ex quadam necessitate, non vero ex libera electione, quo in casu scribentes ex obligatione naturali tantum ad secretum tenerentur.

3° Qui peccata alicujus se accusantis voluntarie vel involuntarie audivit.

4° Ii quibus revelatio confessionis facta fuisset, sive cum licentia pœnitentis, sive quolibet alio modo, etiamsi notitia ad innumeros pervenisset, quia cum onere sibi annexo sic pervadit.

5° Juxta multos, qui industria vel casu legit scriptum peccata in ordine ad confessionem descripta continens, quia velut instrumentum confessionis sacramentalis habetur. Hic eadem admittenda est restrictio ac in numero 2°.

6° Confessarius cui pœnitens de rebus ad confessiones suas attinentibus, extra confessionem, loquitur : non vero alii, sive laici sive sacerdotes, quibus fideles res conscientiae ad quærendam consolationem vel ad petenda consilia aperiunt ; tunc enim nullus est respectus ad confessionem sacramentalem ; igitur solum naturale secretum debetur : at si pœnitens eos in ordine ad confessionem consuleret, petendo, v. g. modum hæc vel illa peccata declarandi, quidam volunt inde procreari obligationem sigilli : sic P. *Antoine*, *Concina*, *Collet* et *Billuart*, contra multos alios qui contendunt ibi solam adesse obligationem naturalem.

*Quæritur* 1° an ipse pœnitens obligatione sigilli teneatur ?

*R. negative.* Nam sigillum in ipsius favorem fuit institutum : in tantum igitur ad secretum naturale tenetur, in quantum seipsum infamare, vel cum detrimento confessarii aut sacramenti loqui non debet.

*Quæritur* 2° an confessarius quandoque loqui possit cum pœnitente de ipsius confessione ?

*R.* Potest in tribunali Pœnitentiæ, sed discrete, ne illum offendat : at extra sacrum tribunal, ne ullum quidem verbum dicere potest absque pœnitentis licentia. Ex licentia autem ipsius spontanea et plene libera, loqui potest de confessione ejus, non solum cum ipso, sed et cum alio, dummodo fines licentiæ non excedat. *Notandum quippe est*, hanc licentiam a sola voluntate pœnitentis pendere, et ideo limitari vel ad nutum revocari posse.

*Quæritur* 3° an confessarius aliquando uti possit notitia ex confessione accepta ?

*R.* 1°. Si rem aliunde quam per confessionem noseat, ea sub hoc respectu uti potest, dicendo se eam vidisse, vel tali aut tali via cognovisse. Si vero per solam confessionem eam cognoscat, nunquam ea notitia uti potest, si subsit periculum revelationis directe vel indirecte, aut gravaminis realis aut æstimati pœnitenti vel alteri advenientis : hoc ex natura sigilli sequitur.

Hinc superior cognitione per confessionem obtenta uti non potest ad exercendos actus pœnitenti vel alteri ingratos, v. g. ut vultum austeriorem ei ostendat, durius eum alloquatur, colloquium ejus fugiat aut ægre ferat, licentiam exeundi ei recuset, vel suffragium neget, eum ad ordines, ad officium vel ad pastorum non promoveat, ut res suas diligentius servet, seras mutet, claves apud se custodiat, fenestram claudat, etc. Unde Clemens VIII, decreto diei 26 maii, anni 1594, mandavit ut,  
 « Tam superiores pro tempore existentes quam confes-  
 » sarii qui postea ad superioris gradum fuerint promoti,  
 » caveant diligentissime ne ea notitia quam de aliorum  
 » peccatis in confessione habuerint, ad externam guber-  
 » nationem utantur. »

R. 2°. Si nullum sit periculum revelationis aut gravaminis, sive pœnitenti, sive alteri, scientia ex confessione hausta uti licitum est; quia tunc nihil est quod reverentiæ sacramento debitæ adversetur, vel pœnitenti obesse possit. Unde confessarii notitia per confessionem accepta uti possunt ad orandum pro pœnitentibus, ad studendum, ad consulendum, ad sibi invigilandum ne in similes casus labantur, ad benignius eos suscipiendos, ad speciales gratias eis concedendas; in hac enim agendi ratione nihil sacramentum reddit odiosum, nec gravamen imponit pœnitenti aut alteri.

## CAPUT OCTAVUM.

### DE EFFECTIBUS SACRAMENTI POENITENTIÆ.

Præcipuus hujus sacramenti effectus est remissio peccatorum mortalium et venialium, sive quoad culpam, sive quoad reatum pœnæ æternæ, non semper remissa pœna temporali: talem ex natura sua habere effectum probavimus.

Certum est insuper illud producere gratiam sacramentalem sibi propriam, quæ duo importat, scilicet 1º gratiam sanctificantem ex se peccata remittentem, et 2º jus gratias speciales ad perseverandum necessarias suscipiendi. Hæc propositio, ab omnibus theologis admissa constat tum ex tractatu de Sacramentis in genere, tum ex dictis in præsentī tractatu : peccata enim remitti non possunt nisi per effusionem gratiæ sanctificantis in animam.

Duo nunc supersunt paucis verbis expendenda, videlicet 1º an peccata remissa per lapsum in novum peccatum redeant, et 2º an merita ante peccatum acquisita, per sacramentum Pœnitentiæ reviviscant.

## ARTICULUS PRIMUS.

AN ITA DELEANTUR PECCATA UT PER NOVUM PECCATUM  
NON REDEANT.

### PROPOSITIO.

*Peccata semel remissa per lapsum in novum peccatum non redeunt simpliciter.*

*Prob. Scriptura sacra. Ezech. xviii, 21 : Si impius egerit pœnitentiam ab omnibus peccatis suis.... omnium iniquitatum ejus quas operatus est non recordabor. Rom. xi, 29 : Sine pœnitentia sunt dona Dei : at si peccata reviviscerent, Deus recordaretur iniquitatum, et ipsius dona non essent sine pœnitentia : ergo. Ita omnes theologi.*

Si autem mulier vidua de Sarepta dicat Eliæ, III Reg. xvii, 18 : *Quid mihi et tibi, vir Dei ? ingressus es ad me ut rememorarentur iniquitates meæ ;* si Tobias dicat Deo, Tob. iii, 3 : *Domine, ne reminiscaris delicta mea, vel parentum meorum ;* si Psalmista oret, dicens, Ps. lxxviii, 8 : *Ne memineris iniquitatumstrarum antiquarum :* hæc aliaque similia intelligenda sunt de pœnis temporalibus quæ pro peccato jam remisso infligi possunt ; minime vero ostendunt peccata, sive quoad maculam, sive quoad reatum pœnæ æternæ redire.



Dixi non redeunt *simpliciter*, quia redeunt secundum quid, eo sensu quod peccatum, post obtentam justificationem admissum, sit majus et magis a Deo puniendum.

## ARTICULUS SECUNDUS.

AN MERITA ANTE PECCATUM ACQUISITA, PER POENITENTIAM REVIVISCANT.

*Notandum est*, quadruplicis generis distingui opera, scilicet viva, mortua, mortifera et mortificata.

Opera viva ea sunt quæ fiunt in statu gratiæ cum debitis conditionibus ut gloriam æternam mereantur : mortua, sunt illa quæ, licet bona et supernaturalia, præmium cœleste non merentur, quia fiunt ab homine gratia sanctificante destituto : mortifera, sunt peccata quælibet mortalia : denique opera mortificata, sunt opera bona, supernaturalia et in statu gratiæ facta, sed quæ desinunt esse meritoria coram Deo, propter lapsum in peccatum mortale.

Certum est quæstionem moveri non posse de operibus in mortuis quæ, cum vitam non habuerint, reviviscere non possunt, neque de operibus vivis quæ meritoria esse non desierunt, sed de solis operibus mortificatis.

### PROPOSITIO.

*Bona opera per peccatum mortificata, efficacia Pœnitentiæ sacramenti reviviscunt.*

*Prob. 1º Scriptura sacra. Ezech. xviii, 22 : Omnium iniquitatum ejus, quas operatus est, non recordabor ; in justitia sua quam operatus est, vivet ; et xxxiii, 12 : Impietas impii non nocebit ei, in quacumque die conversus fuerit ab impietate sua : at si bona opera per peccatum mortificata non reviviscerent, Deus iniquitatum recordaretur, impietas noceret impio converso. Ergo.*

*Prob. 2º SS. Patribus. S. Hieronymus, in Epist. ad Galatas, cap. iii, sic ait : « Quicumque ob fidem Christi labo-*

» raverit, et postea lapsus fuerit in peccatum, sicut priora  
 » sine causa dicitur passus fuisse, dum peccat, sic rursum  
 » non perdet ea, si ad pristinam fidem et ad antiquum  
 » studium revertatur. » Eodem sensu locutus est S. Amb.  
 lib. 2 in Luc. et plures alii. Ergo.

*Prob. 3<sup>o</sup> conc. Trid. Sess. 6, cap. 16, docet tres requiri*  
 conditiones ut bona opera præmium æternum conse-  
 quantur, videlicet, 1<sup>o</sup> ut facta fuerint ab hominibus jus-  
 tificatis, 2<sup>o</sup> in Deo seu supernaturaliter, et 3<sup>o</sup> ut qui ea  
 fecerint, in statu gratiæ decedant : atqui opera mortifi-  
 cata facta sunt in statu gratiæ, ab homine justificato,  
 qui, moriens post justificationem, in statu gratiæ dece-  
 dit : ergo.

*Dices. Non reviviscunt peccata : ergo nec merita.*

*R. Nego conseq. et paritatem. Ratio disparitatis est,*  
 quod peccatum per remissionem omnino deleatur quoad  
 culpam et quoad pœnam saltem æternam, et merita per  
 peccatum non destruantur, sed tantum obex illis ponat-  
 ur : per justificationem autem obex tollitur : ergo reviv-  
 iscunt.

*Queritur quo gradu reviviscant merita ?*

*R. Tres sunt theologorum opiniones, quarum com-*  
 muniore et probabiliori tenet ea reviviscere gradu pro-  
 portionato intensitati pœnitentiæ unde : si quis ante pec-  
 catum habuerit justitiam ad quatuor gradus, et ipsius  
 conversio sit tantum ad duos, dimidiam habebit par-  
 tem meritorum ; si conversio sit ad quatuor gradus, tota  
 habebit merita, cum gratia sanctificante et virtutibus  
 annexis ; si dispositio ejus ad sex gradus ascendat, merita  
 ultra quatuor non resurgent, siquidem nunquam fue-  
 runt majora. Ita, post S. Thomam, Billuart, Dens et  
 multi alii.

## CAPUT NONUM.

## DE PURGATORIO.

“ Nomine purgatorii intelligitur locus in quo, post mortem, mundantur animæ quibus aliquid superest luen- dum; vel, ut alii dicunt, locus in quo animæ justorum defunctorum pœnis temporalibus obnoxix satis patiuntur. Non dicitur, satisfaciunt, quia jam libertatem non habent, nec igitur mereri possunt, sed tantum pœnas a Deo sibi inflictas, sive pro peccatis mortalibus remis- sis, sive pro peccatis venialibus non expiatis, exsolvere.

Existentiam purgatorii olim negarunt Valdenses, et nunc fortiter negant lutherani et calvinistæ. « Claman- dum, inquit Calvinus, Inst. lib. 3, cap. 5, n. 6, non modo vocis, sed gutturis ac laterum contentione, purgatorium exitiale esse Satanæ commentum, quod Christi crucem evacuat. »

## PROPOSITIO.

*Existit purgatorium.*

*Prob.* Illa propositio tenenda est quæ est de fide, probatur Scriptura sacra, SS. Patribus, traditione et ratione; atqui propositio nostra est de fide, etc.

1<sup>o</sup> *Est de fide.* Sic enim definita fuit in conc. Trid. sess. 6, can. 30: « Si quis, post acceptam justificationis gratiam, cuilibet peccatori pœnitenti ita culpam remitti, et reatum æternæ pœnæ deleri dixerit, ut nullus remaneat reatus pœnæ temporalis exsolvendæ, vel in hoc sæculo, vel in futuro, in purgatorio, antequam ad regna cœlorum aditus patere possit: anathema sit. » Ergo.

2<sup>o</sup> *Prob. Scriptura sacra.* II Mach. xii, 43, Judas Machabæus, cum quidam Judæi in prælio adversus Gorgiam

cecidissent, *Facta collatione, duodecim millia drachmas argenti misit Jerosolymam offerri pro peccatis mortuorum sacrificium, bene et religiose de resurrectione cogitans.* Deinde v, 46 : *Sancta ergo et salubris est cogitatio pro defunctis exorare, ut a peccatis solvantur.*

Unde sic. Sacrificium et preces inservire possunt mortuis ut a peccatis solvantur : sed inservire non possunt beatis qui non habent peccata solvenda, nec damnatis qui, fatentibus adversariis, a peccatis liberari nequeunt : ergo existit purgatorium.

Neque dicant hæretici libros Machabæorum non esse canonicos; cum enim in primis Ecclesiæ sæculis a Græcis et a Latinis inter libros canonicos annumerati fuerint, ut constat testimoniis Tertull. S. Cyprian. Luciferi Calarit. S. Aug. conc. Carth. III, can. 47, concil. Romani, sub Gelasio celebrati, Innocentii I in Epist. ad Exuperium, etc. eorum *canonicitas* in dubium merito revocari non potest. Aliunde, etsi concederetur illos non esse canonicos, saltem negari non potest esse antiquissimos, et cuncta exemplaria, sive Latina, sive Græca, sive Syriaca, eodem modo textum supra citatum exprimere : ergo fidem Judæorum sicut et Christianorum circa purgatorii existentiam testantur. Ergo.

Matth. xii, 32 : *Quicumque verbum dixerit contra Filium hominis, remittetur ei : qui autem dixerit contra Spiritum sanctum, non remittetur ei, neque in hoc sæculo, neque in futuro.* Christus loqui debuit modo intelligibili : porro verba ista, *neque in hoc sæculo, neque in futuro*, non haberent sensum intelligibilem, si Apostoli credidissent nulla remitti peccata in futuro sæculo. Quid sentiremus de homine dicente : Non nubam, neque in hoc sæculo, neque in futuro ? Insulse loqueretur, quia supponeret possibles esse nuptias in altera vita : ergo similiter insane locutus fuisset Christus. Ergo.

Alia eruitur probatio ex I Cor. iii, 15, ubi Apostolus dicit alios in die judicii mercedem statim recepturos et alios detrimentum passuros; salvandos tamen, sed *quasi per ignem.* Ergo 2º.



3<sup>o</sup> *Prob. SS. Patribus.* Tertul. lib. de Monogamia, cap. 10, loquens de vidua, dicit : « Pro anima ejus (conjugis defuncti) orat et refrigerium interim adpostulat. »

S. Epiphanius, Hæresi 75, n. 7 et 8 : Quæ pro mortuis concipiuntur preces, eis utiles sunt; necessario facere illud Ecclesiam dico, quæ traditum sibi ritum illum a majoribus acceperit. »

S. Aug. Serm. 172 : « Orationibus sanctæ Ecclesiæ, et sacrificio salutari, et eleemosynis quæ pro eorum spiritibus erogantur, non est dubitandum mortuos adjuvari, ut cum eis misericordius agatur a Domino, quam eorum peccata meruerunt : hoc enim a Patribus traditum, universa observat Ecclesia. »

Plures alii Patres citari possent. S. Epiphanius et S. Augustini testimonia probant morem pro defunctis exorandi ipsorum tempore fuisse antiquum, id est, a Judæis transmissum Christianis, et in Ecclesia universalem : insuper S. Aug. integrum fecit librum, de Cura pro mortuis gerenda, et ipse pro matre defuncta oravit eamque orationibus et sacrificiis lectorum suorum commendat, l. 9 Conf. cap. 13. Ergo 3<sup>o</sup>.

4<sup>o</sup> *Traditione.* Præter ea enim quæ retulimus et quæ traditionis existentiam, tum apud Christianos, tum apud Judæos ostendunt, sequentia addi possunt : Græci Latinis in hoc dogmate consenserunt in concil. Florentino; in eorum liturgia, sicut in nostra, oratur pro defunctis; imo in omnibus liturgiis ecclesiarum Orientalium, etiam antiquissimis et quæ ad ipsos Apostolos ascendunt, idem statuitur. Ergo.

5<sup>o</sup> *Ratione.* Constat, remissa culpa, non semper remitti pœnam temporalem : si quis ergo cum pœna temporali non soluta, aut cum aliquo peccato veniali decedat, non statim introibit in regnum cœlorum, nec damnabitur : ergo debet esse locus in quo pœnas debitas patiens mundabitur : ergo, etc. aliunde, etc. Ergo.

Inter rationes ab hæreticis contra dogma catholicum allegatas, objicitur 1<sup>o</sup> vocem *purgatorium* in Scriptura sacra non inveniri; 2<sup>o</sup> in Scriptura duos tantum exprimi

status hominum e vita decedentium, et 3° Græcos a Latinis in pluribus dissentire.

Verum 1° quid refert quod vox *purgatorium* in Scriptura non inveniatur, si res ipsa reperiatur? certe vox *consubstantialis* non invenitur in Scriptura, nec vox *Trinitas*, et tamen eas admittunt Protestantes. 2° Scriptura duos tantum exprimit status hominum in altera vita post ultimum iudicium, ut in Matth. xxv, 34 et 41, scilicet, statum beatorum et statum damnatorum; sed alibi, *ut ostendimus*, supponit existere locum inter utrumque medium, in quo mortui adjuvari possunt. 3° Græci a Latinis dissentiunt circa naturam pœnarum quibus animæ justæ plectuntur in purgatorio, non vero circa illarum existentiam. Ergo.

Duo puncta tantum ab Ecclesia fuerunt definita tanquam de fide catholica, scilicet, dari purgatorium et animas ibi detentas fidelium suffragiis, et potissimum salutari altaris sacrificio adjuvari: cætera liberæ theologorum discussioni relinquuntur.

*Quæritur* 1° quæ sit natura pœnarum in purgatorio luendarum?

*R.* Juxta omnes, duplex est pœna in purgatorio, una damni quæ est retardatio visionis beatificæ, et altera sensus. Hæc autem, secundum Græcos, per labores et dolores acerbos causatur: verum constans Latinorum sententia est, in purgatorio esse ignem materiale similem igni infernali, et ideo Ecclesiam pro animabus fidelium orantem, non petere tantum locum lucis et pacis, sed et refrigerii, videlicet contra ignis ardorem. Unde S. Thomas docet pœnam purgatorii quamlibet pœnam hujus vitæ excedere, quamvis pœnis inferni æquiparari non debeat, propter amicitiam Dei, spem obtinendi gloriam æternam et resignationem patientium.

Non æquales sunt pœnæ, sive in intensitate, sive in duratione, pro omnibus, quia non omnes eadem habent debita divinæ justitiæ solvenda. Hinc S. Bonaventura et Bellarminus dixerunt maximam purgatorii pœnam maximam hujus vitæ pœna esse graviolem, non vero mini-

nam purgatorii pœnam maxima hujus vitæ majorem esse.

Incertum est an dæmones justos in purgatorio torqueant; graves theologi cum S. Thoma negant: affirmat vero S. Bernardus, cujus sententiæ favent liturgiæ, in quibus petitur a Deo ut animas illas liberet de ore leonis.

*Quæritur 2º ubinam sit purgatorium?*

R. Communiter docetur illud esse in visceribus terræ, prope infernum. Attamen S. Thomas dicit animas extra hunc locum, Deo ita permittente, aliquando purgari et in terra divagari, vel ad vivorum instructionem, vel ad mortuorum subventionem.

Ut certum habetur infernum esse subterraneum. Alius est locus etiam subterraneus, ab inferno et a purgatorio valde probabilius distinctus, quem habitant qui cum solo peccato originali mortui sunt.

*Quæritur 3º quanto tempore animæ justorum in purgatorio detineantur?*

R. Hoc prorsus ignoratur; Alexander VII sequentem damnavit propositionem: « Annum legatum pro anima » relictum non durat plus quam per decem annos. » S. Aug. matrem suam triginta annos post mortem ejus sacrificiis et orationibus lectorum suorum commendabat; Ecclesia celebrat anniversaria ante plura sæcula pro quibusdam fidelibus in particulari condita: ergo fieri potest ut animæ diutissime maneant in purgatorio, et plures hæc verba I Petr. III, 19 et 20, *In quo et his qui in carcere erant, spiritibus veniens prædicavit: qui increduli fuerant aliquando, quando exspectabant Dei patientiam in diebus Noe, cum fabricaretur arca*, interpretantur de animabus in purgatorio detentis a tempore diluvii usque ad descensum Christi in inferos, id est, per duo millia annorum et amplius.

Quomodo autem mundabuntur qui in fine sæculorum cum debitis temporalibus decedent, prorsus ignoramus: Deus, cujus scientia est infinita, non carebit medio pœnas proportionatas eis infligendi.

*Quæritur 4º an animæ in purgatorio detentæ, certæ sint de salute sua?*

*R. affirmative*, idque ob revelationem ipsis factam in iudicio particulari, et quia, ex speciali Dei protectione, confirmatæ sunt in gratia: mereri quidem non possunt, sed etiam peccare nequeunt. Unde si Ecclesia, orans pro illis, postulet ut liberentur de pœnis inferni, ne absorbeat eas Tartarus, ne cadant in obscurum, etc. hoc est quia eas sibi et Deo repræsentat tanquam ex corpore exeuntes.

*Quæritur* 5° an animæ in purgatorio orare possint?

*R.* Quamvis illæ animæ mereri aut satisfacere nequeant, quia sunt in termino, actus virtutis, v. g. fidei, spei, charitatis, patientiæ exercere possunt; similiter et orando, aliquid a Deo impetrare valent, sive pro seipsis, v. g. aliquam remissionem pœnæ, ut fere omnes fatentur, sive, juxta multos, pro vivis, maxime pro illis qui orant pro ipsis, quia nobiscum sunt in communione Sanctorum. Hinc nihil obstat, in ea sententia, quominus istæ animæ in privatis orationibus invocentur, sicut preces justorum viventium utiliter petuntur.

*Quæritur* 6° an animæ in purgatorio detentæ, suffragiis vivorum adjuvari possint?

*R.* De fide est eas adjuvari posse: hoc constat ex conc. Florent. decreto de Purgatorio, et ex conc. Trid. sess. 22, can. 3, et sess. 25, decreto de Purgatorio, ubi definit, « Purgatorium esse, animasque ibi detentas fidelium suffragiis, potissimum vero acceptabili altaris sacrificio » juvari. »

Aliunde dogma istud cum articulo Symboli, de communione Sanctorum, conjunctum est et perpetua ac universali Ecclesiæ praxi probatur, ut testimoniis in propositione de existentia purgatorii allatis et ex multis aliis quæ offerri possent innotescit. Ergo.

Bona opera quibus animæ in Purgatorio adjuvari possunt, prout exponuntur in conc. Florent. sunt: « Missarum sacrificia, orationes, eleemosynæ et alia pietatis officia. » His adjungenda est indulgentia, quando ita conceditur ut defunctis applicari possit.

Sacrificium missæ et officium nomine Ecclesiæ celebratum, defunctis prosunt, licet a sacerdote in peccato mor-



tali existente offerantur, quia hæc opera ex ipsius dispositione efficaciam suam non habent. Contra vero, orationes, jejunia aliaque opera personalia in statu peccati peracta, defunctis inservire nequeunt, quia non sunt viva, nec Deo grata.

Determinare non possumus qua mensura suffragia vivorum, etiam præstantissima, ut sacrificium missæ, pœnam in Purgatorio solvendam minuant, nec quo modo illorum valor defunctis applicetur : hoc a multis circumstantiis pendere potest, v. g. a natura peccatorum pro quibus pœna solvenda est, a voluntate pœnitentiam agendi quam habuerunt defuncti, a sollicitudine qua movebantur viventes erga alios defunctos, a dispositionibus offerentium et orantium, etc.

## CAPUT DECIMUM.

### DE INDULGENTIIS.

Indulgentia recte definiri potest : *Remissio pœnæ temporalis, peccatis actualibus jam remissis quoad culpam debitæ, extra sacramentum Pœnitentiæ facta ab eis qui habent potestatem thesaurum Ecclesiæ spiritualem dispensandi.*

Dividitur 1º in plenariam et partialem. Indulgentia plenaria ea est quæ omnem pœnam peccatis debitam remittit : unde qui eam perfecte lucratus, statim decederet, in regnum cœlorum introiret. Indulgentia partialis ita vocatur, quia partem tantum, majorem vel minorem, pœnæ temporalis remittit.

Dividitur 2º in temporalem et in perpetuam. Indulgentia temporalis ea est quæ per aliquod tempus lucranda proponitur, et adveniente termino præfixo expiratur : est vero perpetua, quando indefinite concessa est ; non cessat nisi per revocationem sufficienter manifestatam.

Dividitur 3º in localem, realem et personalem. Indul-

gentia localis illa est quæ affixa est loco, v. g. alicui ecclesiæ, capellæ B. Mariæ; realis ea est quæ nonnullis objectis portabilibus, v. g. coronis annexa est; indulgentia personalis illa est quæ uni vel pluribus personis annectitur: tales sunt indulgentiæ confraternitatibus concessæ, quas confratres ubique lucrari possunt.

Breviter nobis dicendum est 1° de potestate Ecclesiæ concedendi indulgentias; 2° de iis qui hanc habent potestatem; 3° de causis ob quas licet indulgentias concedere; 4° de natura indulgentiarum; 5° de thesauro indulgentiarum; 6° de illarum efficacia, et 7° de conditionibus ad eas lucrandas requisitis.

## ARTICULUS PRIMUS.

### DE POTESTATE ECCLESIAE CONCEDENDI INDULGENTIAS.

Hanc potestatem plus minusve directe negarunt Valdenses, Wiclefistæ et deinde Lutherus, ac post ipsum cuncti Protestantes. Contra quos sit

#### PROPOSITIO.

*Existit in Ecclesia potestas concedendi indulgentias.*

*Prob.* Illa propositio negari non potest, quæ est de fide, ac probatur Scriptura sacra et traditione: atqui propositio nostra est de fide, probatur, etc.

1° *Est de fide.* Sic enim definita fuit in conc. Trid. sess. 25, decreto de Indulgentiis: « Sacrosancta synodus » indulgentiarum usum christiano populo maxime salutarem, et sacrorum conciliorum auctoritate probatum, » in Ecclesia retinendum esse docet et præcipit, eosque » anathemate damnat, qui aut inutiles esse asserunt, vel » eas concedendi in Ecclesia potestatem esse negant. » Duo igitur fide catholica constant, scilicet 1° Ecclesiam habere potestatem concedendi indulgentias, et 2° eas populo christiano esse salutare. Ergo 1°.

2° *Prob. Scriptura sacra.* Matth. xvi, 19: *Tibi dabo claves regni cælorum, et quodcumque ligaveris super terram,*

*erit ligatum et in cælis, et quodcumque solveris super terram, erit solutum et in cælis; et viii, 18 : Quæcumque solveritis super terram, erunt soluta et in cælo.* Unde sic. Ecclesia habet potestatem, sine ulla restrictione, aperiendi cælum, solvendo vincula] quæ ingressum ejus impediunt : atqui pœna temporalis peccatis remissis debita, est vinculum ingressum cœli impediens : ergo.

Ea potestate B. Paulus utens erga incestuosum Corinthium quem in vindictam criminis publica pœnitentia affecerat, reliquam pœnam *in persona Christi* indulgit, *ne abundantiori tristitia absorberetur*, II Cor. ii, 7. Ergo 2º.

3º *Prob. traditione.* Urbanus II, in concilio Claromontano, anno 1095, longe ante Valdenses, plenariam concessit indulgentiam iis qui crucem adversus infideles sumerent, nemo redarguit Pontificem eo quod talem exerceret potestatem : ergo tunc constans et universalis erat traditio circa illud punctum. In præcedentibus autem sæculis nullum deprehenditur vestigium institutionis hujus praxis : videmus, e contra, in variis temporibus, quasdam indulgentiarum species in usu ; summi Pontifices et episcopi pœnitentias canonicas sæpius relaxabant, modo propter aliquam compensationem minorem, modo ad commendationem martyrum ; Græci usum indulgentiarum non exprobraverunt Latinis, et ipsi indulgentias concedunt. Ergo 3º.

Negari non potest plures olim irrepsisse abusus in concedendis indulgentiis, unde hæretici immerito sumpserunt occasionem adversus rem ipsam insurgendi : ipsis respondendum est per verba sacri concilii Tridentini, quod, « in his concedendis (indulgentiis) moderationem, » juxta veterem et probatam in Ecclesia consuetudinem, » adhiberi cupit, ne, nimia facilitate, ecclesiastica disciplina enervetur ; » sess. 25, decret. de Indulgentiis. Abusus ergo de quibus conquesti sunt novatores, non imputandi sunt Ecclesiæ, cujus doctrina semper fuit sancta, sed hominibus et præsertim quæstoribus, ut ipsum concil. Trid. satis indicat, in decreto citato.

## ARTICULUS SECUNDUS.

DE IIS QUI HABENT POTESTATEM CONCEDENDI INDULGENTIAS.

Hæc potestas non est ordinis, sed jurisdictionis : competit :

1° Summo Pontifici respectu omnium fidelium, ille enim solus habet jurisdictionem universalem ;

2° Episcopis qui jure communi easdem concedere possunt indulgentias diœcesanis suis quas summus Pontifex cunctis fidelibus ; sed concil. Lateran. IV, anno 1215, statuit, can. 62, quod deinceps annum duntaxat concedere possint die consecrationis ecclesiæ, et in quibuscumque aliis circumstantiis quadraginta dies tantum.

3° Papa vel alius episcopus electus et canonice institutus, licet non ordinatus, indulgentias concedere potest, quia jurisdictionem habet. Episcopus, e contra, dimissus, vel *in partibus infidelium*, potestatem concedendi indulgentias non habet, quia caret jurisdictione.

4° Delegatus ad hoc easdem concedere potest indulgentias ac ille a quo fuit delegatus ; apud omnes enim in confesso est actus jurisdictionis per delegatos exerceri posse.

5° Cum episcopi non habeant jurisdictionem in extraneos, solis diœcesanis indulgentias directe concedere possunt : si vero indulgentiam alicui loco affixissent, extranei eam consequerentur, opus determinatum perficiendo.

6° Cardinales centum dies concedere possunt in ecclesiis quarum sunt titulares, festis solemnibus, quando divinis officiis assistunt.

7° Legati a latere septem annos et septem quadragenas in terris suæ jurisdictionis concedere possunt. Verum hanc potestatem in Gallia exercere nequeunt, nisi specialem ad hoc obtinuerint delegationem, ut habuit Cardinalis Caprara, anno 1802.

8° Vicarii generales, juxta multos, indulgentias con-



cedere non possunt sine speciali delegatione papæ vel episcopi.

## ARTICULUS TERTIUS.

DE CAUSIS OB QUAS LICET CONCEDERE INDULGENTIAS.

Quoniam potestas concedendi indulgentias a Deo concessa est, papa et episcopi non sunt illius domini, sed tantum depositarii : unde illa valide uti non possunt sine justa causa, quæ duo complecti debet, nempe finem Deo gratum et opus ad consequendum hunc finem idoneum.

1° *Finem Deo gratum.* Sola autem remissio pœnæ temporalis non reputatur finis legitimus, alioquin Ecclesia omnem pœnam temporalem peccatis debitam semper sine alio motivo remittere posset, quod evidenter repugnat. Similiter indulgentia valide concedi non posset ob finem mere temporalem, v. g. ad obtinendam pecuniam, nisi hæc pecunia in bonum opus cedere deberet.

Fines vero legitimi propter quos indulgentias concedere licet, sunt : 1° conversio infidelium, exstirpatio hæreseon, et exaltatio sanctæ matris Ecclesiæ ; 2° augmentum pietatis inter fideles qui frequentiori usu sacramentorum aliisve motivis et auxiliis supernaturalibus accensi, excitantur ad melius vivendum, 3° ædificatio vel reparatio alicujus ecclesiæ, fundatio nosocomii, vel alicujus religiosi instituti in honorem Dei vel sanctorum, aut in gratiam pauperum, infirmorum, etc.

2° *Opus ad assequendum hunc finem idoneum* ; id est, opus quod justam habeat proportionem cum fine obtinendo. Non necesse est ut pœnæ remittendæ æquivaleat, alioquin indulgentia jam non esset indulgentia ; neque ut sit graviter molestum ; aliunde enim sufficientem habere potest proportionem, v. g. si fidem excitet, spem erigat, charitatem inflammet, etc. Similiter quædam videri possunt levia respectu singulorum, quamvis sint majora respectu communitatis, ut recitare quinquies *Pater* et *Ave*, ad postulandam exstirpationem hæreseon, etc.

Non est fidelium, nec simplicium sacerdotum judicare de sufficientia causæ ob quam indulgentia conceditur. Cæterum, cum indulgentia sit divisibilis, si causa ad totam non valeat, valet saltem ad partem; si autem opus præscriptum recte perficiatur, pars ista obtinebitur.

## ARTICULUS QUARTUS.

### DE NATURA INDULGENTIÆ.

Sensus præsentis quæstionis est, an Ecclesia, concedendo indulgentias, a pœna temporali debita realiter absolvat. Contendimus illam realiter absolvere; vel enim a pœna realiter absolvit, vel tantum permittit ut bona opera per modum suffragii Deo in compensationem pœnæ offerantur: atqui posterius dici non potest; potestas enim concedendi indulgentias probatur ex verbis Christi, *Quæcumque solveritis erunt soluta*: porro hæc verba veram absolutionem indicant. Unde summi Pontifices, indulgentias concedendo, prædicta verba sæpe referunt iisque nituntur, ut potestatem suam astruant. Ergo.

Hæc tamen proprie dicta absolutio respectu vivorum duntaxat locum habet: nam mortui in purgatorio exstantes Ecclesiæ militantis non sunt subditi: ergo realiter absolvi nequeunt. Indulgentiæ igitur per modum suffragii ipsis applicari possunt, non vero per modum absolutionis. *Ita omnes theologi*, et summi Pontifices aliter non loquuntur quando permittunt aliquam indulgentiam mortuis applicari; dicunt enim eam per modum suffragii applicabilem esse.

## ARTICULUS QUINTUS.

### DE THESAURO INDULGENTIARUM.

Nomine thesauri indulgentiarum, intelligitur superabundantia satisfactionum Christi et sanctorum, quæ non fuerunt applicatæ et in memoria Dei custodiuntur.

*Notandum est*, dari discrimen inter merita et satisfactiones : merita personæ merenti sunt propria et alteri communicari non possunt; v. g. qui præclaris gestis jus ad mercedem acquisiit, efficere non potest ut alter, jus suum ei cedendo, eadem mercede dignus sit. Contra vero satisfactiones pro altero solvi possunt; v. g. Petrus centum nummos debet Paulo, si hanc summam ex propriis nomine Petri tribuam Paulo qui eam acceptet, Petrus erit liberatus in stricto rigore justitiæ. Sic Christus pro nobis satisfecit.

Certum est ipsius satisfactiones fuisse superabundantes; nam unica actio ejus satisfactoria erat valoris infiniti, et pœna temporalis peccatis hominum debita, quantumque supponatur, est finita : ergo maxima pars satisfactionum Christi nondum fuit applicata, dispensationi Ecclesiæ committitur, et ab ea, juxta prudentiæ regulas, applicari potest.

Sancta Maria ab omni labe peccati originalis et actualis divino auxilio custodita; S. Joannes Baptista in ventre matris sanctificatus, qui tamen austeram duxit vitam et decollatus fuit, multique alii sancti Deo obtulerunt satisfactiones pœnam peccatis suis debitam longe superantes : hæc superabundantia satisfactionum, tum Christi, tum sanctorum, spiritualem Ecclesiæ thesaurum et indulgentiarum fontem inexhaustum constituit. Veritas ista contra Protestantes eam negantes probatur 1º auctoritate Clementis VI, Extrav. comm. l. 3, cap. 2; 2º auctoritate Leonis X, propositionem Lutheri damnantis, atque dicentis indulgentias concedi *ex superabundantia meritum Christi et sanctorum*; 3º auctoritate Pii VI, qui in bulla *Auctorem fidei*, n. 41, propositionem eundem habentem sensum quem habet propositio Lutheri, damnavit; 4º usu Ecclesiæ publice et constanter docentis thesaurum indulgentiarum ex satisfactionibus Christi et sanctorum coalescere. Hinc merito dicere possumus, cum Apostolo, Rom. v, 20 : *Ubi abundavit delictum, superabundavit gratia*.

## ARTICULUS SEXTUS.

## DE EFFICACIA INDULGENTIARUM.

Effectus indulgentiarum spectari possunt respectu vivorum et respectu mortuorum.

*De efficacia indulgentiarum respectu vivorum.*

*Certum est* 1° indulgentiam non remittere peccatum, sive mortale, sive veniale, quoad culpam : nam remissio peccati supponit mutationem voluntatis et effusionem gratiæ : at indulgentia voluntatem non mutat, nec gratiam infundit, sed tantum compensat satisfactiones justitiæ Dei a peccatore debitas, et ad solum hunc finem conceditur.

*Certum est* 2° eam non remittere pœnam peccatis remissis debitam, si homo relapsus sit in novum peccatum mortale : nam homo in peccato mortali constitutus cujuslibet operis vivi est incapax ; nec mereri, nec satisfacere de condigno, nec igitur remissionem pœnæ per applicationem indulgentiæ obtinere potest.

3° Si quædam bullæ, indulgentias concedentes, de remissione peccatorum loquantur, hoc intelligendum est de pœna peccatis debita ; vel si de peccatis, eo sensu accipiendum est quod bona opera præscripta et religiose impleta contritionem excitent, peccata venialia remittant, et ad remissionem peccatorum mortalium disponant.

4° Pœnitentia olim canonibus determinata est mensura quam sequitur Ecclesia in concedenda indulgentia. Unde indulgentia Quadragesimæ, centum dierum, septem annorum, etc. est relaxatio seu remissio, non solum coram Ecclesia, sed coram Deo, pœnæ temporalis quæ expiata fuisset per quadragenam, centum dies, aut septem annos pœnitentiæ canonicæ. Quæ autem pars purgatorii huic pœnitentiæ respondeat, quis sit modus applicationis indulgentiæ, Ecclesia non definiit. Nunquam igitur certi



esse possumus nos, per plures indulgentias etiam plenarias, plenissimam obtinuisse remissionem totius pœnæ temporalis peccatis nostris debitæ; sæpe enim indulgentia plenaria fit partialis vel defectu causæ sufficientis, vel defectu operis fini intento proportionati, vel defectu dispositionum in agente.

*Hinc* 1° indulgentia ab obligatione pœnitentiam agendi non eximit; *a fortiori* fidelis pœnitentiam sacramentalem sibi injunctam propria auctoritate omittere non potest, sub prætextu quod lucratus vel lucraturus sit indulgentiam; quia hæc pœnitentia legitime imposita et acceptata, ad integritatem sacramenti pertinet, et solus sacerdos tanquam iudex eam mutare potest.

*Hinc* 2° indulgentiæ centum annorum vel majores, vel quæ sint, possunt adhuc esse insufficientes ad compensandam totam pœnam temporalem quam peccator solvere tenetur; v. g. si quis millies, tum interne, tum externe iteraverit peccatum pro quo pœnitentia decennalis imponenda erat ex canonibus, certe per talem indulgentiam pœnitentiam canonicam non compensaret; aliunde nihil probat totam pœnam temporalem peccatis debitam pœnitentia canonica deleri. Ergo.

*Hinc* 3° peccatores vere conversi satagere debent ut bonis operibus et indulgentiis, sive partialibus, sive plenariis, debita quibus erga divinam justitiam astringuntur, quotidie minuant, atque penitus compensent in hac vita, ne in carcerem purgatorii missi, inde non exeant donec novissimum solverint quadrantem.

*De efficacia indulgentiarum respectu mortuorum.*

Certum est indulgentiam applicari posse defunctis in purgatorio detentis eisque prodesse; et, juxta Sylvium, Suppl. q. 71, art. 10, hæc propositio ad fidem pertinet. Etenim 1° Ecclesia ubique concedit indulgentias, declarans eas applicabiles esse defunctis: ergo credit eas defunctis prodesse. 2° Leo X damnavit, anno 1520, propositionem Lutheri qui contendebat indulgentias defunctis

non prodesse. 3<sup>o</sup> Pius VI proscripsit, in bulla *Auctorem fidei*, n. 42, aliam propositionem propositioni Lutheri similem, *tanquam falsam, temerariam, pias aures offendentem, summis Pontificibus injuriosam et praxi universalis Ecclesiæ contrariam*. Ergo.

At, cum animæ in purgatorio detentæ jurisdictioni Ecclesiæ non subdantur, indulgentia ipsis applicari non potest per modum absolutionis sicut vivis, sed tantum per modum suffragii; id est, fidelis, concedente summo Pontifice, haurit in thesauro Ecclesiæ satisfactiones quas exhibet Deo, illum suppliciter rogans ut eas pro tali vel tali anima acceptare dignetur. Qua autem proportionem Deus eas acceptet, nemo definire potest: itaque nunquam certi esse possumus animas, ope indulgentiarum, sive partialium, sive plenariarum eis applicatarum, a purgatorio fuisse liberatas. Unde indulgentia qua promittitur liberatio unius animæ e purgatorio, vim habet quidem animam liberandi, verum semper ignoratur quo gradu de facto fuerit applicata.

*Queritur* quid necessarium sit ut indulgentia applicari possit defunctis?

*R.* Requiritur 1<sup>o</sup> ut superior ecclesiasticus declaraverit eam applicabilem esse defunctis; est enim actus jurisdictionis et a voluntate ejus pendet cui administratio thesauri Ecclesiæ concredita est. Hinc indulgentia simpliciter concessa pro vivis applicari non potest defunctis, nec indulgentia mortuis destinata, ut indulgentia altaris privilegiati, vivis applicari potest: si autem declaretur tantum applicabilis defunctis, ad nutum fidelis eam lucrari conantis, ipsi vel defunctis applicari potest.

2<sup>o</sup> Requiritur intentio determinata. Revera enim dici non posset indulgentiam applicari, juxta verba Pontificis, si nulla aut vaga et indeterminata duntaxat exstisset intentio eam applicandi. Quamvis definire nollem indulgentiam pro pluribus defunctis oblatam eis non prodesse, saltem tutius est eam alicui individuo, vel nominatim, vel ex aliqua circumstantia determinato applicare, v. g. animæ magis derelictæ, ei pro quo magis te-

neor orare, etc. Optimum est etiam plures simul habere personas in mente, sed conditionate, v. g. Hanc indulgentiam applicare volo Andreæ; si Andreas ea non indigeat, vel illius non sit capax, eam dirigo ad Petrum defectu Petri, ad Joannem, etc.

3<sup>o</sup> Requiritur ut conditiones præscriptæ accurate impleantur. Si contritio et confessio inter has conditiones inveniantur, ut ordinarie contingit, status gratiæ necessarius est, *ut satis patet*. Si vero indulgentia applicabilis defunctis cuidam operi externo annexa sit, nulla facta mentione confessionis aut communionis, probabilius est eam applicari posse defunctis ab homine in statu peccati mortalis constituto; nam opera præscripta non sunt causa meritoria indulgentiæ, sed tantum conditiones sub quibus conceditur: atqui opus externum non est vitiatum, quia fit ab homine in statu peccati mortalis constituto: ergo. Ita Navarus, Suarez, Sylvius, Bonacina, Billuart et multi alii, contra paucos qui æstimant statum gratiæ esse necessarium.

4<sup>o</sup> Requiritur ut defunctus in statu gratiæ decesserit: *hoc patet*. Cajetanus et quidam cum ipso docuerunt indulgentiam iis duntaxat prodesse defunctis qui, dum viverent, meruerunt ut ipsis applicari posset, claves Ecclesiæ honorando, indulgentias defunctis applicando, alias pro seipsis lucrando et aliter justitiæ Dei satisfacere conando. Sententia ejus communiter rejicitur, licet plerique dicant indulgentias plus minusve prodesse defunctis, prout hi actibus suis meruerunt illas sibi applicatum iri. Hinc quanta sollicitudinis causa, sive erga nosmetipsos, sive erga defunctos!

## ARTICULUS SEPTIMUS.

### DE CONDITIONIBUS AD LUCRANDAS INDULGENTIAS REQUISITIS.

1<sup>o</sup> Indulgentia est actus jurisdictionis et absolutionis erga vivos: qui ergo non sunt membra Ecclesiæ, eam lucrari non possunt.

2<sup>o</sup> Cum indulgentia sit remissio pœnæ temporalis, supponit statum gratiæ et remissionem culpæ in eo qui eam lucrari intendit. Non tamen necesse est ut opera præscripta in statu gratiæ impleantur, modo adsit gratia sanctificans eo instanti quo ultimum opus perficitur; nam in eo momento indulgentia applicatur.

Peccatum veniale non impedit quin indulgentia peccatis remissis respondens applicari possit: verum tunc non est plenaria in sua applicatione, siquidem pœna peccato veniali adhuc exstanti debita non remittitur.

3<sup>o</sup> Requiritur intentio positiva saltem virtualis indulgentiam lucrandi: intentio virtualis ea dicitur quæ fuit actualis et in serie actionum adhuc perseverare censetur, quamvis agens de illa non cogitet. Nisi hujusmodi saltem intentio existeret, dici non posset hominem indulgentiam lucrari velle: attamen repugnat illum lucrari indulgentiam quam non intendit: ergo. Communiter docetur hanc intentionem per diem integrum perseverare, nisi retractetur: laudabilis est igitur et utilissima praxis piarum animarum quæ mane semper innovant propositum omnes lucrandi indulgentias bonis operibus hac die ab ipsis faciendis annexas.

4<sup>o</sup> Cuncta opera præscripta fideliter impleri debent; nam præcipue in hac materia valet axioma: *Verba tantum valent quantum sonant.*

Quædam opera omnibus indulgentiis plenariis ordinariè sunt communia, videlicet confessio, communio et preces juxta intentionem concedentis.

1<sup>o</sup> *Confessio.* Nisi præscriberetur, stricte necessaria non esset, nequidem pro iis qui alicujus peccati mortalis sunt conscii; nam per contritionem perfectam justificationem obtinere possent.

At quando habetur in bullis, ut fere semper, *rite contritis et confessis*, certum est necessariam esse confessionem sacramentalem iis qui peccato mortali inquinantur, quantumvis sint contriti: ita respondit sacra Congregatio Indulgentiarum, die 19 septembris, anno 1729.

Ab hac obligatione fere omnes theologi eximebant eos



qui tantum habebant venialia : verum eadem Congregatio pronuntiavit, die 19 maii 1759, illos pariter ad confessionem obligari. Clemens XIII hoc decretum approbavit, publicari et vim legis habere voluit.

Sed postea supplicationibus multarum communitatum virorum ac mulierum, parochorum et episcoporum cedens, rigorem hujus decreti temperavit per indultum diei 9 septembris 1763, quo statuit ut omnes qui singulis hebdomadis confiteri solent, indulgentias plenarias occurrentes sine nova confessione lucrari possent, dummodo conscientia eorum nullo peccato mortali gravaretur. Hæc dispositio adhuc subsistit.

Dicta Indulgentiarum Congregatio aliud edidit decretum, a Pio VII die 12 junii 1822 approbatum, quo permisit, in gratiam eorum qui singulis hebdomadis non solent confiteri, ut confessio ad lucrandam indulgentiam in die festo necessaria, octo dies ante festum fieri posset.

Vi indulti reverendissimo episcopo nostro die 3 octobris 1825 concessi, ad quinquennium duraturi, qui solent confiteri bis in mense, eodem privilegio gaudent ac ii qui singulis hebdomadis confitentur.

Petitur an, in frequentibus istiusmodi confessionibus, semper concedenda sit absolutio sacramentalis, ut indulgentia obtineri possit ?

R. Olim docui id necessarium non esse, et adhuc non video quo fundamento hæc necessitas innitatur : sed quoniam viri docti arbitrantur summum Pontificem præscribere, nomine confessionis, ipsum Pœnitentiæ sacramentum, tutius est absolutionem impertire, curando, si opus sit, ut quædam præterita declarentur peccata.

2º *Communio*. Quandoque plenariam indulgentiam lucrari licet absque communione, v. g. in articulo mortis, ubi sacrum viaticum administrari non potest, in via sanctæ Crucis, etc. Verum ordinarie præscribitur communio quæ ipso die festi fieri debet : attamen decretum congregationis Indulgentiarum diei 12 junii 1822, a Pio VII approbatum, eam facere permittit vigilia festi.

3º *Preces*. Ordinarie dicitur in bullis, *Qui pie oraverint*;

sæpe exprimitur finis propter quem orandum sit, v. g. concordia principum Christianorum, exaltatio sanctæ matris Ecclesiæ, extirpatio schismatis ac hæreseon, conservatio summi Pontificis. Si finis non exprimatur, sufficit ut secundum intentionem concedentis indulgentiam oretur.

Non determinantur orationes faciendæ, et sufficit quinques recitare *Pater* et *Ave*, aut quid æquivalens, v. g. decanam Rosarii, litanias sanctissimi Nominis Jesu, beatissimæ Mariæ Lauretanæ, etc.

Oratio mentalis non sufficeret, quia per orationem simpliciter intelligitur oratio vocalis, eo modo articulata ut quis se audire possit.

Tempus ad recitandas hujusmodi preces determinatum extenditur a primis vesperis ad ultimum crepusculum diei festi, et in diebus ferialibus, a media nocte ad mediam noctem sequentem.

Ex declaratione Benedicti XIV, Inst. 53, n. 7, et Encyclica *Inter præteritos*, diei 3 decembris 1749, § 53, opus aliunde præscriptum inservire non potest ad lucranda indulgentia : unde qui recitaret preces ad quas ex voto vel ex præcepto Ecclesiæ aut ex mandato confessarii tenetur, conditionem orandi ad lucranda indulgentia a summo Pontifice præscriptam non impleret.

Multa sunt alia scitu necessaria circa indulgentias plenarias et partiales, circa confraternitates et Jubilæum : pro iis ediscendis remittimus ad tractatum nostrum Gallicum cui titulus : *Traité dogmatique et pratique des Indulgences, des confréries et du Jubilé, à l'usage des ecclésiastiques qui travaillent dans le saint ministère*, 1 volume in-12.

# TRACTATUS

## DE EXTREMA-UNCTIONE.

---

Extrema-Unctio, sic dicta quia infirmis in extremo vitæ periculo constitutis administratur, vel potius quia ultima est unctio sancta homini destinata, aliis etiam donatur nominibus; v. g. dicitur *unctio infirmorum*, *sacramentum exeuntium*, et apud Græcos, *oleum sanctum*, *oleum cum oratione*, *oleum benedictionis*. Arcudius, l. 5, cap. 1.

Definiri potest: *Sacramentum novæ Legis quo, per olei benedicti unctionem et sacerdotis orationem, Christiano periculose ægrotanti animæ et etiam corporis, si expediat, sanitas restituitur*. Veritas hujus definitionis ex dicendis patebit.

Præsentem dividemus Tractatum in octo capita. In 1º de existentia, in 2º de materia, in 3º de forma, in 4º de ministro, in 5º de effectibus, in 6º de necessitate, in 7º de subjecto, et in 8º de ritibus hujus sacramenti disseremus.

---

### CAPUT PRIMUM.

#### DE EXISTENTIA EXTREMÆ-UNCTIONIS SACRAMENTI.

Juxta Bellarminum et quosdam alios, Valdenses, Wiclefistæ et Hussitæ sacramentum Extremæ-Unctionis negaverunt: verum *Bossuet, Histoire des Variations*, l. 11, cap. 108, *Juenin* aliique plures eos ab hoc errore vindicant. Lutherani vero et Calvinistæ illud suggillantes procul rejiciunt. Contra quos sit

## PROPOSITIO.

*Extrema-Uncio est sacramentum novæ Legis proprie dictum.*

*Prob.* Illa propositio est de fide catholica, et insuper probatur Scriptura sacra, traditione et præscriptione.

1° *Est de fide catholica.* Fuse enim exponitur in Decreto ad Armenos, et definitur in concilio Trid. sess. 7, can. 1, de Sacramentis in genere, et sess. 14, de Extrema-Uncione, can. 1, sic se habente : « Si quis dixerit Extremam-Uncionem non esse vere et proprie sacramentum a Christo Domino nostro institutum, et a B. Jacobo Apostolo promulgatum, sed ritum tantum acceptum a Patribus, aut figmentum humanum : anathema sit. » Ergo 1°.

2° *Prob. Scriptura sacra.* Epist. B. Jacobi, v, 14 et 15 : *Infirmatur quis in vobis ? inducat presbyteros Ecclesiæ, et orent super eum, ungentes eum oleo in nomine Domini, et oratio fidei salvabit infirmum, et alleviabit eum Dominus, et si in peccatis sit, remittentur ei.* Unde sic. In Extrema-Uncione reperitur, ex illo textu, 1° signum sensibile, ut patet, 2° promissio gratiæ, cum peccata remitti debeant, et 3° institutio Christi, quia solus Christus gratiam huic signo annectere potuit. Ergo 2°.

3° *Traditione.* Origenes, Hom. 2 in Levitic. n. 4 : *Est adhuc et septima, licet dura et laboriosa, per pœnitentiam remissio peccatorum* (est sacramentum Pœnitentiæ cujus characteres describit); addit : *In quo impletur et illud quod Apostolus dicit : Si quis autem infirmatur, etc.* Extremam-Uncionem comparat Pœnitentiæ et velut supplementum ejus habet : porro æstimat ibidem Pœnitentiam esse sacramentum : ergo.

S. Chrysost. de Sacerdotio, l. 3, n. 6 : « Neque sacerdotes tantum cum nos regenerant, sed etiam post regenerationem admissa peccata condonare possunt; nam infirmatur, inquit, quis in vobis, advocet presbyteros Ecclesiæ, etc. »



Innocentius I, mortuus anno 417, in Epistola ad Decentium episcopum, ab illo interrogatus de quibusdam dubiis circa hoc sacramentum, respondet, inter alia, hoc sacramentum negandum esse pœnitentibus publicis, quibus cætera sacramenta negantur; « Nam, inquit, pœnitentibus istud infundit non potest, quia genus est sacramenti; nam quibus reliqua sacramenta negantur, » quomodo unum genus putatur posse concedi? » *Labbe*, t. 2. Ergo 3º.

4º *Præscriptione*. Hoc enim sacramentum communis est usus, non solum in ecclesia Latina, sed in cunctis ecclesiis Orientalibus; in cunctis retro sæculis reperitur existens, nec ulla assignari possunt introductionis ejus vestigia; merito applicatur regula S. Aug. « Quod universa tenet » Ecclesia, nec conciliis fuit institutum, sed semper retentum est, non nisi ab Apostolis traditum rectissime » creditur. » Ergo 4º, etc. aliunde, etc. Ergo.

*Dices*. Antiqui auctores vitam et ultimos actus plurimorum virorum illustrium scribentes, de administratione hujus sacramenti omnino silent, v. g. Eusebius, in Vita Constantini Magni; S. Athanasius, in Vita S. Antonii; Sulpitius Severus, in Vita S. Martini; Possidius, in Vita S. Aug. etc. Ergo illud sacramentum tunc non existebat.

*R. Nego consequ.* Nam 1º multi vitam aliorum pietate conspicuorum enarrantes, de susceptione sancti Viatici nihil dicunt; et tamen incredibile est eos divinum illud sacramentum non suscepisse, cum concil. Nicæn. can. 13, dixisset: « De iis qui ad exitum veniunt, etiamnum lex » antiqua regularisque servabitur; ita ut si quis egredietur e corpore, ultimo et necessario viatico minime privetur; » *Labbe*, t. 2. 2º Indubium est S. Bernardum Extremam-Uncionem, cujus utilitatem in Vita S. Malachie plurimum commendat, ante mortem quam prævidebat suscepisse: atqui tamen nullibi legitur eum sacramentum istud suscepisse: ergo ex silentio auctorum nobis objectorum nihil concludi potest.

Constat, ex dictis in tractatu de Sacramentis in genere, cap. 4, Extremam-Uncionem a Christo fuisse institutam;

sed quo tempore, an ante passionem, an post resurrectionem ejus, ignoramus, nec quærendum esse judicamus.

---

## CAPUT SECUNDUM.

### DE MATERIA EXTREMÆ-UNCTIONIS.

Duplex est materia hujus sacramenti, sicut et Baptismi ac Confirmationis.

### ARTICULUS PRIMUS.

#### DE MATERIA REMOTA.

1° Materia remota hujus sacramenti est oleum olivarum, ut constat 1° textu citato B. Jacobi, *ungentes eum oleo*; oleum enim simpliciter dictum, est oleum olivarum: ubi alia olea exprimenda sunt, aliquid communiter additur, et dicitur, v. g. oleum nucum, oleum amygdalarum, etc. 2° ex decreto ad Armenos, in quo legitur de Extrema-Uctione: *cujus materia est oleum olivarum*; 3° ex tota traditione et unanimi. doctorum ac Pontificum consensu.

2° Oleum debet esse purum, id est, sine ulla admixtione alterius liquoris, saltem ex præcepto ecclesiastico, ut ait Bened. XIV, de Synodo diœces. l. 8, cap. 1, n. 4. Contendit tamen Suarez contra institutionem Christi non esse alium liquorem huic admiscere, et balsamum oleo infirmorum aliquando admixtum fuisse: hanc opinionem communiter rejiciunt doctores, sed fatentur validum fore sacramentum si, contra communem et perpetuam Ecclesiæ praxim, aliquid oleo infirmorum misceatur balsami, modo quantitas tanta non sit ut species olei corrumpatur et fiat unguentum.

3° Requiritur ut oleum ab episcopo sit benedictum:

patet ex Decreto Eugenii IV ad Armenos, ex concil. Trid. sess. 14, cap. 1, de Extr.-Unct. dicente *materiam* (Extremæ-Unionis) *esse oleum ab episcopo benedictum, ex rituali Romano, etc.*

4<sup>o</sup> Hæc benedictio in ordine ad sacramentum Extremæ-Unionis adeo necessaria est, juxta communiorem sententiam, ut sacramentum cum oleo profano, vel cum oleo catechumenorum, vel etiam cum sancto chrismate administratum, nullum esset. Quia tamen non pauci arbitrantur sanctum chrisma vel oleum catechumenorum sufficientem esse materiam, docet Ligorio, l. 6, n. 109, in necessitate Extremam-Unionem cum chrismate vel oleo catechumenorum ministrari posse sub conditione, et deinde iterandum sacramentum sub alia conditione, si, habito oleo infirmorum, ægrotus adhuc vivat. Propter eandem rationem, qui Extremam-Unionem administraturus, vasculum chrismatis vel olei catechumenorum pro vasculo olei infirmorum incautus adhibuisset, sacramentum sub conditione iterare deberet.

Unde oleorum sacrorum distributor qui eâ, etiam absque ulla culpa, promiscuisset, parochos sic deceptos monere teneretur sub peccato mortali, et alia obtinenda essent olea non dubia.

5<sup>o</sup> Benedictio ad sanctificandum oleum infirmorum necessaria, non adeo propria est episcopis, ut ex delegatione expressa vel tacita summi Pontificis simplicibus presbyteris delegari non possit : nam « In ecclesia Orientali, » inquit Bened. XIV, de Synodo diœces. l. 8, cap. 1, n. 4, mos viget, a mille et amplius annis in ea receptus, ut ipsimet presbyteri, cum se accingunt ad infirmum inungendum, oleum in ea sacramentali unctione adhibendum, benedicant. » Mos iste apud alias Orientales ecclesias, v. g. apud Armenos existit, et ecclesia Romana illum pluries ratum habuit, ut videre est apud Bened. XIV, in loco citato, et in const. *Etsi pastoralis*, § 4, ubi agens de Italo-Græcis, ait : « Non sunt cogendi presbyteri Græci » olea sancta, præter chrisma, ab episcopis Latinis diœcesanis accipere, cum hujusmodi olea ab eis in ipsa oleo-

» rum et sacramentorum exhibitione, ex veteri ritu,  
» conficiantur seu benedicantur. » Bullar. t. I.

7° Hæc autem facultas in ecclesia Latina simplicibus presbyteris nunquam conceditur, sed precul dubio concedi posset, sicut et apud Græcos : verum Pius VI eam vicariis generalibus diœceses episcopis destitutas administrantibus anno 1791 denegavit.

8° Oleum infirmorum, sicut chrisma, singulis annis renovandum est et quidem sub gravi, et feria V in Cœna Domini ab episcopo diœcesano, vel sede vacante, a viciniore episcopo benedici debet. Valet tamen sacramentum cum veteri oleo administratum ; imo eo uti licitum est si novum oleum nondum haberi potuerit.

9° Vetera olea, habitis novis, comburuntur et cineres in sacrarium mittuntur ; vel si copia sit major, consumi potest in lampade coram venerabili Sacramento ardente ; Dens, t. 7.

10° Si oleum in sufficienti non videatur quantitate ut per annum non deficiat, oleum olivarum commune cum oleo benedicto commiscere licet, juxta rituale Romanum et omnes theologos, sed in minore quantitate ; alioquin prius oleum desineret esse benedictum, quia moraliter idem jam dici non posset. Sed hæc adjunctio pluribus vicibus iterari potest, » ita ut oleum adjunctum consideratum separatim, et in unaquaque admixtione, sit in » minori quantitate quam oleum benedictum, quamvis, » consideratis omnibus additionibus simul, fiat quantitas » major non benedicti ; quemadmodum resolutum est a » S. Congreg. concilii, die 23 septembris 1682. » Sunt verba Pii VI respondentis, die 1 aprilis 1794, ad plurima quæsitâ a presbyteris Gallicanis sibi proposita.

11° Vigilandum est ut oleum profanum ita cum sancto commisceatur, ut nulla pars ejus, sine aliqua parte olei benedicti, sumi possit ; quia probabilius manet commune, et non fit benedictum per commixtionem cum oleo benedicto, quidquid in contrarium dicant *Collet, Billuart* aliique plures.



## ARTICULUS SECUNDUS.

## DE MATERIA PROXIMA EXTREMÆ-UNCTIONIS.

1° Materia proxima est applicatio materiæ remotæ, ac proinde in Extrema-Uncione est unctio cum oleo infirmorum ab episcopo benedicto : patet ex verbis B. Jacobi, *ungentes eum*, et ex perpetua ac universali traditione.

2° Unctio fieri debet cum pollice dextro, et in casibus extraordinariis, fieri potest cum virgula in oleo sancto intincta : sic expresse rituale Cenomanense, communi theologorum sententia innixum. Ea adhibenda est olei quantitas quæ ad unctionem proprie dictam sufficiat.

3° Eugenius IV, in Decreto ad Armenos, septem numerat unctiones ad sacramenti hujus administrationem faciendas, videlicet : « Ungendus est ( infirmus ) in oculis propter visum, in auribus propter auditum, in naribus propter odoratum, in ore propter gustum vel locutionem, in manibus propter tactum, in pedibus propter gressum, in renibus propter libidinem ibidem vigentem. » Idem habet rituale Romanum, quod tamen addit : « Sed renum unctio in mulieribus, honestatis gratia, semper omittitur, atque etiam in viris, quando infirmus commode moveri non potest. » Et alia corporis pars pro renibus ungi non debet, juxta ritualis Romani dispositionem : attamen rituale Cenomanense præscribit inungi, ante manus et pedes, pectus in viris, et imum gutturis in mulieribus.

4° Constat unctiones pedum et renum, aut pectoris vel colli, ad essentiam sacramenti non pertinere : *a fortiori* multæ aliæ unctiones apud Græcos usitatæ, v. g. in fronte, in mento, in genis, in cruribus, in genibus, etc. essentielles non sunt, siquidem sæpe variantur vel prorsus omittuntur, sine sacramenti detrimento.

5° Certum est necessarium non esse, necessitate sacramenti, ut unctio in duplici organo ejusdem sensus fiat, scilicet in duobus oculis, in duabus auribus, in utraque

manu vel in utroque pede : unum singulorum sensuum organum ungere sufficit, ut valeat sacramentum.

6° Multi theologi, inter quos Sylvius, Estius, Natalis Alexander, *Juenin, Drouin, Tournely*, Theologia Lug. Rothom. etc. æstimant unicam unctionem in quocumque sensu, et præsertim capitis, sub forma universali, inferius referenda, ad essentiam sacramenti sufficere ; 1° quia verba B. Jacobi verificantur ; 2° quia numerus unctionum nunquam fuit uniformis, sed variavit diversis temporibus, tum in Oriente, tum in Occidente, ut erudite ostendit Bened. XIV, de Synodo diœces. l. 8, cap. 3, n. 3 ; 3° quia plurima ritualia, et inprimis Cenomanense, permittunt ut, in casu necessitatis, unica fiat unctio : quam disciplinam Bened. XIV referens, ibid. n. 4, minime ut reprehensibilem arguit. Ergo.

Multi vero alii, cum S. Th. ut Layman, Sotus, Suarez, Bellarminus, Concina, Bonacina, *Billuart*, Ligorio, etc. docent unctionem quinque sensuum essentialem esse, idque constare dicunt ex perpetuo usu Ecclesiæ et communi doctorum consensu.

Posterior hæc sententia tutior est sola in praxi sequenda, nisi periculum mortis urgeat ; quo in casu unicam adhibere licet unctionem in sensu magis obvio, alios sensus in forma modo generali exprimendo, ut indicat rituale : melius est quippe dare sacramentum dubium quam nullum. Si vero infirmus supervivat, aliæ splendæ erunt unctiones sub conditione tacita.

7° Ordo inter unctiones non est essentialis, juxta omnes : hinc qui ignoranter vel per inadvertentiam unum sensum ante alium unxisset, unctionem semel factam iterare non deberet.

8° Jure ecclesiastico omnes unctiones in rituali propriæ diœcesis præscriptas, juxta ordinem determinatum, unusquisque sacerdos facere debet, nec a peccato gravi excusari posset si voluntarie ab eo ordine recederet, vel aliquam unctionem extra necessitatem omitteret.

9° Si quis esset mutilatus, ungenda esset pars membro amputato vicinior, cum forma sensui cujus membrum

erat organum correspondente: sic rituale Romanum et omnes theologi. Similiter ungendi essent oculi cæci a nativitate, sub forma consueta; quia, licet per visum peccare non potuerit, non repugnat eum per desideria ad visum spectantia peccasse.

---

## CAPUT TERTIUM.

### DE FORMA SACRAMENTI EXTREMÆ-UNCTIONIS.

1º Forma hujus sacramenti in ecclesia Latina a multis sæculis usitata, in Decreto ad Armenos et in concil. Trid. sess. 14, de Ext.-Unct. cap. 1, tradita, est sequens: *Per istam sanctam unctionem et suam piissimam misericordiam indulgeat tibi Dominus quidquid peccasti per visum; vel ut in rituali Romano et in ritualibus nostris habetur, quidquid per visum deliquisti.*

2º Eadem repetitur forma ad unamquamque unctionem, solummodo expressionem sensus mutando, et dicendo, *per odoratum, per gustum et locutionem, per tactum, per gressum vel per incessum*, ut apud nos habetur; *per ardorem libidinis et alia prava desideria*, pro unctione pectoris in viris et colli in mulieribus; *per lumborum delectationem*, ad unctionem renum, ubi hæc unctio pro viris est in usu.

3º Si, ob necessitatem, unica fiat unctio, exprimitur sensus cujus organum inungitur, et alii adduntur generice, et melius specificè, ut multi volunt, arbitantes essentialè esse ut omnes sensus exprimantur, hancque adhibendam esse formam contendunt: *Per istam sanctam unctionem et suam piissimam misericordiam indulgeat tibi Dominus quidquid deliquisti per visum, auditum, gustum, odoratum et tactum.* Monent expedire verbum *deliquisti* præmittere, quia si ægrotans ante prolationem illius moreretur, certo nullum esset sacramentum, et dubium fieret

ad summum, si mors ante expressionem aliorum sensuum consummaretur. Ligorio, l. 6, n. 710.

Attamen in rituali Cenomanensi sic generalis ista terminatur forma : *quidquid per visum ( vel auditum, etc. ) et alios sensus deliquisti.*

4° Verba, *per istam unctionem indulgeat tibi Dominus quidquid deliquisti*, aut alia æquivalentia, sunt essentialia ; nullum enim omitti potest quin sensus substantialiter mutetur. Dubium est, ex modo dictis, an expressio uniuscujusque sensus sit essentialis.

Cætera verba non habentur ut essentialia.

5° Una tantum est forma pro duplici unctione oculorum, aurium, manuum et pedum : cavendum est ne absolvatur priusquam secunda facta fuerit unctio ; quæ a membro dextro semper incipienda est, in sinistro statim continuanda, et unica reputatur.

6° Forma apud Græcos usitata longa est oratio, cujus sequentia tantum verba Arcudius, l. 5, cap. 5, æstimat necessaria : *Pater sancte, medice animorum et corporum, sana hunc servum tuum a morbo corporis et animæ quo detinetur.*

7° Disputatur inter theologos an forma indicativa ad validitatem sacramenti sufficeret.

*Certum est* 1° Christum formam hujus sacramenti explicite non instituisse, cum diversa sit apud Græcos et Latinos, et aliunde constet sacramentum Extremæ-Uctionis in utraque ecclesia validum esse.

*Certum est* 2° formam deprecatoriam solam in usu esse tum in Orientali, tum in Occidentali ecclesia, *ut patet ex dictis.* Quæstio igitur est an forma indicativa absolute sufficere posset. Affirmant plurimi, ut Tannerus, Estius, Juenin, Tournely, Martène, Drouin, in argumentum sententiæ suæ innumeras exhibentes formas absolutas et non deprecatorias, in variis ecclesiis Latinis olim usurpatas, et a nemine ut insufficientes damnatas, v. g. sequentem, quæ S. Ambrosio tribuitur et Ambrosiana dicitur : *Ungo te oleo sanctificato, in nomine Patris, et Filii, et Spiritus sancti, ut more militis uncti præparatus ad certamen, æreas possis superare potestates.*



Negant autem alii multo plures et communius ; quia, ex verbis S. Jacobi, effectus sacramenti hujus tribuitur orationi, et mos forma deprecatoria utendi universalis est. Quoad citatas veteres formas, dicunt vel aliquam in eis inclusam fuisse orationem, vel saltem post verba absoluta adhibitam fuisse orationem. Bened. XIV, de Synodo diœces. l. 8, cap. 2, quæstionem exponit et non definit ; nec nos eam definire intendimus.

---

## CAPUT QUARTUM.

### DE MINISTRO EXTREMÆ-UNCTIONIS.

1° De fide est solum sacerdotem esse ministrum hujus sacramenti : sic enim traditur in Decreto ad Armenos et definitur a concil. Trid. sess. 14, de Extr.-Unct. can. 4 :  
 « Si quis dixerit presbyteros Ecclesiæ quos beatus Jacobus  
 » adducendos esse ad infirmum inungendum hortatur,  
 » non esse sacerdotes ab episcopo ordinatos, sed ætate se-  
 » niores in quavis communitate ; ob idque proprium  
 » Extremæ-Unctionis ministrum non esse solum sacerdo-  
 » tem : anathema sit. » Hæc definitio textu B. Jacobi et perpetua traditione fundatur.

2° Quilibet sacerdos, etiam excommunicatus, interdictus et degradatus, valide hoc sacramentum administrare potest, quia potestas illud administrandi, non a jurisdictione, sed a solo caractere pendet. *Ita omnes.*

3° Solus autem parochus vel episcopus, aut a parochus vel ab episcopo delegatus, illud licite administrare potest, excepto casu necessitatis. *Sic omnes.* Quicumque ergo sacerdos, nec pastor, nec legitimè delegatus, Extremam-Unctionem administraret, graviter peccaret, et religiosus excommunicationem majorem incurreret, ut in Clement. l. 5, tit. 7, cap. 1, statuitur.

4° In gravi necessitate autem consensus sive parochi,

sive episcopi præsumitur, et omnis sacerdos etiam regularis sacramentum istud licite administrare potest, et ex charitate debet. *Ita generaliter theologi*, qui inferunt omnes sacerdotes ritum sacramentum Extremæ-Uctionis administrandi percallere teneri.

5° Idem sacerdos debet unctionem facere et verba formæ proferre, nec valeret sacramentum si unus ungeret et alter formam pronuntiaret.

6° Verum, cum singulæ unctiones propriam habeant formam sibi correspondentem, et partem efficiant integram, valeret sacramentum si tot essent sacerdotes quot unctiones faciendæ, et unusquisque suam unctionem faciendo, verba correspondentia pronuntiaret, observando duplicia ejusdem sensus organa sub unica forma ungenda esse. *Ita omnes.*

7° Unde Græci etiam nunc septem, vel saltem tres, ubi septem haberi non possunt, advocare solent sacerdotes ad ungendum infirmum. Doctissimus *Martène*, de Antiq. Eccl. ritib. l. 1, cap. 7, art. 3; et Bened. XIV, de Synodo diœces. l. 8, cap. 4, diserte ostendunt hunc morem in Occidentali ecclesia diu viguisse, et Valdenses hoc sacramentum reprobasse *propter sacerdotes ibi necessarios*, qui pro sua opera non exiguam exposcebant mercedem: unde fiebat ut pauperes sine Extrema-Uctione decederent.

8° Omnes tamen fatentur unicum sacerdotem tunc temporis sacramentum istud, etiam coram aliis sacerdotibus, valide administrare potuisse, sicut et apud Græcos illud valide administraret; ideoque verba beati Jacobi, *inducat presbyteros*, non eo intelligenda esse sensu quod plures necessarii sint, sed quod ad sacerdotes, non vero ad alios recurrendum esset; quemadmodum Christus dixit leprosis, apud Luc. xvii, 14, *Ite, ostendite vos sacerdotibus*, quamvis sufficeret ut uni tantum sacerdoti se ostenderent.

9° Nunc vero apud nos graviter peccaretur, si plures ad conferendam Extremam-Uctionem more veteri concurrerent, propter contrariam exstantem disciplinam, ni

sacerdos, post inceptas unctiones deficeret, easque perficere non posset : tunc alter sacerdos præsens illas continuaret, jam factas non repetens; si notabile temporis intervallum effluxisset, v. g. quadrans, omnes incipiendæ essent, quia unio moralis non existeret. Sic Ligorio et plures apud ipsum. l. 6, n. 724.

10° Parochi et vices eorum gerentes mortaliter peccant, si petentem inungere negligant, vel cum probabili periculo ne sine unctione moriatur differant, nisi aliqua legitima causa eos excuset; quia in re gravi non præstant id ad quod ex iustitia obligantur.

Alii sacerdotes, parochi et vicariis deficientibus aut nolentibus, ad idem conferendum sacramentum ex charitate tenentur, sub gravi vel sub levi, juxta necessitatem ægroti. Ligorio, l. 6, n. 729; et Ferraris, v° *Ext.-Unct.* n. 42.

Tempore pestis, succurrendum est ægroto per sacramenti Extremæ-Unionis administrationem, etiam cum periculo morbum contrahendi, si in gravi sit necessitate, præsertim si aliud suscipere non potuerit sacramentum.

## CAPUT QUINTUM.

### DE EXTREMÆ-UNCTIONIS EFFECTIBUS.

*Effectus hujus sacramenti est mentis sanatio, quantum expedit, ipsius etiam corporis, inquit concil. Florent. in Decreto ad Armenos.*

Concil. Trid. sic habet, sess. 14, de Extr.-Unct. can. 2 :  
 « Si quis dixerit sacram infirmorum unctionem non con-  
 » ferre gratiam, nec remittere peccata, nec alleviare infir-  
 » mos; sed jam cessasse, quasi olim tantum fuerit gratia  
 » curationum : anathema sit. »

Unde sacramenti hujus quatuor sunt effectus, scilicet, gratia sanctificans, animam sanans, peccatorum remissio,

reliquiarum peccatorum abstersio et corporis allevatio.

1° *Gratia sanctificans*. Probatum est enim Extremam-Uctionem esse novæ Legis sacramentum : ergo gratiam sanctificantem producit et quidem ex opere operato, idque de fide esse constat tum ex tractatu de Sacramentis in genere, tum ex canone concil. Trid. supra citati.

Hæc gratia primario sanat animam, ut docet concil. Florent. ac proinde non est mortuorum, sed vivorum, quia mortuus non sanatur : est igitur per se augmentatio gratiæ sanctificantis, dans jus ad gratias speciales in tentationibus exitum a præsentī vita comitantibus necessarias.

2° *Peccatorum remissio*. Hoc de fide est, ut patet ex supra dictis, ex verbis beati Jacobi, *Et si in peccatis sit, remittentur ei*, et ex traditione universali. Per peccata autem intelliguntur 1° venialia quæ directe per sanationem animæ remittuntur, et 2° mortalia quæ in homine sufficienter attrito per accidens remittuntur. Conclusio hæc deducitur 1° ex verbis Apostoli quæ, cum generalia sint, tam mortalia quam venialia complectuntur peccata; 2° ex verbis concil. Trid. supra relatis; 3° ex consensu omnium doctorum; 4° ex verbis formæ : *Indulgeat tibi Dominus quidquid per.... deliquisti*.

Dixi *per accidens*, quia cum sacramentum istud primario institutum non fuerit ad peccata mortalia delenda, sicut Baptismus et Pœnitentia, accidentaliter tantum ea remittit, si nempe infirmus in eis sit, sive per oblivionem, sive quia sacramentum Pœnitentiæ suscipere non potest, sive quia invalide fuit absolutus.

3° *Reliquiarum peccatorum abstersio*, quod sic exprimit concil. Trid. sess. 14, de Extr.-Unct. cap. 2 : « Ac peccati » reliquias abstergit, et ægroti animam alleviat et confirmat, magnam in eo divinæ misericordiæ fiduciam » excitando, qua infirmus sublevatus, et morbi incommoda ac labores levius fert, et tentationibus dæmonis » calcaneo insidiantis facilius resistit. » Per reliquias peccatorum, intelliguntur torpor animi ad cœlestia, horror mortis, timor ob incertitudinem salutis, pronitas ad ma-



lum, pusillanimitas, mentis dejectio, etc. Gratia sacramenti hæc radicitus non tollit, sed per auxilia supernaturalia plus minusve abundantia, secundum suscipientis dispositiones, dat robur contra illa, et efficit ut ægrotus ex ultimis pugnis victor evadat.

4<sup>o</sup> *Corporis allevatio*. Hæc assertio fulcitur 1<sup>o</sup> verbis beati Jacobi, *Et alleviabit eum Dominus*, quæ, cum ad infirmum referantur, de allevatione corporali simul et spirituali intelliguntur; 2<sup>o</sup> verbis Decreti ad Armenos supra relatis; 3<sup>o</sup> sequentibus verbis concil. Trid. cap. 2: « Et » sanitatem corporis interdum, ubi saluti animæ expedierit, consequitur. »

Conditio, *ubi expedierit*, in verbis beati Jacobi et concilii Florent. necessario includitur; nam Extremæ-Unionis sacramentum ad spiritualem hominis utilitatem fuit institutum: porro sæpe saluti hominis non utile est ut amplius vivat vel sanitatem recuperet: ergo. Imo communius docent theologi hanc corporis sanitatem, etiam saluti utilem futuram, non infallibiliter per illud sacramentum produci, sed tantum juxta divinæ Providentiæ ordinationem.

## CAPUT SEXTUM.

### DE EXTREMÆ-UNCTIONIS NECESSITATE.

*Certum est* 1<sup>o</sup> illam necessariam non esse necessitate mediæ; homo enim potest esse justus absque illo sacramento; et, si in justitia decedat, salvus erit. Ergo.

*Certum est* 2<sup>o</sup> apud omnes, sacramentum hoc contemnere, aut cum aliorum offensione et scandalo negligere vel prætermittere, peccatum esse mortale, propter gravem irreverentiam rei sacræ illatam, aut propter scandalum: nullus ergo Christianus tantum Dei beneficium tuta conscientia negligere potest, et multo minus sibi oblatum respuere.

Disputant theologi an sacramentum istud sit de præcepto, sive divino, sive ecclesiastico : Suarez, Estius, Sylvius, Cabassut, Sainte-Beuve, Billuart, Ligorio, etc. negant, contenduntque verba Apostoli de consilio intelligenda esse, nisi, ut ait Sainte-Beuve, ægrotus gravibus prematur tentationibus, ad quassuperandas novo indigeat hujus sacramenti munimine. Alii vero multi docent grave existere præceptum divinum et ecclesiasticum hoc suscipiendi sacramentum.

Præcepti divini existentiam probant 1° ex verbis S. Jacobi, *inducat presbyteros*, quæ præceptum et non merum consilium exprimere videntur; 2° ex concilio Trid. quod capite 4, de Extr.-Unct. ait : « Quare nulla ratione audiendi sunt qui, contra tam apertam et dilucidam Apostoli Jacobi sententiam, docent hanc unctionem vel figmentum humanum, vel ritum a Patribus acceptum, nec mandatum Dei, nec promissionem gratiæ habentem. » 3° Ratione; quia homo sacramentum hoc negligens, magna privatur gratia et auxiliis ei annexis : ergo contra charitatem sibi debitam graviter peccat. Patroni alterius sententiæ fatentur hanc posteriorem omnino suadendam esse : nemo igitur Extr.-Unct. tuto negligere potest.

Existentia præcepti ecclesiastici infertur 1° ex concil. Coloniensi I, anno 1536 celebrato, decernente privandos esse sepultura ecclesiastica qui hoc sacramentum contempserint; 2° ex communi persuasione fidelium et pastorum, atque ex Ritualium dispositione ubi præceptum supponi videtur.

Curandum igitur, quantum fieri potest, ut ægroti tempore opportuno ultima suscipiant sacramenta.

*Quæritur* 1° an et quando sacramentum Extremæ-Unionis iterari possit?

*R.* Nonnulli theologi, in undecimo et duodecimo sæculo, docuerunt, referente Bened. XIV, de Synodo diœces. l. 8, cap. 8, n. 3, fidelem oleo sancto semel inunctum, eodem deinceps inungi non posse; alii contra, illum in eadem infirmitate versantem, de novo inungi

posse post triginta dies; alii hoc sacramentum bis dari non posse in eodem anno; alii vero plures antiqui, ut refert *Martène*, l. 1, cap. 7, art. 2, n. 5, volebant infirmos vita periclitantes per septem dies continuos sancto oleo esse perungendos.

« Sed usus postea ab universa Ecclesia receptus, theologia communis calculo approbatus, et synodorum ac Ritualium auctoritate roboratus, obtinuit ut semel dumtaxat in eadem infirmitate Extrema-Unctio adhibeatur, » inquit Bened. XIV, ibid n. 4. Hæc regula in omnibus Ritualibus statuitur et sola sequenda est.

« Quod si infirmi, post susceptam hanc unctionem, convaluerint, iterum hujus sacramenti subsidio juvari potuerunt, cum in aliud simile vitæ discrimen inciderint. » Sic concil. Trid. sess. 14, de Extr.-Unct. cap. 3.

Extrema-Unctio igitur in eadem infirmitate *iterari non debet*, ut ait rituale Romanum, *nisi diuturna sit, ut cum infirmus convaluerit, et iterum in periculum mortis incidit.*

Non requiritur quidem ut ægrotus radicitus fuerit sanatus, sed ut tanquam convalescens habitus fuerit, atque in novum vitæ periculum inciderit: si, omnibus perpensis, dubium existat, « magis pro reiteratione inclinandum » est, eo quod hæc reiteratio conformior sit veteri Ecclesiæ consuetudini, tum quod per eam novum ipsi infirmo subsidium spirituale sperari possit. » Sic concludit Van-Espen, part. 2, tit. 8, cap. 3, n. 39; et Bened. XIV hanc conclusionem citat et approbat.

*Quæritur 2º an Extrema-Unctio iteranda esset si ægrotus eam cum malis dispositionibus suscepisset?*

*R. negative*; tunc enim effectus manet suspensus, et sublato obice, applicatur. Ita Dens, t. 7.

## CAPUT SEPTIMUM.

## DE SUBJECTO EXTREMÆ-UNCTIONIS.

Nobis dicendum est 1° de iis quibus administrari potest Extrema-Unctio; 2° de dispositionibus ad eam requisitis; 3° de iis quibus neganda est; 4° de ordine inter S. Viaticum et Extremam-Unionem, et 5° per appendicem, de sepultura ecclesiastica.

## ARTICULUS PRIMUS.

## DE IIS QUIBUS ADMINISTRARI POTEST EXTREMA-UNCTIO.

Solis baptizatis, peccati post Baptismum commissi reis, infirmis et graviter periclitantibus hoc sacramentum conferri potest.

1° *Solis baptizatis*, cum Baptismus sit janua cæterorum sacramentorum.

2° *Peccatis post Baptismum commissis reis*. Extrema quippe unctio peccatum originale remittere non posset, quia non fuit instituta ad regenerandum hominem, nec valide conferretur homini qui nullum peccatum actuale commisisset; tunc enim effectus ad quos primario destinata est, nempe sanitatem animæ, etc. obtinere non posset.

3° *Infirmis*. Mos existit quidem apud Græcos, sanos oleo sancto inungendi, et plures, ut *Juenin*, *Sainte-Bewe*, etc. volunt verum tunc administrari sacramentum: longe communius autem docent theologi invalidum fore hoc sacramentum sano ministratum, suamque sententiam probant 1° verbis beati Jacobi, *infirmatur quis in vobis*, quæ denotare videntur statum infirmitatis necessarium esse; 2° præceptis et statutis diversorum conciliorum, Extremam-Unionem infirmis adhibendam



præcipientium ; 3° dispositionibus Ritualium de solis infirmis, nunquam vero de sanis loquentium.

Quoad morem apud Græcos usitatum, dicendum est cum Bened. XIV, de Synodo diœces. l. 8, cap. 5, n. 5 et 6, vel eos existimasse hanc unctionem sanis collatam, meram esse cæremoniam et sacramentalem quamdam benedictionem, ut contendit P. Goar; vel illos graviter errasse, quod minus probabile est, siquidem in concilio Florentino de singulis ritibus suis rationem reddere coacti sunt : circa hoc punctum non fuerunt reprehensi, et tamen Eugenius IV, in Decreto ad Armenos, dicit : « Hoc » sacramentum nisi infirmo, de, cujus morte timetur, » dari non debet. » Ergo.

4° *Graviter periclitantibus.* Nonnulli docuerunt hoc sacramentum cuilibet infirmo valide et licite conferri posse, quia beatus Jacobus gravitatem periculi exigere non videtur; verum communissima sententia tenet non solum illicite, sed invalide dictum sacramentum infirmis non periclitantibus conferendum : probant 1° ex verbis Eugenii IV, superius relatis; 2° ex concil. Trid. quod, sess. 14, in præmio Extr.-Unct. ait : « Ita Extremæ-Unionis » sacramento finem vitæ tanquam firmissimo quodam » præsidio munivit » ( Deus ). Finis ergo hujus sacramenti est succurrendi infirmis periclitantibus, ac proinde aliis valide conferri non potest.

Non tamen ultimus exspectandus est vitæ exitus : certo in hoc gravis existit obligatio Extremam-Unionem administrandi ; sed valide, licite et prudenter administratur ubi verum existit periculum mortis ex præsentī infirmitate sequendæ, quamvis non proximæ ; idque probatur 1° ex verbis Decreti ad Armenos jam citatis, *de cujus morte timetur* ; 2° ex his concil. Trid. ibid. cap. 3, dicentis, « hanc unctionem infirmis adhibendam, iis vero præsertim qui in exitu vitæ constituti videantur. » Vox *præsertim*, supponit hoc sacramentum aliis infirmis in exitu vitæ nondum constitutis administrari posse ; 3° ex auctoritate Bened. XIV, qui, in const. *Ex quo primum*, diei 1 martii 1756, § 46, ait hoc sacramentum ministran-

dum esse, « solis fidelibus graviter ægrotantibus; neque » tamen expectetur, inquit, tempus illud quo æger jam » suæ mentis compos non est. »

Quapropter, quoties viaticum ministratur infirmo, Extremam-Uctionem administrare expedit, quia tunc saltem probabile adesse vitæ periculum judicatur.

## ARTICULUS SECUNDUS.

DE DISPOSITIONIBUS AD SUSCIPIENDAM EXTREMAM-UNCTIONEM  
REQUISITIS.

1° Requiritur intentio expressa, vel tacita et legitime præsumpta sacramentum istud suscipiendi, ut diximus in tractatu de Sacramentis.

2° Cum sacramentum istud ad sanandam animam primario instituatur, supponit eam esse viventem, licet infirmam: itaque, si fieri potest, confessio sacramentalis semper ei præmittenda est, aut saltem ægrotus eam habere debet attritionem quæ ad obtinendam justificationem in sacramento Pœnitentiæ necessaria est.

3° Ad uberiores sacramenti hujus fructum percipiendum, necesse est ut ægrotus 1° vividam habeat fidem et firmam salutis impetrandæ fiduciam; 2° divinæ voluntati perfecte se subjiciat; 3° vehementi desiderio ad regnum cœlestis properandi et Christo perfruendi accendatur; 4° ut peccata singulis sensibus correspondentia, dum inungitur, toto corde detestetur, suasque preces orationibus Ecclesiæ jungere studeat, de quo monendus est a sacerdote.

## ARTICULUS TERTIUS.

DE IIS QUIBUS NEGANDA EST EXTREMA-UNCTIO.

Ex superius dictis, Extrema-Unctio neganda est: 1° pueris baptizatis usum rationis nondum assecutis, quia illius sacramenti nondum sunt capaces: ministranda vero foret, non solum pueris usum rationis certo habentibus,

licet ad sacram communionem nondum fuissent admissi, sed et iis de quorum usu rationis vere dubitatur, quia pars tutior est eligenda: sic Ligorio, qui vult eos sub conditione ungendos esse: conditio autem non exprimitur. « Non denegatur (hoc sacramentum) etiam pueris, » si septimum attigerint annum, nec iis in quibus malitia supplet ætatem, etiamsi septenarii non sint. » Bened. XIV hæc ritualis Argentinensis refert verba, eaque approbat, de Synodo diœces. l. 8, cap. 6, n. 2.

2° Deneganda est perpetuo amentibus, qui scilicet rationis usu nunquam potiti sunt: non autem eis qui usum rationis habuerunt, et postea amentia aut phrenesi correpti sunt, quia rationem peccati habere possunt, et præsumitur eos ante amentiam vel phrenesim voluisse ut sacramentum illud in periculo sibi ministraretur.

3° Neganda est sanis mox decessuris, v. g. præliaturis, naufragantibus, supplicio mortis plectendis, quia non sunt infirmi: non vero negaretur graviter vulneratis in prælio, naufrago ex aquis educto et graviter periclitanti, nec seni nullum dolorem experienti, sed præ senio deficienti: vere quippe sunt infirmi.

4° Non conceditur mulieri parituræ, etiam ante primum partum, quia, licet periculum timendum sit, reipsa non existit: secus si mulier illa in labore partus judicetur periclitari; tunc enim vere est infirma et administrari debet, sicut alii quilibet infirmi, cum celeritate et cautione ex circumstantiis præscripta.

5° Neganda est homini nunc non periclitanti, sed periculosissimam subituro operationem, v. g. membri amputationem, calculi exstirpationem, nisi jam graviter infirmus esset: tunc ante operationem omnibus muniretur sacramentis.

6° Neganda est iis qui eam sibi oblatam recusarunt cum impietate, obstinatione, sufficienter ostendentes se hoc sacramentum suscipere nolle: item iis qui publice in peccato vivunt, v. g. in concubinato, in matrimonio pure civili, in boni alieni possessione, etc. et scandalum reparare nolunt.

7° Iis qui sensibus subito destituuntur Extrema-Unctio concedenda vel neganda est, juxta regulas, pro absolutione concedenda aut neganda, in tractatu de Pœnitentia statutas.

8° Probabilius est Extremam-Unionem conferri posse adulto infirmo statim post Baptismum; quia per Baptismum non omnes auferuntur peccatorum reliquiæ, ut torporem ad bonum, pronitatem ad malum aliaque similia ex peccatis actualibus provenientia. Ergo. Ita Layman, Suarez, Ligorio, n. 721, etc.

9° Non vero neganda est surdis-mutis et cæcis a natiuitate, nisi constet eos non peccasse, quia hujus sacramenti sunt capaces, et unctiones faciendæ in organis vitiatis; etsi enim homines isti per ea exterius non peccaverint, interius peccare potuerunt per potentias ad illa correspondentes.

## ARTICULUS QUARTUS.

### DE ORDINE INTER S. VIATICUM ET EXTREMAM- UNCTIONEM.

In plerasque regiones olim irrepserat abusus ut oleo sancto non lenirentur infirmi, nisi vitam jam exhalaturi essent, quia sæculo decimo tertio falsa plurimorum animos invaserat persuasio quod, Extrema-Unctione semel accepta, non liceret, etiam post restitutam sanitatem, uxores cognoscere, carnes comedere, nudis pedibus ambulare. Alii postea putarunt per Extremæ-Unionis suspensionem facultatem condendi testamentum adimi, huncque errorem reperimus damnatum in concilio Mechliniensi, anni 1607: nunc, his erroribus amotis, nihilominus fideles a sacra unctione perinde ac a morte abhorrent, persuasum habentes nihil postea sibi expectandum esse præter sepulcrum. Hinc contigit ut sacrum Viaticum ante Extremam-Unionem ministraretur.

Nullum est dubium quin Extrema-Unctio, velut sacramenti Pœnitentiæ supplementum, sacro Viatico præmissa fuerit: id scite demonstrant Saurez, *Latnoy*, *Van-Espen*, *Martène*, *Sainte-Beuve*, Bened. XIV, etc.



Non tamen deerant exempla Extremæ-Uctionis post sacrum Viaticum administratæ, ut ostendit idem *Martène*, l. 1, cap. 7, art. 2, n. 4, et posterior hæc praxis adeo invaluit, ut Catechismus concilii Trid. S. Carolus Borromæus, in suis Instructionibus, et innumera Ritualia Extremam-Uctionem post Viaticum præbendam esse decreverint; ratio est quia Eucharistia ut cibus ad confortandum in via præbetur, et ideo ut detur non est expectandum ultimum vitæ periculum: hoc vero sacramentum, scilicet Extremæ-Uctionis, est exeuntium et quasi in ultimum fuit institutum.

Quædam Ritualia nihilominus permittunt Extremam-Uctionem nunc ante viaticum conferri; rituale Ceno-manense id suadet et commendat, 1º ut fideles ab eo sacramento minus abhorreant, videntes mortem non tam frequenter, nec tam cito illius susceptionem sequi; 2º ut ægrotus, ope illius sacramenti magis emundatus, sacram Eucharistiam cum abundantiori fructu suscipiat.

Bened. XIV, de Synodo diœces. l. 8, cap. 8, n. 2, hanc permissionem non improbat, licet « in locis in quibus hic » mos obsolevit, vigetque disciplina a concilii Tridentini » catechismo præscripta, non facile permetteremus, inquit, ab hac recedi, solum ad indulgendum privatæ et » peculiari infirmi devotioni. »

Unusquisque igitur dispositionibus Ritualis diœcesis suæ stare debet.

## ARTICULUS QUINTUS.

### DE SEPULTURA ECCLESIASTICA.

In omnibus sacræ sepulturæ circumstantiis quadruplicem finem sibi proponit Ecclesia, scilicet, vivorum solatium, pietatis debitum, defunctorum honorem eorumque refrigerium ope divini officii celebrationis, bonorum operum et precum, sive propinquorum, sive cæterorum fidelium. Ideo corpora in loco sancto deponuntur.

Sepositis iis quæ officium defunctorum, cæremoniarum

ordinem et expensas pro exsequiis solvendas respiciunt, pauca dicemus de tempore et loco sepulturæ, ac de iis quibus sepultura ecclesiastica neganda est.

1<sup>o</sup> *De tempore sepulturæ.* Art. 77 Codicis civilis, prohibetur ne sepultura fiat absque licentia magistratus civilis, gallice *le maire*, scripto data, in papyro libero, et tantum viginti et quatuor horas post obitum, exceptis casibus extraordinariis, a magistratu civili determinandis, v. g. propter pestem, putredinem, etc.

Cavere debent parochi ne ad sepulturam cujusvis fidelis procedant quin licentia supradicta sibi fuerit exhibita, quamque prudenter servabunt.

Qui absque dicta licentia defunctum sepelirent aut sepelire facerent, damnari possent ad carcerem pro tempore a sex diebus usque ad duos menses, et ad mulctam a sexdecim ad quinquaginta nummos. (*Code pénal*, art. 358. )

2<sup>o</sup> *De loco sepulturæ.* Decretum diei 12 junii 1804, semper existens, multas continet dispositiones circa loca sepulturis destinata quæ vocantur cœmeteria, et stricte prohibet ne mortuorum corpora in ullis ædificiis clausis, in quæ fideles cultus sui causa coadunari solent, sepeliantur. Parochi ab ea prohibitione recedere non debent.

Non prohibetur sepultura intra capellam in cœmeterio existentem.

Ponendi sunt defuncti secundum ordinem inceptum, sine ulla distinctione, nisi aliqua obtineatur concessio juxta conditiones in decreto 12 junii 1804, art. 13, præscriptas.

Proprietarius qui habet sacellum domesticum, a civitate vel pago saltem triginta et quinque metris distans, in eo sepeliri poterit, si id testamento præscripserit, vel alio modo postulaverit. Hoc merito infertur ex articulis 1, 2 et 14 citati decreti.

Cum autem sacellum ad sepulturam ecclesiasticam non sit destinatum, necesse est ut parochus licentiam episcopi obtineat.

3<sup>o</sup> *De iis quibus sepultura ecclesiastica neganda est.* Cer-

tum est nullam nunc existere legem civilem vi cuius parochus aliusve sacerdos catholicus ad sepulturam alicujus defuncti procedere teneatur aut cogi possit : in decreto 12 junii 1804 statuitur, art. 19, quod, uno divini cultus ministro officium suum pro sepultura negante, magistratus civilis alterum ejusdem cultus ministrum ad eam sepulturam faciendam committet; sed nulla decernitur pœna : imo additur : *Dans tous les cas, il est chargé ( le maire ) de faire porter, présenter, déposer et inhumer les corps.*

Quicumque ergo ecclesiasticos honores alicui defuncto negabit, non magistratibus laicis, sed solis superioribus ecclesiasticis rationem reddere tenebitur, maxime sub regimine Chartæ diei 7 augusti 1830, ut omnes fatentur.

Cavendum tamen ne leviter denegetur sepultura ecclesiastica, quia non modica inde oriri solent incommoda. In sequentibus tantum casibus negandam esse nunc docemus.

1° Iis qui sectæ ab Ecclesia catholica separatæ per actus externos adhærebant, et nullum conversionis signum ante mortem dederunt, quales sunt Lutherani, Calvinistæ, sectatores dicti *de la petite église*. Item iis qui publice profitebantur impietatem et omnem abjecerant religionem, si morte præoccupati, nulla pœnitentiæ exhibuerint signa.

2° Iis qui certantes in duello, statim occumbunt, nec ostendere possunt se pœnitere, aut scandalum reparare nequeunt, dolorem suum saltem coram nonnullis personis manifestando.

3° Iis qui in flagranti delicto moriuntur, id est, in actu peccati, v. g. in voluntaria et mortali ebrietate, quod raro evidenter cognoscitur, vel seipsos ex desperatione occidendo; non vero si ex morbo aut phrenesi mortem sibi inferrent, aut si, posita culpabili causa, ante obitum se pœnitere sufficienter ostenderent.

4° Iis qui scienter sacramenta Ecclesiæ sibi oblata ex impietate recusarunt, aut injustitiis notis vel aliis publicis scandalis satisfacere noluerunt, v. g. usuras lege

damnatas restituendo, inimicis condonando, concubinam ejiciendo, matrimonium civile legitimando, etc.

In dubiis, pro sepultura magis quam pro ejus negatione inclinandum est : verum tunc consulendus est episcopus, si per tempus liceat, ut omnis, quantum fieri potest, præcaveatur imprudentia.

*Notandum*, parochos jus non habere apud nos impediendi ne corpora quibus honores ecclesiasticos denegant, in cœmeteriis juxta ordinem consuetum deponantur; nec polluitur cœmeterium, modo defunctus fuerit baptizatus, et non excommunicatus publice denunciatus. Si vero non sit baptizatus, conandum est ut in parte infantibus sine Baptismate decedentibus reservata sepeliatur : alioquin pollueretur cœmeterium, et nulla in eo fieri posset sepultura ecclesiastica donec, ex consensu episcopi, reconciliatum fuisset, corpore prius exhumato.

## CAPUT OCTAVUM.

### DE RITIBUS SACRAMENTI EXTREMÆ-UNCTIONIS.

Pauca in hoc capite dicemus; remittimus enim ad Rituale propriæ diœcesis, quod unusquisque percallere et apprimè sequi tenetur. Sint tamen sequentia.

1° Qui extra necessitatem hoc sacramentum ministraret sine vestibus præscriptis, nempe superpelliceo et stola, graviter peccaret : *ita omnes*; quia gravis est irreverentia erga sacramentum. Si vero urgens existeret necessitas, plures volunt sacramentum istud tunc sine dictis vestibus administrari posse, maxime si ægrotus aliud sacramentum suscipere non possit, propter magnam quam inde percepturus est utilitatem. Alii, e contra, negant, quia honor sacramenti simplicis fidelis utilitati anteponendus est; et hæc sententia probabilior mihi videtur, nisi legitima adsit dispensatio, ut in Anglia, ubi sacerdotes



catholici Extremam-Uctionem et etiam sanctum Viaticum in nosocomiis administrant catholicis, coram Protestantibus, absque superpelliceo et stola.

2° Omittere preces in Rituali præscriptas, ante et post unctiones faciendas, sine necessitate, peccatum est mortale; in necessitate, nullum est peccatum, cum Rituale dicat infirmum statim ungendum, et postea, si adhuc vivat, preces omissas continuendas esse.

3° Deferre Extremam-Uctionem ad ægrotum eamque ministrare sine lumine, non videtur mortale, sed tantum veniale. Hoc tamen cavendum est pro administratione.

4° Eam sine ministro qui respondeat conferre, non reputatur etiam mortale, et in necessitate, nullum esset peccatum. In eo casu ministerio feminæ uti non liceret. Ita Ligorio, l. 6, n. 724, et plures apud ipsum.

5° Omittere formam crucis inungendo, non reputatur peccatum mortale in se. Sic plures apud Ligorio.

6° « Minister, si est in sacris, vel ipsemet sacerdos, post  
• quamlibet unctionem, tergat loca inuncta novo globulo  
• bombycis, vel rei similis, eaque in vase mundo reponat,  
• et ad ecclesiam postea deferat, comburat, cineresque  
• projiciat in sacrarium. » Sunt verba ritualis Romani.

Juxta Rituale nostrum, globuli quibus loca inuncta terguntur, in ignem statim mittendi sunt, cum pane et aqua quæ purificandis digitis sacerdotis inservierunt.

7° Oleum sanctum domi retinere non licet, nisi forte sacerdos prævideat se noctu vocandum, et periculum esse ne serius adveniret, si ad ecclesiam ire teneretur. Ligorio, n. 730.

8° Confessarius et præsertim parochus ne arbitretur ministerium suum erga moribundum per Extremæ-Uctionis collationem esse completum; illum enim frequenter visitare debet, si possit, erudire, hortari, confortare, et denique, pro posse suo, in tanta extremitate adjuvare ut in rituali Romano atque in Rituali nostro optime explicatur.



# INDEX.

5

## TRACTATUS DE SANCTISSIMA EUCHARISTIA.

### PARS PRIMA.

	Pag.
De Eucharistia quatenus est sacramentum. . . . .	6
CAPUT I. De sacramenti Eucharistiæ existentia et natura. . . . .	<i>ib.</i>
ARTICULUS I. De præsentia reali Christi in Eucharistia. . . . .	7
PROPOSITIO. Sanctissimum Eucharistiæ sacramentum continet vere, realiter et substantialiter corpus et sanguinem, una cum anima et divinitate Domini Nostri Jesu Christi, ac proinde totum Christum. . . . .	9
Argumentum I. Ex verbis Christi promissionem Eucharistiæ respicientibus petitur. . . . .	<i>ib.</i>
Arg. II. Ex verbis institutionis Eucharistiæ petitur. . . . .	12
Arg. III. Ex usu Eucharistiæ desumptum. . . . .	14
Arg. IV. Ex traditione petitur. . . . .	15
Arg. V. Ex præscriptione petitur. . . . .	21
ART. II. De modo præsentiae realis. . . . .	34
§ I. De transsubstantiatione. . . . .	<i>ib.</i>
PROP. Christus est in Eucharistia per transsubstantiationem. . . . .	35
§ II. De natura specierum panis et vini post consecrationem. . . . .	40
§ III. De modo quo Christus est sub speciebus panis et vini. . . . .	44
PROP. Christus est totus sub utraque specie et sub singulis uniuscujusque speciei partibus, saltem separatione facta. . . . .	<i>ib.</i>
§ IV. De duratione præsentiae Christi sub speciebus panis et vini. . . . .	46
PROP. Christus est sub speciebus panis et vini modo permanente. . . . .	47
§ V. De cultu Christo in divina Eucharistia debito. . . . .	50
PROP. Cultus patriæ Christo debetur in Eucharistia. . . . .	<i>ib.</i>
CAP. II. De materia sacramenti Eucharistiæ. . . . .	51
ART. I. De pane eucharistico. . . . .	<i>ib.</i>
PROP. I. Solus panis triticeus adhibendus est ad consecrationem corporis Domini. . . . .	52

PROP. II. Valet consecratio tum in azymo, tum in fermentato, et disciplina utriusque Ecclesiæ retinenda est. . . . .	55
ART. II. De vino eucharistico. . . . .	56
PROP. Solum vinum ex vite est materia consecrationis calicis. . . . .	57
ART. III. De aqua in calice cum vino miscenda. . . . .	59
PROP. Aqua commiscenda est vino in Eucharistia. . . . .	ib.
ART. IV. De modo quo materia debeat esse præsens et determinata. . . . .	62
ART. V. De unione utriusque speciei in consecratione. . . . .	65
PROP. Jure divino prohibetur ne una species sine altera consecretur. . . . .	ib.
CAP. III. De forma Eucharistiæ. . . . .	67
CAP. IV. De Eucharistiæ ministro. . . . .	70
ART. I. De ministro confectionis sacramenti Eucharistiæ. . . . .	ib.
PROP. Soli sacerdotes Eucharistiam valide consecrare possunt. . . . .	71
ART. II. De ministro distributionis Eucharistiæ. . . . .	73
PROP. I. Soli episcopi et presbyteri sunt ministri ordinarii distributionis Eucharistiæ. . . . .	74
PROP. II. Diaconi sunt jure divino ministri extraordinarii distributionis Eucharistiæ. . . . .	75
CAP. V. De sacræ Eucharistiæ subjecto. . . . .	83
ART. I. De iis qui ad sacram Eucharistiam admitti possunt. . . . .	ib.
ART. II. De dispositionibus ad suscipiendam Eucharistiam requisitis. . . . .	86
§ I. De dispositionibus ex parte animæ. . . . .	87
§ II. De dispositionibus ex parte corporis. . . . .	90
CAP. VI. De necessitate Eucharistiæ. . . . .	98
ART. I. An sacra Eucharistia sit ad salutem necessaria ex præcepto divino. . . . .	99
ART. II. An Eucharistia ex præcepto ecclesiastico sit necessaria. . . . .	102
ART. III. An communio sub utraque specie sit necessaria. . . . .	107
PROP. Nullum est præceptum divinum de sacra Eucharistia sub utraque specie sumenda. . . . .	109
ART. IV. De frequenti communione. . . . .	113
PROP. I. Laudabilis et utilis est per se frequens communio. . . . .	114
PROP. II. Ad frequentem communionem non solum necessaria est immunitas a peccato mortali, sed requiritur ut nullus sit affectus ad peccatum veniale, et ardens existat desiderium communicandi. . . . .	115
CAP. VII. De effectibus Eucharistiæ. . . . .	120



## PARS SECUNDA.

	Pag.
De Eucharistia quatenus est sacrificium. . . . .	123
CAP. I. De sacrificiis in genere. . . . .	125
CAP. II. De existentia sacrificii missæ. . . . .	129
PROP. In Eucharistiæ confectione, quæ dicitur Missa, verum Deo offertur sacrificium. . . . .	131
CAP. III. De essentia sacrificii missæ. . . . .	138
ART. I. De re in sacrificio missæ essentialiter offerenda. . . . .	<i>ib.</i>
PROP. Nuda sacrificii crucis repræsentatio ad essentiam sacrificii missæ non sufficit, sed præsentia realis est omnino necessaria. . . . .	139
ART. II. De actione in qua essentia sacrificii consistit. . . . .	141
CAP. IV. De effectibus sacrificii missæ. . . . .	143
ART. I. Quos effectus sacrificium missæ producit. . . . .	<i>ib.</i>
PROP. I. Sacrificium missæ est propitiatorium. . . . .	<i>ib.</i>
PROP. II. Sacrificium missæ est impetratorium. . . . .	144
ART. II. Quomodo sacrificium missæ effectus suos producat. . . . .	145
ART. III. Quis sit valor sacrificii missæ. . . . .	147
CAP. V. De iis pro quibus missæ sacrificium offerri potest. . . . .	148
CAP. VI. De ministro sacrificii missæ. . . . .	152
ART. I. De obligatione quam habent sacerdotes missam celebrandi. . . . .	153
ART. II. De frequenti celebratione missæ. . . . .	154
ART. III. De obligatione applicandi fructum missæ. . . . .	158
ART. IV. De stipendio et obligationibus ex illo nascentibus. . . . .	161
§ I. De origine et legitimitate stipendii pro missa. . . . .	162
§ II. De quantitate stipendii et ejus ad alios transmissione. . . . .	164
§ III. De modo satisfaciendi pro stipendiis acceptis. . . . .	168
§ IV. De missis fundatis et earum reductione. . . . .	176
CAP. VII. De conditionibus ad legitime celebrandum requisitis. . . . .	178
ART. I. De diversis liturgiis. . . . .	<i>ib.</i>
ART. II. De variis liturgiæ nostræ partibus. . . . .	192
ART. III. De variis missarum speciebus. . . . .	222
ART. IV. De loco ubi Missa celebrari potest. . . . .	235
ART. V. De altari et ejus ornamentis. . . . .	258
ART. VI. De vasis sacris et objectis ad ea attinentibus. . . . .	270
ART. VII. De vestibus sacris. . . . .	281
ART. VIII. De rubricis servandis. . . . .	292
§ I. De obligatione rubricarum missam spectantium. . . . .	293
§ II. De modis quibus peccari possit contra rubricas in missa servandas. . . . .	295
§ III. Quædam observationes in cæremonias et ritus missæ privatae. . . . .	301
§ IV. Observationes missam solemnem spectantes. . . . .	307
ART. IX. De defectibus in missa occurrentibus. . . . .	312

	Pag.
ART. X. De hora qua celebrare liceat. . . . .	314
ART. XI. De præparatione et gratiarum actione celebrantis. . . . .	316
ART. XII. De interruptione missæ. . . . .	318

## TRACTATUS DE POENITENTIA.

Definitio Pœnitentiæ. . . . .	321
CAP. I. De existentia sacramenti Pœnitentiæ. . . . .	323
PROP. I. Pœnitentia est verum novæ Legis sacramentum. . . . .	325
PROP. II. Sacramentum Pœnitentiæ habet vim remittendi omnia peccata post Baptismum commissa. . . . .	328
PROP. III. Pœnitentia est sacramentum a baptismo prorsus distinctum. . . . .	333
PROP. IV. Sententia absolutionis non tantum declarat peccata esse remissa, sed ea vere remittit. . . . .	335
CAP. II. De materia sacramenti Pœnitentiæ. . . . .	339
ART. I. De materia remota sacramenti Pœnitentiæ. . . . .	ib.
PROP. I. Omnia peccata mortalia post Baptismum commissa et nondum directe remissa, sunt materia necessaria sacramenti Pœnitentiæ. . . . .	ib.
PROP. II. Peccata venialia sunt materia sacramenti Pœnitentiæ sufficiens, sed non necessaria. . . . .	340
PROP. III. Peccata jam remissa sunt materia sufficiens sacramenti Pœnitentiæ. . . . .	ib.
ART. II. De materia proxima sacramenti Pœnitentiæ. . . . .	342
PROP. Tres actus pœnitentis, contritio, confessio et satisfactio, sunt materia proxima sacramenti Pœnitentiæ. . . . .	343
CAP. III. De contritione. . . . .	345
ART. I. De contritione in genere. . . . .	346
§ I. De necessitate contritionis in genere ad justificationem. . . . .	ib.
PROP. Omni tempore contritio fuit necessaria ad justificationem. . . . .	ib.
§ II. De dotibus seu qualitatibus contritionis. . . . .	348
Sectio I. An contritio debeat esse interna. . . . .	ib.
PROP. Necesse est ad justificationem ut contritio sit interna. . . . .	ib.
Sectio II. An contritio debeat esse supernaturalis. . . . .	349
PROP. Contritio ad justificationem necessaria debet esse supernaturalis, tum ratione principii, tum ratione motivi. . . . .	ib.
Sectio III. An contritio debeat esse universalis. . . . .	350
PROP. Contritio ad justificationem necessaria debet esse universalis quoad peccata mortalia. . . . .	ib.
Sectio IV. An contritio debeat esse summa. . . . .	351
PROP. Contritio ad justificationem necessaria, debet	

esse summa *appretiative*, non vero *intensive*, nec *extensive*. . . . . 352

ART. II. De conditione perfecta. . . . . 355

§ I. An contritio perfecta hominem Deo semper reconciliet ante sacramentum. . . . . 356

PROP. Contritio perfecta hominem semper Deo reconciliat, priusquam sacramentum actu suscipiatur, quamvis sit in gradu infimo. . . . . *ib.*

§ II. An contritio perfecta sit dispositio necessaria ad sacramentum Pœnitentiæ. . . . . 359

PROP. Contritio perfecta, ex se justificans, non necessaria est ad sacramentum Pœnitentiæ. . . . . 360

ART. III. De contritione imperfecta. . . . . *ib.*

§ I. An attritio ex consideratione pœnarum gehennæ concepta sit honesta. . . . . 361

PROP. Attritio ex metu servili gehennæ concepta, honesta est; supernaturalis esse potest, et voluntatem peccandi non includit. . . . . 362

§ II. An attritio ex metu gehennæ concepta, ad justificationem sufficiat cum sacramento Pœnitentiæ. . . . . 365

PROP. Sola attritio, sive ex consideratione turpitudinis peccati, sive ex metu gehennæ concepta, ad justificationem in sacramento Pœnitentiæ obtinendam non sufficit, nisi aliquem contineat amorem Dei, sive spei, sive benevolentiae. . . . . 366

CAP. IV. De confessione. . . . . 370

ART. I. De necessitate confessionis. . . . . *ib.*

PROP. I. Confessio sacramentalis necessaria est jure divino iis qui post Baptisma mortaliter peccaverunt. . . . . 371

PROP. II. Confessio sacramentalis necessaria est jure ecclesiastico. . . . . 383

ART. II. De conditionibus confessionis. . . . . 388

§ I. De integritate confessionis quoad numerum, species et circumstantias. . . . . 389

PROP. Confessio jure divino debet esse integra quoad numerum, species et circumstantias peccatorum, saltem mutantem speciem, quantum pœnitens moraliter potest. . . . . *ib.*

§ II. De causis ab integritate confessionis excusantibus. . . . . 392

PROP. Impotentia tum physica, tum moralis, ab integritate confessionis excusat. . . . . *ib.*

§ III. An peccata dubia sint declaranda. . . . . 194

§ IV. De iteranda confessione peccatorum quæ jam fuerunt declarata. . . . . 397

PROP. Quacumque de causa nulla fuerit confessio, iterum declaranda sunt peccata. . . . . *ib.*

§ V. De confessione generali. . . . . 399

§ VI. De manifestatione complicitis. . . . . 401

	Pag.
§ VII. De confessione scripto et per litteras. . . . .	404
CAP. V. De satisfactione. . . . .	406
ART. I. De necessitate satisfactionis. . . . .	407
PROP. I. Remissa culpa non semper remittitur, sed ordinarie remanet pœna temporalis luenda. . . . .	ib.
PROP. II. Homo pœnam temporalem peccato remisso debitam operibus satisfactoriis redimere potest. . . . .	411
PROP. III. Homo pro pœna temporali satisfacere tenetur. . . . .	412
PROP. IV. Confessarius satisfactionem seu pœnitentiam peccatis proportionatam regulariter imponere tenetur. . . . .	414
ART. II. De quantitate et qualitate pœnitentiæ a confessario injungendæ. . . . .	415
§ I. Præcipui Canones pœnitentiales per ordinem præceptorum Decalogi. . . . .	416
§ II. De pœnitentia nunc injungenda. . . . .	419
§ III. De operibus injungendis. . . . .	422
ART. III. De obligatione acceptandi et adimplendi pœnitentiam a confessario impositam. . . . .	424
PROP. Pœnitens tenetur, sub peccato ex genere suo mortali, acceptare et adimplere pœnitentiam rationabilem et peccatis proportionatam, a confessario sibi impositam. . . . .	ib.
ART. IV. De commutatione pœnitentiæ a confessario injunctæ. . . . .	427
CAP. VI. De forma sacramenti Pœnitentiæ. . . . .	430
ART. I. Quæ sit forma sacramenti Pœnitentiæ. . . . .	ib.
ART. II. An forma deprecatoria sit valida. . . . .	434
PROP. Probabilius est formam pure deprecatoriam ad validitatem sacramenti non sufficere. . . . .	435
CAP. VII. De ministro sacramenti Pœnitentiæ. . . . .	437
ART. I. De charactere in ministro sacramenti Pœnitentiæ requisito. . . . .	ib.
PROP. Solus sacerdos minister est sacramenti Pœnitentiæ. . . . .	438
ART. II. De jurisdictione ministro sacramenti Pœnitentiæ necessaria. . . . .	441
§ I. An jurisdictio sit necessaria ad sacramentum Pœnitentiæ valide administrandum. . . . .	442
PROP. Præter ordinis potestatem, necessaria est jurisdictio in sacerdote ut valide absolvat. . . . .	ib.
§ II. Quinam habeant jurisdictionem ordinariam. . . . .	443
§ III. Quinam habeant jurisdictionem delegatam. . . . .	445
§ IV. An qui ex errore communi pro pastoribus ordinariis vel pro delegatis habentur, valide absolvere possint. . . . .	449
§ V. Quid sit approbatio et an sit necessaria. . . . .	452
§ VI. Quinam a peccatis reservatis absolvere possint. . . . .	456
PROP. I. Summus Pontifex et episcopi jus habent quosdam sibi reservandi casus. . . . .	457
PROP. II. Extra mortis articulum vel probabile ejus periculum, solus superior cui casus reservantur, vel	




	Pag.
ipsius delegati, ab eis valide absolvere possunt. . . .	459
§ VII. Quinam habeant jurisdictionem in articulo mortis. . . .	461
ART. III. De obligationibus confessarii. . . . .	463
§ I. De obligationibus confessarii quæ spectant confessionem. . . .	ib.
<i>Sectio I.</i> De probitate in confessario necessaria. . . .	ib.
<i>Sectio II.</i> De scientia in ministro sacramenti Pœnitentiæ requisita. . . . .	466
<i>Sectio III.</i> De prudentia in confessario requisita. . . .	468
<i>Sectio IV.</i> De obligatione audiendi confessiones. . . .	ib.
<i>Sectio V.</i> De obligatione interrogandi pœnitentes. . . .	470
<i>Sectio VI.</i> De obligatione monendi et erudiendi ignorantes. . . .	475
<i>Sectio VII.</i> De obligatione quam habet confessarius dignos- cendi et procurandi contritionem in pœnitente. . . .	479
§ II. De obligationibus confessarii quæ spectant absolutionem. . . .	480
<i>Sectio I.</i> De generali obligatione confessarii in dando aut differenda absolutione. . . . .	481
<i>Sectio II.</i> De agendi ratione confessarii erga eos qui ad res- tutionem, reparationem injuriæ aut reconciliationem tenentur. . . . .	483
<i>Sectio III.</i> De agendi ratione confessarii erga eos qui ver- santur in occasione peccandi. . . . .	ib.
<i>Sectio IV.</i> De agendi ratione confessarii erga consuetudina- rios et recidivos. . . . .	487
PROP. Peccator pluries absolutus et cum eodem habitu pravo rediens, absolvi non potest extra necessitatem, nisi extraordinaria det signa conversionis. . . . .	488
<i>Sectio V.</i> De agendi ratione confessarii erga eos qui peccata sua negant. . . . .	492
<i>Sectio VI.</i> De agendi ratione confessarii erga moribundos. . . .	593
<i>Sectio VII.</i> De agendi ratione confessarii erga scrupulosos. . . .	497
<i>Sectio VIII.</i> De agendi ratione confessarii erga personas devotas. . . . .	499
<i>Sectio IX.</i> De agendi ratione confessarii erga eos quos male absolvit. . . . .	501
§ III. De obligationibus confessarii quæ spectant sigillum. . . .	502
<i>Sectio I.</i> De obligatione servandi sigillum. . . . .	ib.
PROP. Strictissima est obligatio inviolabiliter servandi sigillum confessionis. . . . .	ib.
<i>Sectio II.</i> De iis quæ sub sigillo cadunt. . . . .	505
<i>Sectio III.</i> De iis qui ad sigillum obligantur. . . . .	507
CAP. VIII. De effectibus sacramenti Pœnitentiæ. . . . .	509
ART. I. An ita deleantur peccata ut per novum peccatum non redeant. . . . .	510
PROP. Peccata semel remissa per lapsum in novum pecca- tum non redeunt simpliciter. . . . .	ib.
ART. II. An merita ante peccatum acquisita, per pœnitentiam	

	Pag.
reviviscant. . . . .	511
PROP. Bona opera per peccatum mortificata, efficacia Pœnitentiæ sacramenti reviviscunt. . . . .	<i>ib.</i>
CAP. IX. De purgatorio. . . . .	513
PROP. Existit purgatorium. . . . .	<i>ib.</i>
CAP. X. De indulgentiis. . . . .	519
ART. I. De potestate Ecclesiæ concedendi indulgentias. . . . .	520
PROP. Existit in Ecclesia potestas concedendi indulgentias. . . . .	<i>ib.</i>
ART. II. De iis qui habent potestatem concedendi indulgentias. . . . .	522
ART. III. De causis ob quas licet concedere indulgentias. . . . .	523
ART. IV. De natura indulgentiæ. . . . .	524
ART. V. De thesauro indulgentiarum. . . . .	<i>ib.</i>
ART. VI. De efficacia indulgentiarum. . . . .	526
ART. VII. De conditionibus ad lucrandas indulgentias requisitis. . . . .	529

## TRACTATUS DE EXTREMA-UNCTIONE.

Definitio. . . . .	533
CAP. I. De existentia Extremæ-Unionis sacramenti. . . . .	<i>ib.</i>
PROP. Extrema-Unctio est sacramentum novæ Legis proprie dictum. . . . .	534
CAP. II. De materia Extremæ-Unionis. . . . .	536
ART. I. De materia remota. . . . .	<i>id.</i>
ART. II. De materia proxima Extremæ-Unionis. . . . .	539
CAP. III. De forma sacramenti Extremæ-Unionis. . . . .	541
CAP. IV. De ministro Extremæ-Unionis. . . . .	543
CAP. V. De Extremæ-Unionis effectibus. . . . .	545
CAP. VI. De Extremæ-Unionis necessitate. . . . .	547
CAP. VII. De subjecto Extremæ-Unionis. . . . .	550
ART. I. De iis quibus administrari potest Extrema-Unctio. . . . .	<i>ib.</i>
ART. II. De dispositionibus ad suscipiendam Extremam-Unionem requisitis. . . . .	<i>ib.</i>
ART. III. De iis quibus neganda est Extrema-Unctio. . . . .	552
ART. IV. De ordine inter S. Viaticum et Extremam-Unionem. . . . .	554
ART. V. De sepultura ecclesiastica. . . . .	555
CAP. VIII. De ritibus sacramenti Extremæ-Unionis. . . . .	558



## Date Due

[illegible]





The borrower is responsible for books drawn on his card and for all fines accruing on the same.

If you cannot find what you want, ask the Librarian who will be glad to help you.

overtime.

Two cents a day is charged for each book kept

renewed for the same period, unless reserved. Books may be kept for two weeks and may be

CHESTNUT HILL, MASS.

UNIVERSITY HEIGHTS

BOSTON COLLEGE LIBRARY

62579

BOSTON COLLEGE



